





exhibi ~~to the~~ ~~original~~ ~~manuscript~~  
173


R. Med. To. I p 321 n. 1 [9]

5-9-A. 11-

XXIV. 1-5

T. 10.

M. TVLLII CICERONIS  
ORATIONVM  
PARS II



CORRIGENTE PAVLO MANVTIO,  
ALDI FILIO.

VENETIIS, M. D. XLVI.

THE NEW YORK PUBLIC LIBRARY

ASTEN LENOX TILDEN FOUNDATION

1892



NEW YORK PUBLIC LIBRARY

ASTEN LENOX TILDEN FOUNDATION

1892

GVLIELMO BELLAIO LANGEO,  
APVD SVBALPINAS GEN-  
TES PRO REGE, PAV-  
LVS MANVTIVS,  
ALDI FILIVS,



D.

AGNI refert , Bellai ornatissime ,  
quo quidque tempore agatur ; & ad  
omnes res non paruum habere mo-  
mentum solet occasio quædam, & com-  
moditas , qua uti dicuntur ij , qui ni-  
hil , nisi loco , facere consueuerunt . nam quemadmo-  
dum pictorum tabulæ certo loco positæ delectant ; eæ-  
demq; minus bono lumine constitutæ , non item eorum ,  
qui spectant , oculos tenere solent : sic actiones nostræ ,  
mirum est , quantum opportunitate commenduntur :  
ut interdum plus in tempore , quàm in ipsa re positum  
esse uideatur . quod ego cum semper iudicassem , ta-  
men non sum ueritus , quin tibi in ijs rebus uel maxi-  
me occupato , quas rex Christianissimus , & post ho-  
minum memoriam maximus tuæ fidei , diligentiaeq;  
mandauit , hoc ipsum , quod nunc à me proficiscitur ,  
officium futurum esset uel iucundissimum . nam etsi  
magna tibi est grauissimorū negotiorum imposita mo-  
les , quam tu summa tua cum laude , & omnium pe-  
ne gentium admiratione sustines : tamen in ipsa illa oc-  
cupatione ita te literarum tractatio delectat , ut et legas  
cum uoluptate , quæ alij scripta reliquerunt , & scri-  
bas ipse quæ à posteris cum admiratione legentur . ex

quo illud consequeris ; ut non modo regis uoluntati seruias, quod est summa laude dignum ; sed etiam posteritati consulas, quo laudabilius esse nihil potest . itaque tantum abest ; ut à maioribus tuis omni decore affluantibus ad te ornandum quidquā haurias, ut etiam in te sit, quod ad illos redundet . nam si tibi aliunde petenda sit laus, unde plura suppetant ornamenta, quàm à fratribus tuis, maximeq; ab eo, qui à Paulo III . ita est in cardinalium collegium cooptatus, ut ei summus pontifex amplissimam dignitatem non quasi optatam concessisse, sed quasi debitam persoluisse uideatur ? cui quidem uiro cum ad summam gloriam nihil desit ; cumq; item tibi eæ res abunde adsint, quibus homines hominibus antecellere uidentur : tamen fit uestra bonitate, & sapientia, ut uicissim & tu in illius dignitate, atque amplitudine, & ille in ingenio, atque in uirtute conquiescat tua . uterque uero magna apud regem prudentissimum, & summo iudicio præditum auctoritate, magno estis apud omnes nomine & gloria . nam tu quidem, quis est tam longinquus, cui notissimus non sis ? non ex præsentis corporis forma, ( quanquam multas prouincias regis legatus obisti ) sed ex imagine ingenij tui, quam uerissimis eloquentiæ coloribus expressam in tuis scriptis licet intueri . in hac cum & naturæ tuæ bonitas, & uirtutis eximia præstantia cernatur : sequitur, ut, ex ea quite norunt, iidem ament . quorum ego in numero cum ita essem, ut nemini concederem : tamen non est credibile, quantum ad illam ipsam animi erga te mei uoluntatem addiderit Gulielmi Pellicerij, oratoris in hac



urberegij, hominis præstâtissimi, prædicatio. cuius mul-  
ti, & egregij de tua laude sermones me iam antea com-  
motum impulerunt, ut ex orationibus Ciceronis, cuius  
tu libros è manibus dimittere non soles, alteram par-  
tem cum tui nominis inscriptione diuulgarem. quæ in  
parte ab erroribus, & mendis vindicanda quantum  
operæ studiûq; posuerim, mihi ipse sum testis; quantum  
autem profecerim, & tu, & alij indicabunt. tibi qui-  
dem, si consequar, ut nostra diligentia probetur: sane  
meos labores non exiguo compensatos esse fructu existi-  
mabo. Vale. Venetijs.



INDEX ORATIONVM CICERONIS,  
QVAE SECVNDO VOLVME  
CONTINENTVR.

Pro lege Manilia ad populum, oratio XIII.	pagina 1
Pro A. Cluentio Habito, oratio XIII.	13
De lege agraria contra P. Seruilium Rullum trib. pl. in senatu, oratio XV.	61
De lege agraria contra Rullum trib. pl. ad populum, oratio XVI.	66
De lege agraria contra Rullum trib. pl. ad populum, oratio XVII.	73
Pro C. Rabirio perduellionis reo ad Quirites, oratio XVIII.	92
In L. Catilinam in senatu, oratio XIX.	99
In L. Catilinam ad Quirites, oratio XX.	107
In L. Catilinam ad Quirites, oratio XXI.	114
In L. Catilinam in senatu, oratio XXII.	121
Pro L. Murena, oratio XXIII.	127
Pro L. Flacco, oratio XXIII.	131
Pro P. Sylla, oratio XXV.	173
Pro A. Licinio Archia poeta, oratio XXVI.	194
Ad equites R. antequam iret in exiliũ, oratio, quam tamen Ciceronis non esse, manifestum est.	201
Ad Quirites post reditum suũ, oratio XXVIII.	207
Post reditum in senatu, oratio XXIX.	213
Pro domo sua ad pontifices, oratio XXX	223
De aruspicum responsis, in senatu, oratio XXXI.	255
Pro Cn. Plancio, oratio XXXII.	272



VANQVAM mihi semper  
 per frequens conspectus uester  
 multo iucundissimus, hic au-  
 tem locus ad agendum amplis-  
 simus, ad dicendum ornatiss-  
 simus est uisus Quirites: ta-  
 men hoc aditū laudis, qui sem-  
 per optimo cuique maxime patuit, non mea me uolun-  
 tas, sed mea uitæ rationes ab incunte ætate susceptæ  
 prohibuerunt. nam cum antea per ætatē non dum hu-  
 ius auctoritatem loci contingere auderem; statueremq;  
 nihil huc, nisi perfectum ingenio, elaboratum indu-  
 stria, afferri oportere: omne meum tempus amicorum  
 temporibus transmittendum putavi. ita neque hic lo-  
 cus uacuus unquam ab ijs, qui uestram causam defen-  
 derent, & meus labor in priuatorum periculis caste in-  
 tegre; uersatus, ex uestro iudicio fructum est amplis-  
 simum consecutus. nam cum propter dilationem comi-  
 tiorum ter prætor primus centurijs cunctis renunciatus  
 sum, facile intellexi Quirites, & quid de me iudica-  
 retis, & quid alijs præscriberetis. nam cum & aucto-  
 ritatis in me tantum sit, quantum uos honoribus man-  
 dandum esse uoluistis; & ad agendum facultatis tan-  
 tum, quantum homini uigilanti ex forensi usu prope  
 quotidiana dicendi exercitatio potuit afferre: certe, &

si quid etiam dicendo consequi possum, ijs ostendam  
 potissimum, qui ei quoque rei fructum suo iudicio  
 tribuendum esse censuerunt. atque illud in primis mi-  
 hi letandum iure uideo, quod in hac insolita mihi ex  
 hoc loco ratione dicendi, causa talis oblata est, in qua or-  
 ratio nemini deesse potest: dicendum est enim de Cn.  
 Pompeij singulari eximiaq; uirtute: huius autem ora-  
 tionis difficilius est exitum, quam principium, inue-  
 nire: itaque non mihi tam copia, quam modus in di-  
 cendo querendus est. Atque ut inde oratio mea pro-  
 ficiscatur, unde haec omnis causa ducitur: bellum gra-  
 ue, & periculosum uestris uectigalibus, atque socijs  
 à duobus potentissimis regibus infertur, Mithrida-  
 te, & Tigraue: quorum alter relictus, alter laceffi-  
 tus, occasionem sibi ad occupandam Asiam oblatam  
 esse arbitratur. equitibus R. honestissimis uiris, affe-  
 runtur ex Asia quotidie literae, quorum magnae res a-  
 guntur, in uestris uectigalibus exercendis occupa-  
 ta: qui ad me, pro necessitudine, quae mihi est cum  
 illo ordine, causam reip. periculaq; rerum suarum  
 detulerunt: Bithyniae, quae nunc uestra prouincia est,  
 uicos exustos esse complures: regnum Ariobarzanis,  
 quod finitimum est uestris uectigalibus, totum esse in  
 hostium potestate: Lucillum magnis rebus gestis ab eo  
 bello discedere: huic qui succurrerit; non satis esse  
 paratum ad tantum bellum administrandum: u-  
 num ab omnibus socijs, & ciuibus ad id bellum  
 imperatorem deposci, atque expeti: eundem hunc  
 unum ab hostibus metui, praeterea neminem. Cau-  
 sa quae sit, uidetis: nunc, quid agendum sit, consi-

derate. Primum mihi uidetur de genere belli, deinde de magnitudine, tum de imperatore deligendo esse dicendum. genus est enim eiusmodi, quod maxime uestros animos excitare, atque inflammare debet: in quo agitur populi R. gloria, quæ uobis à maioribus cum magna in rebus omnibus, tum summa in re militari tradita est: agitur salus sociorum atque amicorum, pro qua multa maiores uestri magna et grauius bella gesserunt: aguntur certissima populi R. uectigalia, & maxima, quibus amissis, & pacis ornamenta, & subsidia belli frustra requiretis: aguntur bona multorum ciuium, quibus est & à uobis, & ab imperatoribus reip. consulendum. & quoniam semper appetentes gloriæ, præter ceteras gentes, atque auidi laudis fuistis, delenda est uobis illa macula Mithridatico bello superiore suscepta, quæ penitus iam insedit, atque inueterauit in populi R. nomine, quod is, qui una die tota Asia, tot in ciuitatibus, uno nuncio, atque una literarum significatione ciues R. necandos, trucidandosq; denotauit, non modo adhuc poenam nullam suo dignam scelere suscepit, sed ab illo tempore annum iam tertium & uigesimalium regnat, & ita regnat, ut se non Ponto, neque Cappadociæ latebris occultare uelit, sed emergere è patrio regno, atque in uestris uectigalibus, hoc est in Asiæ luce uersari. etenim adhuc ita uestri cum illo rege contenderunt imperatores, ut ab illo insignia uictoriæ, non uictoriam reportarent. triumphauit L. Sylla, triumphauit L. Muræna de Mithridate, duo fortissimi uiri, & summi imperatores; sed ita triumpharunt, ut ille pulsus, superatusq; regnaret. ueruntamen illis impe-

ratoribus laus est tribuenda, quòd egerunt; uenia dan-  
 da, quòd reliquerunt; propterea quòd ab eo bello Syl-  
 lam in Italiam resp. Murenā Sylla reuocauit. Mi-  
 thridates autem omne reliquum tempus nō ad obliuio-  
 nem ueteris belli, sed ad comparationem noui contulit.  
 qui posteaquam maximas ædificasset ornassetq; classes,  
 exercitusq; permagnos, quibuscūque ex gentibus potuis-  
 set, comparasset, Bosporanis finitimis suis bellum inferre  
 simulasset; usque in Hispaniā legatos & literas misit  
 ad eos duces, quibuscum tum bellum gerebamus: ut,  
 cum duobus in locis disiunctissimis, maximeq; diuersis,  
 uno cōsilio, ab unis hostium copijs, bellum terra, mariq;  
 gereretur, uos ancipiti contentione distracti de imperio  
 dimicaretis. sed tamen alterius partis periculum Serto-  
 rianæ atque Hispaniensis, quæ multo plus firmamenti  
 ac roboris habebat, Cn. Pompeij diuino consilio, ac sin-  
 gulari uirtute depulsum est: in altera parte ita res à L.  
 Lucullo, summo uiro, est administrata, ut initia illa ge-  
 starum rerum magna atque præclara nō felicitati eius,  
 sed uirtuti, hæc autem extrema, quæ nuper acciderunt,  
 non culpæ, sed fortunæ tribuenda esse uideantur. sed  
 de Lucullo dicam alio loco, & ita dicam Quirites, ut  
 neque uera laus ei detracta oratione nostra, neque falsa  
 afficta esse uideatur. sed pro uestri imperij dignita-  
 te atque gloria, quoniam is est exorsus orationis meæ,  
 uidete, quem uobis animum suscipiendum putetis. ma-  
 iores uestri sæpe, mercatoribus ac nauiculatoribus iniu-  
 riosius tractatis, bella gesserunt: uos, tot ciuium R.  
 millibus uno nuncio atque uno tempore necatis, quo  
 tandem animo esse debetis? legati quòd erāt appellati su-



perbius, Corinthum patres uestri, totius Græciæ lumen, extinctum esse uoluerunt : uos eum regem inultum esse patiimini, qui legatum populi R. consularem, uinculis, ac uerberibus, atque omni supplicio excruciatum necauit ? illi libertatem ciuium R. imminutam non tulerunt : uos uitam ereptam negligetis ? ius legationis uerbo uiolatum illi persecuti sunt : uos legatum populi R. omni supplicio interfectum, inultum relinquetis ? uide te, ne, ut illis pulcherrimum fuit, tantam uobis imperij gloriam relinquere, sic uobis turpissimum sit, illud, quod accepistis, tueri & conseruare non posse. Quid, quod salus sociorum summum in periculum ac discrimen uocatur ? regno. expulsus est Ariobarzanes rex, socius populi R. atque amicus : imminet duo reges toti Asiæ non solum uobis inimicissimi, sed etiam uestris socijs atque amicis : ciuitates autem omnes cuncta Asia, atque Græcia uestrum auxilium expectare propter periculi magnitudinem coguntur : imperatorem à uobis certum deposcere, cum præsertim uos alium miseritis, neque audent, neque se id facere summo sine periculo posse arbitrantur : uident, & sentiunt hoc idem, quod et uos, unum uirum esse, in quo summa sint omnia, & eum prope esse, quo etiam carent ægrius : cuius aduentu ipso, atque nomine, tametsi ille ad maritimum bellum uenerit, tamen impetus hostium repressos esse intelligunt, ac retardatos. hi uos, quoniam libere loqui non licet, tacite rogant, ut se quoque, sicut cæterarum prouinciarum socios, dignos existimetis, quorum salutem tali uiro commendetis : atque hoc etiam magis

quàm ceteros, quòd eiusmodi in provinciam homines cum imperio mittimus, ut, etiam si ab hoste defendant, tamen ipsorum aduentus in urbes sociorum non multum ab hostili expugnatione differant. hunc audiebant antea, nunc præsentem vident, tanta temperantia, tanta mansuetudine, tanta humanitate, ut ij beatissimi esse videantur, apud quos ille diutissime comoratur. quare si propter socios nulla ipsi iniuria læcessiti maiores uestri cum Antiocho, cum Aetolis, cum Poenis bella gesserunt: quanto vos studio convenit, iniurijs prouocatos, sociorum salutem una cum imperij uestri dignitate defendere, præsertim cum de uestris maximis uectigalibus agatur? nam cæterarum prouinciarum uectigalia Quirites tanta sunt, ut his ad ipsas provincias tutandas uix contenti esse possimus. Asia uero tam opima est, & fertilis, ut & ubertate agrorum, & uarietate fructuum, & magnitudine passionis, & multitudine earum rerum, quæ exportantur, facile omnibus terris antecellat. itaque hæc uobis prouincia Quirites, si & belli utilitatem, & pacis dignitatem sustinere uultis, non modo à calamitate, sed etiam à metu calamitatis est defendenda. nam cæteris in rebus, cum uenit calamitas, tum detrimentum accipitur: at in uectigalibus non solum aduentus mali, sed etiam metus ipse affert calamitatem. nam cum hostium copiae non longe absunt, etiam si irruptio facta nulla sit, tamen pecora relinquuntur, agricultura deseritur, mercatorum nauigatio conquiescit. ita neque ex portu, neque ex decumis, neque ex scriptu-



ra uectigal conseruari potest : quare sæpe totius anni  
 fructus uno rumore periculi , atque uno belli terro-  
 re amittitur . quo tandem animo esse existimatis aut  
 eos , qui uectigalia uobis pensitant ; aut eos , qui  
 exercent , atque exigunt ; cum duo reges cum ma-  
 ximis copijs prope adsint ? cum una excursio equi-  
 tatus perbreui tempore totius anni uectigal auferre  
 possit ? cum publicani familias maximas , quas in  
 salinis habent , quas in agris , quas in portubus atque  
 custodijs , magno periculo se habere arbitrentur ? pu-  
 tatisne , uos illis rebus frui posse , nisi eos , qui uobis  
 fructuosi sunt , conseruaueritis , non solum , ut antea  
 dixi , calamitate , sed etiam calamitatis formidine libe-  
 ratos ? ac ne illud quidem uobis negligendum est , quod  
 mihi ego extremum proposueram , cum essem de belli  
 genere dicturus , quod ad multorum bona ciuium R.  
 pertinet , quorum uobis pro uestra sapientia Quirites  
 habenda est ratio diligenter . nam & publicani , homi-  
 nes & honestissimi , & ornatissimi , suas rationes , &  
 copias in illam prouinciã contulerunt : quorum ipso-  
 rum per se res , & fortunæ curæ uobis esse debent .  
 etenim si uectigalia neruos esse reip. semper duximus ,  
 cum certe ordinem ; qui exercet illa , firmamentum cæ-  
 terorum ordinum recte esse dicemus . deinde cæteris ex  
 ordinibus homines nauis et industrij partim in Asia ne-  
 gotiantur , quibus uos absentibus consulere debetis :  
 partim suas & suorum in ea prouincia pecunias ma-  
 gnas collocatas habent . erit igitur humanitatis uestræ ,  
 magnum eorum ciuium numerum calamitate prohibe-

bere; sapientiæ, uidere, multorum ciuium calamita-  
 tem à rep. seiunctam esse non posse. etenim illud pri-  
 mum parui refert, uos publicanis amissa uectigalia  
 postea uictoria recuperare. neque enim iisdem redimen-  
 di facultas erit, propter calamitatem; neque alijs uolun-  
 tas, propter timorem. deinde, quod nos eadem Asia  
 atque idem iste Mithridates initio belli Asiatici docuit;  
 id quidem certe calamitate docti memoria retinere de-  
 bemus. nam tum, cum in Asia res magnas permulti  
 amiserunt, scimus Romæ, solutione impedita, fidem con-  
 cidisse. non enim possunt una in ciuitate multirem at-  
 que fortunas amittere, ut non plures secum in eandem  
 calamitatem trahant. à quo periculo prohibete rep.  
 & mihi credite id, quod ipsi uidetis: hæc fides, atque  
 hæc ratio pecuniarum, quæ Romæ, quæ in foro uer-  
 satur, implicita est cum illis pecunijs Asiaticis, & co-  
 heret. ruere illa non possunt, ut hæc non eodem labe-  
 factata motu concidant. quare uidete, num dubitan-  
 dum uobis sit, omni studio ad id bellum incumbere, in  
 quo gloria nominis uestri, salus sociorum, uectigalia  
 maxima, fortunæ plurimorum ciutum cum rep. defen-  
 duntur. Quoniam de genere belli dixi, nunc de ma-  
 gnitudine pauca dicam. potest enim hoc dici; belli ge-  
 nus esse ita necessarium, ut sit gerendum; non esse  
 ita magnum, ut sit pertimescendum. in quo maxime  
 me laborandum est, ne forte à uobis, quæ diligentissi-  
 me prouidenda sunt, contempta esse uideantur. At-  
 que ut omnes intelligant me L. Lucullo tantum imper-  
 tiri laudis, quantum forti uiro, & sapientissimo ho-

mini, & magno imperatori debeat: dico, eius ad-  
uentu maximas Mithridatis copias, omnibus rebus or-  
natas atque instructas, esse deletas; urbemq; Asiæ cla-  
rissimam, nobisq; amicissimam, Cyzicenorum, ob-  
sessam ab ipso rege maxima multitudine, & oppu-  
gnatam uehementissime, L. Luculli uirtute, assidui-  
tate, consilio, summis obsidionis periculis liberatam:  
ab eodem imperatore classem magnam, & ornata-  
m, quæ ducibus Sertorianis ad Italiam studio inflamma-  
to raperetur, superatam esse, atque depressam: ma-  
gnas hostium præterea copias multis præliis esse dele-  
tas: patefactumq; nostris legionibus esse Pontum, qui  
ante populo R. ex omni aditu clausus esset: Sinopem  
atque Amisum, quibus in oppidis erant domicilia re-  
gis, omnibus rebus ornata atque referta, ceterasq;  
urbes Ponti, & Cappadociæ permultas uno aditu, at-  
que aduentu esse captas: regem spoliatum regno pa-  
trio atque auito, ad alios se reges atque alias gentes  
supplicem contulisse: atque hæc omnia, salutis populi  
R. socijs atque integris uectigalibus, esse gesta. Satis  
opinor hoc esse laudis: atque ita reputo, ut hoc uos in-  
telligatis, à nullo istorum, qui huic obtrectant legi at-  
que causæ, L. Lucillum similiter ex hoc loco esse lau-  
datum. Requiretur fortasse nunc, quemadmodum,  
cum hæc ita sint, reliquum possit esse magnum bel-  
lum. cognoscite Quirites: non enim sine causa quæri  
uidetur. Primum, ex suo regno sic Mithridates pro-  
fugit, ut ex eodem Ponto Medea illa quondam profu-  
gisse dicitur: quam prædicant in fuga fratris sui

membra in ijs locis, qua se parens persequeretur, dis-  
 sipauisse, ut eorum collectio dispersa, mœrorq; patriæ  
 celeritatem persequendi retardaret. sic Mithridates fu-  
 giens, maximam uim auri atque argenti, pulcherri-  
 marumq; rerum omnium, quas & à maioribus acce-  
 perat, & ipse bello superiore ex tota Asia direptas in  
 suum regnum congefferat, in Ponto omnem reliquit.  
 hæc dum nostri colligunt omnia diligentius, rex ipse  
 è manibus effugit. ita illum in persequendi studio mœ-  
 ror, hos lætitia tardauit. hunc in illo timore & fuga  
 Tigranes rex Armenius excepit, diffidentemq; rebus  
 suis confirmauit, & afflictum erexit, perditumq; re-  
 creauit. cuius in regnum posteaquam L. Lucullus  
 cum exercitu uenit, plures etiam gentes contra impe-  
 ratorem nostrum concitate sunt: erat enim metus in-  
 iectus ijs nationibus, quas nunquam populus R. ne-  
 que laceffendas bello, neque tentandas putauit: erat  
 etiam alia grauis atque uehemens opinio, quæ per ani-  
 mos gentium barbararum peruaserat, fani locuple-  
 tissimi & religiosissimi diripiendi causa in eas oras no-  
 strum exercitum esse adductum. ita nationes multæ  
 atque magnæ nouo quodam terrore ac metu concia-  
 tabantur. noster autem exercitus, etsi urbem ex Ti-  
 granis regno ceperat, & prælijs usus erat secundis,  
 tamen nimia longinquitate locorum, ac desiderio suo-  
 rum commouebatur. hic iam plura non dicam.  
 fuit enim illud extremum, ut ex ijs locis à mili-  
 tibus nostris reditus magis maturus, quàm proces-  
 sus longior, quæreretur. Mithridates autem & suam  
 manum



manum iam confirmarat, & eorum, qui se ex eius regno collegerant, & magnis aduentitijs multorum regum, & nationum copijs iuuabatur. hoc iam fere sic fieri solere accepimus, ut regum afflictae fortunae facile multorum opes alliciant ad misericordiam, maximeq; eorum, qui aut reges sunt, aut uiuunt in regno, quod regale ijs nomen magnum & sanctum esse uideatur: itaque tantum uictus efficere potuit, quantum incolumis nunquam est ausus optare. nam cum se in regnum recepisset suum, non fuit eo contentus, quod ei praeter spem acciderat, ut illam, posteaquam pulsus erat, terram unquam attingeret, sed in exercitum uestrum clarum atque uictorem impetum fecit. sinite hoc loco Quirites (sicut poetae solent, qui res Romanas scribunt) praeterire me uestram calamitatem; quae tanta fuit, ut eam ad aures L. Luculli non ex praelio nuncius, sed ex sermone rumor afferret. hic in ipso illo malo, grauissimaq; belli offensione L. Lucullus, qui tamen aliqua ex parte ijs incommodis mederi fortasse potuisset, uestro iussu coactus, quod imperij diuturnitati modum statuendum ueteri exemplo putauistis, partem militum, qui iam stipendijs confectis erant, dimisit, partem Glabrioni tradidit. multa praetereo consulto, sed ea uos coniectura perspicitis, quantum illud bellum futurum putetis, quod coniungant reges potentissimi, renovent agitatae nationes, suscipiant integrae gentes, nouus imperator uester accipiat uetere expulso exercitu. Satis mihi multa uerba fecisse uideor, quare hoc bellum esset genere ipso necessarium, magnitudine periculosum. restat, ut de imperatore ad id bellum deligen-

do, ac tantis rebus præficiendo dicendum esse uideatur. utinam Quirites uiro-  
rum fortium atque innocentium  
copiam tantam haberetis, ut hæc uobis deliberatio dif-  
ficilis esset, quemnam potissimum tantis rebus, ac tan-  
to bello præficiendum putaretis. nunc uero, cum sit  
unus Cn. Pompeius, qui non modo eorum hominum,  
qui nunc sunt, gloriam, sed etiam antiquitatis me-  
moriam uirtute superarit: quæ res est, quæ cuiusquam  
animum in hac causa dubium facere possit? ego enim  
sic existimo, in summo imperatore quatuor has res in-  
esse oportere, scientiam rei militaris, uirtutem, aucto-  
ritatem, felicitatem. quis igitur hoc homine scientior  
unquam aut fuit, aut esse debuit? qui è ludo atque  
pueritiæ disciplina, bello maximo, atque acerrimis ho-  
stibus, ad patris exercitum, atque in militiæ discipli-  
nam profectus est: qui extrema pueritia miles fuit  
summi imperatoris, ineunte adolescentia maximus ipse  
exercitus imperator: qui sæpius cum hoste confligit,  
quàm quisquam cum inimico concertauit: plura bella  
gessit, quàm ceteri legerunt: plures prouincias con-  
fecit, quàm alij concupiuerunt: cuius adolescentia ad  
scientiam rei militaris non alienis præceptis, sed suis im-  
perijs; non offensionibus belli, sed uictorijs; non stipen-  
dijs, sed triumphis est traducta. quod denique genus  
belli esse potest, in quo illum non exercuerit fortuna  
reip.? Ciuile, Africanum, Transalpinum, Hispanien-  
se, mistum ex ciuitatibus, atque ex bellicosissimis natio-  
nibus, seruale, nauale, uaria & diuersa genera, &  
bellorum, & hostium non solum gesta ab hoc uno, sed  
etiam confecta, nullam rem esse declarant in usu mili-

tari positam, quæ huius uiri scientiam fugere possit. Iam uero uirtuti Cn. Pompeij quæ potest par oratio inueniri? quid est, quod quisquam aut dignum illo, aut uobis nouum, aut cuiquam inauditum possit asserere? non enim illæ sunt solæ uirtutes imperatoriæ, quæ uulgo existimantur, labor in negotijs, fortitudo in periculis, industria in agendo, celeritas in conficiendo, consilium in prouidendo: quæ tanta sunt in hoc uno, quanta in omnibus reliquis imperatoribus, quos aut uidimus, aut audiuius, non fuerunt. testis est Italia, quam ille uictor L. Sylla huius uirtute, & consilio confessus est liberatam. testis est Sicilia, quam multis undique cinctam periculis, non terrore belli, sed celeritate consilij explicauit. testis est Africa, quæ magnis oppressa hostium copijs, eorum ipsorum sanguine redundauit. testis est Gallia, per quam legionibus nostris in Hispaniam iter, Gallorum internecione, patefactum est. testis est Hispania, quæ sæpissime plurimos hostes ab hoc superatos prostratosq; conspexit. testis est iterum, et sæpius Italia, quæ cum seruili bello tetro periculo soq; premeretur, ab hoc auxilium absente expetiuit: quod bellum expectatione Pompeij attenuatū atque imminutū est, aduentu sublatum ac sepultum. testes uero iam omnes oræ, atque omnes exteræ gentes, ac nationes: denique maria omnia, tum uniuersa, tum in singulis oris omnes sinus atque portus. quis enim toto mari locus per hos annos aut tam firmum habuit præsidium, ut tutus esset; aut tam fuit abditus, ut lateret? quis nauigauit, qui non se aut mortis, aut seruitutis periculo committeret? cum aut hieme, aut referto prædonū mari nauis



garetur . hoc tantum bellum , tam turpe , tam uetus ,  
 tam late diuisum atque dispersum quis unquam arbi-  
 traretur , aut ab omnibus imperatoribus uno anno , aut  
 omnibus annis ab uno imperatore confici posse ? quam  
 prouinciam tenuistis à prædonibus liberam per hosce  
 annos ? quod uectigal uobis tutum fuit ? quem socium  
 defendistis ? cui præsidio classibus uestris fuistis ? quàm  
 multas existimatis insulas esse desertas ? quàm multas  
 aut metu relietas , aut à prædonibus captas urbes esse  
 sociorum ? sed quid ego longinqua commemoro ? fuit  
 hoc quondam , fuit proprium populi R. longe à domo  
 bellare , & propugnaculis imperij sociorum fortunas ,  
 non sua tecta defendere . socijs uestris ego mare clau-  
 sum per hosce annos dicam fuisse ; cum exercitus nostri  
 Brundusio nunquam nisi summa hieme transmiserint ?  
 quid , ad nos cum ab exteris nationibus uenirent , captos  
 querar , cum legati populi R. redempti sint ? mercato-  
 ribus tutum mare non fuisse dicam ; cum duodecim  
 secures in prædonum potestatem peruenerint ? quid aut  
 Colophonem , aut Samum , nobilissimas urbes , innu-  
 merabilesq; alias captas esse cōmemorem ; cum uestros  
 portus , atque eos portus , quibus uitam , & spiritum  
 ducitis , in prædonum fuisse potestatem sciatis ? an ue-  
 ro ignoratis portum Caietæ celeberrimum atque plenif-  
 simum nauium , inspectante prætore à prædonibus es-  
 se direptum ? ex Miseno autem , eius ipsius liberos , qui  
 cum prædonibus antea ibi bellum gesserat , à prædoni-  
 bus esse sublatos ? nam quid ego Hostiense incōmodum ,  
 atque illam labem , atque ignominiam reip. querar ,  
 cum , prope inspectantibus uobis , classis ea , cui Consul

populi R. præpositus esset, à prædonibus capta, atque oppressa est? Prò dij immortales, tantam ne unius hominis incredibilis ac diuina uirtus, tam breui tempore, lucem afferre reip. potuit, ut uos, qui modo ante ostium Tiberinum classem hostium uidebatis, ij nunc nullam intra oceani ostium prædonum nauem esse audiat? atque hæc qua celeritate gesta sint, quanquam uidetis, tamen à me in dicendo prætereunda non sunt. quis enim unquam aut obeundi negotij, aut consequendi quæstus studio, tam breui tempore, tot loca adire, tantos cursus conficere potuit, quàm celeriter Cn. Pompeio duce belli impetus nauigauit? qui Sicilia adiit, Africam explorauit, inde Sardiniam cum classe uenit, nondum tempestiuo ad nauigandum mari: atque hæc tria frumentaria subsidia reip. firmissimis præsidijs, classibusq; muniuit. inde secum in Italiam recepisset, duabus Hispanijs, & Gallia cisalpina præsidijs, ac nauibus confirmata, missis item in oram Illyrici maris, & in Achaïam, omnemq; Græciam nauibus, Italia duo maria maximis classibus, firmissimisq; præsidijs adornauit: ipse autem, ut à Brundusio profectus est, unde quinquagesimo die totam ad imperiū populi R. Ciliciam adiunxit: omnes, qui ubique prædones fuerunt, partim capti, interfectiq; sunt, partim unius huius imperio, ac potestati se dederunt. idem Creteribus, cum ad eum usque in Pamphyliam legatos deprecatoresq; misissent, spem deditiois non ademit, obsidesq; imperauit. ita tantum bellum, tam diuturnum, tam longe lateq; dispersum, quo bello omnes gentes, ac nationes premebantur, Cn. Pompeius extrema

hieme apparauit, ineunte uere suscepit, media æstate confecit. Est hæc diuina atque incredibilis uirtus imperatoris. quid ceteræ, quas paulo ante commemorare coeperam, quantæ, atque quàm multæ sunt? non enim solum bellandi uirtus in summo atque perfectò imperatore quærenda est, sed multæ sunt artes eximiæ, huius administræ comitesq; uirtutis. Ac primum, quanta innocentia debent esse imperatores? quanta deinde omnibus in rebus temperantia? quanta fide? quanta facilitate? quanto ingenio? quanta humanitate? quæ breuiter, qualia sint in Cn. Pompeio, consideremus: summa enim omnia sunt Quirites, sed ea magis ex aliorum contentione, quàm ipsa per sese, cognosci atque intelligi possunt. Quem enim possumus imperatorem aliquo in numero putare, cuius in exercitu ueneant centuriatus atque uenierint? quid hunc hominem magnum, aut amplum de rep. cogitare, qui pecuniam ex ærario depromptam ad bellum administrandum, aut propter cupiditatem prouinciæ magistratibus diuiserit, aut propter auaritiam Romæ in quæstu reliquerit? uestra admurmuratio facit Quirites, ut agnoscere uideamini, qui hæc fecerint. ego autem neminem nomino. quare irasci mihi nemo poterit, nisi qui ante de se uoluerit confiteri. itaque propter hanc auaritiam imperatorum quantas calamitates, quocunque uentum sit, nostri exercitus ferant, quis ignorat? itinera, quæ per hosce annos in Italia per agros atque oppida ciuium R. nostri imperatores fecerunt, recordamini: tum facilius statuetis, quid apud exterarum nationum fieri existimetis. utrum, plures arbitramini per hosce annos



militum uestrorum armis hostium urbes, an hiber-  
 nis, sociorum ciuitates esse deletas? neque enim potest  
 exercitum is continere imperator, qui se ipsum non  
 continet; neque seuerus esse in iudicando, qui alios in se  
 seueros esse iudices non uult. hic miramur hunc homi-  
 nem tantum excellere ceteris, cuius legiones sic in A-  
 siam peruenerunt, ut non modo manus tanti exer-  
 citus, sed ne uestigium quidem cuiquam pacato no-  
 uisse dicatur? iam uero, quemadmodum milites hi-  
 bernent, quotidie sermones ac literæ perferuntur: non  
 modo, ut sumptum faciat in militem, nemini uis as-  
 fertur, sed ne cupienti quidem cuiquam permittitur:  
 hiemis enim, non auaritiæ perfugium maiores no-  
 stri in sociorum atque amicorum tectis esse uolue-  
 runt. Age uero, ceteris in rebus quali sit temperan-  
 tia, considerate. unde illam tantam celeritatem, &  
 tam incredibilem cursum initum putatis? non enim  
 illum eximia uis remigum, aut ars inaudita quædam  
 gubernandi, aut uenti aliqui noui tam celeriter in ul-  
 timas terras pertulerunt: sed hæ res, quæ ceteros res-  
 morari solent, non retardarunt: non auaritia ab in-  
 stituto cursu ad prædam aliquam reuocauit, non li-  
 bido ad uoluptatem, non amœnitas ad delectationem,  
 non nobilitas urbis ad cognitionem, non denique la-  
 bor ipse ad quietem: postremo signa, & tabulas, cæ-  
 teraq; ornamenta Græcorum oppidorum, quæ ceteri  
 tollenda esse arbitrantur, ea sibi ille ne uisenda quæ-  
 dam existimauit. itaque omnes quidem nunc in his lo-  
 cis Cn. Pompeium sicut aliquæ non ex hac urbe missum,  
 sed de cælo delapsum intuentur: nunc denique inci-

piunt credere, fuisse homines Romanos hac quondam  
 abstinentia, quod iam nationibus exteris incredibile,  
 ac falso memoriae proditum uidebatur. nunc imperij  
 nostri splendor illis gentibus lucet. nunc intelligunt,  
 non sine causa maiores suos tum, cum hac temperan-  
 tia magistratus habebamus, seruire populo R. quam  
 imperare alijs maluisse. iam uero ita faciles aditus ad  
 eum priuatorum, ita liberae querimonie de aliorum  
 iniurijs esse dicuntur, ut is, qui dignitate principibus  
 excellit, facilitate par infimis esse uideatur. iam quan-  
 tum consilio, quantum dicendi grauitate et copia ua-  
 leat, in quo ipso inest quaedam dignitas imperatoria, uos  
 Quirites hoc ipso in loco saepe cognostis. fidem uero eius  
 inter socios quantam existimari putatis, quam hostes  
 omnium gentium sanctissimam esse iudicant? huma-  
 nitate iam tanta est, ut difficile dictu sit, utrum hostes  
 magis uirtutem eius pugnares timuerint, an man-  
 suetudinem uicti dilexerint. & quisquam dubitabit,  
 quin huic tantum bellum hoc transmittendum sit, qui  
 ad omnia uestrae memoriae bella conficienda diuino quo-  
 dam consilio natus esse uideatur? & quoniam aucto-  
 ritas multum in bellis quoque administrandis, atque  
 imperio militari ualet: certe nemini dubium est, quin  
 ea in re idem ille imperator plurimum possit. uehemen-  
 ter autem pertinere ad bella administranda, quid hostes,  
 quid socij de imperatoribus uestris existiment, quis  
 ignorat; cum sciamus homines in tantis rebus, ut aut  
 contendant, aut metuant, ut oderint, aut ament, opinio-  
 ne non minus fama, quam aliqua certa ratione comoue-  
 ri? quod igitur nomen unquam in orbe terrarum clarius

fuit? cuius res gestæ pares? de quo homine uos, id quod maxime facit auctoritatem, tanta, & tam præclara iudicia fecistis? an uero ullam usquam esse oram tam desertam putatis, quò non illius diei fama peruaserit, cum uniuersus populus R. referto foro, repletisq; omnibus templis, ex quibus hic locus conspici potest, unum sibi ad commune omnium gentium bellum Cn. Pompeium imperatorem depoposcit? itaque ut plura non dicam, neque aliorum exemplis confirmem, quantum huius auctoritas ualeat in bello; ab eodem Cn. Pompeio omnium rerum egregiarum exempla sumantur: qui quo die à uobis maritimo bello præpositus est imperator, tanta repente uilitas annonæ ex summa inopia et caritate rei frumentariæ consecuta est unius spe & nomine, quantam uix ex summa ubertate agrorum diuturna pax efficere potuisset. Iam uero accepta in Ponto calamitate ex eo prælio, de quo uos paulo ante inuitus admonui, cum socij pertinuissent, hostium opes, animiq; creuissent, cum satis firmum præsidium provincia non haberet; amisissetis Asiam Quirites, nisi ipsum id temporis diuinitus Cn. Pompeium ad eas regiones fortuna populi R. attulisset. huius aduentus Mithridatem insolita inflammatum uictoria continuit, et Tigranem magnis copijs minitantem Asiæ retardauit. & quisquam dubitabit, quid uirtute profecturus sit, qui tantum auctoritate profecerit? aut quàm facile imperio atque exercitu socios, et uectigalia conseruaturus sit, qui ipso nomine ac rumore defenderit? Age uero, illa res quantam declarat eiusdem hominis apud hostes populi R. auctoritatem, quòd ex locis tam

longinquis, tamq̃; diuersis, tam breui tempore omnes  
unā huic se dediderunt? quòd Cretenſium legati, cum  
in eorum inſula noſter imperator, exercitusq̃; eſſet, ad  
Cn. Pompeium in ultimas prope terras uenerunt, eiq̃; ſe  
omnes Cretenſium ciuitates dedere uelle dixerunt?  
quid? idem ipſe Mithridates, non'ne ad eundem Cn.  
Pompeium legatum uſque in Hiſpaniam miſit? eumq̃;  
Pompeius legatum ſemper iudicauit: ij, quibus ſemper  
erat moleſtum ad eum potiffimum eſſe miſſum. ſpecula  
torem, quā legatum iudicare maluerunt. Poſteſtis igit̃  
tur iam conſtituere Quirites, hanc auct̃oritatem mul  
tis poſtea rebus geſtis, magnisq̃; ueſtris iudicijs ampli  
catam, quantum apud illos reges, quantum apud exte  
ras nationes ualituram eſſe exiſtimetis. Reliquum eſt,  
ut de felicitate, quam præſtare de ſe ipſo nemo poteſt,  
meminiſſe & commemorare de altero poſſumus, ſicut  
æquum eſt homini de poteſtate deorum, timide & pau  
ca dicamus. Ego enim ſic exiſtimo, Maximo, Marcel  
lo, Scipioni, Mario, & cæteris magnis imperatoribus,  
non ſolum propter uirtutem, ſed etiam propter fortu  
nam ſæpius imperia mandata, atque exercitus eſſe com  
miſſos: fuit enim proſeçto quibuſdam ſummis uiris  
quædam ad amplitudinem, & gloriam, & ad res ma  
gnas bene gerendas diuinitus adiuncta fortuna. de hu  
ius autem hominis felicitate, quo de nunc agimus, hac  
utar moderatione dicendi: non ut in illius poteſtate for  
tunam poſitam eſſe dicam, ſed ut præterita meminiſſe,  
reliqua ſperare uideamur: ne aut inuiſa dijs immorta  
libus oratio noſtra, aut ingrata eſſe uideatur. itaque  
non ſum prædicaturus Quirites, quantas ille res domi,



militiæq; terra, mariq; , quantaq; felicitate gesserit,  
 ut eius semper uoluntatibus non modo ciues assense-  
 rint, socij obtemperarint, hostes obedi-erint, sed etiam  
 uentitempestatesq; obsecundarint. hoc breuissime di-  
 cam, neminem unquam tam impudentem fuisse, qui à  
 dijs immortalibus tot & tantas res tacitus auderet op-  
 tate, quot & quantas dij immortales ad Cn. Pompeium  
 detulerūt. quod ut illi proprium, ac perpetuum sit Qui-  
 rites, cum communis salutis atque imperij, tum ipsius  
 hominis causa, sicuti facitis, uelle, & optare debetis.  
 quare cum et bellum ita necessarium sit, ut negligi non  
 possit; ita magnum, ut accuratissime sit administran-  
 dum; et cum ei imperatorem præficere possitis; in quo  
 sit eximia belli scientia, singularis uirtus, clarissima au-  
 ctoritas, egregia fortuna: dubitabitis Quirites, quin  
 hoc tantum boni, quod à dijs immortalibus oblatum et  
 datum est, in remp. conseruandam, atque amplificandam  
 conferatis? quod si Romæ Cn. Pompeius priuatus esset  
 hoc tempore, tamen ad tantum bellum is erat deligendus  
 atque mittendus. nunc cum ad cæteras summas utilita-  
 tes hæc quoque opportunitas adiungatur, ut in ijs ipsis  
 locis adsit, ut habeat exercitum, ut ab ijs, qui habent, ac-  
 cipere statim possit: quid expectamus? aut cur non, du-  
 cibus dijs immortalibus, eidem, cui cætera summa cum  
 salute reip. commissa sunt, hoc quoque bellum regium  
 committimus? At enim uir clarissimus, reip. et uestris be-  
 neficijs amplissimis affectus, Q. Catulus, itemq; summis  
 ornamentis honoris, fortunæ, uirtutis, ingenij præditus  
 Q. Hortensius, ab hac ratione dissentiuunt: quorum  
 ego auctoritatem apud uos multis locis plurimum ua-

luisse, & ualere oportere confiteor : sed in hac causa,  
 tametsi cognoscitis auctoritates contrarias fortissimorum  
 uirorum et clarissimorum, tamen, omissis auctorita-  
 tatibus, ipsa re & ratione exquirere possumus uerita-  
 tem, atque hoc facilius, quod ea omnia, quæ adhuc à me  
 dicta sunt, iidem isti uera esse concedunt ; & necessa-  
 rium bellum esse, & magnum ; et in uno Cn. Pompeio  
 summa esse omnia . quid igitur ait Hortensius ? si uni  
 omnia tribuenda sunt, unum dignissimum esse Pom-  
 peium : sed ad unum tamen omnia deferri non oportere .  
 obsoleuit iam ista oratio, re multo magis, quam uer-  
 bis refutata . nam tu idem Q. Hortensi multa pro tua  
 summa copia ac singulari facultate dicendi et in sena-  
 tu contra uirum fortem A. Gabinium grauiter, orna-  
 teq; dixisti, cum is de uno imperatore contra prædones  
 constituendo legem promulgasset : & ex hoc ipso loco  
 permulta idem cōtra legem uerba fecisti. quid tum, per  
 deos immortales, si plus apud populum R. auctoritas  
 tua, quam ipsius populi R. salus & uera causa ua-  
 lisset, hodie hanc gloriam atque hoc orbis terræ impe-  
 rium teneremus ? an tibi tum imperium esse hoc uide-  
 batur, cum populi R. legati, prætores, quæstoresq; ca-  
 piebantur ? cum ex omnibus prouincijs commeatu &  
 priuato et publico prohibebamur ? cum ita clausa erant  
 nobis omnia maria, ut neque priuatam rem mariti-  
 mam, neque publicam iam obire possemus ? quæ ciuitas  
 antea unquam fuit, non dico Atheniensem, quæ satis  
 late quondam mare tenuisse dicitur ; non Carthaginen-  
 sium, qui permultum classe, maritimisq; rebus ualue-  
 runt ; non Rhodiorum, quorum usque ad nostram me-

moriam disciplina naualis & gloria remansit : quæ ciuitas antea unquam tam tenuis, quæ tam parua insula fuit, quæ non portus suos, et agros, & aliquam partem regionis atque oræ maritimæ per se ipsa defenderet? At hercle aliquot annos continuos ante legem Gabiniam, ille populus R. cuius usque ad nostram memoriam nomen inuictum in naualibus pugnis permanserat, magna ac multo maxima parte nõ modo utilitatis, sed dignitatis, atque imperij caruit. nos, quorum maiores Antiochum regem classe, Persenq; superarunt, omnibus naualibus pugnis Carthaginenses, homines in maritimis rebus exercitatissimos paratissimosq; uicerunt; ij nullo in loco iam prædonibus pares esse poteramus. nos quoque, qui antea nõ modo Italiam tutam habebamus, sed omnes socios in ultimis oris auctoritate nostri imperij saluos præstare poteramus, tum cum insula Delos tam procul à nobis in Aegæo mari posita, quò omnes undique cum mercibus atque oneribus commeabant, referta diuitijs, parua, sine muro nihil timebat; ijdem non modo prouincijs, atque oris Italiae maritimis, ac portibus nostris, sed etiam Appia iam uia carebamus. et his temporibus non pudebat magistratus populi R. in hunc ipsum locum ascendere, cum eum uobis maiores uestri exuuijs nauticis, et classium spolijs ornatum reliquissent. Bono te animo tum Q. Hortensi populus R. et ceteros, qui erant in eadem sententiâ, dicere existimauit ea, quæ sentiebatis; sed tamen in salute communi idem populus R. dolori suo maluit, quàm auctoritati uestræ obtemperare. itaque una lex, unus uir, unus annus non modo nos illa miseria ac turpitudine liberauit,

sed etiam effecit, ut aliquando uideremur omnibus gen-  
tibus ac nationibus terra mariq; imperare. quo mihi e-  
tiam indignius uidetur obtreſtatum eſſe adhuc, Gabi-  
nio dicam, an ne Pōpeio, an utrique? id quod eſt uerius.  
ne legaretur A. Gabinus Cn. Pompeio expetenti ac po-  
ſtulanti? utrum, ille, qui poſtulat legatum ad tantum  
bellum quem uelit, idoneus non eſt, qui impetret, cum  
cæteri ad expilandos ſocios, diripiēdasq; prouincias, quos  
uoluerunt, legatos eduxerint: an ipſe, cuius lege ſalus  
ac dignitas populo R. atque omnibus gentibus conſtitu-  
ta eſt, expers eſſe debet gloriæ eius imperatoris, atque eo-  
ius exercitus, qui conſilio ipſius atque periculo eſt conſti-  
tutus? an C. Falcidius, Q. Metellus, Q. Celiſus Latinien-  
ſis, Cn. Lentulus, quos omneis honoris cauſa nomino,  
cum tribuni pl. fuiſſent, anno proximo legati eſſe potue-  
runt: in hoc uno Gabinio ſunt tam diligentes? qui in  
hoc bello, quod lege Gabinia geritur, in hoc imperatore  
atque exercitu, quem per ſe ipſe conſtituit, etiam præci-  
puo iure eſſe deberet. de quo legando ſpero conſules ad  
ſenatum relatu-ros. qui ſi dubitabunt, aut grauabun-  
tur, ego me profiteor relaturum: neque me impedit cu-  
iſquam Quirites inimicum ediſtum, quo minus fretus  
uobis ueſtrum ius, beneficiumq; defendam, neque præ-  
ter interceſſionem quidquam audiam: de qua, ut arbi-  
tror, iſti ipſi, qui minantur, etiam atque etiam, qui id  
liceat, conſiderabunt. mea quidem ſententia Quirites  
unus A. Gabinus belli maritimi, rerumq; geſtarum au-  
ſtor, comes Cn. Pompeio adſcribitur, propterea quod al-  
ter uni id bellum ſuſcipiendum ueſtris ſuffragiis detu-  
lit, alter delatum, ſuſceptumq; conſecit. Reliquum eſt,

ut de Q. Catuli auctoritate, et sententia dicendum esse uideatur. qui cum ex uobis quaereret, si in uno Cn. Pompeio omnia poneretis, si quid de eo factum esset, in quo spem essetis habituri; cepit magnum suae uirtutis fructum, ac dignitatis, cum omnes prope una uoce, in eo ipso uos spem habituros esse, dixistis. etenim talis est uir, ut nulla res tanta sit, ac tam difficilis, quam ille non & consilio regere, & integritate tueri, & uirtute conficere possit. sed in hoc ipso ab eo uehementissime dissentio, quod quo minus certa est hominum ac minus diuturna uita, hoc magis resp. dum per deos immortales licet, frui debet summi hominis uita atque uirtute. at enim nihil noui fiat contra exempla, atque instituta maiorum. non dico hoc loco, maiores nostros semper in pace consuetudini, in bello utilitati paruissse, semper ad nouos casus temporum, nouorum consiliorum rationes accommodasse: non dicam, duo bella maxima, Punicum & Hispaniense, ab uno imperatore esse confecta; duas urbes potentissimas, quae huic imperio maxime minabantur, Carthaginem atque Numantiam, ab eodem Scipione esse deletas: non commemorabo, nuper ita uobis patribusq; uestris esse uisum, ut in uno C. Mario spes imperij poneretur, ut idem cum Iugurtha, idem cum Cimbris, idem cum Theutonis bellum administraret: in ipso Cn. Pompeio, in quo noui constitui nihil uult Q. Catulus, quam multa sint noua, summaq; Catuli uoluntate constituta, recordamini. quid tam nouum, quam adolescentulum priuatum, exercitum difficili reip. tempore conficere? confecit: huic praesse? praefuit: rem optime ductu suo gerere? gessit. quid tam praeter consue-



tudinem, quàm homini peradolescēti, cuius à sena-  
 torio gradu ætas longe abesset, imperium atque exerci-  
 tum dari? Siciliam permitti atque Africam, bellumq; in  
 ea administrandum? fuit in his prouincijs singulari inno-  
 centia, grauitate, uirtute: bellum in Africa maximum  
 confecit, uictorem exercitum deportauit. quid uero  
 tam inauditum, quàm equitem R. triumphare? at eam  
 quoque rem populus R. non modo uidit, sed etiam stu-  
 dio omni uisendam putauit. quid tam inusitatum,  
 quàm ut, cum duo consules clarissimi, fortissimiq; es-  
 sent, eques R. ad bellum maximum, formidolosissi-  
 mumq; pro consule mitteretur? missus est. quo qui-  
 dem tempore, cum esset non nemo in senatu, qui dice-  
 ret, non oportere mitti hominem priuatum pro consule;  
 L. Philippus dixisse dicitur, non se illum sua sententia  
 pro consule, sed pro consulibus mittere. tanta in eo  
 reip. bene gerendæ spes constituebatur, ut duorum con-  
 sulum munus unius adolescentis uirtuti committere-  
 tur. quid tam singulare, quàm ut ex S. C. legibus so-  
 lutus, consul ante fieret, quàm ullum alium magi-  
 stratum per leges capere licuisset? quid tam incredi-  
 bile, quàm ut iterum eques R. ex S. C. triumpharet?  
 quæ in omnibus hominibus noua, post hominum me-  
 moriam constituta sunt, ea tam multa non sunt, quàm  
 hæc, quæ in hoc uno homine uidimus. atque hæc tot  
 exempla, tanta ac tam noua, profecta sunt in eundem  
 hominem à Q. Catulo, atque à cæterorum eiusdem di-  
 gnitatis amplissimorum hominum auctoritate. quare  
 uideant, ne sit periniquum, et non ferendum, illorum  
 auctoritatem de Cn. Pompeij dignitate à uobis compro-  
 batam

batam semper esse, uestrum ab illis de eodem homine iudicium, populiq; R. auctoritatem improbari: præsertim cum iam suo iure populus R. in hoc homine suam auctoritatem uel contra omnes, qui dissentiunt, possit defendere: propterea quòd istis reclamantibus uos unum illum ex omnibus delegistis, quem bello prædonum præponeretis. hoc si uos temere fecistis, & reip. parum consululistis: recte isti studia uestra suis consilijs regere conantur. sin autem uos plus tum in rep. uidistis, uos his repugnantibus per uosmet ipsos dignitatem huic imperio, salutem orbi terrarum attulistis: aliquando isti principes & sibi, & cæteris populi R. uniuersi auctoritati parendum esse fateantur. Atque in hoc bello Asia-tico & regio non solum militaris illa uirtus, quæ est in Cn. Pompeio singularis, sed aliæ quoque uirtutes animi multæ, & magnæ requiruntur. difficile est, in Asia, Cilicia, Syria, regnisq; exterarum nationum ita uersari uestrum imperatorem, ut nihil aliud, quàm de hoste ac de laude, cogitet. deinde etiam, si qui sunt pudore ac temperantia moderatiores, tamen eos esse tales propter multitudinem cupidorum hominum nemo arbitratur. difficile est dictu Quirites, quanto in odio sumus apud exteras nationes, propter eorum, quos ad eas hoc anno cum imperio misimus, iniurias ac libidines. quod enim fanum putatis in illis terris, nostris magistratibus religiosum, quam ciuitatem sanctam, quam domum satis clausam ac munitam fuisse? urbes iam locupletes ac copiosæ requiruntur, quibus causa belli propter diripiendi cupiditatem inferatur. Libenter hæc coram Q. Catulo & Q. Hortensio disputarem, sum-

mis & clarissimis uiris. nouerunt enim sociorum uul=
 nera: uident eorum calamitates, querimonias audiunt.
 pro socijs nos contra hostes exercitum mittere putatis,
 an hostium simulatione contra socios atque amicos?
 quæ ciuitas est in Asia, quæ non modo unius impera=
 toris, aut legati, sed unius tribuni mil. animos ac spi=
 ritus capere possit? quare etiam si quem habetis, qui
 collatis signis exercitus regios superare posse uideatur,
 tamen, nisi erit idem, qui se à pecunijs sociorum, qui
 ab eorum coniugibus ac liberis, qui ab auro, gazaq;
 regia manus, oculos, animum cohibere possit, non erit
 idoneus, qui ad bellum Asiaticum, regiumq; mitta=
 tur. ecquam putatis ciuitatem pacatam fuisse, quæ lo=
 cuples sit? ecquam esse locupletem, quæ istis pacata
 esse uideatur? ora maritima Quirites Cn. Pompeium
 non solum propter rei militaris gloriam, sed etiam pro=
 pter animi continentiam requisitum. uidebat enim po=
 pulus R. non locupletari quotannis pecunia publica,
 præter paucos, neque eos quidquam aliud assequi clas=
 sium nomine, nisi ut detrimentis accipiendis maiore af=
 fici turpitudine uideremur. nunc quæ cupiditate ho=
 mines in prouincias, quibus iacturis, quibus conditio=
 nibus proficiantur, ignorant uidelicet isti, qui ad u=
 num deferenda esse omnia non arbitrantur. quasi ue=
 ro Cn. Pompeium non cum suis uirtutibus, tum etiam
 alienis uitijs magnum esse uideamus. Quare nolite do=
 bitare, quin huic uncredatis omnia, qui, inter annos
 tot, unus inuentus sit, quem socij in urbes suas cū exer=
 citu uenisse gaudeant. Quod si auctoritatibus hanc
 causam Quirites confirmandam putatis, est nobis au=

Etor uir bellorum omnium, maximarumq; rerum peritissimus, P. Seruilius, cuius tantæ res gestæ terra, mariq; extiterunt, ut, cum de bello deliberetis, auctor uobis grauior esse nemo debeat: est C. Curio, summis uestris beneficijs, maximisq; rebus gestis, summo ingenio, & prudentia præditus: est Cn. Lentulus, in quo omnes pro amplissimis uestris honoribus summum consilium, summam grauitatem esse cognoscitis: est C. Cassius, integritate, uirtute, constantia singulari. quare uidete, num horum auctoritatibus illorum orationi, qui dissentiuunt, respondere posse uideamur. Quæ cum ita sint C. Manili, primum istam tuam et legem, et uoluntatem, et sententiam laudo, uehementissimeq; comprobo: deinde te hortor, ut auctore populo R. maneat in sententia, neue cuiusquam uim, aut minas pertimescas. primum in te satis esse animi constantiaq; arbitror: deinde cum tantam multitudinem, cum tanto studio adesse uideamus, quantam non iterum in eodem homine præficiendo uidimus: quid est, quod aut de re, aut de perficiendi facultate dubitemus? ego autem, quidquid in me est studij, consilij, laboris, ingenij, quidquid hoc beneficio populi Ro. atque hac potestate prætoria, quidquid auctoritate, fide, constantia possum, id omne ad hanc rem conficiendam tibi, & populo Ro. polliceor & defero: testorq; omnes deos, & eos maxime, qui huic loco temploq; præfident, qui omnium mentes eorum, qui ad remp. ad eunt, maxime perspiciunt, me hoc neque rogatu facere cuiusquam, neque quo Cn. Pompeij gratiam mihi per hanc causam conciliari putem, neque quo mihi ex cu-



iusquam amplitudine aut præsidia periculis, aut adiumenta honoribus quæram : propterea quòd pericula facile, ut hominem præstare oportet, innocentia tecti pellemus, honores autem neque ab uno, neque ex hoc loco, sed eadem nostra illa laboriosissima ratione uitæ, si uestra uoluntas feret, consequemur. Quamobrem, quidquid in hac causa mihi susceptum est Quirites, id omne me reip. causa suscepisse confirmo : tantumq; abest, ut aliquam bonam gratiam mihi quæsisse uidear ; ut multas etiam simultates, partim obscuras, partim apertas, intelligam, mihi non necessarias, uobis non inutiles, suscepisse. sed ego me hoc honore præditum, tantis uestris beneficijs affectum, statui Quirites uestram uoluntatem, & reip. dignitatem, & salutem provinciarum atque sociorum meis omnibus modis, & rationibus præferre oportere.



PRO A. CLVENTIO HABITO  
ORATIO XIII.

Nimaduerti iudices, omnem accusa-  
toris orationem in duas diuisam esse  
partes. quarum altera mihi niti, &  
magnopere confidere uidebatur in-  
uidia iam inueterata iudicij Iuniani:  
altera tantummodo consuetudinis causa, timide, &  
diffidenter attingere rationem ueneficij criminum:  
qua de re lege est hæc quæstio constituta. itaque mihi  
certum est hanc eandem distributionem, inuidiæ, &  
criminum, sic in defensione seruare, ut omnes intelli-  
gant, nihil me nec subterfugere uoluïsse reticendo, nec  
obscurare dicendo. sed cum considero quo modo mihi  
in utraque re sit elaborandum: altera pars, ea, quæ  
propria est iudicij uestri, & legitimæ ueneficij quæ-  
stionis, per mihi breuis, & non magnæ in dicendo con-  
tentionis fore uidetur: altera autem, quæ procul à iu-  
dicio remota est, quæ concionibus seditiose concitatis ac-  
commodatior est, quam tranquillis, moderatisq; iudi-  
cijs, prospicio quantum in agendo difficultatis, et quan-  
tum laboris sit habitura. sed in hac tanta difficultate  
illa me res tamen iudices consolatur, quòd uos de crimi-  
nibus sic audire consueuistis, ut eorum omnem dissolu-  
tionem ab oratore quæritis, ut non existimetis plus uos  
ad salutem reo largiri oportere, quàm quantum de-  
fensor purgandis criminibus consequi, et dicendo pro-  
bare potuerit. de inuidia autem sic inter uos discepta-  
re debetis, ut, non quid dicatur à nobis, sed quid opor-

teat dici, consideretis. agitur enim in criminibus, A. Cluentij proprium periculum; in inuidia, causa communis. quamobrem alteram partem causæ sic agemus, ut uos doceamus; alteram sic, ut oremus. in altera diligencia uestra nobis adiungenda est, in altera fides imploranda: nemo est enim, qui inuidiæ, sine uestro ac sine talium uirorum subsidio, possit resistere. Equidem, quod ad me attinet, quò me uertam, nescio. negem fuisse illam infamiam iudicij corrupti? negem illam rem agitatam in concionibus? iactatam in iudicijs? cōmemoratam in senatu? euellam ex animis hominum tantam opinionem? tam penitus insitam? tam uetustam? non est nostri ingenij. uestri auxilij est iudices, huius innocentie sic in hac calamitosa fama, quasi in aliqua perniciosissima flamma, atque in communi incendio, subuenire. etenim sicut alijs in locis parum firmamenti, et parum uirium falsitas habet: sic in hoc loco falsa inuidia imbecilla esse debet. dominetur in concionibus; iaceat in iudicijs: ualeat in opinionibus ac sermonibus imperitorum; ab ingenijs prudentium repudietur: uehementes habeat repentinos impetus; spatium interposito, et causa cognita, consenescat: denique illa definitio iudiciorum æquorum, quæ nobis à maioribus tradita est, retineatur, ut in iudicijs et sine inuidia culpa plectatur, et sine culpa inuidia ponatur. quamobrem à uobis iudices, antequam de ipsa causa dicere incipio, hoc postulo: primum id, quod æquissimum est, ut ne quid huc præiudicati afferatis. etenim non modo auctoritatem, sed etiam nomen iudicum amittemus, nisi hic ex ipsis causis iudicabimus, ac si ad causas iudicia iam facta domo defere-

mus. deinde, si quam opinionem iam uestris mentibus comprehendistis; si eam ratio conuelleret, si ratio labefaceret, si denique ueritas extorqueret, ne repugnetis, eamq; animis uestris aut libentibus, aut æquis remittatis: tum autem, cum ego unaquaque de re dicam, et diluam, ne ipsi, quæ contraria sunt, taciti cogitationi uestræ subijciatis, sed ad extremum expectetis, et me meum dicendi ordinem seruare patiamini: cum peroraro, tum, si quid erit præteritum, à me requiratis. Ego me indices ad eam causam accedere, quæ iam per annos octo continuos ex contraria parte audiat, atque, ipsa opinione hominum, tacita prope conuicta atque damnata sit, facile intelligo. sed si quis mihi deus uestram ad me audiendum beneuolentiam conciliarit, efficiam profecto, ut intelligatis, nihil esse homini tam timendum, quam inuidiam; nihil innocenti, suscepta inuidia, tam optandum, quam æquum iudicium, quod in hoc uno denique falsæ infamiæ finis aliquis atque exitus reperiat. quamobrem magna me spes tenet, si ea, quæ sunt in causa, explicare, atque omnia dicendo consequi potuero, hunc locum, confessumq; uestrum, quem illi horribilem A. Cluentio ac formidolosum fore putauerunt, eum tandem eius fortunæ miseræ, multumq; iactatæ portum ac perfugium futurum. tametsi permulta sunt, quæ mihi, antequam de causa dicam, de communibus inuidiæ periculis dicenda esse uideantur: tamen ne diutius oratione mea suspensa expectatio uestra teneatur, aggrediar ad crimen, cum illa deprecatione indices, qua mihi sæpius utendum esse intelligo; sic ut me audiatis, quasi hoc tempore hæc causa primum dicatur,

sicuti dicitur; non quasi sæpe iam dicta, & nunquam probata sit. hodierno enim die primum ueteris istius criminis diluendi potestas est data: ante hoc tempus error in hac causa atque inuidia uersata est. quamobrem, dum multorum annorum accusationi breuiter, dilucideq; respondeo, quæso ut me iudices, sicuti facere instituis- tis, benigne, attenteq; audiat. Corruptisse dicitur. A. Cluentius iudicium pecunia, quo inimicum suum innocentem Statium Albium condemnaret. ostendam iudices primum, quoniam caput illius atrocitatis atque inuidiæ fuit, innocentem pecunia circunuentum; neminem unquam maioribus criminibus, grauioribus testibus esse in iudicium uocatum: deinde ea de eo præiudicia esse facta ab ipsis iudicibus, à quibus condemnatus est, ut non modo ab iisdem, sed ne ab alijs quidem ullis absolui ullo modo posset. cum hæc docuero, tum illud ostendam, quod maxime requiri intelligo, iudicium illud pecunia esse tentatum, non à Cluentio, sed contra Cluentium: faciamq; , ut intelligatis, in tota illa causa quid res ipsa tulerit, quid error affinxerit, quid inuidia conflagrit. Primum igitur illud est, ex quo intelligi possit, debuisse Cluentium magis in opere causæ confidere, quod certissimis criminibus et testibus fretus ad accusandum descenderit. hoc loco faciendum mihi iudices est, ut uobis breuiter illa, quibus Albius condemnatus est, crimina exponam. Abs te peto Oppianice, ut me inuitum de patris tui causa dicere existimes, adductum fide atque officio defensionis. etenim tibi si in præsentia satisfacere non potuero, tamen multæ mihi ad satisfaciendum reliquo tempore



facultates dabuntur : Cluentio nisi nunc satisfecero, po-  
stea mihi satisfaciendi potestas non erit. simul & il-  
lud, quis est, qui dubitare debeat, contra damnatum,  
& mortuum, pro incolumi, & uiuo dicere? cum il-  
li. in quem dicitur, damnatio omne ignominiae pericu-  
lum iam abstulerit, mors uero etiam doloris: huic au-  
tem, pro quo dicitur, nihil possit offensionis accedere  
sine acerbissimo animi sensu ac dolore, & sine summo  
dedecore uitae ac turpitudine. atque ut intelligatis Clu-  
entium non accusatorio animo, non ostentatione ali-  
qua, aut gloria adductum, sed nefarijs iniurijs, quo-  
tidianis insidijs, proposito ante oculos uitae periculo, no-  
men Oppianici detulisse, paulo longius exordium rei  
demonstrandae repetam: quod quaeso iudices ne mo-  
leste patiamini: principijs enim cognitis, multo faci-  
lius extrema intelligetis. A. Cluentius Habitus fuit, pa-  
ter huiusce iudices, homo non solum municipij Larina-  
tis, ex quo erat, sed etiam regionis illius, & uicini-  
tatis, uirtute, existimatione, nobilitate facile princeps. is  
cum esset mortuus Sylla et Pompeio consulibus reliquit  
hunc annos XV natum, grandem autem & nubilem  
filiam: quae, breui tempore post patris mortem, nupsit  
A. Aurio Melino consobрино suo, adolescenti in primis,  
ut tum habebatur, inter suos & honesto, et nobili. cum  
essent haec nuptiae plenae dignitatis, plenae concordiae, re-  
pente est exorta mulieris importunae nefaria libido, non  
solum dedecore, uerum etiam scelere coniuncta. nam  
Sassia mater huius Habiti, mater enim à me nominis  
causa, tametsi in hunc hostili odio, & crudelitate est,  
mater inquam appellabitur: neque unquam illa ita de



suo scelere, et immanitate audiet, ut naturæ nomen da-  
 mittat: quo enim est ipsum nomen amanti, indulgen-  
 tiusq; maternum, hoc illius matris, quæ multos iam an-  
 nos, et nunc, cum maxime, filium interfectum cupit,  
singulare scelus maiore odio dignum esse ducetis. ea igitur  
 mater Habiti, Melini illius adolescentis, generi sui,  
 contra quam fas erat, amore capta, primo, neque id  
 ipsum diu, quoquo modo poterat, in illa cupiditate conti-  
 nebatur: deinde ita flagrare coepit amentia, sic inflam-  
 mata ferri libidine, ut eam non pudor, non pudici-  
 tia, non pietas, non macula familiæ; non hominum  
 fama, non filij dolor, non filiæ moeror à cupiditate re-  
 uocaret. animum adolescentis, nondum consilio, ac ra-  
 tione firmatum, pellexit ijs omnibus rebus, quibus illa  
 ætas capi ac deliniri potest: filia, quæ non solum illo  
 communi dolore muliebri in eiusmodi uiri iniurijs an-  
 geretur, sed nefarium matris pellicatum ferre non pos-  
 set, de quo ne queri quidem sine scelere se posse arbitra-  
 retur, cæteros sui tanti mali ignaros esse cupiebat, in  
 huius amantissimi sui fratris manibus, & gremio,  
 moerore, & lacrymis consenescebat. ecce autem subita  
 diuortium, quod solatium malorum omnium fo-  
 re uidebatur. discedit à Melino Cluentia; ut in tantis  
 iniurijs, non inuita; ut à uiro, non libenter. tum ue-  
 ro illa egregia, ac præclara mater palam exultare læti-  
 tia, ac triumphare gaudio coepit, uictrix filiæ, non libi-  
 dinis. itaque diutius suspicionibus obscuris lædi famam  
 suam noluit; lectum illum genialem, quem biennio an-  
 te filiæ suæ nubenti strauerat, in eadem domo sibi orna-  
 ri, & sterni, expulsa, atque exturbata filia, iubet. nu-

bit genero socrus, nullis auspiciis, nullis auctoribus, funestis omnibus omnium. ò mulieris scelus incredibile, & præter hanc unam, in omni uita inauditum. ò libidinem effrænatam, & indomitam. ò audaciam singularem. non timuisse, si minus uim deorum, hominumq; famam, at illam ipsam noctem, facesq; illas nuptiales? non limen cubiculi? non cubile filiae? non parietes denique ipsos superiorum testes nuptiarum? perfregit, ac prostrauit omnia cupiditate ac furore: uicit pudorem libido, timorem audacia, rationem amentia. tulit hoc commune dedecus iam familiae, cognationis, nominis, grauiter filius. augebatur autem eius molestia quotidianis querimonijs, & assiduo fletu sororis. statuit tamen nihil sibi in tantis iniurijs, ac tanto scelere matris grauius faciendum, quam ut illa matre ne uteretur: ne, quam uidere sine summo animi dolore non poterat, ea si matre uteretur, non solum uidere, sed etiam probare suo iudicio putaretur. Initium quod huic cum matre fuerit simultatis, audiuiſtis. pertinuisse hoc ad causam, tunc, cum reliqua cognoueritis, intelligetis. nam illud me non præterit; cuiusmodi dicunque mater sit, tamen in iudicio filij de turpitudine parentis dici uix oportere. non essem ad ullam causam idoneus iudices, si hoc, quod in communibus hominum sensibus, atque in ipsa natura positum atque infixum est, id ego, cum ad amici pericula depellenda adhiberer, non uiderem. facile intelligo, non modo retinere homines parentum iniurias, sed etiam animo æquo ferre oportere. sed ego ea, quæ ferri possunt, ferenda; quæ taceri, tacenda esse arbitror. nihil in uita uidit ca-

lamitatis A. Cluentius, nullum periculum mortis adiit,  
 nihil mali timuit, quod non totum à matre esset confla-  
 tum, & perfectum. quæ hoc tempore sileret omnia,  
 atque ea si obliuione non posset, tamen taciturnitate  
 sua testis esse pateretur: sed ea uero sic agit, ut pror-  
 sus reticere nullo modo possit: hoc enim ipsum iudi-  
 cium, hoc periculum, illa accusatio, omnis testium co-  
 pia, quæ futura est, à matre initio est adornata, à  
 matre hoc tempore instruitur, atque omnibus eius opi-  
 bus, & copijs comparatur: ipsa denique nuper Lari-  
 no huius opprimendi causa Romam aduolauit: præsto  
 est mulier audax, pecuniosa, crudelis: instruit accu-  
 satores: instruit testes: squalore huius & sordibus læ-  
 tatur: exitium exoptat; sanguinem suum profunde-  
 re omnem cupit, dummodo profusum huius ante ui-  
 deat. hæc nisi omnia perspexeritis in causa, temere à  
 nobis illam appellari putatote. sin autem erunt & a-  
 perta, & nefaria, Cluentio ignoscere debetis, quod  
 hæc à me dici patiatur: mihi ignoscere non deberetis,  
 si tacerem. Nunc iam summam exponam, quibus  
 criminibus Oppianicus damnatus sit: ut & constan-  
 tiam A. Cluentij, & rationem accusationis perspicere  
 possitis. Ac primum, causa accusandi quæ fuerit, o-  
 stendam, ut id ipsum A. Cluentium uir & necessitate  
 coactum fecisse uideatis. Cum manifesto uenenum  
 deprehendisset, quod uir matris Oppianicus ei parauis-  
 set; & res non coniectura, sed oculis ac manibus te-  
 neretur, neque in causa ulla dubitatio posset esse: accu-  
 sauit Oppianicum; quàm constanter, & quàm dili-  
 genter, postea dicam: nunc hoc scire uos uolui, nullam

huic aliam accusandi causam fuisse, nisi uti propositum uitæ periculum, & quotidianas capitis insidias hac una ratione uitaret. atque ut intelligatis ijs accusatum esse criminibus Oppianicum, ut neque accusator timere, neque reus sperare debuerit, pauca vobis illius iudicij crimina exponam: quibus cognitis, nemo uestrum mirabitur, illum diffidentem rebus suis ad Stalenum, atque ad pecuniam confugisse. Larinas quædam fuit Dinea, socrus Oppiani, quæ filios habuit M. & Numerium Aurios, & Cn. Magium, & filiam Magiam, nuptam Oppianico. M. Aurius adolescentulus bello Italico captus apud Asculum, in Q. Sergij senatoris, eius, qui inter sicarios damnatus est, manus incidit, & apud eum fuit in ergastulo. Numerius autem Aurius frater mortuus est, hæredemq; Cn. Magium fratrem suum reliquit. postea Magia uxor Oppianici mortua est. postremo, unus qui reliquus erat Dineæ filius, Cn. Magius est mortuus. is fecit hæredem illum adolescentem Oppianicum sororis suæ filium, eumq; partiri cum Dinea matre iussit. interim uenit index ad Dineam neque obscurus, neque incertus, qui nunciaret ei, filium eius M. Aurium uiuere, & in agro Gallico esse in seruitute. mulier amissis liberis, cum unius filij recuperandi spes esset ostentata, omnes suos propinquos, filijq; sui necessarios conuocauit, & ab his flens petiuit, ut negotium susciperent, adolescentem inuestigarent, sibi restituerent eum filium, quem tantum unum ex multis fortuna reliquum esse uoluisset. hæc cum agere instituisset, oppressa morbo est. itaque testamentum fecit eiusmodi,



ut illi filio HS CCCCIDDDD millia legaret; hæredem institueret eundem illum Oppianicum nepotem suum : atque his diebus paucis est mortua. propinqui tamen illi, quemadmodum uiua Dinea instituerant, ita, mortua illa, ad inuestigandum Aurium cum eodem illo indice in agrum Gallicum profecti sunt. interim Oppianicus, ut erat, sicut multis ex rebus reperietis, singulari scelere, et audacia, per quendam Gallicanum familiarem suum, primum illum indicem pecunia corrumpit, deinde ipsum Aurium non magna iactura facta tollendum interficiendumq; curauit. illi autem, qui erant ad propinquum inuestigandum, et recuperandum profecti, literas Larinum ad Aurios illius adolescentis propinquos, suosq; necessarios mittunt, sibi difficilem esse inuestigandi rationem, quod intelligerent indicem ab Oppianico esse corruptum. quas literas A. Aurius, uir fortis & experiens, & domi nobilis, M. illius Aurij propinquus, in foro palam, multis audientibus, cum adesset Oppianicus, recitat, et clarissima uoce, se nomen Oppianici, si interfectum M. Aurium comperisset, delaturum esse testatur. interim breui tempore illi, qui erant in agrum Gallicum profecti, Larinum reuertuntur, interfectum esse M. Aurium renunciant. animi non solum propinquorum, sed etiam omnium Larinatum odio Oppianici, & illius adolescentis misericordia commouentur. itaque cum A. Aurius, qui antea denunciarat, clamore hominem, ac minis insequi cœpisset, Larino profugit, et se in castra clarissimi uiri Q. Metelli contulit. post illam fugam & sceleris, & conscientiae testem, nunquam se iudicijs, nunquam legi-



bus, nunquam inermem inimicis committere ausus est: sed per illam L. Syllæ uim, atque uictoriam Larinum in summo timore omnium cum armatis aduolauit: quatuoruiros, quos municipes fecerant, sustulit: se à Sylla, & alios præterea tres factos esse dixit, & ab eodem sibi esse imperatum, ut Aurium illum, qui sibi delationem nominis, & capitis periculum ostentarat, & alterum Aurium, & eius C. filium, & Sex. Virbium, quo sequestre in illo indice corrupendo dicebatur esse usus, proscribendos interficiendosq; curaret. itaque illis crudelissime interfectis, non mediocri ab eo cæteri proscriptionis, & mortis metu terrebantur. his rebus in causa iudicioq; patefactis, quis est, qui illum absolui potuisse arbitraretur? Atque hæc parua sunt: cognoscite reliqua, ut non aliquando condemnatum esse Oppianicum, sed aliquandiu incolumem fuisse miremini. Primum uidete hominis audaciam. Sassiā in matrimonium ducere Habiti matrem, illam, cuius uirum A. Aurium occiderat, concupiuit. utrum, impudentior hic, qui postulet; an crudelior illa, si nubat? difficile dictu est. sed tamen utriusque humanitatem, constantiamq; cognoscite. petit Oppianicus, ut sibi Sassiā nubat, et id magnopere contendit. illa autem non admiratur audaciam, non impudentiam aspernatur, non denique illam Oppianici dexteram uiri sui sanguine redundantem reformidat: sed, quod haberet tres ille filios, idcirco se ab his nuptiis abhorrere respondit. Oppianicus, qui pecuniam Sassiæ concupiuisset, domo sibi quærendum remedium existimauit ad eam moram, quæ nuptiis afferebatur. nam cum

haberet ex Nouia infantem filium; alter autem eius  
 filius, Pappia natus, Theani Apuli, quod abest à La-  
 rino decem & octo millia passuum, apud matrem edu-  
 caretur: accersit subito sine causa puerum Theano,  
 quod facere nisi ludis publicis, aut festis diebus antea  
 non solebat. mater nihil mali misera suspicans mittit.  
 ille se Tarentum proficisci cum simulasset, eo ipso die  
 puer, cum hora undecima in publico ualens uisus es-  
 set, ante noctem mortuus, & postridie, antequam lu-  
 ceret, combustus est. atque hunc tantum mœrorem ma-  
 tri prius hominum rumor, quàm quisquam ex Oppia-  
 nici familia renunciauit. illa cum uno tempore audis-  
 set sibi non solum filium, sed etiam exequiarum mu-  
 nus ereptum, Larinum confestim exanimata uenit,  
 et ibi de integro funus iam sepulto filio fecit. dies non-  
 dum decem intercesserant, cum ille alter filius infans  
 necatur. itaque nubit Oppianico continuo Saffia lætan-  
 ti iam animo, & spe optima confirmata: nec mirum,  
 quæ se non nuptialibus donis, sed filiorum funeribus  
 delinitam uideret. itaque, quòd ceteri propter liberos  
 pecuniæ cupidiores solent esse, ille propter pecuniam li-  
 beros amittere iucundum esse duxit. Sentio iudices, uos  
 pro uestra humanitate his tantis sceleribus breuiter à  
 me demonstratis uehementer esse commotos. quo tan-  
 dem igitur animo fuisse illos arbitramini, quibus his  
 de rebus non modo audiendum fuit, uerum etiam iu-  
 dicandum? uos auditis de eo, in quem iudices non estis;  
 de eo, quem non uidetis; de eo, quem odisse iam non po-  
 testis; de eo, qui et naturæ, et legibus satisfecit, quem  
 leges exilio, natura morte mulctauit: auditis non ab  
 inimico,

inimico: auditis sine testibus: auditis, cum ea, quæ co-  
 piofissime dici possunt, breuiter à me stricteq; dicun-  
 tur. illi audiebant de eo, de quo iurati sententias fer-  
 re debebant; de eo, cuius præsens nefarium, &  
 consceleratum uultum intuebantur; de eo, quem ode-  
 rant propter audaciam; de eo, quem omni supplicio di-  
 gnum esse ducebant: audiebant ab accusatoribus: au-  
 diebant uerba multorum testium, audiebāt, cum una-  
 quaque de re à P. Canutio homine eloquentissimo, gra-  
 uiter, & diu diceretur. & est quisquam, qui, cum  
 hæc cognouerit, suspicari possit Oppianicum iudicio op-  
 pressum, & circumuentum esse innocentem? acerua-  
 tim iam reliqua iudices dicam, ut ad ea, quæ propiora  
 huius causæ, & adiunctiora sunt, perueniam. uos  
 quæso memoria teneatis, non mihi hoc esse propositum,  
 ut accusem Oppianicum mortuum, sed, cum hoc per-  
 suadere uobis uelim, iudicium ab hoc non esse corru-  
 ptum, hoc uti initio ac fundamento defensionis, Op-  
 pianicum, hominem sceleratissimum, et nocentissimū,  
 esse damnatum: qui uxori suæ Cluentiæ, quæ amita  
 huius Habiti fuit, cum ipse poculum dedisset, subito  
 illa in media potione exclamauit, se maximo cum do-  
 lore mori, nec diutius uixit, quàm locuta est: nam in  
 ipso sermone hoc, & uociferatione mortua est. & ad  
 hanc mortem tam repentinam, uocemq; morientis om-  
 nia præterea, quæ solent esse indicia, & uestigia uene-  
 ni, in illius mortuæ corpore fuerunt: eodemq; ueneno  
 C. Oppianicum fratrem necauit. neque est hoc satis:  
 tametsi in ipso fraterno parricidio nullum scelus præ-  
 termissum uidetur: tamen, ut ad hoc nefarium facinus

d d



accederet, aditum sibi alijs sceleribus ante muniuit:  
 nam cum esset gravida Auria fratris uxor, et iam ap-  
 propinquare partus uideretur, mulierem ueneno inter-  
 fecit, ut una illa, et quod erat fratre conceptum, neca-  
 retur: postea fratrem aggressus est: qui sero, iam ex-  
 hausto illo poculo mortis, cum & de suo, & de uxoris  
 interitu clamaret, testamentumq; mutare cuperet, in  
 ipsa significatione huius uoluntatis est mortuus. ita  
 mulierem, ne partu eius ab hereditate fraterna exclu-  
 deretur, necauit: fratris autem liberos prius uita pri-  
 uarit, quàm illi hanc ab natura propriam lucem accipe-  
 re potuerunt: ut omnes intelligerent, nihil ei clausum,  
 nihil sanctum esse posse, cuius ab audacia fratris libe-  
 ros ne materni quidem corporis custodia tegere potuif-  
 set. memoria teneo, Milesiam quandam mulierem,  
 cum essem in Asia, quòd ab hæredibus secundis acce-  
 pta pecunia partum sibi ipsa medicamentis abegisset,  
 rei capitalis esse damnatam: neque iniuria: quæ spem  
 parentis, memoriam nominis, subsidium generis, hære-  
 dem familiæ, designatum reip. ciuem sustulisset. quan-  
 to est Oppianicus in eadem iniuria maiore supplicio  
 dignus? siquidem illa, cum suo corpori uim attulisset,  
 se ipsam cruciauit: hic autem idem illud effecit per alie-  
 ni corporis mortem, atque cruciatum. cæteri non uiden-  
 tur in singulis hominibus multa parricidia suscipere  
 posse: Oppianicus inuentus est, qui in uno corpore plu-  
 res necaret. itaque cum hanc eius consuetudinem au-  
 daciãq; cognosceret auunculus illius adolescentis Op-  
 pianici, Cn. Magius; isq; graui morbo affectus esset,  
 & hæredem illum sororis suæ filium faceret: amicis



adhibitis, præsente matre sua Dinea, uxorem suam interrogauit, esset ne prægnans: quæ cum se esse respondisset, ab ea petiuit, ut, se mortuo, apud Dineam, quæ tum ei mulieri socrus erat, quoad pareret, habitaret; diligentiamq; adhiberet, ut id, quod conceperat, seruaret, ut saluum parere posset. itaque ei testamento legat grandem pecuniam à filio, si qui natus esset: ab secundo hærede nihil legat. quid de Oppianico suspicatus sit, uidetis: quid iudicarit, obscurum non est: nam cuius filium faceret hæredem, eum tutorem liberis non adscripsit. quid Oppianicus fecerit, cognoscite, ut illum Magiū intelligatis longe animo prospexisse morientem: quæ pecunia mulieri legata erat à filio, si qui natus esset, eam præsentem Oppianicus non debitam mulieri soluit: si hæc solutio legatorum, et non merces abortionis appellanda est. quo illa pretio accepto, multisq; præterea muneribus, quæ tum ex tabulis Oppianici recitabantur, spem illam, quam in aluo commendatam à uiro continebat, uicta auaritia, sceleri Oppianici uendidit. nihil posse iam ad hanc improbitatem addi uidetur. attendite exitum. quæ mulier, obtestatione uiri, decem illis mensibus ne domum quidem ullam, nisi socrus suæ, nosse debuit, hæc quinto mense post uiri mortem ipsi Oppianico nupsit. quæ nuptiæ non diuturnæ fuerunt: erant enim non matrimonij dignitate, sed sceleris societate coniunctæ. Quid illa cædes Asinij Larinatis, adolescentis pecuniosi, quàm clara, cum recens fuit, quàm omnium sermone celebrata? Fuit Aiulius quidam Larinas, perdita nequitia, et summa egestate, arte quadam præditus ad libidines



adolescentulorum excitandas accommodata : qui ut se  
 blanditijs & assentationibus in Asinij consuetudinem  
 penitus immergit, Oppianicus continuo sperare cœpit  
 hoc se Aiulio, tanquam aliqua machina admota cape-  
 re Asinij adolescentiam, et fortunas eius patrias expu-  
 gnare posse. ratio excogitata Larini est, res translata  
 Romam : iniri enim id consilium facilius in solitudine,  
 perfici rem eiusmodi commodius in turba posse arbitra-  
 ti sunt. Asinius cum Aiulio Romam est profectus. hos  
 uestigijs Oppianicus consecutus est. iam ut Romæ ui-  
 xerint, quibus conuiuijs, quibus flagitijs, quantis, &  
 quàm profusis sumptibus, non modo conscio, sed etiam  
 conuiua, & adiutore Oppianico, longum est mihi di-  
 cere, præsertim ad alia properanti. exitum huius assi-  
 mulatæ familiaritatis cognoscite. cum esset adolescens  
 apud mulierculam quandam, atque ibi pernoctaret, et  
 ibi diem posterum commoraretur, Aiulius, ut erat con-  
 stitutum, simulat se ægrotare, & testamentum face-  
 re uelle. Oppianicus obsignatores ad eum, qui neque  
 Asinium neque Aiulium nossent, adducit, et illum Asi-  
 nium appellat: ipse, testamento Asinij nomine obsigna-  
 to, discedit: Aiulius illico conualescit. Asinius autem  
 breui tempore, quasi in hortulos iret, in arenarias quas-  
 dam extra portam Esquilinam perductus, occiditur.  
 quicum unum iam, & alterum diem desideraretur;  
 neque in ijs locis, ubi ex consuetudine quærebatur, in-  
 ueniretur; & Oppianicus in foro Larinatum dictita-  
 ret, nuper se, & suos amicos testamentum eius obsi-  
 gnasse: liberti Asinij, et nonnulli amici, quòd eo die, quo  
 postremum Asinius uisus erat, Aiulium cum eo fuisse,

Et d multis uisum esse constabat, in eum inuadunt, et hominē ante pedes Q. Manilij, qui tum erat triumuir, constituunt. atque ille continuo nullo teste, nullo indice, recentis maleficij conscientia perterritus, omnia, ut à me paulo ante dicta sunt, exponit, Asiniumq; ab se, consilio Oppianici interfectum fatetur. extrahitur domo latitans Oppianicus à Manilio: index Aiulius ex altera parte coram tenetur. hic iam quid reliqua quæritis? Manilium plerique noratis. non ille honorem à pueritia, non studia uirtutis, non ullum estimationis bonæ fructum unquam cogitarat, sed ex petulanti, atque improbo scurra, in discordijs ciuitatis, ad eam columnam, ad quam multorum sæpe conuicijs perductus erat, cum suffragijs populi peruenerat. itaque rem cum Oppianico transigit: pecuniam ab eo accipit: causam et susceptam, et manifestam relinquit. at tum in Oppianici causa crimen hoc Asinianum cum testibus multis, tum uero indicio Aiulij probabatur. in quo inter allegatos Oppianici nomen primum esse constabat, eius, quem uos miserum, atque innocentem falso iudicio circumuentum esse dicitis. Quid? auiam tuam Oppianice Dineam, cui tu es hæres, pater tuus non manifesto necauit? ad quam cum adduxisset medicum illum suum iam cognitum, et sæpe uictorem, per quem interfecerat plurimos, mulier exclamat se ab eo nullo modo uelle curari, quo curante suos omnes perdidisset. tum repente Anconitanum quendam L. Clodium pharmacopolā circumforaneum, qui casu tum Larinum uenisset, aggreditur, et cum eo HS quadringentis, id quod ipsius tabulis tum est de-

monstratum, transigit. L. Clodius, qui properaret, cui  
 fora multa restarent, simul atque introductus est, rem  
 conficit: prima potione mulierem sustulit. neque po=  
 stea Larini punctum est temporis commoratus. eadem  
 hac Dinea testamentum faciente, cum tabulas prehen=  
 disse Oppianicus, qui gener eius fuisset, digito lega=  
 ta deleuit: & cum id multis locis fecisset; post mortem  
 eius, ne literis coargui posset, testamentum in alias ta=  
 bulas transcriptum signis adulterinis obsignauit. Mul=  
 ta prætereo consulto: etenim uereor, ne hæc ipsa ni=  
 mium multa esse uideantur: uos tamen eum similem  
 sui fuisse in cæteris uitæ partibus existimare debetis.  
 illum tabulas publicas Larini censórias corrupisse, de=  
 curiones uniuersi iudicauerunt: cum illo iam nemo ra=  
 tionem, nemo rem ullam contrahebat: nemo illum ex  
 tam multis cognatis, et affinibus tutorem unquam li=  
 beris suis scripsit: nemo illum aditu, nemo congressio=  
 ne, nemo sermone, nemo conuiuio dignum indicabat:  
 omnes aspernabantur, omnes abhorrebant, omnes ut  
 aliquam immanem, ac perniciosam bestiam, pestemq;  
 fugiebant. hunc tamen hominem tam audacem, tam  
 nefarium, tam nocentem nunquam accusasset Habitus  
 iudices, si id prætermittere saluo capite suo potuisset.  
 erat huic inimicus Oppianicus, erat, sed tamen erat ui=  
 tricus: crudelis, & huic infesta mater: attamen ma=  
 ter: postremo nihil tam remotum ab accusatione, quàm  
 Cluentius, & natura, & uoluntate, et instituta ra=  
 tione uitæ. sed cum esset hæc illi proposita conditio, ut  
 aut iuste pieq; accusaret, aut acerbe, indigneq; more=  
 retur: accusare, quoquo modo posset, quàm illo modo

emori, maluit. atque ut hæc ita esse perspicere possitis, exponam vobis Oppianici facinus manifesto compertū, atque deprehensum: ex quo simul utrunque, & huic accusare, et illum condemnari necesse fuisse, intelligetis. Martiales quidam Larini appellabantur, ministri publici Martis, atque ei deo ueteribus institutis religionibusq; Larinatum consecrati. quorum cum satis magnus numerus esset; cumq; item, ut in Sicilia permulti Veneri sunt, sicilli Larini in Martis familia numerarentur: repente Oppianicus, eos omnes liberos esse, ciuesq; Romanos, cepit defendere. grauius id Decuriones Larinatum, cunctiq; municipes tulerunt: itaque ab Habito petiuerunt, ut eam causam susciperet, publiceq; defenderet. Habitus, cum se ab omni eiusmodi negotio remouisset, tamen pro loco, pro antiquitate generis sui, pro eo quod se non solum suis commodis, sed etiam suorum municipum, caterorumq; necessariorum natū esse arbitrabatur, tantæ uoluntati uniuersorum Larinatum deesse noluit. suscepta causa, Romamq; delata, magnæ quotidie contentiones inter Habitem et Oppianicum ex utriusque studio defensionis excitabantur. erat ipse immani acerbaq; natura Oppianicus: incendebat eius amentia infesta atque inimica filio mater Habiti. magni autem illi sua interesse arbitrabantur, hunc à causa Martialium dimouere. suberat etiā alia causa maior, quæ Oppianici, hominis auarissimi, atque audacissimi, mentē maxime comouebat: nam Habitus usque ad illius iudicii tēpus nullum testamētum unquā fecerat: neque enim legare eiusmodi matri, poterat in animū inducere, neque testamento nomen omnino prætermittere



parentis. id cum Oppianicus sciret, ( neque enim erat obscurum ) intelligebat, Habito mortuo, bona eius omnia ad matrem esse uentura: quæ ab sese postea, aucta pecunia, maiore præmio; orbatâ filio, minore periculo; necaretur. itaque his rebus incensus, qua ratione Habito ueneno tollere conatus sit, cognoscite. C. & L. Fabritij fratres gemini fuerunt, ex municipio Aletrinate, homines inter se cum forma, tum moribus similes, municipum autem suorum dissimilimi: in quibus quantus splendor sit, quam prope æquabilis, quam fere omnium constans, & moderata ratio uitæ, nemo uestrum, ut mea fert opinio, ignorat. his Fabritijs semper usus est Oppianicus familiarissime. iam hoc fere scitis omnes, quantam uim habeat ad coniungendas amicitias studiorum ac naturæ similitudo. cum illi ita uiuerent, ut nullum quæstum turpem esse arbitrarentur; cum omnis ab his fraus, omnes insidiæ, circumscriptiõesq; adolescentium nascerentur; cumq; essent uitijs, atque improbitate omnibus noti: studiose, ut dixi, ad eorum se familiaritatem multis iam ante annis Oppianicus applicarat: itaque tunc sic statuit, per C. Fabritium (nam L. erat mortuus) insidias Habito comparare. erat illo tempore infirma ualetudine Habitus, utebatur autem medico ignobili, sed spectato homine Cleophanto: cuius seruum Diogenem Fabritius ad uenenum Habito dandum spe & pretio sollicitare coepit. seruus non incallidus, sed, ut ipsa res declarauit, frugi atque integer, sermonem Fabritij non est aspernatus: rem ad dominum detulit: Cleophantus autem cum Habito est locutus: Habitus autem statim cum

M. Bebrio senatore familiarissimo suo communicauit : qui qua fide, qua prudentia, qua dignitate fuerit, meminisse uos arbitror . ei placuit , ut Diogenem Habitus emeret à Cleophanto , quo facilius aut comprehenderetur res eius indicio , aut falsa esse cognosceretur . ne multis, Diogenes emitur : uenenum diebus paucis, multi uiri boni cum ex occulto interuenissent, pecuniaq; ob signata, quæ ad eam rem dabatur, in manibus Scamandri liberti Fabritiorum deprehenditur . Prò dij immortales, Oppianicum quisquam, his rebus cognitis, circumuentum dicit esse ? quis unquam audacior ? quis nocentior ? quis apertior in iudicium adductus est ? quod ingenium, quæ facultas dicendi, quæ à quouquam excogitata defensio huic uni crimini potuit obistere ? simul & illud, quis est, qui dubitet, quin, hac re comperta, manifestoq; deprehensa, aut obeunda mors Cluentio, aut suscipienda accusatio fuerit ? Satis esse arbitror demonstratum iudices, ijs criminibus accusatum esse Oppianicum, ut honeste absolui nullo modo potuerit . cognoscite nunc ita reum citatum esse illum, ut, re semel atque iterum præiudicata, condemnatus in iudicium uenerit . Nam Cluentius iudices primum nomen eius detulit, cuius in manibus uenenum deprehenderat : is erat libertus Fabritiorum Scamander . integrum consilium, iudicij corrupti nulla suspicio : simplex in iudicium causa, certa res, uerum crimen allatum est . hictum Fabritius, is, de quo ante dixi, qui liberto damnato sibi illud impendere periculum uideret, quòd mihi cum Aletrinatibus uicinitatem, & cum plerisque eorum magnum usum esse sciebat, frequen-

tes eos ad me domum adduxit . qui quanquam de ho=  
mine, sicut necesse erat, existimabant : tamen, quòd  
erat ex eodem municipio, suæ dignitatis esse arbitraban=  
tur, cum, quibus rebus possent, defendere : idq; à me ut  
facerem, et ut causam Scamandri susciperem, petebant :  
in qua causa patroni omne periculum continebatur.  
ego, qui neque illis, talibus uiris, ac tam amantibus  
mei, rem possem ullam negare, neque illud crimen tan=  
tum ac tam manifestum esse arbitrarer, sicut nec illi  
quidem ipsi, qui mihi tum illam causam commenda=  
bant, arbitrabantur; pollicitus ijs sum, me omnia,  
quæ uellent, esse facturum . res agi cœpta est : citatus  
est Scamander reus : accusabat P. Canutius, homo in=  
primis ingeniosus, et in dicendo exercitatus : accusabat  
autem ille quidem Scamandrum uerbis tribus, uene=  
num esse deprehensum . omnia tela totius accusationis  
in Oppianicum coniiciebantur : aperiiebatur causa insi=  
diarum : Fabritiorum familiaritas commemorabatur :  
hominis uita, et audacia proferebatur : denique omnis  
accusatio uarie, grauiusq; tractata, ad extremum ma=  
nifesta uenenî deprehensione conclusa est . hic ego cum  
ad respondendum surrexi, qua cura dii immortales,  
qua solitudine animi, quo timore . semper equidem  
magno cum metu incipio dicere : quotiescunque dico,  
toties mihi uideor in iudicium uenire non ingenij so=  
lum, sed etiam uirtutis atque officij : ne aut id profite=  
ri uidear, quod non possim implere, quod est impuden=  
tiæ ; aut id non efficere, quod possim, quod est aut per=  
fidie, aut negligentie . tum uero ita sum perturba=  
tus, ut omnia timerem ; si nihil dixissem, ne infantis=

simus; si multa in eiusmodi causa dixissem, ne impudentissimus existimarer. collegi me aliquando, & ita constitui, fortiter esse agendum; illi ætati, quam eram, solere laudi dari, etiam si in minus firmis causis hominum periculis non defuissem: itaque feci: sic pugnavi, sic omniratione contendi, sic ad omnia confusgi, quantum ego assequi potui, remedia, ac perfugia causarum, ut, hoc, quod timide dicam, consecutus sim, ne quis illi causæ patronum defuisse arbitraretur. sed ut quidquid ego apprehenderam, statim accusator extorquebat è manibus. si quæsieram, an inimiciæ Scamandro cum Habito: fatebatur nullas fuisse; sed Oppianicum, cuius ille minister fuisset, huic inimicissimum fuisse, atque esse dicebat. sin autem illud egeram, nullum ad Scamandrum morte Habiti venturum emolumentum fuisse: concedebat; sed ad uxorem Oppianici, hominis in uxoribus necandis exercitati, omnia bona Habiti ventura esse dicebat. cum illa defensione usus essem, quæ in libertinorum causis honestissima semper existimata est, Scamandrum patrono esse probatum: fatebatur, sed quærebat, cui probatus esset ipse patronus. cum ego pluribus uerbis in eo commoratus essem, Scamandro factas insidias esse per Diogenem, constitutumque inter eos de alia re fuisse; ut medicamentum, non uenenum, Diogenes afferret, hoc cuius usu uenire posse: quærebat, cur in eiusmodi locum tam abditum, cur solus, cur cum obsignata pecunia uenisset: denique hoc loco causa testibus honestissimis hominibus premebatur. M. Bebrinus de suo consilio Diogenem emptum, se presente



Scamandrum cum ueneno, pecuniaq; deprehensum esse dicebat. P. Quintius Varus, homo summa religione, & summa auctoritate præditus, de insidijs, quæ fierent Habito, & de sollicitatione Diogenis, recenti, re secum Cleopphantum locutum esse dicebat. atque in illo iudicio, cum Scamandrum nos defendere uideremur, uerbo ille reus erat, re quidem uera & periculo, & tota accusatione Oppianicus: neque id obscure ferebat, nec dissimulare ullo modo poterat: aderat frequens, aduocabat, omni studio, gratiaq; pugnabat; postremo, id quod maximo malo illi causæ fuit, hoc ipso loco, quasi reus ipse esset, sedebat. oculi omnium iudicium non in Scamandrum, sed in Oppianicum coniiciebantur: timor eius, perturbatio, suspensus, incertusq; uultus, crebra coloris mutatio, quæ erant antea suspiciosa, hæc aperta, ac manifesta faciebant. cum in consilium iri oporteret, quæsiuit ab reo C. Iunius Quæstor ex lege illa Cornelia, quæ tum erat, clam an palam de sententiam ferri uellet? de Oppianici sententia responsum est, quod is Habiti familiarem Iunium esse dicebat, clam uelle ferri. itum est in consilium: omnibus sententijs præter unam, quam suam Stalenus esse dicebat, Scamander prima ætione condemnatus est. quis tum erat omnium, qui Scamandro condemnato non iudicium de Oppianico factum esse arbitraretur? quid est illa damnatione iudicatum, nisi uenenum id, quod Habito daretur, esse quæsitum? quæ porro tenuissima suspicio collata in Scamandrum est, aut conferri potuit, ut is sua sponte necare uoluisse Habitum putaretur? atque hoc tum iudicio facto, & Oppianico

re, & existimatione iam, lege, & pronuntiatione non  
dum condemnato, tamen *Habitus Oppianicum reum*  
statim non fecit: uoluit cognoscere, utrum iudices in  
eos solos essent seueri, quos uenenum habuisse ipsos com  
perissent; an etiam consilia conscientiasq; eiusmodi fa  
cinorum supplicio dignas iudicarent. itaque *C. Fabri*  
*tium*, quem propter familiaritatem *Oppianici* conscium  
illi facinori fuisse arbitratur, reum statim fecit: utq;  
ei locus primus constitueretur, propter causæ coniun  
ctionem impetravit. hic tum *Fabritius* non modo ad me  
meos uicinos, & amicos *Aletrinales* non adduxit, sed  
ipse ijs neque defensoribus uti postea, neque laudatori  
bus potuit: rem enim integram hominis non alieni,  
quamuis suspiciosam, defendere, humanitatis esse pu  
tabamus; iudicatam labefactare conari, impudentiæ.  
itaque tum ille inopia & necessitate coactus, in causa  
eiusmodi ad *Cepasios* fratres confugit, homines indu  
strios, atque eo animo, ut, quæcunque dicendi pote  
stas esset data, in honore, atque in beneficio ponerent.  
iam hoc quoque prope iniquissime comparatum est;  
quod in morbis corporis, ut quisque est difficillimus, ita  
medicus nobilissimus, atque optimus queritur; in pe  
riculis capitis, ut quæque causa difficillima est, ita de  
terrimus obscurissimusq; patronus adhibetur. nisi forte  
hæc causa est, quod medici nihil præter artificium, ora  
tores etiam auctoritatem præstare debent. citatur reus;  
agitur causa: paucis uerbis accusat, ut de re iudicata,  
*Canutius*. incipit longo, & alte petito proæmio respon  
dere maior *Cepasius*. primo attente auditur eius oratio:  
erigebat animum iam demissum, & oppressum Op=

planicus : gaudebat ipse Fabritius : non intelligebat ;  
 animos iudicium non illius eloquentia , sed defensionis  
 impudentia commoueri . posteaquam de re coepit dice-  
 re , ad ea , quæ erant in causa , addebat etiam ipse noua  
 quædam uulnera . hoc quanquam sedulo faciebat , ta-  
 men interdum non defendere , sed præuaticari accusa-  
 tioni uidebatur . itaque cum callidissime se dicere puta-  
 ret ; & cum illa uerba grauiissima ex intimo artificio  
 deprompsisset , Respicite iudices hominum fortunas , re-  
 spicite dubios , uariosq; casus , respicite C. Fabritij sene-  
 ctutem : cum hoc , Respicite , ornandæ orationis causa  
 sæpe dixisset , respexit ipse : at C. Fabritius à subsellijs  
 demisso capite discesserat . hic iudices ridere ; stomacha-  
 ri , atque acerbe ferre patronus causam sibi eripi , & se  
 cætera de illo loco , Respicite iudices , non posse dicere :  
 nec quidquam propius est factum , quàm ut illum per-  
 sequeretur , & collo oborto ad subsellia reduceret , ut  
 reliqua posset perorare . iam tum Fabritius primum suo  
 iudicio , quod est grauissimum , deinde legis ui , & sen-  
 tentijs iudicum est condemnatus . quid est , quòd iam de  
 Oppianici causa plura dicamus ? apud eosdem iudices  
 reus est factus , cum is duobus præiudicijs iam damna-  
 tus esset : ab ijsdem autem iudicibus , qui Fabritiorum  
 damnatione de Oppianico iudicabant , locus ei primus  
 est constitutus : accusatus est criminibus grauissimis ,  
 ijs , quæ à me breuiter dicta sunt , & præterea multis ,  
 quæ ego omnia nunc omitto : accusatus est apud eos , qui  
 & Scamandrum ministrum Oppianici , & Fabritium  
 conscium maleficii condemnarant . utrum per deos im-  
 mortales magis est mirandum , quòd is condemnatus est ,

an quòd omnino respondere ausus est? quid enim illi iudices facere potuerunt? qui si innocentes Fabritios condemnassent, tamen in Oppianico sibi constare, & superioribus consentire iudicijs debuerunt. an uero illi sua per se iudicia rescinderent, cum ceteri soleant in iudicando, ne ab aliorum iudicijs discrepent, providere? et illi, qui Fabritij libertum, quia minister in maleficio fuerat; patronum, quia conscius, condemnassent: ipsum principem atque architectum sceleris absoluerent? & qui ceteros, nullo praeiudicio facto, tamen ex ipsa causa condemnassent: hunc, quem bis condemnatum iam acceperant, liberarent? tum uero illa iudicia senatoria non falsa inuidia, sed uera atque insigni turpitudine notata, atque operta dedecore, & infamia, defensionem locum nullum reliquissent. quid enim tandem illi iudices responderent, si quis ab ijs quæreretur: condemnastis Scamandrum, quo crimine? nempe, quòd Habitum per seruum medici ueneno necare uoluisset. quid Habitum morte Scamander consequeretur? nihil; sed administrator erat Oppianici. cōdemnastis C. Fabritium; quid ita? quia, cum ipse familiarissime Oppianico usus, libertus autem eius in maleficio deprehensus esset, illum expertem eius consilij fuisse non probabatur. si igitur ipsum Oppianicum bis suis iudicijs cōdemnatum absoluisent, quis tantam turpitudinem iudiciorum, quis tantam inconstantiam rerum iudicarum, quis tantam libidinem iudicum ferre potuisset? quòd si hoc uidetis, quod iam omni oratione patefactum est, illo iudicio reum condemnari, praesertim ab iisdem iudicibus, qui duo praeiudicia fecissent, necesse fuisse: simul illud uideatis necesse est,



nullam accusatori causam esse potuisse, cur iudicium  
 uellet corrumpere. quæro enim abs te Tite Aëtii, relictis  
 iam cæteris argumentis omnibus, num Fabritios quo-  
 que innocentes condemnatos existimes? num etiam illa  
 iudicia pecunia corrupta esse dicas, quibus iudicijs alter  
 à Staleno solo absolutus est, alter etiam ipse se condem-  
 nauit? age, si nocentes, cuius maleficij? nunquid præ-  
 ter uenenum quæsitum, quo Habitus necaretur, obie-  
 ctum est? nunquid aliud in illis iudicijs uersatum est,  
 præter hasce insidias Habito ab Oppianico per Fabritios  
 factas? nihil inquam aliud iudices reperietis. extat me-  
 moria: sunt tabulæ publicæ: redargue me, si mentior:  
 testium dicta recita: doce, in illorum iudicijs quid præ-  
 ter hoc uenenum Oppianici non modo in criminis, sed  
 in maledicti loco sit obiectum. multa dici possunt, quæ  
 re ita necesse fuerit iudicari: sed ego occurram expecta-  
 tioni uestræ iudices. nam etsi à uobis sic audior, ut nun-  
 quam benignius, neque attentius quenquam auditum  
 putem: tamen uocat me aliò iamdudum tacita uestra  
 expectatio, quæ mihi obloqui uidetur: Quid ergo? ne-  
 gas ne illud iudicium esse corruptum? non nego: sed,  
 ab hoc corruptum non esse, confirmo. à quo igitur est  
 corruptum? opinor, primum si incertum fuisset, quis-  
 nam exitus illius iudicij futurus esset, uerisimilius ta-  
 men esset, cum potius corrupisse, qui metuisset ne ipse  
 condemnaretur, quàm illum, qui ueritus esset, ne al-  
 ter absolueretur: deinde, cum esset nemini dubium  
 quid iudicari necesse esset, cum certe potius, qui sibi a-  
 liqua ratione diffideret, quàm eum, qui omni ratione  
 confideret: postremo, certe potius illum, qui bis apud

eos iudices offendisset, quàm illum, qui bis causam ijs probauisset. unum quidem certe, nemo erit tam iniquus Cluentio, qui mihi non concedat; si constet corruptum illud esse iudicium, aut ab Habito, aut ab Oppianico esse corruptum. si doceo, non ab Habito; uinco, ab Oppianico: si ostendo, ab Oppianico; purgo Habitum. quare etsi satis docui, rationem nullam huic corrupendi fuisse, ex quo intelligitur ab Oppianico esse corruptum: tamen de illo ipso separatim cognoscite. Atque ego illa non argumentabor, quæ sunt graui uehementer: eum corrupisse, qui in periculo fuerit; eum, qui metuerit; eum, qui spem salutis in alia ratione non habuerit; eum, qui semper singulari fuerit audacia. multa sunt eiusmodi: uerùm cum habeam rem non dubiam, sed apertam, atque manifestam, enumeratio singulorum argumentorum non est necessaria. Dico, C. Aelio Staleno iudici pecuniam grandem Statium Albium ad corrupendum iudicium dedisse. nunquis negat? te appello Oppianice, te T. Aetli: quorum alter eloquentia damnationem illam, alter tacita pietate deplorat. audete negare, ab Oppianico Staleno iudici pecuniam datam: negate, negate inquam in eo loco. quid reticetis? at negare non potestis, quod repetistis, quod confessi estis, quod abstulistis. quo tandem igitur ore mentionem corrupti iudicij facitis, cum ab ista parte iudici pecuniam ante iudicium datam, post iudicium ereptam esse fateamini? quonam igitur hæc modo gesta sunt? repetam paulo altius iudices: et omnia, quæ in diuturna obscuritate latuerunt, sic aperiam, ut ea cernere oculis uideamini. uos quaeso, ut

adhuc me attente audistis, item, quæ reliqua sunt, audiatis: profecto nihil à me dicetur, quod non dignum hoc conuentu & silentio, dignum uestris studijs, atque auribus esse uideatur. Nam ut primum Oppianicus ex eo, quod Scamander reus erat factus, quid sibi impenderet, coepit suspicari; statim se ad hominis egentis, audacis, in iudicijs corrumpendis exercitatum autem iudicis, Staleni familiaritatem applicauit. ac primum, Scamandro reo, tantum donis datis munebusq; profecerat, ut eo auctore uteretur cupidior, quam fides iudicis postulabat. post autem cum esset Scamander unius Staleni sententia absolutus, patronus autem, Scamandri ne sua quidem sententia liberatus; acrioribus saluti suæ remedijs subueniendum putauit. tum à Staleno, sicut ab homine ad excogitandum acutissimo, ad audendum impudentissimo, ad efficiendum acerrimo, (hæc enim ille & aliqua ex parte habebat, & maiore ex parte se habere simulabat) auxilium capiti & fortunis suis petere coepit. iam hoc non ignoratis iudices, ut etiam bestię fame dominante plerunque ad eum locum, ubi pastæ aliquando sint, reuertantur: Stalenus ille biennio ante, cum causam bonorum Safinij Atellæ recepisset, sexcentis millibus nummum se iudicium corrupturum esse dixerat. quæ cum acceperat à pupillo, suppressit, iudicioq; facto, nec Safinio, nec bonorum emptoribus reddidit. quam cum pecuniam profudisset, & sibi nihil non modo ad cupiditates suas, sed ne ad necessitatem quidem reliquisset, statuit ad easdem sibi prædas ac suppressiones iudiciales reuertendum. itaque cum Oppianicum iam perdi-

rum, & duobus iugulatum præiudicijs uideret, promissis eum suis excitauit abiectum, & simul saluti desperare uetuit. Oppianicus orare hominem cœpit, ut sibi rationem ostenderet iudicij corrumpendi. ille autem, quemadmodum ex ipso Oppianico postea est auditum, negauit quenquam esse in ciuitate præter se, qui id efficere posset: sed primo grauari cœpit, quòd ædilitatem se petere cum hominibus nobilissimis, & inuidiam atque offensionem timere dicebat: post exoratus, initio permagnam pecuniam poposcit, deinde ad id peruenit, quod confici potuit, & HS sexcenta quadraginta millia deferri ad se domum iussit. quæ pecunia simul atque ad eum delata est, homo impurissimus statim cœpit in eiusmodi mente & cogitatione uersari: nihil esse suis rationibus utilius, quàm Oppianicum condemnari: illo absoluto, pecuniam illam aut iudicibus dissipandam, aut ipsi esse reddendam; damnato, repetiturum esse neminem. itaque rem excogitat singularem. atque hæc iudices, quæ uere dicuntur à nobis, facilius credetis, si cum animis uestris longo interuallo recordari C. Staleni uitam & naturam uolueritis. nam perinde ut opinio est de cuiusque moribus, ita, quid ab eo factum & non factum sit, existimari potest. cum esset egens, sumptuosus, audax, callidus, perfidiosus; & cum domi suæ, miserrimus, & inanissimus, tantum nummorum positum uideret; ad omnem malitiam, & fraudem uersare mentem suam hæc secum cogitans cœpit: Dem'ne iudicibus? mihi igitur ipsi, præter periculum et infamiam, quid quæretur? nihil excogitem quamobrem



Oppianico damnari necesse sit? quid tãdem, (nihil enim est, quod fieri non possit) si quis eum forte casus ex periculo eripuerit; non ne reddendum est? præcipitantem igitur impellamus, inquit, & perditum prosternamus. capit hoc consilium, ut pecuniã quibusdam iudicibus leuissimis polliceatur, deinde eam postea supprimat: ut, quoniam graues homines, sua sponte se uere iudicaturos putabat, hos, qui leuiore erant, destitutione iratos Oppianico redderet. itaque, ut erat semper præposterus, atque peruersus, incitium facit à Bulbo, & eum, quod iandiu nihil quæsierat, tristem atque oscitantem leuiter impellit. quid tu, inquit? ecquid me adiuuas Bulbe, ne gratis reip. seruiamus? ille uero, simul atque hoc audiuit; ne gratis; quò uoles, inquit, sequar: sed quid affers? tum ei quadraginta millia, si esset absolutus Oppianicus, pollicetur, et eum, ut ceteros appelleret, quibuscum loqui consueisset, rogat: atque etiam ipse conditor totius negotij Guttam aspergit huic Bulbo. itaque minime amarus is uisus est, qui aliquid ex eius sermone speculæ degustarat. unus & alter dies intercesserat, cum res parum certa uidebatur: sequester & confirmator pecuniæ desiderabatur. tum appellat hilari uultu hominem Bulbus, ut blandissime potest: quid tu, inquit, Pacete? (hoc enim Stalenus cognomen ex imaginibus Acliorum delegerat, ne, si se Ligurem fecisset, nationis magis suæ, quàm generis uti cognomine uideretur) qua de re mecum locutus es, quærunt à me ubi sit pecunia. hic ille planus improbissimus, quæstui iudiciario pastus, qui illi pecuniæ, quam condiderat, spe iam atque animo incubaret, contrahit

frontem, (recordamini faciē, atque illos eius fictos simulatosq; uultus) queritur se ab Oppianico destitutum: & qui esset totus ex fraude & mendacio factus, quiq; ea uitia, quæ à natura habebat, etiam studio, atque artificio quodam malitiæ coniuisset, pulchre assueuerat se ab Oppianico destitutū: atque hoc addit testimonij, sua illum sententia, quam palam omnes laturi essent, condemnatum iri. manarat sermo in consilio, pecuniæ quādam mentionem inter iudices esse uersatam: res neque tam fuerat occulta, quàm erat occultanda; neque tam erat aperta, quàm reip. causa aperienda. in ea obscuritate, ac dubitatione omnium, Canutio perito homini, qui quodam odore suspicionis Staleni corruptum esse sensisset, neque dum rem perfectam arbitraretur, placuit repente iudices pronūciare. iudices, se id uelle dixerunt. hic tum Oppianicus non magnopere pertimuit: rem à Staleno perfectam esse arbitratur. in consilium erant ituri iudices triginta & duo: sententijs decem et sex absolutio confici poterat: HS quadraginta millia nummum in singulos iudices distributa eum numerum sententiarum conficere debebant, ut ad cumulum spe maiorum præmiorum ipsius Staleni sententia septimadecima accederet. atque etiam casutum, quod illud repente erat factum, Stalenus ipse non aderat, causam nescio quam apud iudicem defendebat. facile hoc Habitus patiebatur, facile Canutius. at non Oppianicus, neque patronus eius L. Quintius: qui cum esset eo tempore tribunus pl. conuictum C. Iunio iudici quæstionis maximum fecit, ut ne sine Staleno in consilium iretur: cumq; id ei per uiatores con-

fulto negligentius agi uideretur, ipse à publico iudicio  
 ad priuatum Staleni iudicium profectus est, & illud  
 pro potestate dimitti iussit; Stalenum ipse ad subsellia  
 adduxit. consurgitur in consilium, cum sententias Op-  
 pianicus, quæ tum erat potestas, palam ferri uelle di-  
 xisset, ut Stalenus scire posset, quid cuique deberetur.  
 uaria iudicum genera; nummarij pauci, sed omnes  
 irati. ut enim qui accipere in campo consueuerunt, ijs  
 candidatis, quorum nummos suppressos esse putant,  
 inimicissimi solent esse: sic eiusmodi iudices infestum  
 reo uenerant: ceteri nocentissimum esse arbitran-  
 tur; sed spectabant sententias eorum, quos corruptos  
 putabant; ut ex ijs constituerent, à quo iudicium cor-  
 ruptum uideretur. ecce tibi eiusmodi sortitio, ut in  
 primis Bulbo, & Staleno, & Guttæ esset iudican-  
 dum. summa omnium expectatio, quidnam senten-  
 tiæ ferrent leues, ac nummarij iudices. atque illi om-  
 nes sine ulla dubitatione condemnant. hic tum iniectus  
 est hominibus scrupulus, & quædam dubitatio, quid-  
 nam esset actum. deinde homines sapientes ex uetere il-  
 la disciplina iudiciorum, qui neque absoluerent hominem  
 nocentissimum possent; neque eum, de quo esset orta  
 suspicio, pecunia oppugnatum, re illa incognita primo  
 condemnare uellent; non liquere, dixerunt. nonnul-  
 li autem, seueri homines, hoc statuerunt, quo quisque  
 animo quid faceret, spectari oportere: & si alij pecu-  
 nia accepta uerum iudicabant, tamen nihilo minus se  
 superioribus suis iudicijs constare putabant oportere:  
 itaque damnarunt. quinque omnino fuerunt, qui il-  
 lum uestrum innocentem Oppianicum siue impruden-

tia, siue misericordia, siue aliqua suspitione, siue ambitione adducti absoluerent. condemnato Oppianico, statim L. Quintius, homo maxime popularis, qui omnes rumorum, & concionum uentos colligere consueisset, oblatam sibi facultatem putauit, ut ex inuidia senatoria posset crescere; quod eius ordinis iudicia minus iam probari populo arbitrabatur. habetur una atque altera concio uehemens & grauis: accepisse pecuniam iudices, ut innocentem reum condemnarent, tribunus pl. clamitabat: agi fortunas omnium dicebat, nulla esse iudicia; qui pecuniosum inimicum haberet, incolu mem esse neminem posse. homines totius ignari negotij, qui Oppianicum nunquam uidissent, uirum optimum, & hominem prudentissimum, pecunia oppressum arbitrarentur, incensi suspitione rem in medium uocare coeperunt, & causam illam totam deposcere. atque illo ipso tempore in ades T. Annij, hominis honestissimi, necessarij, et amici mei, noctu Stalenus accersitus ab Oppianico uenit. iam cetera nota sunt omnibus: ut cum illo Oppianicus egerit de pecunia: ut ille se redditurum esse dixerit: ut eorum sermonem omnem audierint uiri boni, qui tum consulto prope in occulto stetissent: ut res patefacta atque in forum prolata, & pecunia omnis a Staleno extorta, atque erepta sit. huius Staleni persona populo iam nota atque perspecta, ab nulla turpi suspitione abhorrebat: superpressam esse ab eo pecuniam, quam pro reo pronunciasset, qui erant in concione non intelligebant: neque enim docebantur: uersatam esse in iudicio mentionem pecuniae sentiebant: innocentem reum condemnatum esse



audiebant : Staleni sententia condemnatum uidebant : non gratis id ab eo factum esse, quòd hominem norant, iudicabant : similis in Bulbo, in Gutta, in alijs nonnullis suspicio consistebat . itaque confiteor , ( licet enim iam impune , hoc præsertim in loco confiteri ) quòd Oppianici non modo uita , sed etiam nomen ante illud tempus populo ignotum fuisset ; indignissimum porro uidetur, circumuentum esse innocentem pecunia; hanc dein de suspicionem auget Staleni improbitas , et nonnullorum eius similium iudicum turpitudine ; causam autem ageret L. Quintius , homo cum summa potestate præditus , tum ad inflammandos animos multitudinis accommodatus ; summam illi iudicio inuidiam , infamiamq; esse conflata . atque in hanc flammam recentem C. Iunium , qui illi quæstioni præfuerat , iniectum esse memini , et illum , hominem ædilitium , iam prætorum opinionibus hominũ constitutum , non disceptatione dicendi , sed clamore hominum de foro , atque adeo de ciuitate esse sublatum . neque me poenitet , hoc potius tempore , quàm illo , causam A. Cluentij defendere . causa enim manet eadem , quæ mutari nullo modo potest : temporis iniquitas , atque inuidia recessit ; ut , quod in tempore mali fuit , nihil obsit ; quod in causa boni fuit , prosit . itaque , nunc quemadmodũ audiar , sentio , non modo ab ijs , quorum iudiciũ atque potestas est ; sed etiam ab illis , quorum tantum est existimatio . at tum si dicere , non audirer , non quòd alia res esset , immo eadem , sed tẽpus aliud . id adeo sic cognoscite . quis tum auderet dicere , nocentem condemnatum esse Oppianicum ? quis nunc audet negare ? quis tum posset arguere , ab

Oppianico tentatum esse iudicium pecunia? quis id hoc tempore inficiari potest? cui tum liceret docere, Oppianicum reum factum esse tum denique, cum duobus proximis præiudicijs condemnatus esset? quis est, qui id hoc tempore infirmare conetur? quare inuidia remota, quam dies mitigauit, oratio mea deprecata est, uestra fides, atque æquitas à ueritatis disceptatione reiecit, quid est præterea, quod in causa relinquatur? uersa tam esse in iudicio pecuniam constat: ea, quæritur, unde profecta sit, ab accusatore, an ab reo. accusator dicit hæc: primum, grauissimis criminibus accusabam, ut nihil opus esset pecunia: deinde, condemnatum adducebam, ut ne eripi quidem pecunia posset: postremo, etiam si absolutus esset, mearum tamen omnium fortunarum status incolumis maneret. quid contra reus? primum, ipsam multitudinem & atrocitatem criminum pertimescebam: deinde, Fabritijs propter conscientiam mei sceleris condemnatis, me esse condemnatum sentiebam: postremo, in eum casum ueneram, ut omnis mearum fortunarum status unius iudicij periculo contineretur. age, quoniam corrumpendi iudicij causas ille multas, & graues habuit, hic nullam; profectio ipsius pecuniæ requiratur. Confecit tabulas diligentissime Cluentius. hæc autem res habet hoc certe, ut nihil possit neque additum, neque detractum de re familiarari latere. anni sunt octo, cum ista causa in ista meditatione uersatur: cum omnia, quæ nunc ad eam rem pertinent, & ex huius, & ex aliorum tabulis agitis, tractatis, inquiritis: cum interea Cluentianæ pecuniæ uestigium nullum inuenitis. quid? Albiana pecu-

nia uestigijs'ne uobis odoranda est, an ad ipsum cubile  
 uobis ducibus uenire possumus? tenentur uno in loco  
 HS sexcenta quadraginta millia nummum: tenentur  
 apud hominem audacissimum: tenentur apud iudi-  
 cem. quid uultis amplius? at enim Stalenus non fuit  
 ab Oppianico, sed à Cluentio ad iudicium corruppen-  
 dum constitutus. cur eum, cum in consilium iretur,  
 Cluentius & Canutius abesse patiebantur? cum in  
 consilium mittebant, Stalenum iudicem, cui pecuniam  
 dederant, non requirebant? Oppianicus quærebat?  
 Quintius flagitabat? sine Staleno ne in consilium ire-  
 tur, tribunitia potestate perfectum est? at condemna-  
 uit. hanc enim damnationem dederat obsidem Bulbo,  
 et cæteris, ut destitutus ab Oppianico uideretur. Qua-  
 re si istinc causa corrumpendi iudicij, istinc pecunia,  
 istinc Stalenus, istinc denique omnis fraus & audacia  
 est; hinc pudor, honesta uita, & nulla suspicio pecu-  
 niæ, nulla corrumpendi iudicij causa: patiamini, ueri-  
 tate patefacta, atque omni errore sublato, eò transire il-  
 lius turpitudinis infamiam, ubi cætera maleficia consi-  
 stant; ab eo inuidiam discedere aliquando, ad quem  
 nunquam accessisse culpam uidetis. at enim pecuniam  
 Staleno dedit Oppianicus, non ad corrumpendum iudi-  
 cium, sed ad conciliationem gratiæ. téne hoc Aeli di-  
 cere, tali prudentia, et iam usu atque exercitatione præ-  
 ditum? sapientissimum esse dicunt eum, cui, quod opus  
 sit, ipsi ueniat in mentem; proxime accedere illum, qui  
 alterius bene inuentis obtemperet. in stultitia contra  
 est: minus enim stultus est is, cui nihil in mentem ue-  
 nit; quàm ille, qui, quod stulte alteri uenit in men-

tem, comprobat. istam conciliationem gratiæ Stalenus  
tum recenti. re, cum faucibus premeretur, excogita-  
uit: siue, ut homines tum loquebantur, à P. Cethe-  
go admonitus, istam dedit conciliationis & gratiæ fa-  
bulam: nam fuisse hunc hominum sermonem recor-  
dari potestis, Cethegum, quòd hominem odisset, &  
quòd eius improbitatem uersari in rep. nollet, & quòd  
uideret eum, qui se ab reo pecuniam, cum iudex es-  
set, clam atque extra ordinem accepisse confessus es-  
set, saluum esse non posse, minus ei fidele consilium  
dedisse. in hoc si improbus Cethegus fuit, uidetur mi-  
hi aduersarium remouere uoluisse. sin erat eiusmodi  
causa, ut Stalenus, num. mos se accepisse, negare non  
posset; nihil autem erat periculosius, nec turpius,  
quàm, ad quam rem accepisset, confiteri: non est con-  
silium Cethegi reprehendendum. uerum alia causa.  
tum Staleni fuit, alia nunc Acti tua est. ille, cum re  
premeretur, quodcunque diceret, honestius diceret,  
quàm si, quod erat factum, fateretur: te uero illud  
idem, quod tum explosum & eiectum est, nunc retin-  
uisse demiror. qui enim poterat tum in gratiam redire  
cum Oppianico Cluentius? qui cum matre habebat si-  
multates: hærebat in tabulis publicis reus & accusa-  
tor: condemnati erant Fabricij: nec elabi alio accusa-  
tore poterat Albius, nec sine ignominia calumniæ re-  
linquere accusationem Cluentius. an, ut præuarias-  
retur? iam id quoque ad corrumpendum iudicium  
pertinet. sed quid opus erat ad eam rem iudice seque-  
stre? & omnino, quamobrem tota ista res per Sta-  
lenum potius, hominem ab utroque alienissimum,



sordidissimum, turpissimum, quàm per bonum ali-  
 quem uirum ageretur, & amicum, necessariumq;  
 communem? Sed quid ego hæc pluribus, quasi de re  
 obscura, disputo? cum ipsa pecunia, quæ Staleno da-  
 ta est, numero ac summa sua, non modo quanta fue-  
 rit, sed etiam ad quam rem data fuerit, ostendat. Sex-  
 decim dico iudices, ut Oppianicus absolueretur, corrup-  
 pendorum fuisse; ad Stalenum sexcenta & quadraginta  
 millia nummum esse delata: si, ut tu dicis, gratiæ con-  
 ciliandæ causa; quadraginta istorum accessio millium  
 quid ualeat? sin, ut nos dicimus, ut DCXL millia  
 nummum sexdecim iudicibus darentur; non Archime-  
 des melius potuit describere. At enim iudicia facta per-  
 multa sunt, à Cluentio iudicium esse corruptum. immo  
 uero ante hoc tempus omnino ista ipsa res suo nomine  
 in iudicium nunquam est uocata: ita multum agita-  
 ta, ita diu iactata ista res est, ut hodierno die primum  
 causa illa defensa sit, hodierno die primum ueritas uo-  
 cem contra inuidiam his iudicibus freta miserit. uerun-  
 tamen multa ista iudicia quæ sunt? ego enim me ad  
 omnia confirmaui, & sic parauì, ut docerem, quæ fa-  
 cta postea iudicia de illo iudicio dicerentur, partim rui-  
 næ similia, aut tempestati, quàm iudicio, & disce-  
 ptationi fuisse; partim nihil contra Habitum ualere;  
 partim etiam pro hoc esse; partim esse eiusmodi, ut ne-  
 que appellata unquam iudicia sint, neque existimata.  
 hic ego, magis ut consuetudinem seruem, quàm quòd  
 uos non uestra hoc sponte faciat, petam à uobis, ut  
 me, dum de his singulis disputo iudicijs, attente audia-  
 tis. Condemnatus est C. Iunius, qui ei quæstioni præ-

fuerat. adde etiam illud, si placet: tum est condes-  
 mnatus, cum esset iudex quæstionis. non modo causæ,  
 sed ne legi quidem quidquam per tribunum pl. laxa-  
 menti datum est. quo tempore illum à quæstione ad nul-  
 lum aliud reip. munus abduci licebat, eo tempore ad  
 quæstionem ipse abreptus est. at quam quæstionem?  
 uultus enim uestri iudices me inuitant, ut, quæ reticen-  
 da putaram, libeat iam libere dicere. quid? illa tan-  
 dem quæstio, aut disceptatio, aut iudicium fuit? pu-  
 tabo fuisse. dicat, qui uult, hodie, de illo populo conci-  
 tato, cui tum mos gestus est, qua de re Iunius causam  
 dixerit. quemcunque rogaris, hoc respondebit, quòd  
 pecuniam acceperit, quòd innocentem circumuenerit.  
 est hæc opinio. at si ita esset, hac lege accusatum esse  
 oportuit, qua accusatur Habitus: at ipse ea lege quæ-  
 rebat. paucos dies expectasset Quintius: at neque pri-  
 uatus accusare, nec sedata iam inuidia uolebat. uide-  
 tis igitur, non in causa, sed in tempore, ac potestate  
 spem omnem accusatoris fuisse. multam petiuit: qua  
 lege? quòd in legem non iurasset; quæ res nemini un-  
 quam fraudi fuit: & quòd C. Verres prætor urbanus,  
 homo sanctus, & diligens, subfortitionem eius in eo  
 codice non haberet, qui tum interlitus proferbatur.  
 his de causis C. Iunius condemnatus est iudices, leuissi-  
 mis, & infirmis, quas omnino in iudicium affer-  
 ri non oportuit: itaque oppressus est non causa, sed tem-  
 pore. hoc uos Cluentio iudicium putatis obesse oportere?  
 quam ob causam? si ex lege subfortitus non erat. Iu-  
 nius, aut si in legem aliquando non iurauerat, iccirco  
 illius damnatione aliquid de Cluentio indicabatur?

non, inquit : sed ille iccirco his legibus condemnatus est, quòd contra aliam legem commiserat. qui hoc confitentur, possunt, illud idem iudicium non fuisse, defendere. ergo iccirco, inquit, infestus tum prætör Iunio fuit, quòd illud iudicium corruptum per eum putabatur. num igitur hoc tempore causa mutata est ? num alia res, alia ratio illius iudicij, alia natura totius negotij nunc est, ac tum fuit ? non opinor ex ijs rebus, quæ gestæ sunt, rem ullam potuisse mutari. quid ergo est causæ, quòd nunc nostra defensio audiatür tanto silentio, tunc Iunio defendendi sui potestas erepta sit ? quia tum in causa nihil erat præter inuidiam, errorem, suspicionem, conciones quotidianas, seditiose ac populariter concitatas. accusabat tribunus pl. idem in concionibus, idem ad subsellia : ad iudicium non modo de concione, sed etiam cum ipsa concione ueniebat. grædus illi Aurelij tum noui, quasi pro theatro illi iudicio ædificati uidebantur : quos ubi accusator concitatis hominibus complerat, non modo dicendi ab reo, sed ne surgendi quidem potestas erat. nuper apud C. Orchinium, collegam meum, locus ab iudicibus Fausto Syllæ de pecunijs residuis non est constitutus : non quo illi aut ex legem esse Syllam, aut causam pecuniæ publicæ contemptam atque abiectam putarent : sed quòd accusante tribuno pl. conditione æqua disceptari posse non putauerunt. quid ? conferam Syllam ne cum Iunio, an hunc tribunum pl. cum Quintio, an uero tempus cum tempore ? Sylla maximis opibus, cognatis, affinibus, necessarijs, clientibus plurimis : hæc autem apud Iunium parua, & infirma, & ipsius labore quæsita,

atque collecta . hic tribunus pl. modestus, pudens, non modo non seditiosus, sed etiam seditiosis aduersarius : ille autem acerbus, criminosus, popularis homo, ac turbulentus. tempus hoc tranquillum, ac pacatum : illud omnibus inuidiæ tempestatibus concitatum . quæ cum ita essent, in Fausto tamen illi iudices statuerunt, iniqua conditione reum causam dicere, cum aduersario eius ad ius accusationis summa uis potestatis accederet. quam quidem rationem uos iudices diligenter pro uestra sapientia, & humanitate cogitare, & penitus perspicere debetis, quid mali, quantum periculi unicuique nostrum inferre possit uis tribunicia, conflatæ præsertim inuidia, & concionibus seditiose concitatis. optimis herde temporibus, tum cum homines se non iactatione populari, sed dignitate, atque innocentia tuebantur, tamen nec C. Popillius, nec Q. Metellus, clarissimi atque amplissimi uiri, uim tribuniciam sustinere potuerunt, nedum his temporibus, his moribus, his magistratibus sine uestra sapientia ac iudiciorum remedijs salui esse possimus. non fuit igitur illud iudicium iudicij simile iudices, non fuit ; in quo non modus est adhibitus, non mos consuetudoq; seruata, non causa defensa. uis illa fuit, & ut sæpe iam dixi, ruina quædam, atque tempestas, et quid uis potius, quàm iudicium, aut disceptatio, aut quæstio. quòd si quis est, qui illud iudicium fuisse arbitretur, & qui his rebus iudicatis standum putet : is tamen hanc causam ab illa debet seiungere . ab illo enim, siue quòd in legem non iurasset, siue quòd ex lege subsortitus iudicem non esset, multa petita esse dicitur : Cluentij autem ra-



tio cum illis legibus, quibus ab Iunio multa petita est,  
 nulla potest ex parte esse coniuncta. At etiam Bulbus  
 est condemnatus. adde, maiestatis: ut intelligas hoc  
 iudicium cum illo non esse coniunctum. at est hoc illi  
 crimen obiectum. fateor: sed etiam legionem esse ab eo  
 sollicitatam in Illyrico, C. Cosconij literis, & multorum  
 testimonijs planum factum est: quod crimen erat pro-  
 prium illius quæstionis, & quæ res lege maiestatis te-  
 nebatur. at hoc obfuit ei maxime. iam ista diuinatio  
 est: quæ si uilicet, uide ne mea coniectura multo sit  
 uerior: ego enim sic arbitror, Bulbum, quod homo  
 nequam, turpis, improbus, multis flagitijs contami-  
 natus in iudicium sit adductus, idcirco facilius esse dam-  
 natum. tu mihi ex tota causa Bulbi, quod tibi commo-  
 dum est, elizis, ut id esse secutos indices dicas. quapro-  
 pter hoc Bulbi iudicium non plus obesse huic causæ de-  
 bet, quàm illa, quæ commemorata sunt ab accusatore,  
 duo iudicia, P. Popilij & T. Guttæ, qui causam de am-  
 bitu dixerunt, qui accusati sunt ab ijs, qui erant ipsi  
 ambitus condemnati: quos ego non idcirco esse arbitror  
 in integrum restitutos, quod planum fecerint, illos ob  
 rem iudicandam pecuniam accepisse; sed quod iudici-  
 bus probarint, quod in eodem genere, in quo ipsi offen-  
 dissent, alios reprehendissent, se ad præmia legis ue-  
 nire oportere. quapropter neminem dubitare existimo,  
 quin illa damnatio ambitus nulla ex parte cum causa  
 Cluentij, uestroq; iudicio coniuncta esse possit. Quid,  
 quod Stalenus est condemnatus? non dico hoc tempore  
 indices, id quod nescio an dici oporteat, illum maiesta-  
 tis esse damnatum: non recito testimonia hominum ho-  
 nestissimorum,

nestissimorum, quæ in Stalenum sunt dicta ab ijs, qui  
M. Aemilio, clarissimo, uiro legati, et præfecti, & tri-  
buni militares fuerunt: quorum testimonijs planum  
factum est, maxime eius opera, cum quæstor es-  
set, in exercitu seditionem esse conflata. ne illa qui-  
dem testimonia recito, quæ dicta sunt de HS DC milli-  
bus: quæ ille cum accepisset nomine iudicij Safiniani,  
sicut in Oppianici iudicio, postea retinuit atque sup-  
pressit. omitto & hæc, et alia permulta, quæ illo iu-  
dicio in Stalenum dicta sunt. hoc dico, eandem tum  
fuisse P. et L. Cominijs, equitibus R. honestissimis ho-  
minibus, et disertis, controuersiam cum Staleno, quem  
accusabant, quæ nunc mihi est cum Aëtio. Cominijs  
dicebant idem, quod ego dico; Stalenum ab Oppianico  
pecuniam accepisse, ut iudicium corrumpere. Stale-  
nus conciliandæ gratiæ causa se accepisse dicebat. irri-  
debatur hæc illius reconciliatio, & persona uiri boni  
suscepta, sicut in statuis inauratis, quas posuit ad lu-  
turnæ: quibus subscripsit, reges ab se in gratiam esse  
reduktos: exagitabantur omnes eius fraudes, atque  
fallaciæ: tota uita in eiusmodi ratione uersata aperie-  
batur: egestas domestica, quæstus forensis in medium  
proferebatur, nummarius interpret pacis & concor-  
diæ non probabatur: itaque tum Stalenus, cum idem  
defenderet quod Aëtius, condemnatus est: Cominijs,  
cum hoc agerent, quod nos in tota causa egimus, pro-  
bauerunt. quamobrem si Staleni damnatione, Oppia-  
nicum iudicium corrumpere uoluisset, oppianicum iu-  
dici ad emendas sententias dedisset pecuniã, iudicatum  
est; cum ita constitutum sit, uti in illa culpa aut Cluen

tius sit, aut Oppianicus; Cluentij nummus nullus iudici datus ullo uestigio reperitur; Oppianici pecunia post iudicium factum à iudice ablata est: potest esse dubium, quin iūa damnatio Staleni non modo non sit contra Cluentium, sed maxime nostram causam defensionemq; confirmet? ergo adhuc Iunij iudicium uideo esse eiusmodi, ut incursionem potius seditionis, uim multitudinis, impetum tribunicium, quàm iudicium, appellandum putem. quod si quis illud iudicium appellet, tamen hoc confiteatur necesse est, nullo modo illam multam, quæ à Iunio petita sit, cum Cluentij causa posse coniungi. illud igitur Iunianum per uim factum est; Bulbi, & Popillij, et Guttae contra Cluentium non est; Staleni etiam pro Cluentio. Videamus, ecquod aliud iudicium, quod pro Cluentio sit, proferre possimus. Dixit'ne tandem causam C. Fidiculanus Falcula? qui Oppianicum condemnarat: cum praesertim, id quod fuit in illo iudicio inuidiosissimum, post paucos dies ex subfortitione sedisset. dixit, & bis quidem dixit: in summam enim L. Quintius inuidiam concionibus eum quotidianis, seditiosis, & turbulentis adduxerat. uno iudicio multa est ab eo petita, sicut ab Iunio, quod non suæ decuriæ munere, neque ex lege sedisset. paulo sedatiore tempore est accusatus, quàm Iunius, sed eadem fere lege, & crimine. quia nulla in iudicio seditio, neque turba uersata est, prima actione facillime est absolutus. non numero hanc absolutionem: nihilo minus enim potest, ut illam multam non commiserit, accepisse tamen ob rem iudicandam pecuniam, quam captam nusquam Stalenus eadem lege dixit. proprium

crimen illud quæstionis eius non fuit. Fidiculanus  
quid fecisse dicebatur? accepisse à Cluentio HS CCCC.  
cuius erat ordinis? senatorij. quæ lege in eo genere à  
senatore ratio repeti solet, de pecunijs repetundis, ea  
lege accusatus, honestissime est absolutus. acta est enim  
causa more maiorum, sine vi, sine metu, sine peri-  
culo: dicta, & exposita, & demonstrata sunt omnia:  
adducti iudices sunt, non modo potuisse honeste ab eo  
reum condemnari, qui non perpetuo sedisset, sed, si  
aliud is iudex nihil scisset, nisi quæ præiudicia de eo  
facta esse constaret, audire præterea nihil debuisse. tum  
etiam illi quinque, qui imperitorum hominum rumu-  
sculos aucupati, tum illum absoluerunt, iam suam  
clementiam laudari magnopere nolebant. à quibus si  
qui quæreret, sedissent ne iudices in C. Fabricium: se-  
disse se dicerent. si interrogarentur, num quo crimi-  
ne is esset accusatus, præterquam ueneni eius, quod  
quæsitum Habito diceretur: negarent. si deinde es-  
sent rogati, quid iudicassent: condemnasse se dice-  
rent: nemo enim absoluit. eodem modo quæsitum si  
esset de Scamandro, certe idem respondissent: tametsi  
ille una sententia est absolutus: sed illam unam nemo  
tum istorum suam dici uellet. uter igitur facilius suæ  
sententiæ rationem redderet? isne, qui se & sibi, &  
rei indicatæ constitisse dicit; an ille, qui se in princi-  
pem maleficij lenem, in adiutores eius, & consocios ue-  
hementissimum esse respondit? quorum ego de sen-  
tentia non debeo disputare: neque enim dubito, quin  
ij tales uiri suspitione aliqua percussi repentina, de  
statu suo declinarent. quare eorum, qui absolue-



runt, misericordiam non reprehendo: eorum, qui in iudicando superiora iudicia secuti sunt sua sponte, non staleri fraude, constantiam comprobo: eorum uero, qui sibi non liquere dixerunt, sapientiam laudo: qui absolvere eum, quem nocentissimum cognorant, et quem ipsi bis iam antea condemnarant, nullo modo poterant; condemnare, cum tanta consilij infamia, & tam atrocis rei suspicio esset iniecta, paulo posterius, patefacta re, maluerunt. ac ne ex facto solum sapientes illos iudicetis, sed etiam ex nominibus ipsis, quod ij fecerint, rectissime, ac sapientissime factum probetis: quis P. Octauio Balbo ingenio prudentior, iure peritior, fide, religione, officio diligentior, aut sanctior commemorari potest? non absoluit. quis Q. Considio constantior? quis iudiciorum, atque eius dignitatis, quæ in iudicijs publicis uersari debet, peritior? quis uirtute, consilio, auctoritate præstantior? ne is quidem absoluit. longum est de singulorum uirtute ita dicere. quæ quia cognita sunt ab omnibus, uerborum ornamenta non quærunt. qualis uir M. Iuuenius Peto fuit ex uetere illa iudicum disciplina? qualis L. Cauius Mergus? M. Basilius? C. Caudinus? qui omnes in iudicijs publicis iam tñ florente rep. floruerunt. ex eodem numero L. Cassius, Cn. Neuius, pari et integritate, & prudentia: quorum nullius sententia est Oppianicus absolutus. atque ex his omnibus natu minimus, ingenio, & diligentia, et religione par ijs, quos antea commemorauimus, P. Saturius in eadem sententia fuit. ò innocentiam Oppianici singularem: quo in reo, qui absoluit, ambitiosus; qui distulit, cautus; qui

condemnavit, constans existimatur. hæc tum, agitante Quintio, neque in concione, neque in iudicio demonstrata sunt: neque enim ipse dici patiebatur, nec per multitudinem concitatam consistere cuiquam in dicendo licebat. itaque ipse, postquam Iunium pervererat, causam totam reliquit: paucis enim diebus illis, et ipse priuatus est factus, et hominum studia defervuisse intelligebat. quod si, per quos dies Iunium accusavit, Fidiculanium accusare voluisset: respondendi Fidiculanio potestas facta non esset. ac primo quidem, omnibus illis iudicibus, qui Oppianicum condemnarant, minabatur. iam insolentiam noratis hominis, noratis animos eius, ac spiritus tribunicios. quod erat odium, dii immortales? quæ superbia? quanta ignoratio sui? quam gravis, atque intolerabilis arrogantia? qui illud etiam ipsum acerbe tulerit, ex quo illa nata sunt omnia, non sibi ac defensionis suæ condonatum esse Oppianicum: proinde quasi non satis signi esse debuerit, ab omnibus eum fuisse desertum, qui se ad patronum illum contulisset. erat enim Romæ summa copia patronorum, hominum eloquentissimorum, atque amplissimorum: quorum certe aliquis defendisset equitem R. in municipio suo nobilem, si honeste putasset eiusmodi causam posse defendi. nam Quintius quidem quam causam unquam antea dixerat, cum annos ad quinquaginta natus esset? quis eum unquam non modo in patroni, sed in laudatoris, aut advocati loco viderat? qui, quod Rostra iandiu uacua, locumque illum post, aduentum L. Syllæ à tribunicia voce desertum, oppresserat, multitudinemque;

iam desuetam à concionibus ad ueteris consuetudi-  
 nis similitudinem reuocauerat; ideo cuidam homi-  
 num generi paulisper iucundior fuit. atque idem quan-  
 to in odio postea suis illis ipsis fuit, per quos in altiore  
 locum ascenderat? neque iniuria: facite enim, ut non  
 solum mores eius, & arrogantiam, sed etiam uul-  
 tum, atque amictum, atque illam usque ad talos de-  
 missam purpuram recordemini. is, quasi non esset ul-  
 lo modo ferendum, se ex iudicio discessisse uictum,  
rem ab subsellijs in Rostra detulit: & iam querimur,  
 sæpe hominibus nouis non satis magnos in hac ciuita-  
 te esse fructus? nego usquam unquam fuisse maiores.  
 ubi, si quis, ignobili loco natus, ita uiuat, ut nobilita-  
 tis dignitatem uirtute tueri posse uideatur; usque eò  
 peruenit, quoad eum industria cum innocentia prose-  
 cuta est. si quis autem hoc uno nititur, quòd sit igno-  
 bilis; procedit sæpe longius, quàm si idem ille esset cum  
 ijsdem suis uitijs nobilissimus. ut Quintius (nihil enim  
 dicam de cæteris) si fuisset homo nobilis, quis eum cum  
 illa superbia, atque intolerantia ferre potuisset? quòd  
 eo loco fuit, ita tulerunt, ut, si quid haberet à natu-  
 ra boni, prodesse ei putarent oportere; superbiam au-  
 tem atque arrogantiam eius deridendam magis arbi-  
 trarentur propter humilitatem hominis, quàm perti-  
 mescendam. Sed, ut illuc reuertar: quo tempore Fi-  
 diculanius est absolutus, tu, qui ea iudicia facta com-  
 memoras, quæro quid tum esse existimas iudicatum?  
 certe, gratis iudicasse. at condemnarat: at causam to-  
 tam non audierat: at in concionibus omnibus à L. Quin-  
 tio uehementer erat & sæpe uexatus. illa igitur om-

nia Quintiana iniqua, falsa, turbulenta, popularia, seditiosa iudicia fuerunt. esto, potuit esse innocens Falcula: iam ergo aliquis Oppianicum gratis condemnauit: iam non eos Iunius subfortitus est, qui pecunia accepta condemnarent: iam potuit aliquis ab initio non sedisse, & tamen Oppianicum gratis condemnasse. uerum si innocens Falcula, quæso quis innocens? si hic gratis condemnauit, quis accepit? nego, rem esse ullam in quenquam illorum obiectam, quæ Fidiculanio obiecta non sit; neque aliquid fuisse in Fidiculani causa, quod idem non esset in cæterorum. aut hoc iudicium reprehendas tu, cuius accusatio rebus iudicatis niti uidebatur; necesse est: aut; si hoc uerum esse concedis, Oppianicum gratis condemnatum esse fateare. quanquam satis magno argumento esse debet, quod ex tam multis iudiciis, absoluto Falcula, nemo reus factus est. quid enim mihi damnatos ambitus colligitis, alia lege, certis criminibus, plurimis testibus? cum primum illi ipsi debuerint potius accusari de pecunijs repetundis, quàm ambitus. nam si in ambitus iudicijs hoc his obfuit, cum alia lege causam dicerent: certe, si propria lege huius peccati adducti essent, multo plus obfuisse. deinde, si tanta uis fuit istius criminis, ut qua quisque lege ex illis iudiciis reus factus esset, tamen hac plaga periret: cur in tanta multitudine accusatorum, tantis præmijs cæteri rei facti non sunt? Hic profertur id, quod iudicium appellari non oportet; P. Septimio Scæuolæ litem eo nomine esse æstimatam. cuius rei quæ consuetudo sit, quoniam apud homines peritissimos diff



co, pluribus uerbis docere non debeo: nunquam enim ea diligentia, quæ solet adhiberi in cæteris iudicijs, eadem reo damnato adhibita est. in litibus æstimandis fere iudices aut, quod sibi eum, quem semel condemnarunt, inimicum putant esse; si qua in eum lis capitis illata est, non admittunt: aut, quod se perfunctos iam esse arbitrantur, cum de reo iudicarunt, negligentius attendunt cætera. itaque & maiestatis absoluti sunt permulti, quibus damnatis de pecunijs repetundis lites essent æstimatæ: et hæc quotidie fieri uidemus, ut, reo damnato de pecunijs repetundis, ad quos peruenisse pecunias in litibus æstimandis statutum sit, eos illi iudices absoluant. quodcum fit, non iudicia rescinduntur, sed hoc statuitur, æstimationem litium non esse iudicium. scæuola condemnatus est alijs criminibus, frequentissimis Apulie testibus: omni contentione pugnatum est, ut lis hæc capitis, æstimaretur: quæ res si rei iudicatæ pondus habuisset, ille postea uel iisdem, uel alijs inimicis reus hac lege ipsa factus esset. Sequitur id, quod illi iudicium appellant, maiores autem nostri nunquam, neque iudicium nominarunt, neque perinde ut rem iudicatam obseruauerunt, animaduersio, atque auctoritas censoria. quæ de re antequam dicere incipio, per pauca mihi de meo officio uerba facienda sunt, ut à me cum huiusce periculi, tum cæterorum quoque officiorum, et amicitiarum ratio conseruata esse uideatur. nam mihi cum uiris fortibus, qui censores proxime fuerunt, amobus est amicitia, cum altero uero, sicuti & plerique uestrum sciunt, magnus usus, & summa utriusque

officijs constituta necessitudo est . quare quidquid de subscriptionibus eorum mihi dicendum erit , eo dicam animo , ut omnem orationem meam non de illorum facto , sed de ratione censoria habitam existimari uelim : à Lentulo autem familiari meo , qui à me pro eximia sua uirtute , summisq; honoribus , quos à populo R. adeptus est , honoris causa nominatur , facile hoc iudices impetrabo , ut , quam ipse adhibere consuevit in amicorum periculis fidem , & diligentiam , tum uim animi , libertatemq; dicendi , in hac mihi concedat , ut tantum mihi sumam , quantum sine huius periculo præterire non possum . à me tamen , ut æquum est , omnia cæute , pedetentimq; dicentur ; ut neque fides huius defensionis relicta , neque cuiusquam aut dignitas læsa , aut amicitia uiolata esse uideatur . Video igitur iudices , animaduertisse censores in iudices quosdam illius consilij Iuniani , cum istam ipsam causam subscriberent . hic primum illud commune proponam , nunquam animaduersionibus censorijs hanc ciuitatem ita contentam , ut rebus iudicatis , fuisse . neque in re nota consumam tempus exemplis : ponam illud unum ; C. Getam , cum à L. Metello , & Cn. Domitio censoribus ex senatu eiectus esset , censorem ipsum postea esse factum ; & , cuius mores à censoribus erant reprehensi , hunc postea & populi R. & eorum , qui in ipsum animaduertierant , moribus præfuisse . quòd si illud iudicium putaretur : ut cæteri turpi iudicio damnati in perpetuum omni honore ac dignitate priuantur , sic hominibus ignominia notatis neque ad honorem aditus , neque in curiam reditus esset . nunc si quem Cn. Lentuli , aut L. Gellij liber=

tus furti condemnarit, is omnibus ornamentis amissis nunquam ullam honestatis suæ partem recuperabit. quos autem ipse L. Gellius, & Cn. Lentulus duo censores, clarissimi uiri, sapientissimiq; homines, furti, & captarum pecuniarum nomine notauerunt, ij non modo in senatum redierunt, sed etiam illarum ipsarum rerum iudicijs absoluti sunt. neminem uoluerunt maiores nostri non modo de existimatione cuiusquam, sed ne pecuniaria quidem de re minima esse iudicem, nisi qui inter aduersarios conuenisset. quapropter in omnibus legibus, quibus exceptum est, de quibus causis aut magistratum capere non liceat, aut iudicem legi, aut alterum accusare, hæc ignominie causa prætermissa est: timoris enim causam, non uitæ poenam in illa potestate esse uoluerunt. itaque non solum iudices illud ostendam, quod iam uidetis, populi R. suffragijs sæpenumero censorias subscriptiones esse deletas, uerum etiam iudicijs eorum, qui iurati statuere maiore cum religione & diligentia debuerunt. Primum iudices, senatores, equitesq; R. in compluribus iam reis, quos contra leges pecunias accepisse subscriptum est, suæ potius religioni, quàm censorum opinioni paruerunt. deinde prætores urbani, qui iurati debent optimum quenque in selectos iudices referre, nunquam sibi ad eam rem censoriam ignominiam impedimento esse oportere duxerunt. censores denique ipsi sæpenumero superiorum censorum iudicijs (si ista iudicia appellari uultis) non steterunt. atque etiam ipsi inter se censores sua iudicia tanti esse arbitrantur, ut alter alterius iudicium non modo reprehendat, sed etiam rescindat; ut alter de se=

natu mouere uelit, alter retineat, & ordine amplissi-  
 mo dignum existimet; ut alter in ararios referri, aut  
 tribu moueri iubeat, alter uetet. quare qui uobis in  
 mentem uenit, hæc appellare iudicia, quæ à populo R.  
 rescindi, ab iuratis iudicibus repudiari, à magistrati-  
 bus negligi, ab ijs, qui eandem potestatem adepti sunt,  
 commutari, inter collegas discrepare uideatis? quæ cum  
 ita sint, uideamus quid tandem censores de illo iudicio  
 corrupto iudicasse dicantur. Ac primum illud statu-  
 mus; utrum, quia censores subscripserint, ita sit; an,  
 quia ita fuerit, illi subscripserint. si ideo, quia subscri-  
 pserint: uidete, quid agatis; ne in unumquenque no-  
 strum censoribus in posterum potestatem permittatis;  
 ne subscriptio censoria non minus calamitatis ciuitati-  
 bus, quam illa acerbissima proscriptio possit afferre;  
 ne censorium stylum, cuius mucronem multis remedijs  
 maiores nostri reuiderunt, æque posthac, atque illum  
 dictatorium gladium, pertimescamus. sin autem,  
 quod subscriptum est, quia uerum est, ideo graue  
 debet esse: hoc quaeramus, uerum sit, an falsum; re-  
 moueantur auctoritates censoriæ; tollatur id ex cau-  
 sa, quod in causa non est. doce quam pecuniam Cluenti-  
 tius dederit, unde dederit, quemadmodum dederit:  
 unum denique aliquod à Cluentio profectæ pecuniæ ue-  
 stigium ostende. uince deinde uirum bonum fuisse Op-  
 pianicum, hominem integrum, nihil de illo unquam  
 secus esse existimatum, nihil denique præiudicatum:  
 tum auctoritatem censorum amplexato, tum illorum  
 iudicium cum re coniunctum esse defendito. dum ue-  
 ro cum fuisse Oppianicum constabit, qui tabulas publi-



cas municipij sui corrupisse iudicatus sit ; qui testamentum interleuerit ; qui supposita persona falsum testamentum obsignandum curarit ; qui eum, cuius nomine id obsignatum est , interfecerit ; qui auunculum filij sui in seruitute , ac uinculis necarit ; qui municipes suos proscribendos, occidendosq; curarit ; qui eius uxorem, quem occiderat , in matrimonium duxerit ; qui pecuniam pro abortione dederit ; qui socrum, qui uxorem, qui uno tempore fratris uxorem , speratosq; liberos , fratremq; ipsum , qui denique suos liberos interfecerit ; qui, cum uenenum priuigno suo quæreret, manifesto sit deprehensus ; cuius ministris conscijsq; damnatis, ipse adductus in iudicium pecuniam iudici dederit ad sententias iudicum corrupendas : dum hæc inquam de Oppianico constabunt , nec ullo argumento Cluentianæ pecuniæ crimen tenebitur, quid est quòd te ista censoria siue uoluntas, siue opinio fuit, adiuuare, aut hunc innocentem opprimere posse uideatur ? quid igitur censores secuti sunt ? ne ipsi quidem , ut grauissime dicam , quidquam aliud dicent, præter sermonem atque famam . nihil se testibus , nihil tabulis, nihil graui aliquo argumento comperisse , nihil denique causa cognita statuuisse dicent . quòd si ita fecissent, tamen id non ita fixum esse deberet , ut conuelli non liceret . non utar exemplorum copia , quæ summa est : non rem ueterem , non hominem potentem aliquem , aut gratiosum proferam . nuper hominem tenuem, scribam ædilicium, D. Matrinium cum defendissem apud M. Iunium , Q. Publicium prætores, & M. Pletorium , C. Flaminium ædiles curules , persuasi ut



scribam iurati legerent eum, quem iſdem iſti cenſores  
ærarium reliquiſſent. cum enim in homine nulla cul-  
pa reperiretur; quid ille meruiſſet, non quid de eo ſta-  
tutum eſſet, quærendum eſſe duxerunt. nam hæc  
quidem, quæ de iudicio corrupto ſubſcripſerint, quis eſt,  
qui ab illis ſatis cognita & diligenter iudicata arbitre-  
tur? in M. Aquillium, & in T. Guttam uideo eſſe ſub-  
ſcriptum. quid eſt hoc? duos eſſe corruptos ſolos pecu-  
nia? quid? cæteri uidelicet gratis condemnarunt. non  
eſt igitur circumuentus, non eſt oppreſſus pecunia;  
non, ut illæ Quintianæ conciones habebantur, omnes,  
qui Oppianicum condemnarunt, in culpa ſunt, ac ſu-  
ſpicionem ponendi. duos ſolos uideo auctoritate cenſo-  
rum affines ei turpitudini iudicari. nam, ut illud aſ-  
ſerant, nihil eſt; quod de ijs duobus habuerint comper-  
tum, de cæteris comperiſſe. nam illud quidem mini-  
me probandum eſt, ad notationes auctoritatemq; cen-  
ſoriam exemplum illos à conſuetudine militari tranſtu-  
liſſe. ſtatuerunt enim ita maiores noſtri, ut, ſi à mul-  
tis eſſet flagitium rei militaris admiſſum, ſortitione in  
quosdam animaduerneretur: ut metus uidelicet ad om-  
nes, poena ad paucos perueniret. quod idem facere  
cenſores in delectu dignitatis, & in iudicio ciuium, &  
in animaduersione uitiorum, qui conuenit? nam mi-  
les, qui locum non tenuit, qui hoſtium impetum, uimq;  
pertimuit, poteſt idem poſtea & miles eſſe melior, &  
uir bonus, & ciuis utilis. quare ne in bello propter ho-  
ſtium metum delinqueret, amplior ei mortis & ſuppli-  
cij metus eſt à maioribus conſtitutus: ne autem ni-  
mium multi poenam capitis ſubirent, idcirco illa ſorti-

tio comparata est . hoc tu idem facies censor in senatu  
 legendo ? si erunt plures , qui ob innocentem condem=  
 nandum pecuniam acceperint ; ut non animaduertas  
 in omnes , sed carpas ut uelis , & paucos ex multis ad  
 ignominiam sortiare ? habebit igitur te sciente & ui=  
 dente curia senatorem , populus R. iudicem , resp. ciuem  
 sine ignominia quenquam , qui ad perniciem innocen=  
 tis fidem suam & religionem pecunia commutarit ? et  
 qui pretio adductus eripuerit patriam , fortunas , libe=  
 ros ciui innocenti , is censoriae seueritatis nota non inu=  
 retur ? tu es praefectus moribus ? tu magister ueteris  
 disciplinae & seueritatis , si aut retines quenquam  
 sciens in senatu , scelere tanto contaminatum ; aut  
 statuis , qui in eadem culpa sit , non eadem poena  
 affici oportere ? & quam conditionem supplicij maio=  
 res in bello timiditati militis propositam esse uolue=  
 runt , eandem tu in pace constitues improbitati sena=  
 toris ? quod si hoc exemplum ex re militari ad animad=  
 uersionem censoriam transferendum fuit , sortitione id  
 ipsum factum esse oportuit . sin autem sortiri ad poe=  
 nam , atque hominum delictum fortunae iudicio com=  
 mittere , minime censorium est : certe in multorum pec=  
 cato carpi paucos ad ignominiam & turpitudinem non  
 oportet . uerum omnes intelligimus , in istis subscriptio=  
 nibus uentum quendam popularem esse quaesitum . ia=  
 Etata res erat in concione à tribuno seditioso : incognita  
 causa probatum illud erat ; multitudini illicitum erat  
 contradicere : nemo denique , ut defenderet contrariam  
 partem , laborabat : in inuidiam porro magnam illa  
 iudicia uenerant : etenim paucis postea mensibus alia ue

hemens erat in iudicijs ex notatione tabularum inuidia uersata . prætermitti à cēsoribus et negligi macula iudiciorum posse non uidebatur . homines , quos cæteris uitijs atque omni dedecore infames uidebant , eos hac quoque subscriptione notare uoluerunt ; & eo magis , quòd illo ipso tempore , illis censoribus erant iudicia cum equestri ordine communicata ; ut uiderentur per hominum idoneorum ignominiam sua auctoritate illa iudicia cum equestri ordine reprehendisse . quòd si hanc apud eos ipsos censores mihi aut alijs causam agere licuisset , hominibus tali prudentia certe probauissem , ( res enim indicat ) nihil ipsos habuisse cogniti , nihil comperti , ex tota ipsa subscriptione rumorem quendam & plausum popularem esse quæsitum . nam in L. Popillium , qui Oppianicum condemnarat , subscripsit L. Gellius , quòd is pecuniam acceperat , quo innocentem condemnaret . iam id ipsum quantæ diuinationis est , scire innocentem fuisse reum , quem fortasse nunquam uiderat ? cum homines sapientissimi iudices ( ut nihil dicam de ijs , qui condemnarunt ) causa cognita sibi dixerint , non liquere . uerum esto . condemnat Popillium Gellius , iudicat acceperat à Cluentio pecuniam . negat hoc Lentulus : nam Popillium , quòd erat libertini filius , in senatum non legit : locum quidem senatorium ludis & cætera ornamenta reliquit , & eum omni ignominia liberat . quod cum facit , iudicat eius sententia gratis esse Oppianicum condemnatum . & eundem Popillium postea Lentulus in ambitus iudicio pro testimonio diligentissime laudat . quare neque L. Gellij iudicio stetit Lentulus , neque Lentuli existimatione con-

tentus fuit Gellius : & si uterque censor censoris opinionione standum non putauit, quid est quamobrem quisquam nostrum censorias subscriptiones omnes fixas, & in perpetuum ratas putet esse oportere? at in ipsum Habitum animaduenterunt. nullam quidem ob turpitudinem, nullum ob totius uitæ, non dicam uitium, sed erratum : neque enim hoc homine sanctior, neque probior, neque in omnibus officijs retinendis diligentior esse quisquam potest : neque illi aliter dicunt ; sed eandem illam famam iudicij corrupti secuti sunt : neque ipsi secus existimant, quàm nos existimari uolumus, de huius pudore, integritate, uirtute ; sed putarunt prætermitti accusatorem non potuisse, cum animaduersum esset in iudices. qua de re tota si unum factum ex omni antiquitate protulero, plura non dicam : non enim mihi exemplum summi & clarissimi uiri P. Africani prætereundum uidetur. qui cum esset censor, & in equitum censu C. Licinius Sacerdos prodijisset, clara uoce, ut omnis concio audire posset, dixit se scire illum uerbis conceptis peierasse : si quis contra dicere uellet, usurum esse eum suo testimonio : deinde cum contra nemo diceret, iussit equum traducere. itaque is, cuius arbitrio et populus R. et exteræ gentes contentæ esse consueuerunt, ipse sua conscientia ad ignominiam alterius contentus non fuit. quòd si hoc Habito facere licuisset, facile illis ipsis iudicibus, & falsæ suspicioni, & inuidiæ populariter excitatæ restitisset. Vnum etiam est, quod me maxime conturbat, cui loco respondere posse uix uideor, quòd elogium recitasti de testamento Cn. Egnatij patris, hominis honestissimi uidelicet,



licet, & sapientissimi, iccirco se exheredasse filium,  
 quod is ob Oppianici damnationem pecuniam accepisset.  
 de cuius hominis leuitate et inconstantia plura non  
 dicam. hoc testamentum ipsum, quod recitas, eiusmodi  
 est, ut ille, cum eum filium exheredaret, quem ode-  
 rat, ei filio cohæredes homines alienissimos coniunge-  
 ret, quem diligebat. Sed tu Acti consideres censeo dili-  
 genter, utrum censorium iudicium graue uelis esse,  
 an Egnatij. si Egnatij: leue est, quod censores de cæte-  
 ris subscripserunt: ipsum enim Egnatium, quem tu  
 grauem esse uis, ex senatu eiecerunt. sin autem cen-  
 sorium: hunc Egnatium, quem pater censoria subscri-  
 ptione exheredauit, censores in senatu, cum patrem  
 eiecerent, retinuerunt. at enim senatus uniuersus iu-  
 dicauit illud corruptum esse iudicium: quo modo? susce-  
 pit causam. an potuit rem delatam eiusmodi repudia-  
 re? cum tribunus pl. populo concitato rem pene ad ma-  
 nus reuocasset, cum uir optimus, & homo innocentis-  
 simus pecunia circumuentus esse diceretur, cum inui-  
 dia flagraret ordo senatorius, potuit nihil decerni? po-  
 tuit illa concitatio multitudinis sine summo periculo  
 reip. repudiari? at quid est decretum? quàm iuste?  
 quàm sapienter? quàm diligenter? SI QVI SUNT,  
 QVORVM OPERA FACTVM SIT, VT  
 IUDICIUM PVBLICVM CORRVMPE-  
 RETVR. utrum, uidetur senatus id factum iudica-  
 re, an, si factum sit, moleste grauiterq; ferre? si ipse  
 A. Cluentius sententiam de iudicijs rogaretur, aliam  
 non diceret, atque ij dixerunt, quorum sententijs Cluen-  
 tium condemnatum esse dicitis. sed quæro d' uobis, num

istam legem ex isto S. C. L. Lucullus consul, homo sapientissimus, tulerit? num anno post M. Lucullus & C. Cassius? in quos cum consules designatos idem illud senatus decreuerit, non tulerunt. & quod tu Habiti pecunia factum esse arguis, neque id ulla tenuissima suspitione confirmas: factum est primo illorum æquitate, & sapientia consulum, ut id, quod senatus decreuerat ad illud inuidiæ præsens incendium restinguendum, id postea referendum ad populum non arbitrarètur. ipse deinde populus R. qui L. Quintij trib. pl. fœtis querimonijs antea concitatus rem illam, & rogationem flagitarat, idem C. Iunij filij, pueri parvuli, lacrymis commotus, maximo clamore, & concursu totam illam legem, & quæstionem repudiavit. ex quo intelligi potuit id, quod sæpe dictum est; ut mare, quod sua natura tranquillum sit, ventorum ui agitari atque turbari, sic & populum R. sua sponte esse placatum, hominum seditiosorum uocibus, ut uiolentissimis tempestatibus, concitari. Est etiam relisqua permagna auctoritas, quam ego turpiter pene præterij: mea enim esse dicitur. Recitauit ex oratione nescio qua Aëtius, quam meam esse dicebat, cohortationem quandam iudicum ad honeste iudicandum, & commemorationem tum illorum iudiciorum, quæ probata non essent, tum illius ipsius iudicij Iuniani: perinde quasi ego non ab initio huius defensionis dixerim, inuidiosum illud fuisse iudicium; aut, cum de infamia iudiciorum disputarem, potuerim illud, quod tam populare esset, in illo tempore præterire. ego uero, si quid eiusmodi dixi, neque cognitum comme-

morauī : neque pro testimonio dixi , & illa oratio potius temporis mei , quā iudiciij & auctoritatis fuit . cum enim accusarem , & mihi initio proposuissem , ut animos & populi R. & iudicum commouerem ; cumq; omnes offensiones iudiciorum non ex mea opinione , sed ex hominum rumore proferrem . istam rem , quæ tam populariter esset agitata præterire non potui . sed errat uehementer , si quis in orationibus nostris , quas in iudicijs habuimus , auctoritates nostras consignatas se habere arbitratur : omnes enim illæ orationes causarum , & temporum sunt , non hominum ipsorum , ac patronorum . nam si causæ ipsæ pro se loqui possent , nemo adhiberet oratorem : nunc adhibemur , ut ea dicamus , non quæ nostra auctoritate constituentur , sed quæ ex re ipsa causaq; ducantur . hominem ingeniosum M. Antonium aiunt solitum esse dicere , iccirco se nullam unquam orationem scripsisse , ut , si quid aliquando , quod non opus esset , ab se esset dictum , posset se negare dixisse : perinde quasi , quid à nobis dictum , aut actum sit , id nisi literis mandauerimus , hominum memoria non comprehendatur . ego uero in isto genere libentius cum multorum , tum hominis eloquentissimi , & sapientissimi L. Crassi auctoritatem sequor : qui cum L. Plancium defenderet accusante M. Bruto , homine indico uehementi , & callido ; cum Brutus duobus recitatoribus constitutis , ex duabus eius orationibus capita alterna inter se contraria recitanda curasset , quod in dissuasionē rogationis eius , quæ contra coloniam Narbonensem ferebatur , quantum po-

test de auctoritate senatus detrahit, in suasionem legis Serviliæ summis ornat senatum laudibus; & multa in equites R. cum ex ea oratione asperius dicta recitasset, quo animi illorum iudicium in Crassum incenderentur; aliquatum esse commotus dicitur. itaque in respondendo primum exposuit utriusque rationem temporis, ut oratio ex re, & causa habita uideretur: deinde, ut intelligere posset Brutus, quem hominem, & non solum qua eloquentia, uerum etiam quo lepore & quibus facetiis præditum lacecesset, tres & ipse excitauit recitatores cum singulis libellis, quos M. Brutus pater illius accusatoris de iure ciuili reliquit. eorum initia cum recitarentur ea, quæ uobis nota esse arbitror; FORTE EVENIT, UT RVRI IN PRIVERNATE ESSEMVS EGO ET BRVTVS FILIVS; fundum Priuernatē flagitabat: IN ALBANO ERAMVS EGO ET BRVTVS FILIVS; Albanū poscebat: IN TIBVRTI FORTE CVM ASSEDISSEMVS; Tiburtem fundum requirebat: Brutum autem hominem sapientem, quod filij nequitiam uideret, quæ prædia ei relinqueret, testificari dicebat uoluisse. quod si potuisset honeste scribere, se in balneis cum id ætatis filio fuisse; non præterisset: eas se tamen ab eo balneas non ex libris patris, sed ex tabulis, et ex censu quærere. Crassus tum ita Brutum ultus est, ut illius recitationis suæ poeniteret: moleste enim fortasse tulerat, se in ijs orationibus reprehensum, quas de rep. habuisset, in quibus forsitan magis requiratur constantia. ego autem illa recitata esse non moleste fero:



neque enim ab illo tempore, quod tum erat; neque ab ea causa, quæ tum agebatur, aliena fuerunt. neque mihi quidquam oneris suscepi, cum ista dixi, quo minus honeste hanc causam & libere possem defendere. quod si uelim confiteri, me causam A. Cluentij nunc cognoscere, antea fuisse in illa opinione populari: quis tandem id possit reprehendere? præsertim iudices cum à uobis quoque ipsis hoc impetrare sit æquissimū, quod ego & ab initio petiui, & nunc peto, ut si quam huc grauiorem de illo iudicio opinionem attulistis, hanc, causa perspecta atque omni ueritate cognita, deponatis. Nunc quoniam ad omnia, quæ abs te dicta sunt T. Acti de Oppianici damnatione, respondi: confiteare necesse est, te opinionem multum fefellisse, quod existimaris me causam A. Cluentij non factō eius, sed lege defensurum. nam hoc persæpe dixisti, tibi sic renunciari, me habere in animo causam hanc præsidio legis defendere. ita ne est? ab amicis uidelicet imprudentes prodimur: & est nescio quis de ijs, quos amicos nobis arbitramur, qui nostra consilia ad aduersarios deferat. quisnam tibi hoc renunciavit? quis tam improbus fuit? cui ego autem narraui? nemo, ut opinor, in culpa est: sed nimirum tibi isthuc lex ipsa renunciavit. sed num tibi ita defendisse uideor, ut tota in causa mentionem ullam fecerim legis? num secus hanc causam defendisse, ac si lege Habitus teneretur? certe, ut hominem confirmare oportet, nullus est locus à me purgandi istius inuidiosi criminis prætermissus. quid ergo est? quæret fortasse quispiam, displiceat ne mihi legum præsidio à capite periculum propulsare? mihi uero iudices non di-

splicet: sed utor instituto meo in hominis honesti puden-  
 tisq; iudicio. non solum meo consilio uti consueui, sed  
 multum etiam eius, quem defendo, & consilio, &  
 uoluntati obtempero. nam ut hæc ad me causa delata  
 est, qui leges eas, ad quas adhibemur, & in quibus  
 uersamur, nosse deberem, dixi Habito statim, de eo,  
 qui coisset, quo quis condemnaretur, illum esse libe-  
 rum, teneri autem nostrum ordinem. atque ille me ora-  
 re, & obsecrare cœpit, ut ne sese lege defenderem.  
 cum ego, quæ mihi uiderentur, dicerem, traduxit me  
 ad suam sententiam: affirmabat enim lacrymans,  
 non se cupidiorē esse ciuitatis retinendæ, quàm exi-  
 stimationis. morem homini gessi: & tamen iccirco fe-  
 ci, (neque enim id semper facere debemus) quòd uide-  
 bam per se ipsam causam copiosissime sine lege posse de-  
 fendi: uidebam in hac defensione, qua iam sum usus,  
 plus dignitatis, in illa, qua me hic uti noluit, minus la-  
 boris futurum. quòd si nihil aliud esset actum, nisi ut  
 hanc causam obtinerem: lege recitata perorassē: ne-  
 que me illa oratio commoueret, quòd ait Actius, indi-  
 gnum esse facinus, si senator iudicio quenquam cir-  
 cumuenerit, legibus eum teneri; si eques R. hoc idem  
 fecerit, non teneri. ut tibi concedam hoc indignum esse,  
 (quod cuiusmodi sit, iam uidero) tu mihi concedas ne-  
 cesse est, multo esse indignius, in ea ciuitate, quæ legi-  
 bus teneatur, discedi à legibus: hoc enim uinculum est  
 huius dignitatis, qua fruimur in rep. hoc fundamen-  
 tum libertatis, hic fons æquitatis. mens, & animus,  
 & consilium, et sententia ciuitatis posita est in legibus.  
 ut corpora nostra sine mente, sic ciuitas sine lege suis

partibus, ut neruis, ac sanguine, & membris, uti non potest. legum ministri, magistratus: legum interpretes, iudices: legum denique & cetero omnes serui sumus, ut liberi esse possimus. quid est Q. Naso, cur tu in isto loco sedeas? quæ uis est, qua abs te hi iudices tali dignitate præditi coerceantur? uos autem iudices quamobrem ex tam magna multitudine ciuium tam pauci de hominum fortunis sententiam fertis? quo iure Aëtius, quæ uoluit, dixit? cur mihi tandiu potestas dicendi datur? quid sibi autem illi scribæ, quid liçtores, quid ceteri, quos apparere huic quæstioni uideo, uolunt? opinor, hæc omnia lege fieri, totumq; hoc iudicium, ut antea dixi, quasi mente quadam regi, & administrari. quid ergo est? hæc quæstio sola ita gubernatur? quid M. Plethorij et C. Flaminij inter sicarios? quid C. Orchinij peculatus? quid mea de pecunijs repetundis? quid C. Aquilij, apud quem nunc de ambitu causa dicitur? quid reliquæ quæstiones? circumspecte omnes reip. partes: omnia legum imperio, & præscripto fieri uidebitis. si quis apud me te T. Aëtireum uelit facere, clames te lege pecuniarum repetundarum non teneri: neque hæc tua recusatio confessio sit captæ pecuniæ, sed laboris, sed periculi non legitimi declinatio. nunc quid agatur, & quid abs te iuris constituatur, uide. iubet lex ea, qua lege hæc quæstio constituta est, iudicem quæstionis, hoc est Q. Voconium, cum ijs iudicibus, qui ei obuenerint (uos appellat iudices) quærere de ueneno: in quem quærere? infinitum est.

QVICVNQVE FECERIT, VEN-  
DIDERIT, EMERIT, HABVERIT,



## O R A T I O

DEDERIT. quid eadem lex statim adiungit? recita.  
 DE' QVE EIVS CAPITE QVAERITO:  
 cuius? qui coierit? cōuenierit? non ita est. quid ergo est?  
 dic. QVI TRIBVNVS MIL. LEGIONI=  
 BVS QVATVOR PRIMIS, QVIVE  
 QVAESTOR, TRIBVNVS PL. deinceps om=  
 nes magistratus nominauit: QVIVE IN SENA=  
 TV SENTENTIAM DIXIT, DIXERIT:  
 quid tū? QVI EORVM COIT, COIERIT,  
 CONVENIT, CONVENERIT, QVO  
 QVIS IVDICIO PVBLICO CON=  
 DEMNARETVR. qui eorum? quorum? uideli=  
 cet, qui supra scripti sunt. quid interest utro modo  
 scriptum sit? etsi est apertum, tamen ipsa lex docet:  
 ubi enim omnes mortales alligat, ita loquitur. QVI  
 VENENVM MALVM FECIT, FECE=  
 RIT. omnes uiri, mulieres, liberi, serui in iudicium  
 uocantur. si item de coitione uoluisset, adiunxisset,  
 Quiue coierit. nunc ita est. DE' QVE EIVS CA=  
 PITE QVAERITO, QVI MAGISTRA=  
 TVM HABVERIT, QVIVE IN SENA=  
 TV SENTENTIAM DIXERIT. QVI  
 EORVM COIT, COIERIT. nū is est Cluen=  
 tius? certe non est. quis ergo est Cluentius? qui tamen  
 defendi causam suam lege nolit: itaque abiicio legem:  
 morem Cluentio gero. tibi tamen Acti pauca, quæ ab  
 huius causa seiuncta sunt, respondebo: est enim quiddā  
 in hac causa, quod Cluentius ad se; est aliquid, quod  
 ego ad me putem pertinere. hic sua putat interesse, se  
 re ipsa et gesto negotio, nō lege defendi: ego autem mea



existimo interesse, me nulla in disputatione ab Aëtio uideri esse superatum. non enim mihi hæc causa sola dicenda est: omnibus hic labor meus propositus est, quicumque hac facultate defensionis contenti esse possunt. non loquenquam eorum, qui adsunt, existimare, me, quæ de lege ab Aëtio dicta sunt, si reticuerim, comprobare. quamobrem Cluenti de te tibi obsequor; neque ego legem recito; neque hoc loco pro te dico: sed ea, quæ à me desiderari arbitror, non relinquam. Iniquum tibi uidetur Aëti esse, non iisdem legibus omnes teneri. Primum, ut id iniquissimum esse confitear, huiusmodi est, ut commutatis eis opus sit legibus, non ut ijs, quæ sunt, non pareamus. deinde quis unquam hoc senator accusauit, ut, cum altiore gradum dignitatis beneficio populi R. esset consecutus, eo se putaret durioribus legum conditionibus uti non oportere? quàm multa sunt commoda, quibus cæremus: quàm multa molesta ac difficilia, quæ subimus. atque hæc omnia tantum honoris et amplitudinis commodis compensantur. Conuerte nunc ad equestrem ordinem, atque in cæteros ordines: easdem uitæ conditiones non perferent: putant enim minus multos sibi laqueos legum, & conditionum, ac iudiciorum propositos esse oportere, qui in summum locum ciuitatis aut non potuerunt ascendere, aut non petiuerunt. Atque ut omittam leges alias omnes, quibus nostenemur, cæteri autem sunt ordines liberati: hanc ipsam legem, ne quis iudicio circumueniretur, C. Gracchus tulit: eam legem pro plebe, non in plebem tulit. postea L. Sylla, homo à populi causa remotissimus, tamen, cum eius rei quæstionem hac ipsa lege constitue-

ret, quæ uos hoc tempore iudicatis, populum R. quem ab hoc genere liberum acceperat, alligare nouo quæstionis genere ausus non est. quod si fieri posse existimasset, pro illo odio, quod habuit in equestrem ordinem, nihil fecisset libentius, quàm omnem illam acerbicatem pro= scriptionis suæ, quæstus in ueteres iudices, in hanc u= nam quæstionem contulisset. nec nunc quidquam agi= tur, mihi credite iudices, & prospicite id, quod prou= dendum est, nisi ut equester ordo in huiusce legis peri= culum includatur: neque hoc agitur ab omnibus sed à paucis: nam ij senatores, qui se facile tuentur integri= tate, & innocentia, quales, ut uere dicam, uos estis, et cæteri, qui sine cupiditate uixerunt, equites ordini se= natorio dignitate proximos, concordia coniunctissimos esse cupiunt: sed ij, qui se uolunt posse omnia, neque præterea quidquam esse aut in homine ullo, aut in or= dine, hoc uno metu se putant equites R. in potestatem suam redacturos, si constitutum est, ut de ijs, qui rem iudicarent, huiusmodi iudicia fieri possint: uident e= nim auctoritatem huius ordinis confirmari: uident iu= dicia comprobari: hoc metu proposito, euellere se acu= leum seueritatis uestræ posse confidunt. quis enim de homine audeat paulo maioribus opibus prædito uere & fortiter iudicare, cum uideat sibi de eo, quod coierit, aut consenserit, causam esse dicendam? ò uiros fortes equites R. qui homini clarissimo, ac potentissimo M. Dru= so trib. pl. resisterunt, cum ille nihil aliud ageret, cum illa cuncta, quæ tum erat, nobilitate, nisi uti, qui rem iudicassent, huiusmodi quæstionibus in iudicium uo= carentur. tunc C. Flavius Pusio, Cn. Titinius, C. Mecœ=

nas, illa robora populi R. ceteriq; huiusmodi ordinis non fecerunt idem, quod nunc Cluentius, ut aliquid culpæ suscipere se putarent recusando; sed apertissime repugnauerunt, cum hæc recusarent, & palam fortissime atque honestissime dicerent; se potuisse iudicio populi R. in amplissimum locum peruenire; si sua studia ad honores petendos conferre uoluissent: sese uidisse, in ea uita qualis splendor inesset, quanta ornamenta, quæ dignitas: quæ se non contempsisse, sed ordine suo patrumq; suorum contentos fuisse, & uitam illam tranquillam & quietam, remotam à procellis inuidiarum, & huiusmodi iudiciorum anfractu, sequi maluisse: aut sibi ad honores petendos ætatem integram restitui oportere; aut, quoniam id non posset, eam conditionem uitæ, quam secuti, petitionem reliquissent, manere: iniquum esse, eos, qui honorum ornamenta propter periculorum multitudinem prætermisissent, populi beneaffectis esse priuatos, iudiciorum nouorum periculis non carere: senatorem hoc queri non posse, propterea quòd ea conditione proposita petere cœpisset, quodq; permulta essent ornamenta, quibus eam mitigare molestiam posset, locus, auctoritas, domi splendor, apud exterarum nationes nomen, & gratia, toga prætexta, sella curulis, insignia, fasces, exercitus, imperia, prouinciæ: quibus in rebus cum summum recte factis maiores nostri præmium, tum plura peccatis pericula proposita esse uoluerunt: illi non hoc recusabant, ea ne lege accusarentur, qua nunc Habitus accusatur, quæ tunc erat Sempronia: nunc est Cornelia: intelligebant enim ea lege equestrem ordinem non teneri: sed, ne noua lege

alligarentur, laborabant. *Habitus* ne hoc quidem unquam recusavit, quo minus uel ea lege rationem uitæ suæ redderet, qua non teneretur. quæ si uobis conditio placet, omnes id agamus, ut hæc quamprimum in omneis ordines quæstio perferatur. interea quidem per deos immortales, quoniam omnia commoda nostra, iura, libertatem, salutem denique legibus obtinemus, à legibus non recedamus: simul & illud quàm sit indignum cogitemus, populum R. aliud nunc agere, uobis remp. & fortunas suas commisisse, ipsum sine cura esse, non metuere ne lege ea, quam nunquam ipse iusserit, & quæstione, qua se solutum liberumq; esse arbitretur, per paucos iudices astringatur: agit enim sic causam T. Aëtius, adolescens bonus, & disertus, omnes ciues legibus teneri omnibus: uos attenditis, & auditis silentio, sicut facere debetis. A. Cluentius eques R. causam dicit ea lege, qua lege senatores, & ij, qui magistratum habuerunt, soli tenentur. mihi per eum recusare, & in arce legis præsidia constituere defensionis meæ non licet. si obtinuerit causam Cluentius, sicuti uestra æquitate nixi confidimus; omnes existimabunt id, quod erit, obtinuisse propter innocentiam, quoniam ita defensus sit; in lege autem, quam attingere noluerit, præsidij nihil fuisse. Hic nunc est quiddam, quod ad me pertineat, de quo ante dixi, quod ego populo R. præstare debeam; quoniam is meæ uitæ status est, ut omnis mihi cura, atque opera posita sit in omnium periculis defendendis. Video, quanta, & quàm periculosa, & quàm infinita quæstio tentetur ab accusatoribus, cum eam legem, quæ in nostrum ordinem scri=



pta sit, in populum R. transferre conentur. qua in lege est: QVI COIERIT: quod quàm late pateat, uideatis: CONVENERIT: æque infinitum, & incertum est: CONSENSERIT: hoc uero cum incertum, & infinitum, tum obscurum, & occultum est: FALSVMVE TESTIMONIUM DIXERIT. quis de plebe Romana testimonium dixit unquam, cui non hoc periculum T. Aëtio auctore paratum esse uideatis? nam dicturum quidem certe, si hoc iudicium plebi Romanæ propositum sit, neminem unquam esse confirmo. sed hoc polliceor omnibus, si cui forte hac lege negotium facessetur, qui lege non teneatur, si is uti me defensore uoluerit, me eius causam legis præsidio defensurum, & uel his iudicibus, uel eorum similibus facile probaturum, & omni me defensione usurum esse legis: qua nunc ut utar, ab eo, cuius uoluntati mihi obtemperandum est, non conceditur: non enim debeo dubitare iudices, quin, si qua ad uos causa huiusmodi delata sit eius, qui lege non teneatur, etiam si is inuidiosus, aut multis offensus esse uideatur, etiam si eum oderitis, etiam si inuiti absoluturi sitis, tamen absoluatis, & religioni potius uestre, quàm odio pareatis: est enim sapientis iudicis, meminisse se hominem; cogitare, tantum sibi à populo R. esse permissum, quantum commissum, & creditum sit; & non solum sibi potestatem datam, uerum etiam fidem habitam esse, meminisse; posse, quem oderit, absolueri; quem non oderit, condemnare; & semper, non quid ipse uelit, sed quid lex, & religio cogat, cogitare; animaduvertere, qua lege reus citetur, de quo



reo cognoscat, quæ res in quæstione uersetur. cum hæc sunt uidenda, tum uero illud est hominis magni iudices atque sapientis, cum illam iudicandi causa tabelam sumpserit, non se putare esse solum, neque sibi, quodcunque concupierit, licere, sed habere in consilio legem, religionem, æquitatem, fidem; libidinem autem, odium, inuidiam, metum, cupiditatesq; omneis amouere; maximiq; æstimare conscientiam mentis suæ, quam ab dijs immortalibus accepimus, quæ à nobis diuelli non potest: quæ si optimorum consiliorum, atque factorum testis in omni uita nobis erit, sine ullo metu, & summa cum honestate uiuemus. hæc si T. Actius aut cognouisset, aut cogitasset, profecto ne conatus quidem esset dicere id, quod multis uerbis egit; iudicem, quod ei uideatur, statuere, & non deuinctum legibus esse oportere. quibus de rebus mihi pro Cluentij uoluntate nimium, pro reip. dignitate parum, pro uestra prudentia satis dixisse uideor. Reliqua per pauca sunt, quæ, quia uestre quæstionis erant, iccirco illi statuerunt sibi fingenda esse, & proferenda, ne omnium turpissimi reperirentur, si in iudicium nihil præter inuidiam attulissent. Atque ut existimetis necessario me de his rebus, de quibus iam dixerim, pluribus egisse uerbis, attendite reliqua: profecto intelligetis, ea, quæ paucis demonstrari potuerunt, breuissime esse defensa. Cn. Decio Samniti, ei, qui proscriptus est, iniuriam in calamitate eius ab huius familia factam esse dixistis. à nullo ille liberalius, quam à Cluentio tractatus est. huius illum opes in rebus eius incommodis subleuauerunt, atque hoc cum ipse, tum omnes eius

amici, necessarij; cognouerunt. Ancarij, & Paceni pastoribus huius uillicos uim, & manus attulisse. Cum quædam in collibus, ut solet, controuersia pastorum esset orta, Habiti uillici rem domini, & priuatam possessionem defenderunt. cum esset expostulatio facta; causa illis demonstrata, sine iudicio controuersiaq; discessum est. P. Aelij testamento propinquus exheredatus cum esset, hæres hic alienior institutus est. P. Aelius Habiti merito fecit: neque hic in testamento faciendo interfuit: idq; testamentum ab huius inimico Oppianico est obsignatum. Florio legatum ex testamento, inficiatum esse. Non est ita: sed cum HS XXX scripta essent, pro HS CCC, neque ei satis cautum uideretur, uoluit eum aliquid acceptum referre liberalitati suæ: primo debere negauit, post sine controuersia soluit. Celij cuiusdam Samnitis uxorem post bellum ab hoc esse repetitam. Mulierem cum emisset de seëtoribus; quo tempore eam primum liberam esse audiuit, sine iudicio reddidit Celio. Ennium esse quendam, cuius bona teneat Habitus. Est hic Ennius egens quidam calumniator, mercenarius Oppianici, qui per multos annos quieuit, deinde aliquando cum seruo Habiti furti egit, nuper ab ipso Habito petere cœpit. hic illo priuato iudicio, mihi credite, nobis iisdem fortasse patronis calumniam non effugiet. Atque etiam, ut nobis renunciatur, hominem multorum hospitum, A. Binnum quendam coponem de uia Latina, subornatis, qui sibi à Cluentio, seruisq; eius in taberna sua manus allatas esse dicat. quo de homine nihil etiam nunc dicere nobis est necesse. si inuitauerit, id quod solet, sic



hominem accipiemus, ut moleste ferat, se de uia decessisse. Habetis iudices, quæ in totam uitam de moribus A. Cluentij, quem illi inuidiosum reum uolunt esse, annos octo meditati accusatores collegerunt, quam leuia genere ipso, quam falsare, quam breuia responsu. cognoscite nunc id, quod ad uestrum iusiurandum pertinet, quod uestri iudicij est, quod uobis oneris imposuit ea lex, qua coacti huc conuenistis, de criminibus ueneni: ut omnes intelligant, quam paucis uerbis hæc causa perorari potuerit, & quam multa à me dicta sint, quæ ad huius uoluntatem maxime, ad uestrum iudicium minime pertinerent. Obiectum est, C. Vibium Capacem ab hoc A. Cluentio ueneno esse sublatum. Opportune adest homo summa fide, & omni uirtute præditus L. Pletorius senator, qui illius Capacis hospes fuit, & familiaris. apud hunc ille Romæ habitauit, apud hunc ægrotauit, huius domi est mortuus. haud hæres est Cluentius: intestatum dico esse mortuum, possessionemq; eius bonorum prætoris edicto huic illius sororis filio, adolescenti pudentissimo, & in primis honesto, equiti R. datam, Numerio Cluentio, quem uidetis. Alterum ueneficij crimen, Oppianico huic adolescenti, cum eius in nuptijs more Lariatum multitudo hominum pranderet, uenenum Habitum consilio paratum: id cum daretur in mulso, Balbuetium quendam eius familiarem interceptisse, bibisse, statimq; esse mortuum. Hæc ego si sic agerem, tanquam mihi crimen esset diluendum; hæc pluribus uerbis dicerem, quæ nunc paucis percurrit oratio mea. quid unquam Habitus in se admisit, ut hoc tantum ab eo facinus



facinus non abhorrere uideatur? quid autem magno-  
pere Oppianicum metuebat? cum ille uerbum omnino  
in hac ipsa causa nullum facere potuerit, huic autem  
accusatores matre uina deesse non possent: quod iam  
intelligetis. an ut de causa eius periculi nihil decederet,  
ad causam nouum crimen accederet? quod autem tem-  
pus ueneni dandi illo die? in illa frequentia? per  
quem porro datum? unde sumptum? quæ deinde in-  
terceptio poculi? cur non de integro autem datum?  
multa sunt, quæ dici possunt: sed non committam, ut  
uidear non dicendo uoluisse dicere: res enim iam se ipsa  
defendat. Nego illum adolescentem, quem statim epo-  
to poculo mortuum esse dixistis, omnino illo die esse mor-  
tuum. magnum & impudens mendacium. perspici-  
te cetera. dico illum, cum ad illud prandium crudior  
uenisset, & ut ætas illa fert, sibi tum non pepercisset,  
aliquot dies ægrotasse, & ita esse mortuum. quis huic  
rei testis est? idem qui sui luctus, pater, pater inquam  
illius adolescentis: quem propter animi dolorem perte-  
nuis suspicio potuisset ex illo loco testem in A. Cluen-  
tium constituere, is hunc suo testimonio subleuat. quod  
recita. tu autem, nisi molestum est, paulisper exur-  
ge, & perfer hunc dolorem commemorationis neces-  
sariæ: in qua ego diutius non morabor, quoniam,  
quod fuit uiri optimi, fecisti, ut ne cui innocenti mœ-  
ror tuus calamitatem, & falsum crimen afferret.

Vnum etiam mihi reliquum eiusmodi crimen est iudi-  
ces, ex quo illud perspicere possitis, quod à me initio  
orationis meæ dictum est; quidquid mali per hos annos  
A. Cluentius uiderit, quidquid hoc tempore habeat soli-

citudinis ac negotij, id omne à matre esse conflatum. Oppianicum ueneno necatum esse, quod ei datum sit in pane per M. Asellium quendam familiarem illius, idq; Habiti consilio factum esse, dicitis. in quo primum illud quaero, quæ causa Habito fuerit, cur interficere Oppianicum uellet. inimicitias enim inter ipsos fuisse confiteor: sed homines inimicos suos morte affici uolunt, uel quòd metuant, uel quòd oderunt. quo tandem igitur Habitus metu adductus tantum in se facinus suscipere conatus est? quid erat, quòd iam Oppianicum poena affectum pro maleficijs, eiectum è ciuitate, quisquam timeret? quid metuebat? ut oppugnaretur à perdito, an ne accusaretur à condemnato, an ne exulis testimonio laderetur? sin autem, quòd oderat, Habitus iccirco illum uita frui noluit: adeo'ne erat stultus, ut illam, quam tum ille uiuebat, uitam esse arbitraretur damnati, exulis, deserti ab omnibus, quem propter animi importunitatem nemo recipere tecto, nemo adire, nemo alloqui, nemo respicere uellet? huius igitur uitæ Habitus inuidebat? hunc si acerbe, & penitus oderat, non eum quamdiutissime uiuere uelle debebat? huic mortem maturabat inimicus, quod illi unum in malis perfugium erat calamitatis? qui si quid animi ac uirtutis habuisset, ut multi sæpe fortes uiri in eiusmodi dolore, mortem sibi ipse conscisset. huic quamobrem id uellet inimicus offerre, quod ipse sibi optare deberet? nam nunc quidem quid tandem illi mali mors attulit? nisi forte ineptijs ac fabulis ducimur, ut existimemus illum apud inferos impiorum supplicia perferre, ac plures illic offendisse inimicos, quàm hic reliquisse; à so-

crus, ab uxorū, à fratris, à liberū pœnis actum  
esse præcipitem in sceleratorum sedem, atque regio-  
nem. quæ si falsa sunt, id quod omnes intelligunt:  
quid ei tandem aliud mors eripuit, præter sensum dolo-  
ris? Age uero uenenum per quem datum? per M. Asel-  
lium. quid huic cum Habito? nihil; atque adeo, quod  
ille Oppianico familiarissime est usus, potius etiam con-  
tra simultas: ei ne igitur, quem sibi offensorem, Op-  
pianico familiarissimum sciebat esse, potissimum et  
suum scelus, et illius periculum committebat? cur  
deinde tu, qui pietate ad accusandum excitatus es,  
hunc Asellium esse inultum tandiu sinis? cur non Ha-  
biti exemplo usus es, ut per illum, qui attulisset uene-  
num, de hoc præiudicaretur? iam uero illud quàm non  
probabile, quàm inusitatum iudices, quàm nouum? in  
pane datum uenenum. facilius ne potuit, quàm in po-  
culo? latentius potuit abditum aliqua in parte panis,  
quàm si totum colliquefactum in potionem esset? celerius  
potuit comesum, quàm epotum, in uenas, atque in om-  
nes partes corporis permanare? facilius fallere in pa-  
ne, si esset animaduersum; quàm in poculo, cum ita  
confusum esset, ut secerni nullo modo posset? at repen-  
tina morte periit. quod si esset ita factum, tamen ea-  
res, propter multorum eiusmodi mortem, satis firmam  
ueneni suspicionem non haberet: si esset suspiciosum,  
tamen ad alios potius, quàm ad Habitum pertineret.  
uerum in eo ipso homines impudentissime mentiuntur.  
id ut intelligatis, et mortem eius, et quemadmodum  
post mortem in Habitum sit crimen à matre quæsitum,  
cognoscite. Cum uagus, et exul erraret, atque undi-

quæ exclusus Oppianicus in Falernum se ad C. Quintilium contulisset, ibi primum in morbum incidit, ac satis uehementer, diuq; ægrotauit. cum esset una Saffia; & Statio Albio, quodam colono, homine ualente, qui simul esse solebat, familiarius uteretur, quàm uir dissolutissimus incolumi fortuna pati posset; & ius illud matrimonij castum, atque legitimum damnatione uiri sublatum arbitraretur: Nicostratus quidam, fidelis Oppianici seruulus, percuriosus, & minime mendax, multa dicitur renunciare domino solitus esse. interea Oppianicus cum iam conualesceret, neque in Falerno improbitatem coloni diutius ferre posset, & huc ad urbem profectus esset, (solebat enim extra portam aliquid habere conducti) cecidisse ex equo dicitur, & homo infirma ualeitudine latus offendisse uehementer, & posteaquam ad urbem cum febris uenerit, paucis diebus esse mortuus. mortis ratio iudices eiusmodi est, ut aut nihil habeat suspicionis, aut, si quid habet, id intra parietes in domestico scelere uersetur. post mortem eius Saffia statim moliri nefaria mulier cœpit insidias filio: quæstionem habere de uiri morte constituit: emit de A. Rupilio, quo erat usus Oppianicus medico, Stratone[m] quendam, quasi ut idem faceret, quod Habitus in emendo Diogene fecerat. de hoc Stratone, & de assecla quodam seruo suo quæsituram esse dixit. præterea seruum illum Nicostratum, quem nimium loquacem fuisse, ac nimium domino fidelem arbitrabatur, ab hoc adolescente Oppianico in quæstionem postulauit. hic cum esset illo tempore puer, et illa quæstio de patris sui morte constitui diceretur; etsi illum seruum & sibi beneuolum



esse, & patri fuisse arbitrabatur, nihil tamen est ausus recusare. aduocantur amici, & hospites Oppianici, & ipsius mulieris, multi homines honesti, atque omnibus rebus ornati: tormentis omnibus uehementissimis quæritur, cum essent animi seruorum & spe, & metu tentati, ut aliquid in quæstione dicerent, tamen, ut arbitror, auctoritate aduocatorum, & ui tormentorum adducti, in ueritate manserunt, neque se quidquam scire dixerunt. quæstio illo die de amicorum sententia dimissa est: satis longo interuallo post iterum aduocatur. habetur de integro quæstio: nulla uis tormentorum acerrimorum prætermittitur: auersari aduocati, & iam uix ferre posse: furere crudelis, atque importuna mulier, sibi nequaquam, ut sperasset, ea, quæ cogitasset, procedere. cum iam tortor, atque essent tormenta ipsa defessa, neque tamen illa finem facere uellet: quidam ex aduocatis, homo & honoribus populi ornatus, & summa uirtute præditus, intelligere se dixit, non id agi, ut uerum inueniretur, sed ut aliquid falsi dicere cogerentur. hoc postquam cæteri comprobarunt, ex omnium sententia constitutum est, satis uideri esse quæsitum. redditur Oppianico Nicostratus: Larinum ipsa proficiscitur cum suis, moerens, quòd iam certe incoluam filium fore putabat, ad quem non modo uerum crimen, sed ne ficta quidem suspicio perueniret, & cui non modo opera inimicorum oppugnatio, sed ne occultæ quidem matris insidiæ nocere potuissent. Larinum postquam uenit, quæ à Stratone illo uenenum antea uiro suo datum sibi persuasum esse simulasset, in struētam ei continuo, & ornatam Larini medicinæ exer-

cendæ causa tabernam dedit. unum, alterum, tertium annum Saffia quiescebat, ut uelle, atque optare aliquid calamitatis filio potius, quàm id struere, & moliri uideretur: cum interim, Hortensio, Metello consulibus, ut hunc Oppianicum, aliud agentem, ac nihil eiusmodi cogitantem, ad hanc accusationem detraheret, inuito despondit ei filiam suam; illam, quam ex genere susceperat, ut eum nuptiis alligatum, simul & testamenti spe deuinctum posset habere in potestate. hoc ipso fere tempore Strato ille medicus domi furtum fecit, & eadem eiusmodi: cum esset in ædibus armarium, in quo sciret esse nummorum aliquantum, et auri, noctu duos conseruos dormientes occidit, in piscinamq; deiecit, ipse armarij fundum execut, & HS \*, et auri quinque pondo abstulit, uno ex seruis puero non grandi conscio. furto postridie cognito, omnis suspicio in eos seruos, qui non comparebant, commouebatur. cum exactio illa fundi in armario animaduerneretur, quærebant homines quonam modo fieri potuisset. quidam ex amicis Saffiæ recordatus est, se nuper in auctione quadam uidisse in rebus minutis aduncam ex omni parte dentium, & tortuosam uenire ferrulam, qua illud potuisse ita circumsolari uideretur. ne multa, perquiritur à coactoribus, inuenitur ea ferrula ad Stratonem peruenisse. hoc initio suspicionis orto, & aperte insimulato Stratone, puer ille conscius pertimuit, rem omnem dominæ indicauit: homines in piscina inuenti sunt: Strato in uincula coniectus est: atque etiam in taberna eius nummi, nequaquam omnes, reperiuntur: constituitur questio de furto: nam quid quisquam su-

spicari aliud potest? an hoc dicitis; armario expilato,  
 pecunia ablata, non omni recuperata, occisis homini-  
 bus, institutam esse quæstionem de morte Oppianici?  
 cui probatis? quid est, quod minus uerisimile proferre  
 potuistis? deinde, ut omittam cætera, triennio post mor-  
 tem Oppianici de eius morte quærebat. atque etiam  
 incensa odio pristino Nicostratum eundem illum cum  
 sine causa in quæstionem postulauit. Oppianicus primo  
 recusauit: posteaquam illa abdueturam se filiam, mu-  
 taturam esse testamentum minaretur, mulieri crudelis-  
 simæ seruum fidelissimum non in quæstionem tulit, sed  
 plane ad supplicium dedit. post triennium igitur agi-  
 tata denique quæstio de uiri morte habebatur: & de  
 quibus seruis habebatur? noua, credo, res obiecta, noui  
 quidam homines in suspicionem uocati sunt: de Strato-  
 ne, & de Nicostrato. quid? Romæ quæsitum de istis  
 hominibus non erat? ita ne tandem? mulier iam non  
 morbo, sed scelere furiosa, cum quæstionem habuisset  
 Romæ, cum de T. Annij, L. Rutilij, P. Saturij, & cæ-  
 terorum, honestissimorum uirorum, sententia consti-  
 tutum esset, satis quæsitum uideri; eadem de re, trien-  
 nio post, iisdem de hominibus, nullo adhibito, non di-  
 cam uiro, ne colonum forte affuisse dicatis, sed bono  
 uiro, in filij caput quæstionem habere conata est. an  
 hoc dicitis? (mibi enim uerit in mentem, quid dici  
 possit, tametsi adhuc non esset dictum) cum habere-  
 tur de furto quæstio, Stratonem aliquid de ueneno es-  
 se confessum. hoc uno modo iudices sæpe multorum  
 improbitate depressa ueritas emergit, & innocentie  
 defensio interclusa respirat; quod aut ij, qui ad frau-

dem callidi sunt, non tantum audent, quantum excogitant; aut illi, quorum eminet audacia atque proiecta est, à consilijs malitiæ deseruntur. quod si aut confidens astutia, aut callida esset audacia, uix ullo obsisti modo posset. utrum, furtum factum non est? at nihil clarius Larini fuit. an ad Stratonem suspicio non pertinuit? at is & ex serrula insimulatus, & à puero conscio est indicatus. an id actum non est in quaerendo? quæ fuit alia igitur causa quaerendi? an id, quod dicendum uobis est, & quod tum Saffia dictitabat; cum de furto quaereretur, tum Strato iisdem in tormentis dixit de ueneno? en hoc illud est, quod ante dixi: mulier abundat audacia, consilio, & ratione deficitur: nam tabellæ quæstionis plures proferuntur, quæ recitatæ, uobisq; editæ sunt, illæ ipsæ, quas tum obsignatas esse dixi: in quibus tabellis de furto litera nulla inuenitur. non uenit in mentem, primam orationem Stratonis conscribere de furto, post aliquid adiungere dictum de ueneno, quod non percontatione quæsitum, sed dolore expressum uideretur. quæstio de furto est, ueneni iam suspicione superiore quæstione sublata: quod ipsum hæc eadem mulier indicarat: quæ ut Romæ de amicorum sententia statuerat satis esse quæsitum, postea per triennium maxime ex omnibus seruis Stratonem illum dilexerat, in honore habuerat, commo dis omnibus affecerat. cum igitur de furto quaereretur, & eo furto, quod ille sine controuersia fecerat: tum ille de eo, quod quaerebatur, uerbum nullum fecit, de ueneno statim dixit: de furto, si non eo loco quod debuit, ne in extrema quidem, aut media, aut in aliqua



denique parte quæstionis uerbum fecit ullum ? Iam uide-  
detis, illam nefariam mulierem iudices eadem manu,  
qua, si detur potestas interficere filium cupiat, hanc  
fictam quæstionem conscripsisse. atque istam ipsam quæ-  
stionem, dicite, quis obsignauit ? unum aliquem nomi-  
nate. neminem reperietis, nisi forte eiusmodi homi-  
nem, quem ego proferri malim, quàm neminem nomi-  
nari. Quid ais T. Aeli ? tu periculum capitis, tu iudi-  
cium sceleris, tu fortunas alterius literis conscriptas in  
iudicium afferas ; neque earum auctorem literarum,  
neque obsignatorem, neque testem ullum nominabis ?  
Et quam tu pestem innocentissime filio ex matris sinu  
deprompseris, hanc hi tales uiri comprobabunt ? esto :  
in tabellis nihil est auctoritatis : quid ? ipsa quæstio in  
dicibus, quid ? amicis hospitibusq ; Oppianici, quos adhi-  
buerat antea, quid ? huic tandem ipsi tempori cur non  
reseruata est ? quid istis hominibus factum est, Stratonem  
et Nicostrato ? quæro abs te Oppianice, seruo tuo  
Nicostrato quid factum esse dicas ? quem tu, cum hunc  
breni tempore accusaturus esses, Romam deducere, da-  
re potestatem indicandi, incolumem denique seruare  
quæstioni, seruare his iudicibus, seruare huic tempori  
debuiisti. nam Stratonem quidem iudices in crucem a-  
ctum esse exacta scitote lingua : quod, nemo est Lari-  
natium, qui nesciat. timuit mulier amens non suam  
conscientiam, non odium municipum, non famam  
omnium, sed, quasi non omnes eius sceleris testes essent  
futuri, sic metuit, ne condemnaretur extrema seruitu-  
tinoce morientis. quod hoc portentum, dii immortales ?  
quod tantum monstrum in ullis locis ? quod tam infe-

stum scelus, & immane, aut unde natum esse dicamus? iam enim uidetis profecto iudices, non sine necessarijs me ac maximis causis principio orationis meae de matre dixisse: nihil est enim mali, nihil sceleris, quod illa non ab initio filio uoluerit, optauerit, cogitauerit, effecerit. mitto illam primam libidinis iniuriam: mitto nefarias generi nuptias: mitto cupiditate matris expulsam ex matrimonio filiam: quae nondum ad huiusce uitae periculum, sed ad commune familiae dedecus pertinebant: nihil de alteris Oppianici nuptijs queror; quarum illa cum obsides filios ab eo mortuos accepisset, tum denique in familiae luctum, atque in priuignorum funus nupsit: praetereo, quod Aurium Melinum, cuius illa quodam socrus, paulo ante uxor fuisset, cum Oppianici esse opera proscriptum, occisumque cognosceret, eam sibi domum sedemque coniugij delegit, in qua quotidie superioris uiri mortis indicia, & spolia fortunarum uideret. illud primum queror, de illo scelere, quod nunc denique patefactum est, Fabriciani ueneni, quod iam tum recens suspiciosum caeteris, huic incredibile, nunc uero apertum iam omnibus, ac manifestum uidetur. non est profecto de illo ueneno celata mater: nihil est ab Oppianico sine consilio mulieris cogitatum. quod nisi esset, certe postea, deprehensa re, non illa ut ab improbo uiro discessisset, sed ut à crudelissimo hoste fugisset, domumque illam in perpetuum scelere omni affluentem reliquisset. non modo id non fecit, sed ab illo tempore nullum locum praetermisit, in quo non instrueret insidias aliquas, ac dies omnes, ac noctes tota mente mater de perni-

tie filij cogitaret. quæ primum, ut istum confirmaret Oppianicum accusatorem filio suo, donis muliebribus, collocatione filiae, spe hæreditatis obstrinxit. itaque apud cæteros nouis inter propinquos susceptis inimicijs sæpe fieri diuortia, atque affinitatum dissidia uidimus: hæc mulier satis firmum accusatorem filio suo fore neminem putauit, nisi qui in matrimonium sororem eius ante duxisset. cæteri nouis affinitatibus adducti, ueteres inimicitias sæpe deponunt: illa sibi ad confirmandas inimicitias affinitatis coniunctionem pignori fore putauit. neque in eo solum diligens fuit, ut accusatorem filio suo compararet: sed etiam cogitauit, quibus eum rebus armaret: hinc enim illæ sollicitationes seruorum et minis, et promissis: hinc illæ infinitæ crudelissimæq; de morte Oppianici quæstiones; quibus finem aliquando non mulieris modus, sed amicorum auctoritas fecit: ab eodem scelere illæ triennio post habitæ Larini quæstiones: eiusdem amentiae falsæ conscriptiones quæstionum: ex eodem furore etiam illa conscelerata exectio linguae: totius denique huius ab illa est, et inuenta, et adornata comparatio criminis. atque his rebus cum instructum accusatorem filio suo Romam ipsa misisset, paulisper conquirendorum, et conducendorum testium causa Larini est commorata: postea autem, cum appropinquare huius iudicium ei nunciatum est, confestim huc aduolauit, ne aut accusatoribus diligentia, aut pecunia testibus deesset, aut ne forte mater hoc sibi optatissimum spectaculum huius sordium, atque luctus, et tanti squaloris amitteret. iam uero quod iter Ro-



mam eius mulieris fuisse existimatis? quod ego propter  
 uiciniam Aquinatium & Venafranorum ex multis  
 audiuī, & comperi: quos concursus in ijs oppidis?  
 quantos & uirorum, & mulierum gemitus esse fa-  
 ctos? mulierem quandam Larino, atque illam usque  
 à mari supero, Romam proficisci, cum magno comita-  
 tu & pecunia, quo facilius circumuenire iudicio capi-  
 tis atque opprimere filium posset. nemo erat illorum,  
 pene dicam, quin expiandum illum locum esse arbitra-  
 retur, quacunque illa iter fecisset: nemo, quin terram  
 ipsam uiolari, quæ mater est omnium, uestigijs consce-  
 leratæ matris putaret. itaque nullo in oppido consisten-  
 di potestas ei fuit: nemo ex tot hospitibus inuentus est,  
 qui non contagionem aspectus fugeret. nocti se potius  
 ac solitudini, quam ulli aut urbi, aut hospiti, com-  
 mittebat. nunc uero quid agat, quid moliat, quid  
 denique quotidie cogitet, quem ignorare nostrum pu-  
 tat? quos appellarit, quibus pecuniam promiserit, quo-  
 rum fidem pretio labefactare conata sit, tenemus. quin  
 etiam nocturna sacrificia, quæ putat occultiora esse,  
 sceleratasq; eius preces, & nefaria uota cognouimus,  
 quibus illa etiam deos immortales de suo scelere testa-  
 tur; neque intelligit, pietate, & religione, & iustis  
 precibus deorum mentes, non contaminata superstitio-  
 ne, neque ad scelus perficiendum cæsis hostijs, posse pla-  
 cari: cuius ego furorem, atque crudelitatem deos im-  
 mortales à suis aris, atque templis aspernatos esse con-  
 fido. Vos iudices, quos huic A. Cluentio quosdam alios  
 deos ad omne uitæ tempus fortuna esse uoluit, hu-  
 ius importunitatem matris à filij capite depellite. mul-



ti saepe in iudicando peccata liberum parentum misericordiae concesserunt : uos ne huius honestissime aetam uitam matris crudelitati condonetis, rogamus ; praesertim cum ex altera parte totum municipium uidere possitis . omnes scitote iudices , ( incredibile dictum est , sed à me uerissime dicitur ) omnes Larinates , qui ualuerunt , uenisse Romam , ut hunc studio , frequentiaq ; sua , quantum possent , in tanto eius periculo subleuarent . pueris illud hoc tempore & mulieribus oppidum scitote esse traditum , idq ; in praesentia in communi Italia pace domesticis copiis esse tutum . quos tamen ipsos aequè & eos , quos praesentes uidetis , huius expectatio iudicii dies noctesq ; sollicitat . non illi uos de unius municipis fortunis arbitrantur , sed de totius municipij statu , dignitate , commodisq ; omnibus sententias esse laturos : summa est enim iudices hominis in communem municipij rem diligentia , in singulos municipes benignitas , in omnes homines iustitia , & fides ; praeterea nobilitatem illam inter suos locumq ; à maioribus traditum sic tuetur , ut maiorum grauitatem , constantiam , gratiam , liberalitatem assequatur . itaque ijs eum uerbis publice laudant , ut non solum testimonium suum , iudiciuq ; significant , uerum etiam curam animi , ac dolorem . quæ dum laudatio recitatur , uos quaeso , qui eam detulistis , assurgite . ex lacrymis horum iudices existimare potestis , omnes hæc decuriones decreuisse lacrymantes . Age uero uicinarum quantum studium ; quam incredibilis beneuolentia , quanta cura est ? non illi in libellis laudationum decreta miserunt , sed homines honestissimos , quos nossemus omnes , huc frequen-

tes adesse; & hunc praesentes laudare uoluerunt. ad-  
 sunt Ferentani, homines nobilissimi; Marrucini item:  
 pari dignitate Theano Apulo, atque Luceria equites  
 Romanos, honestissimos homines, laudatores uidetis:  
 Bouiano, totoq; ex Samnio cum laudationes honestis-  
 simae missae sunt, tum homines amplissimi, nobilissi-  
 miq; uenerunt. iam qui in agro Larinati praedia, qui  
 negotia, qui res pecuniarias habent, honesti homines,  
 & summo splendore praediti, difficile dictu est, quam  
 sint solliciti, quam laborent. non multi mihi ab uno  
 sic diliguntur, ut hic ab his uniuersis. Quam, non  
 abesse ab huius iudicio L. Volusienum, summo splen-  
 dore hominem, ac uirtute praeditum, uellem. praesen-  
 tem possem P. Heluidium Rufum, equitem R. om-  
 nium ornatissimum, nominare: qui cum huius causa  
 dies noctesq; uigilaret, & cum me hanc causam doce-  
 ret, in morbum grauem periculosumq; incidit: in quo  
 tamen non minus de capite huius, quam de sua uita  
 laborat. Cn. Tudici senatoris, uiri optimi & honestis-  
 simi, par studium & testimonio & laudatione cogno-  
 scetis. eadem spe, sed maiore uerecundia de te P. Vo-  
 lumni, quoniam iudex es in A. Cluentium, dicimus.  
 & ne longum sit, omnium uicinorum summam esse  
 in hunc beneuolentiam confirmamus. horum omnium  
 studium, curam, diligentiam, meumq; una laborem,  
 qui totam hanc causam uetere instituto solus perora-  
 ui, uestramq; simul iudices equitatem, & mansue-  
 tudinem una mater oppugnat. at quae mater? quam  
 caecam crudelitate, & scelere ferri uidetis: cuius cu-  
 piditatem nulla unquam turpitudine retardauit: quae

uitijs animi in deterrimas partes iura hominum conuertit omnia : cuius ea stultitia est , ut eam nemo hominem ; ea uis , ut nemo fœminam ; ea crudelitas , ut nemo matrem appellare possit . atque etiam nomina necessitudinum , non solum naturæ nomen , & iura mutauit , uxor generi , nouerca filij , filia pellex : eò iam denique adducta est , ut sibi , præter formam , nihil ad similitudinem hominis reseruauit .

Quare iudices , si scelus odistis , prohibete aditum matris à filij sanguine : date parenti hunc incredibilem dolorem ex salute , ex uictoria liberum : patiamini matrem , ne orbata filio lætetur , uictam potius uestra æquitate discedere . sin autem , id quod uestra natura postulat , pudorem , bonitatem , uirtutemq̃ diligitis : leuate hunc aliquando supplicem uestrum iudices , tot annos in falsa inuidia , periculisq̃ uersatum : qui nunc primum post illam flammam , aliorum factò , et cupiditate excitatam , spe uestræ æquitatis erigere animum , & paulum respirare à metu cœpit : cui posita sunt in uobis omnia : quem seruatum esse plurimi cupiunt , seruare soli uos potestis . orat uos Habitus iudices , & flens obsecrat , ne se inuidiæ , quæ in iudicijs ualere non debet ; ne matri , cuius uota , et preces à uestris mentibus repudiare debetis ; ne Oppianico , homini nefario , condemnato iam et mortuo , condonetis . quòd si qua calamitas hunc in hoc iudicio afflixerit innocentem : nã iste miser iudices , si , id quod difficile factu est , in uita remanebit , sæpe , & multum queretur , deprehensum esse illud quondam Fabricianum uenenum : quod si tum indicatum non esset , non huic

ærumnosissimo uenenum illud fuisset, sed multorum  
 medicamentum laborum: postremo etiam fortassis ma-  
 ter exequias illius funeris prosecuta, mortem se filij lu-  
 gere simulasset: nunc uero quid erit profectum, nisi ut  
 huius ex medijs mortis insidijs uita ad luētum reserua-  
 ta, mors sepulcro patris priuata esse uideatur? satis diu  
 fuit in miserijs iudices: satis multos annos ex inuidia  
 laborauit. nemo huic tam iniquus præter parentem  
 fuit, cuius animum non iam expletum esse putemus.  
 uos, qui æqui estis omnibus, qui, ut quisque crudelis  
 me oppugnatur, eum lenissime subleuatis; conserva-  
 te A. Cluentium; restituite incolumem municipio;  
 amicis, uicinis, hospitibus, quorum studia uidetis, red-  
 dite; uobis in perpetuum liberisq; uestris obstringite. ue-  
 strum est hoc iudices, uestre dignitatis, uestre clemen-  
 tiæ: recte hoc repetitur à uobis, ut uirum optimum,  
 atque innocentissimum, plurimisq; mortalibus carum  
 atque iucundissimum, his aliquando calamitatibus li-  
 beretis; ut omnes intelligant, in concionibus esse inui-  
 diæ locum, in iudicijs ueritati.



DE LEGE AGRARIA CONTRA  
P. SERVILIUM RULLUM  
TRIB. PL. IN SENATU.  
ORATIO XV.

Desunt multa.

quæ res aperte petebatur, ea nunc occulte cuniculis op-  
pugnatur. dicent enim decemviri id, quod & dicitur  
à multis, & sæpe dictum est; post eosdem consules,  
regis Alexandrini testamento regnum illud populi R.  
esse factum. dabitis igitur Alexandriam clam petenti-  
bus ijs, quibus apertissime pugnantibus restitistis? hæc,  
per deos immortales, utrum esse vobis consilia sicco-  
rum, an uinolentorum somnia; & utrum cogitata  
sapientum, an optata furiosorum uidentur? Videte  
nunc, proximo capite, ut impurus hellua turbet temp.  
ut à maioribus nostris possessiones relictas disperdat,  
& dissipet: ut sit non minus in populi R. patrimonio  
nepos, quàm in suo. proscribit in sua lege neëligalia,  
quæ decemviri uendant; hoc est, proscribit auëtionem  
publicorum bonorum: agros emi uult, qui diuidan-  
tur: quærit pecuniam. uidelicet excogitabit aliquid,  
atque afferet. nam superioribus capitibus dignitas po-  
puli R. uiolabatur, nomen imperij in commune odium  
orbis terræ uocabatur; urbes pacatæ, agri sociorum,  
regum status decemviris donabantur: nunc præsens  
certa pecunia numerata quæritur. expecto, quid tri-

bonus pl. uigilans & acutus extogitet. ueneat, in-  
 quit, silua scantia. utrum tandem, hanc siluam in  
 relictis possessionibus, an in censorum pascuis inueni-  
 sti? si quid est, quod indagaris, inueneris, ex tene-  
 bris erueris; quanquam iniquum est, tamen consume  
 sane, quoniam commodum est, quoniam quidem tu  
 attulisti. siluam uero tu Scantiam uendas, nobis con-  
 sulibus, atque hoc senatu? tu ullum uectigal attin-  
 gas? tu populi R. subsidia belli, tu ornamenta pacis  
 eripias? tum uero hoc me inertiolem consulem iudica-  
 bo; quam illos fortissimos uiros, qui apud maiores no-  
 stros fuerunt; quod, quæ uectigalia illis consulibus po-  
 pulo R. parata sunt, ea me consule ne retineri quidem  
 potuisse indicabuntur. Vendit Italiae possessiones ex or-  
 dine omnes. sane est in eo diligens: nullam enim præ-  
 termittit: persequitur in tabulis censorijs totam Sici-  
 liam: nullum ædificium, nullos agros relinquit. au-  
 distis auctionem populi R. proscriptam à tribuno pl.  
 constitutam in mensem Ianuarium. & credo, non  
 dubitatis, quin iccirco hæc æuarij causa non uendi-  
 derint ij, qui armis, & uirtute pepererunt, ut es-  
 set quod nos largitionis causa uenderemus. Vi-  
 dete nunc, quoad fecerit iter apertius, quam antea.  
 nam, superiore parte legis quemadmodum Pompeium  
 oppugnarent, à me indicati sunt: nunc iam se ipsi  
 indicabunt. Iubent uenire agros Attalensium at-  
 que Olympenorum: hos populo R. Seruiliij, fortissimi  
 uiri, uictoria adiunxit: deinde agros in Macedonia re-  
 gios, qui partim T. Flaminini, partim L. Paulli, qui  
 Persen uicit, uirtute parti sunt: deinde agrum optimū

Et fructuosissimum Corinthium, qui L. Mummiū im-  
 perio, ac felicitate ad uectigalia populi R. adiunctus  
 est: post autem agros in Hispania apud Carthaginem  
 nouam, duorum Scipionum eximia uirtute possessos:  
 tum ipsam ueterem Carthaginem uendunt, quam P.  
 Africanus nudatam tectis ac mœnibus, siue ad notan-  
 dam Carthaginensium calamitatem, siue ad testifican-  
 dam nostram uictoriam, siue ad oblatam aliquam reli-  
 gionem, ad æternam hominum memoriam consecrauit.  
 his insignibus atque infulis imperij uenditis, quibus or-  
 natam uobis maiores uestri temp. tradiderunt, iubent  
 eos agros uenire, quos rex Mithridates in Paphlagonia,  
 Ponto, Cappadociaq; possederit. num obscure uidentur  
 prope hasta præconis insectari Cn. Pompeij exercitum,  
 qui uenire iubeant eos ipsos agros, in quibus ille etiam  
 nunc bellum gerat, atque uersetur? hoc uero cuius-  
 modi est, quod eius auctioris, quam constituunt, lo-  
 cum sibi nullum definiunt? nam decemuiris, quibus  
 in locis ipsis uideatur, uendendi potestas lege permit-  
 titur. censoribus uectigalia locare, nisi in conspectu po-  
 puli R. non licet: his uendere, uel in ultimis terris lice-  
 bit? at hoc etiam nequissimi homines consumptis patri-  
 monijs faciunt, ut in atrijs auctiorarijs potius, quam  
 in triuijs, aut in compitis auctiorantur. hic permittit  
 sua lege decemuiris, ut, in quibus commodum sit tea-  
 nebris, aut in qua uelint solitudine, bona populi R.  
 possint diuendere. iam illa omnibus in prouincijs, re-  
 gnis, liberis populis quàm acerbæ, quàm formidolo-  
 sæ, quàm quæstiosa concursatio decemuiralis futura  
 sit, non uidetis? hæreditatum obeundarum causa,

quibus uos legationes dedistis, qui & priuati, & priuatum ad negotium exierunt, non maximis opibus, neque summa auctoritate præditi, tamen auditis profecto, quàm graues eorum aduentus socijs uestris esse soleant. quamobrem quid putatis impendere hac lege omnibus gentibus terroris & mali, cum mittantur in orbem terrarum decemuiro summo cum imperio, summa cum auaritia, infinitaq; omnium rerum cupiditate? quorum cum aduentus graues, cum fascēs formidolosi, tum uero iudicium, ac potestas erit non ferenda: licebit enim, quod uidebitur, publicum iudicare; quod iudicarint, uendere: etiam illud, quod homines sancti non facient, ut pecuniam accipiant, ne uendant; tamen id ijs ipsum per legem licebit. hinc uos quas spoliationes, quas pactiones, quam denique in omnibus locis nundinationem iuris, ac fortunarum fore putatis? etenim quod superiore parte legis præfinitum fuit, Sylla & Pompeio consulibus, id rursus liberum, infinitumq; fecerunt. iubet eosdē decemuiros omnibus agris publicis pergrande uectigal imponere, ut ijdē possint & liberare agros, quos commodum sit, et, quos ipsis libeat, publicare. quo in iudicio perspicere non potest, utrum seueritas acerbior, an benignitas quæstuosior sit futura. Sunt tamen in tota lege exceptiones duæ non tam iniquæ, quàm suspiciosæ. excipit in uectigali imponendo agrum Recentoricum Siciliensem, in uendendis agris eos agros, de quibus cautum sit fœdere. hi sunt in Africa, qui ab Hiempsale possidentur. hic quæro, si Hiempsali satis est cautum fœdere, & Recentoricus ager priuatus est; quid attinuerit excipi? sin



Et fœdus illud habet aliquam dubitationem, et ager  
 Recentoricus dicitur nonnunquam esse publicus; quem  
 putet existimaturum duas causas in orbem terrarum re-  
 pertas; quibus gratis parceret? numquidnam tam  
 abstrusus usquam nummus uidetur, quem non ar-  
 chitecti huiusce legis olfecerint? provincias, ciuitates  
 liberas, socios, amicos, reges denique exhauriunt, ad-  
 mouent manus uectigalibus populi R. non est satis au-  
 dite uos, qui amplissimo populi, senatusq; iudicio exer-  
 citus habuistis, et bella gessistis. quod ad quenque  
 peruenit, peruenerit ex præda, ex manubijs, ex au-  
 ro coronario, quod neque consumptum in monumento,  
 neque in ærarium relatum sit, id ad decemuiros referri  
 iubet. hoc capite multa sperant: in omnes imperatores,  
 heredesq; eorum quæstionem suo iudicio comparant:  
 sed maximam pecuniam se à Fausto ablaturus arbi-  
 trantur. quam causam suscipere iurati iudices nolue-  
 runt, hanc isti decemuiri susceperunt. iccirco à iudicibus  
 fortasse prætermittam esse arbitrantur, quod sit ipsis  
 reseruata. deinde etiam in reliquum tempus diligen-  
 tissime sancit, ut, quod quisque imperator habeat pe-  
 cuniæ, protinus ad decemuiros deferat. hic tamen ex-  
 cipit Pompeium, simillime, ut mihi uidetur, atque in  
 illa lege, qua peregrini Roma eijciuntur, Glaucipa-  
 pus excipitur: non enim hac exceptione unus affici-  
 tur beneficio, sed unus priuatur iniuria. sed cui ma-  
 nubias remittit, huius uectigalia inuadit: iubet enim  
 pecuniam, si qua post nos consules ex nouis uectigali-  
 bus recipiatur, hac uti decemuiros. quasi uero non in-  
 telligamus, hæc eos uectigalia, quæ Cn. Pompeius ad-

iunxerit, uendere cogitare. Videtis iam P. C. omnibus rebus, & modis constructam, & coaceruatam pecuniam decemviralem. minuetur huius pecuniae inuidia: consumetur enim in agrorum emptionibus. optime. quis ergo emet agros istos? idem decemviri: tu Rulle (missos enim facio ceteros) emes, quos uoles: uendes, quos uoles: utrumque horum facies, quanti uoles: cauet enim uir optimus, ne emat ab inuito. quasi uero non intelligamus, ab inuito emere, iniuriosum esse; ab non inuito, quaestuosum. quantum tibi agri uendet, ut alios omittam, socer tuus? &, si ego eius aequitatem animi probe noui, uendet non inuitus. facient idem ceteri libenter, ut possessionis inuidiam pecunia commutent; accipiant, quod cupiunt; dent, quod retinere uix possunt. Nunc prospicite omnium rerum infinitam atque intolerandam licentiam. pecunia coacta est ad agros emendos: uero porro ab inuitis non ementur: si consenserint possessores non uendere, quid futurum est? referetur pecunia? non licet: exigetur? uetat. uerum esto: nihil est, quod non emi possit, si tantum des, quantum uelit uenditor. spoliemus orbem terrarum, uendamus uectigalia, effundamus ararium, ut, locupletatis aut inuidiae, aut pestilentiae possessoribus, agri tamen emantur. quid? tum quae erit in istos agros deductio? quae totius rei ratio, atque descriptio? deducuntur, inquit, coloniae: quod? quorum hominum? in quae loca? quis enim non uidet, in coloniis esse haec omnia consideranda? tibi nos Rulle, & istis tuis harum omnium rerum machinatoribus totam Italiam inermem tradituros existimasti,

quàm præsidijs confirmaretis, colonijs occuparetis; omnibus uinculis deuinctam; & constrictam teneretis? ubi enim cauetur; ne in Ianiculo coloniam constituantis? ne urbem hanc urbē alia premere; atque urgere possitis? non faciemus; inquit. primum nescio: dein de timeo: postremo non committam, ut uestro beneficio potius, quàm nostro consilio, salui esse possimus.

Quod uero totam Italiam uestris coloniis complere uoluistis, id cuiusmodi esset, neminem ne nostrum intellecturum existimastis? scriptum est enim, quae in municipia, quasque in colonias decemuiri uelint, deducant colonos, quos uelint; & ijs agros assignent; quibus in locis uelint; ut, cum totam Italiam militibus suis occuparint, uobis non modo dignitatis retinenda, sed ne libertatis quidem recuperandae spes relinquatur. atque haec à me suspicionibus, & coniectura coarguuntur. iam omnis omnium tollitur error: iam aperte ostendunt, sibi nomen huius reip. sedem urbis atque imperij, denique hoc templum Iouis Optimi Maximi, atque hanc arcem omnium gentium displicere. Capuam deduci colonos uolunt. illam urbem huic urbi rursus opponere, illuc opes suas deferre, et imperij nomen transferre cogitant. qui locus, propter ubertatem agrorum, abundantiamque rerum omnium, superbiam, & crudelitatem genuisse dicitur; ibi nostri coloni, delecti ad omne facinus, à decemuiris collocabuntur. & credo, qua in urbe homines in ueteri dignitate, fortunaque nati copiam rerum moderate ferre non potuerunt, in ea isti uestri satellites modeste insolentiam suam continebunt. maiores nostri Capua magistratus, se-

natum, consilium commune, omnia denique insi-  
 gnia reip. sustulerunt, neque aliud quidquam nisi ina-  
 ne nomen Capuæ reliquerunt: non crudelitate: quid  
 enim illis fuit clementius, qui etiam externis hostibus  
 uictis sua sæpissime reddiderunt? sed consilio, quod  
 uidebant, si quod reip. uestigium illis mœnibus conti-  
 neretur, urbem ipsam imperio domicilium præbere pos-  
 se. uos hæc, nisi euertere remp. cuperetis, ac uobis no-  
 uam dominationem comparare, credo, quàm pernicio-  
 sa essent, non uideretis. quidenim cauendum est in  
 colonijs deducendis? si luxuries, Annibalem ipsum Ca-  
 puæ corripit: si superbia, nata inibi esse ex Campano-  
 rum fastidio uidetur: si præsidium, non præponitur  
 huic urbi ista colonia, sed opponitur. at quemad mo-  
 dum armatur, dii immortales? nam bello Punico quid-  
 quid potuit Capuæ, potuit ipsa per sese: nunc omnes  
 urbes, quæ circum Capuam sunt, à colonis per eos-  
 dem decemuiros occupabuntur: hanc enim ob cau-  
 sam permittit ipsa lex, in omnia, quæ uelint, oppida  
 colonos ut decemuiros deducant, quos uelint. atque his  
 colonis agrum Campanum & Stellatæ campum di-  
 uidi iubet. non queror diminutionem uectigalium,  
 non flagitium huius iacturæ, atque damni: præter-  
 mitto illa, quæ, nemo est, quin grauissime & uerissi-  
 me conqueri possit, nos caput patrimonij publici, pul-  
 cherrimam populi R. possessionem, subsidium annonæ,  
 horreum belli, sub signo, claustrisq; reip. positum ue-  
 ctigal seruare non potuisse; cum denique nos agrum  
 P. Rullo concessisse, qui ager ipse per sese & Sylla-  
 næ dominationi, & Gracchorum largitioni restitisset:



non dico; solum hoc in rep. uestigial esse, quod amissis alijs remaneat, intermissis non conquiescat; in pace nateat, in bello non obsolescat; militem sustentet, hostem non pertimescat: prætermitto omnem hanc orationem, & concioni referuo: de periculo salutis ac libertatis loquor. quid enim existimatis integrum uobis in rep. fore, aut in uestra libertate, ac dignitate retinendum, cum Rullus, atque ij, quos multo magis quàm Rullum timetis, cum omni gentium atque improborum manu, cum omnibus copijs, cum omni argento, & auro Capuam, & urbes circa Capuam occuparint? his ego rebus P. C. resistam uehementer atque acriter, neque patiar homines ea me consule expromere, quæ contra remp. diu cogitarint. Errastis Rulle uehementer & tu, & nonnulli collegæ tui, qui sperastis uos contra consulem, ueritate, non ostentatione popularem, posse in euertenda rep. populares existimari. laceffo uos, in concionem uoco, populo R. disceptatore uti uolo: etenim, ut circumspiciamus omnia, quæ populo grata atque iucunda sunt, nihil tam populare, quàm pacem, quàm concordiam, quàm otium, reperiemus. sollicitam mihi ciuitatem suspicione, suspensam metu, perturbatam uestris legibus, & concionibus, & seditionibus tradidistis: spem improbis ostendistis, timorem bonis iniecitis: fidem de foro, dignitatem de rep. sustulistis. hoc motu, atque hac perturbatione animorum, atque rerum cum populo R. uox, & auctoritas consulis repente in tantis tenebris illuxerit; cum ostenderit nihil esse metuendum, nullum exercitum, nullam manum, nullas colonias, nullam uenditionem uestigialium,

nullum imperium nouum, nullum regnum decemui-  
 rale, nullam alteram Romam, neque aliam sedem im-  
 perij nobis consulibus futuram, summamq; tranquilli-  
 tatem pacis atque otij : uerendum, credo, nobis erit, ne  
 uestra ista præclara lex agraria magis popularis esse ui-  
 deatur. cum uero scelera consiliorum uestrorum, frau-  
 demq; legis & insidias, quæ ipsi populo R. à populari-  
 bus tribunis pl. fiant : pertimescam, credo, ne mihi  
 non liceat contra uos in concione consistere : præsertim  
 cum mihi deliberatum & constitutum sit, ita gerere  
 consulatum, quo uno modo geri grauitè & libere po-  
 test, ut neque prouinciam, neque honorem, neque orna-  
 mentum aliquod, aut commodum, neque rem ullam,  
 quæ à tribuno pl. impediri possit, appetiturus sim. di-  
 cit frequentissimo senatu consul calendis Ian. sese, si sta-  
 tus hic reip. maneat, neque aliud negotium extiterit,  
 quod honeste subterfugere non possit, in prouinciam  
 non iturum. sic me in hoc magistratu geram populi  
 R. ut possim tribunum pl. reip. iratum coercere, mihi  
 iratum contemnere. quamobrem per deos immortales  
 colligite uos tribuni pl. deferite eos, à quibus, nisi prospi-  
 citis, breui tempore deferemini : conspirete nobiscum :  
 consentite cum bonis : communem remp. communi stu-  
 dio, atque amore defendite. multa sunt occulta reip.  
 uulnera, multa nefariorum ciuium perniciofa consilia :  
 nullum externum periculum est : non rex, non gens  
 ulla, non natio pertimescenda est : inclusum malum,  
 intestinum, ac domesticum est. huic pro se quisque no-  
 strum mederi, atque hoc omnes sanare uelle debemus.  
 erratis, si senatum probare ea, quæ dicuntur à me, pu-

tatis, populum autem esse in alia voluntate. omnes,  
 qui se incolumēs uolent, sequentur auctoritatem con-  
 sulis soluti cupiditatibus, liberi a delictis, cāuti in pe-  
 riculis, non timidi in contentiōibus. quōd si quis ue-  
 strum spe ducitur, se posse turbulenta ratione honori  
 uelificari suo: primum me consule id sperare desistat:  
 deinde habeat me ipsum sibi documentum, quem eque-  
 stri ortum loco consulem uidet, quæ nitæ uiafacillime  
 uiros bonos ad honorem dignitatemq; perducatur. quōd  
 se uos uestrum mihi studium P.C. ad communem digni-  
 tatem defendendā profitemini: perficiam profecto, id  
 quod maxime resp. desiderat, ut huius ordinis aucto-  
 ritas, quæ apud maiores nostros fuit, eadem nunc lon-  
 go interuallo recip. restituta esse uideatur.

DE LEGE AGRARIA CONTRA  
P. SERVILIUM RULLUM  
TRIB. PL. AD POPVLVM.  
O R A T I O XVI.

ST hoc in more positum Quirites, in=  
stitutoq; maiorum, ut ij, qui beneficio  
uestro imagines familiae suae consecuti  
sunt, eam primam habeant concio=  
nem, qua gratiam beneficii uestri cum  
suorum laude coniungant. qua in oratione nonnulli  
aliquando digni maiorum loco reperiuntur: plerique  
autem hoc perficiunt, ut tantum maioribus eorum de=  
bitum esse uideatur, unde, etiam quod posteris solue=  
retur, redundaret. mihi quidem apud uos de meis ma=  
ioribus dicendi facultas non datur: non quod non tales  
fuerint, quales nos illorum sanguine creatos, discipli=  
nisq; institutos uidetis: sed quod laude populari, atque  
honoris uestri luce caruerunt. de me autem ipso, uereor  
ne arrogantis sit, apud uos dicere; ingrati, tacere.  
nam et, quibus studiis hanc dignitatem consecutus sim,  
memet ipsum commemorare perquam graue est; &  
silere de tantis uestris beneficiis nullo modo possum.  
quare adhibebitur à me certa ratio, moderatioq; dicen=  
di; ut, quid à uobis acceperim, commemorem; quare  
dignus uestro summo honore, singulariq; iudicio sim,  
ipse modice dicam, si necesse erit; uos eosdem existima=  
tuos putem, qui iudicauistis. Me perlongo interual=  
lo prope memoriae, temporumq; nostrorum primum,  
hominem nouum, consulem fecistis: & eum locum,



quem nobilitas praesidijs firmatum, atque omni ratione obvallatum tenebat, me ducere scidistis, uirtutiq; in posterum patere uoluistis: neque me tantummodo consulem, quod est ipsum per sese amplissimum, sed ita fecistis, quo modo pauci nobiles in hac ciuitate consules facti sunt, nouus ante me nemo. nam profecto si recordari uolueritis de nouis hominibus, reperietis, eos, qui sine repulsa consules facti sunt, diuturno labore, atque aliqua occasione esse factos, cum multis annis petiissent, quam praetores fuissent, aliquanto serius, quam per aetatem, ac per leges liceret; qui autem anno suo petierint, sine repulsa non esse factos: me esse unum ex omnibus nouis hominibus, de quibus meminisse possimus, qui consulatum petierim, cum primum licitum sit; consul factus sim, cum primum petierim: ut uester honos ad mei temporis diem petitus, non ad alienae petitionis occasionem interceptus, nec diuturnis precibus efflagitatus, sed dignitate impetratus esse uideatur. est illud amplissimum, quod paulo ante commemorauimus, Quirites, quod hoc honore ex nouis hominibus primum me multis posthabitis affecistis, quod prima petitione, quod anno meo: sed tamen magnificentius, atque ornatius esse illo nihil potest, quod meis comitijs non tabellam indicem tacitae libertatis, sed uocem uiam pra uobis indicem uestrarum erga me uoluntatum, ac studiorum tulistis. itaque me non extrema tribus suffragiorum, sed primi illi uestri concursus, neque singulae uoces praconum, sed una uoce uniuersus populus R. consulem declarauit. hoc ego tam insigne, tam singulare uestrum beneficium Quirites cum ad

animi mei fructum; atque lætitiā dūco esse permā-  
gnū, tum ad curā, solitudinēq; multo maius:  
uersantur enim Quirites in animo meo multæ, & gra-  
ues cogitationes, quæ mihi nullam partem neque diur-  
næ neque nocturnæ quietis impatiunt: primum iuen-  
di consulatus: quæ cum omnibus est difficilis, & ma-  
gna ratio, tum uero mihi præter cæteros; cui errato nul-  
la uenia, recte factō exigua laus, & ab inuitis expres-  
sa proponitur, non dubitanti fidele consiliū, non la-  
boranti certum subsidium nobilitatis ostenditur. quōd  
si solus in discrimen aliquod adducerer, ferrem Quiri-  
tes animo æquiore: sed mihi uidentur certi homines, si  
qua in re me non modo consilio; uerum etiam casu la-  
psū esse arbitrabuntur, uos uniuersos, qui me ante-  
tuleritis nobilitati, uituperaturi: mihi autem Quirites  
omnia potius perpetienda esse dūco, quā non ita ge-  
rendū consulatū, ut in omnibus meis factis, atque  
consilijs uestrum de me factū, consiliūq; laudetur.  
accedit etiam ille mihi summus labor, ac difficillima ra-  
tio consulatus gerendi, quōd non eadem, qua superio-  
ribus consulibus, lege, & conditione utendū esse de-  
creui: qui aditū huius loci, conspectūq; uestrum  
partim magnopere fugerunt, partim non uehementer  
secuti sunt. ego autem non solum hoc in loco dicam, ubi  
est id dictū facillimū; sed in ipso senatu, in quo esse  
locus huic uoci non uidebatur, popularem me futurū  
esse consulem, prima mea illa oratione calendis Ian. di-  
xi: neque enim ullo modo facere possem, ut, cum me  
intelligam non hominum potentium studio, non ex-  
cellentibus gratijs paucorum, sed uniuersi populi R. ius

dicio consulem ita factum, ut nobilissimis hominibus  
 longe præponeretur, non & in hoc magistratu, & in om-  
 ni uita essem popularis. sed mihi ad huiusce uerbi uim,  
 & interpretationem uehementer opus est uestra sapien-  
 tia: uersatur enim magnus error propter insidiosas  
 nonnullorum simulationes; qui cum populi non solum  
 commoda, uerum etiam salutem oppugnant, & im-  
 pediunt, oratione assequi uolunt, ut populares esse ui-  
 deantur. ego, qualem calendis Ian. acceperim remp.  
 Quirites, intelligo, plenam solitudinis, plenam timo-  
 ris, in qua nihil erat mali, nihil aduersi, quod non bo-  
 ni metuerent, improbi expectarent. omnia turbulenta  
 consilia contra hunc reip. statum, & contra uestrum  
 otium partim iniri, partim nobis consulibus designatis  
 inrita esse dicebantur. sublata erat de foro fides, non  
 ictu aliquo nouæ calamitatis, sed suspitione, ac pertur-  
 batione iudiciorum, infirmatione rerum iudicarum:  
 nouæ dominationes, extraordinaria non imperia, sed  
 regna quæri putabantur. quæ cum ego non solum su-  
 spicarer, sed plane cernerem; neque enim obscure gere-  
 bantur: dixi in senatu, in hoc magistratu me popula-  
 rem consulem futurum: quid enim est tam populare,  
 quàm pax? qua non modo ij, quibus natura sensum  
 dedit, sed etiam tecta, atque agri mihi letari uiden-  
 tur. quid tam populare, quàm libertas? quam non  
 solum ab hominibus, uerum etiam à bestiis expeti, at-  
 que omnibus rebus anteponi uidetis. quid tam popula-  
 re, quàm otium? quod ita iucundum est, ut & uos,  
 & maiores uestri, & fortissimus quisque uir maxi-



mos labores suscipiendos putet, ut aliquando in otio  
 possit esse, præsertim in imperio, ac dignitate: qui iccir-  
 co etiam maioribus nostris præcipuam laudem, gra-  
 tiamq; debemus, quòd eorum labore est factum, ut im-  
 pune in otio esse possemus. quare qui possum non esse  
 popularis, cum uideam hæc omnia Quirites, pacem ex-  
 ternam, libertatem propriam generis, ac nominis ue-  
 stri, otium domesticum, denique omnia, quæ uobis ca-  
 ra, atque ampla sunt, in fidem, & quodam modo in  
 patrocinium mei consulatus esse collata? neque enim  
 Quirites illud uobis iucundum, aut populare debet ui-  
 deri, largitio aliqua promulgata, quæ uerbis ostentari  
 potest; re uera fieri, nisi exhausto ærario, nullo pacto  
 potest. neque uero illa popularia sunt existimanda, iu-  
 dicio perturbationes, rerum iudicarum infirma-  
 tiones, restitutio damnatorum, qui ciuitatum afflictarum  
 perditis iam rebus extremi exitiorum solent esse  
 exitus: neque, si qui agros populo R. pollicentur, si al-  
 liud quiddam obscure moliuntur, aliud spe ac specie  
 simulationis ostentant, populares existimandi sunt.  
 nam uere dicam Quirites, genus ipsum legis agrarie  
 uituperare non possum: uenit enim mihi in mentem,  
 duos clarissimos, amantissimos plebis Romanæ uiros,  
 Ti. & C. Gracchos plebem in agris publicis constituisse,  
 qui agri à priuatis antea possidebantur. non sum au-  
 tem ego is consul, qui, ut plerique, nefas esse arbitrer,  
 Gracchos laudare, quorum consilijs, sapientia, legibus  
 multas esse uideo reip. partes constitutas. itaque, ut  
 initio mihi designato consuli nunciabatur, legem agra-  
 riam tribunos pl. designatos conscribere, cupiebam,  
 quid



quid cogitarent, cognoscere: etenim arbitrābar, quoniam eodem anno gerendi nobis essent magistratus, esse aliquam oportere inter nos bene administrandæ reip. societatem. cum familiariter me in eorum sermonem insinuarem, ac darem, celabar, excludebar: & cum ostenderem, si lex utilis plebi Romanæ mihi uideretur, auctorem me, atque adiutorem futurum, tamen aspernabantur hanc liberalitatem meam: negabant me adduci posse, ut ullam largitionem probarem. finem feci offerendi mei, ne forte mea sedulitas aut insidiosa, aut impudens uideretur. interea non desistebant clam inter se conuenire, priuatos quosdam adhibere, ad suos coetus occultos noctem adiungere, & solitudinem. quibus rebus quanto in metu fuerimus, ex uestra sollicitudine, in qua illis temporibus fuistis, facile assequi coniectura poteritis. ineunt tandem magistratus tribuni pl. concio tandem expectata P. Rulli, quod & princeps erat agrariæ legis, & truculentiùs se gerebat, quàm ceteri: iam designatus alio uultu, alio uocis sono, alio incessu esse meditabatur, uestitu obsoletiore, corpore inculto, & horrido, capillatior quàm ante, barbaq; maiore, ut oculis & aspectu denunciare omnibus uim tribunitiam, & minitari reip. uideretur. legem hominis, concionemq; expectabam. lex initio nulla proponitur: concionem in primis aduocari iubet. summa cum expectatione concurritur. explicat orationem sane longam, & uerbis ualde bonis. unum erat, quod mihi uitiosum uidebatur, quod tanta ex frequentia inueniri nemo potuit, qui intelligere posset, quid diceret. hoc ille utrum insidiarum causa fecerit, an hoc genere eloquentiæ dele-

Etetur, nescio. tamen si qui acutiores in concione steterant, de lege agraria nescio quid uoluisse eum dicere suspicabantur. aliquando tandem me designato lex in publicum proponitur: concurrunt iussu meo plures uno tempore librarii: descriptam legem ad me afferunt. omni hoc uobis ratione confirmare possum Quirites, hoc animo me ad legendam legem, cognoscendamq; uenisse, ut, si eam uobis accommodatam, atque utilem esse intelligerem, auctor eius, atque adiutor essem. non enim natura, neque dissidio, neque odio penitus insito bellum nescio quod habet susceptum consulatus cum tribu natu; quia persepe seditiosis atque improbis tribunis pl. boni & fortes consules obstiterunt, et quia uis tribunicia nonnunquam libidini restitit consulari. non potestatum dissimilitudo, sed animorum disiunctio dissensionem facit. itaque hoc animo legem sumpsit in manus, ut eam cuperem esse aptam uestris commodis, & eiusmodi, quam consul re, non oratione popularis & honeste, & libenter posset defendere. atqui ego à primo capite legis usque ad extremum reperio Quirites, nihil aliud cogitatum, nihil aliud susceptum, nihil aliud actum, nisi uti decem reges ærarij, uestigalium, prouinciarum omnium, totius reip. regnorum, liberorum populorum, orbis denique terrarum domini constituerentur legis agrariæ simulatione, atque nomine. sic confirmo Quirites, hac lege agraria, pulchra, atque populari, dari uobis nihil, condonari certis hominibus omnia; ostentari populo R. agros, eripi etiam libertatem; priuatorum pecunias augeri, publicas exhauriri; denique, quod est indignissimum, per tribunum pl. quem maiora

rei præsidem libertatis, custodemq; esse uoluerunt, reges  
 in ciuitate constitui. quæ cum exposuero: si falsa uo=  
 bis uidebuntur esse, sequar auctoritatem uestram, mu=  
 tabo meam sententiam: sin insidias fieri libertati ue=  
 stræ simulatione largitionis intelligetis, nolitote dubita=  
 re plurimo sudore, & sanguine maiorum uestrorum  
 partam, uobisq; traditam libertatem, nullo uestro la=  
 bore, consule adiutore defendere. Primum caput est le=  
 gis agrariæ: quo, ut illi putant, tentamini leuiter, quo  
 animo libertatis uestræ diminutionem ferre possitis. iu=  
 bet enim, tribunum pl. qui eam legem tulerit, creare de=  
 cemuiros per tribus septem decem, ut, quem nouem tri=  
 bus fecerint, is decemuir sit. hic quæro, quam ob cau=  
 sam initium rerum, ac legum suarum hinc duxerit, ut  
 populus R. suffragio priuaretur? toties legibus agrarijs  
 curatores constituti sunt, triumui, quinquetri, de=  
 cemui: quæro, à populari tribuno pl. ecquando nisi  
 per XXXV tribus creati sint? etenim cum omnes po=  
 testates, imperia, curationes ab uniuerso populo R. pro=  
 ficisci conuenit, tum eas profecto maxime, quæ consti=  
 tuuntur ad populi fructum aliquem, & commodum;  
 in quo & uniuersi deligant, quem populo R. maxime  
 consulturum putent; & unusquisque studio, & suf=  
 fragio suo uiam sibi ad beneficium impetrandum mu=  
 nire possit. hoc tribuno pl. potissimum uenit in men=  
 tem, populum R. uniuersum priuare suffragijs, paucas  
 tribus non certa conditione iuris, sed sortis beneficio for=  
 tuito ad usurpandam libertatem uocare. Item, inquit,  
 eodemq; modo, capite altero, ut comitijs pontificis maxi=  
 mi. ne hoc quidem uidit, maiores nostros tam fuisse po=



pulares, ut, quod per populum creari fas non erat, pro-  
 pter religionem sacrorum, in eo tamen, propter amplitu-  
 dinem sacerdotij, uoluerint populo supplicari. atque hoc  
 idem de cæteris sacerdotijs Cn. Domitius trib. pl. uir cla-  
 rissimus tulit; quòd populus per religionem sacerdotia  
 mandare non poterat, ut minor pars populi uocaretur;  
 ab ea parte qui esset factus, is à collegio cooptaretur. ui-  
 dete, quid intersit inter Cn. Domitium trib. pl. hominem  
 nobilissimum, & P. Rullum: qui tentauit, ut opinor,  
 patientiam uestram, cum se nobilem esse diceret. Domi-  
 tius, quod, per cerimonias, populi fieri non poterat; ra-  
 tione affectus est, ut id, quoad posset, quoad fas esset,  
 quoad liceret, populi ad partes daret: hic, quod populi  
 proprium semper fuit, quod nemo imminuit, nemo im-  
 mutauit, quin ij, qui populo agros essent assignaturi,  
 ante acciperent à populo beneficium, quàm darent, id  
 totum eripere uobis, atque è manibus extorquere cona-  
 tus est. ille, quod dari populo nullo modo poterat, ta-  
 men quodam modo dedit: hic, quod adimi nullo pacto  
 poterat potestate, quadam ratione eripere conatur.  
 quæret quispiam, in tanta iniuria, tantaq; impudentia  
 quid spectarit. non defuit consilium: fides erga plebem  
 Romanam, æquitas in uos, libertatemq; uestram uehe-  
 menter defuit. iubet enim comitia decemuiris habere  
 creandis eum, qui legem tulerit. hoc dicam planius. iu-  
 bet Rullus, homo non cupidus, neque appetens, habere  
 comitia Rullum. non dum reprehendo. uideo fecisse  
 alios. illud, quod nemo fecit, de minore parte populi,  
 quò pertineat, uidete. habebit comitia: uolet eos renun-  
 ciare, quibus regia potestas hac lege quæritur. uniuer-



so populo neque ipse committit, neque illi horum consili-  
 orum auctores committi recte putant posse. sortietur  
 tribus idem Rullus, homo felix: educet, quas uolet, tri-  
 bus: quos nouem tribus decemuiros fecerint ab eodem  
 Rullo eductæ, hos omnium rerum, ut iam ostendam, do-  
 minos habebimus. atque ij, ut grati, ac memores benefi-  
 cij esse uideantur, aliquid se nouem tribuum notis homi-  
 nibus debere confitebuntur: reliquis uero sex & XX  
 tribubus, nihil erit, quod non putent posse suo iure de-  
 negare. quos tandem igitur decemuiros creari uult? se  
 primum. qui licet? leges enim sunt ueteres, neque eæ  
 consulares, si quid interesse hoc arbitramini, sed tribu-  
 nitæ, uobis, maioribusq; uestris uehementer gratæ, at-  
 que iucundæ. Licinia est lex, atque altera Ebutia: quæ  
 non modo eum, qui tulerit de aliqua curatione, ac pote-  
 state, sed etiam collegas eius, cognatos, affines excipit,  
 ne eis ea potestas, curatio ue mandetur. etenim si populo  
 consulis: remoue te à suspitione alicuius tui commo-  
 di: fac fidem, te nihil nisi populi utilitatem, & fru-  
 ctum quærere: sine ad alios potestatem, ad te gratiam  
 beneficij tui peruenire. nam hoc quidem uix est liberi  
 populi, uix uestrorum animorum, ac magnificentia.  
 quis legem tulit? Rullus. quis maiorem partem populi,  
 suffragijs priuauit? Rullus. quis comitijs præfuit?  
 Rullus. quis tribus, quas uoluit, uocauit, nullo custode  
 sortitus? quis decemuiros, quos uoluit, renunciavit?  
 idem Rullus. quem principem renunciavit? Rullum.  
 uix mehercule seruis hoc eum suis, non uobis omnium  
 gentium dominis, probaturum arbitrarer. optimæ leges  
 igitur hac lege sine ulla exceptione tollentur. idem legis

sibi sua lege curationem petet : idem, maiore parte populi suffragijs spoliata, comitia habebit : quos uolet, atque in ijs se ipsum, renuntiabit : & uidelicet collegas suos, adscriptores legis agrariae, non repudiabit, à quibus ei locus primus inuidiae in praescriptione legis concessus est : ceteri fructus omnium rerum, qui in spe legis huius positi sunt, communi cautione, atque aequa sibi parte retinentur. at uidete hominis diligentiam, si aut Nullo cogitasse, aut si Nullo potuisse in mentem uenire arbitramini. uiderunt ij, qui haec machinabantur; si uobis ex omni populo deligendi potestas esset data, quaecunque res esset, in qua fides, integritas, uirtus, auctoritas quaereretur, uos eam sine dubitatione ad Cn. Pompeium principem delaturos. etenim quem unum ex cunctis delegissetis, ut eum omnibus omnium gentium bellis terra, & mari praepo-neretis, certe in decemuiris faciendis, siue fides haberetur, siue honos, & committi huic optime, & ornari hunc iustissime posse intelligebant. itaque excipitur hac lege non adolescentia, non legitimum aliquod impedimentum, non potestas, non magistratus ullus alijs negotijs, ac legibus impeditus, reus denique, quo minus decemuir fieri possit. praesentem enim profiteri iubet. quod nulla alia in lege unquam fuit, ne in ijs quidem magistratibus, quorum certus ordo est. timebat enim Pompeius, ne, si adesset, ferri non posset; aut ne, si accepta lex esset, illum sibi collegam ascriberetis custodem ac uindictam cupiditatum. Hic quoniam uideo uos hominis dignitate, et contumelia legis esse commotos; renouabo illud, quod initio dixi, regnum comparari, libertatem uestram hac lege

funditus tolli. an uos aliter existimabatis, cum ad omnia uestra pauci homines cupiditatis oculos adiecissent, non eos in primis id acturos, ut ex omni custodia uestrae libertatis, ex omni potestate, curatione, patrocinio uestrorum commodorum Cn. Pompeius depelleretur? uiderunt, & uident, si per imprudentiam uestram, negligentiam meam, legem incognitam acceperitis, fore uti postea cognitis insidijs, cum decemuiros crearetis, tum uitijs omnibus, et sceleribus legis Cn. Pompeij praesidium opponendum putetis. & hoc paruum argumentum uobis erit, à certis hominibus dominationem, potestatemque omnium rerum quæri, cum uideatis eum, quem custodem uestrae libertatis fore uideant, expertem fieri dignitatis? Cognoscite nunc, quæ potestas decemuiris, & quanta detur. primum lege curiata decemuiros ornat. iam hoc inauditum, & plane nouo more, uti curiata lege magistratus detur, cui nullis comitijs ante sit datus. eam legem ab eo prætor, qui sit primus factus, ferri iubet: at qua modo? ut ij decemuiratum habeant, quos plebs designauerit. oblitus est, nullos à plebe designari. & is orbem terrarum constringit nouis legibus, qui, quid in secundo capite scriptum est, non meminit in tertio. atque hic perspicuum est, quid iuris à maioribus acceperitis, quid ab hoc tribuno pl. uobis relinquatur. maiores de omnibus magistratibus bis uos sententiam ferre noluerunt. nam centuriata lex censoribus ferebatur, cum curiata cæteris patricijs magistratibus: tum iterum de eisdem iudicabatur; ut esset reprehendendi potestas, si populum beneficii sui poeniteret. nunc quia prima illa comitia te-

netis centuriata, & tributa: curiata tantum auspicio-  
rum causa remanserunt. hic autem tribunus pl. quia  
uidebat potestatem neminem iniussu populi, aut plebis  
posse habere; curiatis ea comitijs; quæ uos non sinia-  
tis, confirmauit; tributa, quæ uestra erant, sustulit.  
ita cum maiores binis comitijs uoluerint uos de singulis  
magistratibus iudicare, hic homo popularis ne unam  
quidem populo comitiorum potestatem reliquit. sed ui-  
dete hominis religionem, & diligentiam. uidit, &  
perspexit, sine curiata lege decemuiros habere potesta-  
tem non posse, quoniam per nouem tribus essent con-  
stituti. iubet ferri de his legem curiatam: prætori im-  
perat. quàm id ipsum absurde, nihil ad me attinet:  
iubet enim, qui primus sit prætor factus, cum legem cu-  
riatam ferre: sin is ferre non possit, qui postremus sit:  
ut aut luisse in tantis rebus, aut profecto nescio quid  
spectasse uideatur. uerum hoc, quod est aut ita peruer-  
sum, ut ridiculum; aut ita malitiosum, ut obscurum  
sit; relinquamus: ad religionem hominis reuertamur.  
uidet, sine lege curiata nihil agi per decemuiros posse.  
quid postea, si ea lata non erit? attēdite ingenium. tum  
ij decemuiros, inquit, eodem iure sint, quo qui optima le-  
ge. si hoc fieri potest, ut in hac ciuitate, quæ longe iure li-  
bertatis cæteris ciuitatibus antecellit, quisquam nullis co-  
mitijs imperium, aut potestatem assequi possit: quid atti-  
net tertio capite, legem curiatam ferre, iubere, quoniam  
quarto permittas, ut sine lege curiata idem iuris habeant,  
quod haberent, si optima lege à populo essent creati? re-  
ges cōstituuntur, non decemuiros, Quirites: hiq; ab ijs ini-  
tijs, fundamentisq; nascuntur, ut, non modo cum ge-



rere coeperint, sed etiam cum constituentur, omne ue-  
 strum ius, potestas, libertasq; tollatur. at uidete, quàm  
 diligenter retineat ius tribunitiæ potestatis. consulibus  
 legem curiatam ferentibus à trib. pl. sæpe est interces-  
 sum. neque tamen nos id querimus, esse hanc tribunorū  
 pl. potestatem: tantummodo si quis ea potestate temere  
 est usus, existimamus. hic trib. pl. legi curiatæ, quam  
 prætor ferat, adimit intercedendi potestatem. atque  
 hoc cum in eo reprehendendum est, quòd per trib. pl.  
 tribunitia potestas minuitur: tum in eo deridendum;  
 quòd consuli, si legem curiatam non habet, attingere  
 rem militarem non licet; hic, qui uetat intercedere, po-  
 testatem, etiam si intercessum sit, tamen eandem con-  
 stituit, quam si lata esset lex: ut non intelligam, qua-  
 re aut hic uetet intercedere, aut quenquam intercessu-  
 rum putet, cum intercessio stultitiam intercessoris si-  
 gnificatura sit, non rem impeditura. Sint igitur  
 decemuii neque ueris comitijs, hoc est populi suffra-  
 gijs, neque illis ad speciem, atque ad usurpationem ue-  
 rustatis per XXX lictores auspiciorum causa adum-  
 bratis, constituti. Videte nunc, eos, qui à uobis  
 nihil potestatis acceperint, quanto maioribus ornamen-  
 tis afficiat, quàm omnes nos affecti sumus, quibus uos  
 amplissimas potestates dedistis. iubet auspicij coloniarum  
 deducendarum causa decemuiros habere pullarios. eo-  
 dem iure, inquit, quo habuerunt tresuii lege Sempro-  
 nia. audes etiam Rulle mentionem facere legis Sempro-  
 niæ? nec te ea lex ipsa comonet, tresuiros illos XXXV  
 tribuum suffragio esse creatos? & cum tu à Ti. Grac-  
 chi æquitate, ac pudore longissime remotus sis: id, quod

dissimillima ratione factum sit, eodem iure putas esse  
 oportere? dat præterea potestatem, uerbo prætoriam,  
 re uera regiam: definit in quinquennium: facit sem-  
 piternam: tantis enim confirmat opibus, & copijs, ut  
 inuitis eripi nullo modo possit. deinde ornat apparito-  
 ribus, scribis, librarijs, præconibus, architectis, præ-  
 terea mulis, tabernaculis, centurijs, supellectili: sum-  
 ptum haurit ex ærario: suppeditat à socijs: ianitores  
 ex equèstri loco ducentos in annos singulos, stipatores  
 corporis constituit, eosdem ministros, & satellites po-  
 testatis. formam adhuc habetis Quirites, & speciem  
 ipsam tyrannorum: insignia uidetis potestatis, non  
 dum ipsam potestatem. dixerit enim fortasse quispiam:  
 quid me ista lædunt, scriba, liCTOR, præco, pullarius?  
 omnia sunt hæc huiusmodi Quirites, ut, ea qui habeat  
 sine uestris suffragijs, aut rex non ferendus, aut pri-  
 uatus furiosus esse uideatur. perspicite, quanta pote-  
 stas permittatur: non priuatorum insaniam, sed into-  
 lerantiam regum esse dicetis. primum permittitur infi-  
 nita potestas innumerabilis pecuniæ conficiendæ de ue-  
 stris uetigalibus non fruendis, sed alienandis. dein-  
 de orbis terrarum, gentiumq; omnium datur cognitio  
 sine consilio, poena sine prouocatione, animaduersio  
 sine auxilio. iudicare per quinquennium uel de consu-  
 libus, uel de ipsis tribunis pl. poterunt. de illis interea  
 nemo iudicabit. magistratus his gerere licebit, causam  
 dicere non licebit: emere agros à quibus uolent, uel  
 quos uolent, quàm uolent magno poterunt: colonias  
 deducere nouas, renouare ueteres, totam Italiam suis  
 colonijs, ut complere liceat, permittitur: omnes pro-

uincias obeundi, liberos populos agris multandi, regno-  
rum uel dādorū summa potestas datur: cum uelint,  
Romæ esse; cum commodum sit: quacunque uelint,  
summo cum imperio; iudicioq; omnium rerum uagari  
ut liceat, conceditur: interea dissoluant iudicia publi-  
ca: de consilijs abducant, quos uelint: singuli de ma-  
ximis rebus iudicent: quæstori permittant: finitorem  
mittant: ratum sit, quod finitor uni, à quo missus  
erit, renunciauerit. uerbum mihi deest Quirites, cum  
ego hanc potestatem regiam appello: sed profecto maior  
est quædam: nullum enim regnum fuit unquam, quod  
non si minus tunc aliquo, at regionibus tamen certis con-  
tineretur. hoc uero infinitum est, quo & regna om-  
nia, & uestrum imperium, quod latissime patet, &  
ea, quæ partim libera à uobis, partim etiam ignorata  
uobis sunt, permissu legis continentur. datur igitur  
eis, primum ut liceat eis uendere omnia, de quibus  
uendendis S. C. facta sunt M. Tullio Cn. Cornelio con-  
sulibus. cur hoc tam est obscurum, atque cæcum? quid?  
ista omnia, de quibus senatus censuit, nominatim in  
lege perscribi non ne potuerunt? duæ sunt huius obscu-  
ritatis causæ Quirites, una pudoris; si quis pudor esse  
potest in tam insigni impudentia: altera sceleris: nam  
neque ea, quæ senatus nominatim uendenda censuit,  
audet appellare: sunt enim loca publica urbis, sunt fa-  
cella, quæ post restitutam tribuniciam potestatem ne-  
mo attigit, quæ maiores in urbe partim periculi per-  
fusa esse uoluerunt. hæc lege tribunicia decemuiui uen-  
dent. accedet eò mons Gaurus: accedent salicta ad Min-  
turnas: adiungeretur etiam illa uia uendibilis Hercu-

lanes multarum deliciarum, et magnæ pecunie, per multa alia, quæ senatus propter angustias ærarij uendenda censuit, consules propter inuidiam non uendiderunt. uerum hæc fortasse propter pudorem in lege reticerentur. sed illud magis est credendum, & pertimescendum, quod audaciæ decemuirali corrumpendarum tabularum publicarum, fingendorumq; S. C. quæ facta nunquam sunt, cum ex eo numero, qui per eos annos consules fuerunt, multi mortui sint, magna potestas permittitur. nisi forte nihil est æquum uos de eorum audacia suspicari, quorum cupiditati, nimium angustus orbis terrarum esse uideatur. Habetis unum uenditionis genus; quod magnum uideri uobis intelligo: sed attendite animos ad ea, quæ consequuntur: hunc quasi gradum quendam atque aditum ad cætera iam etiam intelligetis. QVI AGRI, QVAE LOCA, AEDIFICIA. quid est præterea? multa in mancipijs, in pecore, auro, argento, ebore, ueste, suppellectili, cæteris rebus. quid dicam? inuidiosum putasset hoc fore, si omnia nominasset? non metuit inuidiam. quid ergo? longum putauit, & timuit, ne quid præteriret: adscripsit: ALIVDVE QUID. qua breuitate rem nullam esse exceptam uidetis. quid quid ergo sit extra Italiam, quod publicum populi R. factum sit L. Sylla, & Pompeio consulibus, aut postea, id decemuiros iubet uendere. hoc capite Quirites omnes gentes, nationes, prouincias, regna decemuirum ditioni, iudicio, potestatiq; permissa, et condonata esse dico. primum hoc quero, qui tandem locus usquam sit, quem non possint decemuiros dicere publicum popu-



li R. esse factum? nam cum idem possit iudicare, qui dixerit: quid est, quod non liceat ei dicere, cui liceat eidem iudicare? commodum erit Pergamum, Smyrnam, Tralleis, Ephesum, Miletum, Cyzicum, totam denique Asiam, quæ post L. Syllam, Q. Pompeium consules recuperata sit, populi R. factam esse dicere. utrum, oratio ad eius rei disceptationem deerit, an, cum idem & differet, & iudicabit, impelli non poterit, ut falsum iudicet? an, si condemnare Asiam uolet, terrorem damnationis, et minas, non, quanti uolet, æstimabit? quid (quod disputari contra nullo patet) Eto potest: quoniam statutum a uobis est, & iudicatum: quam hereditatem iam creuimus) regnum Bithyniæ, quod certe publicum est populi R. factum? num quid causæ est, quin omnes agros, urbes, statua, portus, totam denique Bithyniam decemuiris uendituri sint? quid Mitylenæ, quæ certe uestre Quirites bellilege, ac uictoriæ iure factæ sunt, urbs & natura, & situ, et descriptione ædificiorum, & pulchritudine in primis nobilis; agri iucundi, & fertiles? nempe eodem capite inclusi continentur. quid Alexandria, cunctaq; Aegyptus? ut occulte latet? ut recondita est? ut furtim tota decemuiris traditur? quis enim uestrum hoc ignorat? dici, illud regnum testamento regis Alexandrini populi R. esse factum. hic ego consul populi R. non modo nihil iudico, sed ne quid sentiam quidem profero. magna enim mihi res non modo ad statuendum, sed etiam ad dicendum uidetur esse. uideo, qui testamentum factum esse confirmet: auctoritatem senatus extare hereditatis aditæ sentio, tum quando Alexandro

mortuo legatos Tyrum misimus, qui ab illo pecuniam  
 depositam nostris recuperarent. hæc L. Philippum sæ-  
 pe in senatu confirmasse, memoria teneo. eum, qui re-  
 gnum illud teneat hoc tempore, neque genere, neque  
 animo regio esse, inter omnes fere uideo conuenire. di-  
 citur contra: nullum esse testamentum: non oportere  
 populum R. omnium regnorum appetentem uideri:  
 demigraturos in illa loca nostros homines propter agro-  
 rum bonitatem, & omnium rerum copiam. hac tan-  
 ta de re P. Rullus cum cæteris decemuiris, collegis  
 suis, iudicabit? & uerum iudicabit? nam utrumque  
 ita magnum est, ut nullo modo neque concedendum,  
 neque ferendum sit. uolet esse popularis, populo R.  
 adiudicabit. ergo idem ex sua lege uendet Alexan-  
 driam, uendet Aegyptum, urbis copiosissimæ, pul-  
 cherrimorumq; agrorum iudex, arbiter, dominus, rex  
 denique opulentissimi regni reperietur. non sumet si-  
 bi tantum, non appetet: iudicabit Alexandriam regis  
 esse, & populo R. abiudicabit. primum populi R. hære-  
 ditatem decemuiro iudicent, cum uos uolueritis de pri-  
 uatis hæreditatibus centumuiros iudicare? deinde quis  
 aget causam populi R.? ubi res ista agetur? qui sunt  
 isti decemuiro, quos perspiciamus regnum Alexandriae  
 Ptolemæo gratis adiudicatuos? quod si Alexandria  
 petebatur, cur non eosdem cursus hoc tempore, quos  
 L. Cotta, L. Torquato Consulibus concurrerunt? cur  
 non aperte, ut antea? cur non item ut cum decreto &  
 palam regionem illam petierunt? an quietis ijs, qui per  
 cursum rectum regnum tenere non potuerunt, nunc  
 tetrīs tenebris, & caligine se Alexandriam peruentu-

ros arbitrati sunt? \* atque illud circumspicite uestris  
 \* mentibus, unaq; . Legatos nostros, homines auctoritate tenui, qui rerum priuatarum causa legationes liberas obeunt, tamen exteræ nationes ferre uix possunt: graue est enim nomen imperij, atque id etiam in leui persona pertimescitur: propterea quod uestro, non suo, nomine, cum hinc egressi sunt, abutuntur. quid cense-  
 tis, cum isti decemuii cum imperio, cum fascibus, cum illa delecta finitorum iuuentute per orbem terrarum uagabuntur? quo tandem animo? quo metu? quo periculo miseras nationes futuras? est in imperio terror: patientur. est in aduentu sumptus: ferent. imperabitur aliquid muneris: non recusabunt. illud uero quantum est Quirites, cum is decemuir, qui aliquam in urbem aut expectatus, ut hospes; aut repente, ut dominus, uenerit; illum ipsum locum, quod uenerit, illam ipsam sedem hospitalem, in quam erit deductus, publicam populi R. esse dicet? quanta calamitas populi, si dixerit? quantus ipsi quaestus, si negarit? atque i'dem, qui hæc appetunt, queri nonnunquam solent, omnes terras Cn. Pompeio, atque omnia maria esse permissa. simile uero est, multa committi, an condonari omnia: uel labori, et negotio præponi, an prædæ & quaestui: mitti ad socios liberandos, an ad opprimendos. denique si quis est honos singularis, nihil ne interest, utrum populus R. eum, cui uelit, deferat, an is impudenter populo R. per legis fraudem surripiatur? Intellexistis, quot res, & quantas decemuii legis permissu uendituri sint. non est satis. cum sese sociorum, cum exterarum nationum, cum regum san-



guine implerint, incidant nervos populi R. adhibeant manus uectigalibus uestris, irrumpant in aerarium: sequitur enim caput, quo capite non permittit quidem, si forte desit pecunia, quæ tanta ex superioribus recipi potest, ut deesse non debeat; sed plane, quasi ea res nobis saluti futura sit, ita cogit, atque imperat, ut decemviri uestra uectigalia uedant nominatim. quam tu mihi ex ordine recita de legis scripto populi R. auetionem. quã mehercule ego præconi huic ipsi luctuosam et acerbam prædicationem futurã puto. A V C T I O. Ut in suis rebus, ita in rep. luxuriosus nepos, qui prius siluas uendat, quàm uineas. Italiam percensuisti: perge in Siciliam. nihil est in prouincia, quod aut in oppidis, aut in agris maiores nostri proprium nobis reliquerint, quin id uenire iubeat. quod partum recenti uictoria maiores uobis in sociorum urbibus, ac finibus, et uinculum pacis, et monimentum belli reliquerunt, id uos ab illis acceptum hoc auetore uendetis? Hic mihi parumper mentes uestras Quirites commouere uideor, dum patefacio uobis, quas isti penitus abstrusas insidias se posuisse arbitrantur contra Cn. Pompeij dignitatem. et mihi quæso ignoscite, si appello talem uirum sæpius. uos mihi prætori biennio ante Quirites hoc eodem in loco personam hanc imposuistis, ut, quibuscunque rebus possem, illius absentis dignitatem uobiscum una tuerer. feci adhuc quæ potui, neque familiaritate illius adductus, nec spe honoris, atque amplissimæ dignitatis; quam ego, etsi libente illo, tamen absente, per uos consecutus sum. quamobrem, cum intelligam hanc totam fere legem ad illius opes euertendas

tanquam



tanquam machinam comparari; & resistam consilijs  
 hominum; & perficiam profecto, quod ego uideo com-  
 parari, ut id uos uniuersi non solum uidere, uerum  
 etiam tenere possitis. Iubet uenire quæ Attalensium,  
 quæ Phaselitum, quæ Olympenorum fuerint, agrumq;  
 Agerensem, & Orindicum, & Gedusanum. hæc P.  
 Seruiliij imperio, & uictoria clarissimi uiri uestra fa-  
 cta sunt. adiungit agros Bithyniæ regios, quibus nunc  
 publicani fruuntur: deinde Attalicos agros in Cherrho-  
 neso: in Macedonia, qui regis Philippi, siue Persæ fue-  
 runt: qui item à censoribus locati sunt, et certissimum  
 uectigal. adscribit idem auetioni Corinthios agros opti-  
 mos & fertiles, et Cyrenenses qui Appionis fuerunt: et  
 agros in Hispania propter Carthaginem nouam, & in  
 Africa ipsam ueterem Carthaginem uendit: quam ui-  
 delicet P. Africanus non propter religionem sedium il-  
 larum, ac uetustatis de consilij sententia consecrauit,  
 sed ut ipse locus eorum, qui cum hac urbe de imperio  
 certarunt, uestigia calamitatis ostenderet. sed non fuit  
 tam diligens, quàm est Rullus: aut fortasse emptorem  
 ei loco reperire non potuit. uerum inter hos agros re-  
 gios, captos ueteribus bellis uirtute summorum im-  
 peratorum, adiungit regios agros Mithridatis, qui in  
 Raphlagonia, qui in Ponto, qui in Cappadocia fuerunt,  
 ut eos decem uiri uendant. ita ne uero? non legibus  
 datis, non auditis uerbis imperatorijs, non dum deni-  
 que bello confecto, cum rex Mithridates amisso exerci-  
 tu, regno expulsus, tamen in ultimis terris aliquid  
 etiam nunc moliatur, atque ab inuicta Cn. Pompeij  
 manu Maotide, & illis paludibus, & itinerum an-

gustijs, atque altitudine montium defendatur; cum  
imperator in bello uersetur; in locis autem illis etiam  
nunc belli nomen reliquum sit: eos agros, quorum  
adhuc penes Cn. Pompeium omne iudicium, & pote-  
stas more maiorum debet esse, decemviri uendent? et,  
credo, P. Rullus (is enim sic se gerit, ut sibi iam de-  
cemuir designatus esse uideatur) ad eam auctionem po-  
tissimum proficiscetur. is uidelicet, antequam ueniat  
in Pontum, literas ad Cn. Pompeium mittet, quarum  
ego iam exemplum ab istis compositum esse arbitror.  
P. SERVILIUS RULLUS TRIBUNVS  
P.L. DECEMVIR S. D. CN. POMPEIO  
CN. F. non credo adscripturū esse, Magno: non enim  
uidetur id, quod imminuere lege conatur, concessurus  
uerbo. TE VOLO CVRARE, VT MI-  
HI SINOPE PRAESTO SIS, AVXI-  
LIVM QVE ADDVCAS, DVM EOS  
AGROS, QVOS TVO LABORE CE-  
PISTI, EGO MEA LEGE VENDAM.  
an Pompeium non adhibebit? in eius prouincia uendet  
manubias imperatoris? ponite ante oculos uobis Rullum  
in Ponto, inter uestra, atque hostium castra, hasta po-  
sita, cum suis formosis finitoribus auctionantem. ne-  
que in hoc solum inest contumelia, quæ uehementer  
& insignis est, & noua, ut ulla res parta bello, non-  
dum legibus datis, etiam tum imperatore bellum ad-  
ministrante, non modo uenierit, uerum etiam locata  
sit. plus spectant homines certe, quàm contumeliam:  
sperant, si concessum sit inimicis Cn. Pompeij cum im-  
perio, cum iudicio omniū rerum, cum infinita potesta-

te, cum innumerabili pecunia non solum alijs in locis  
 uagari, uerum etiam ad ipsius exercitum peruenire,  
 aliquid illi insidiarum fieri, aliquid de eius exercitu, co-  
 pijs; gloria detrahi posse: putant, si quam spem in Cn.  
 Pompeio exercitus habeat aut agrorum, aut aliorum  
 commodorum, hanc non habiturum, cum uiderit ear-  
 um rerum omnium potestatem ad decemuiros esse trans-  
 latam. patior non moleste, tam stultos esse, qui hac  
 sperent; tam impudentes, qui conentur: illud quæror,  
 tam me ab ijs esse contemptum, ut hac portenta me con-  
 sule potissimum cogitarent. atque in omnibus his agris,  
 ædificijsq; uendendis permittitur decemuiris, ut uen-  
 dant quibuscunque in locis uideatur. o perturbatam  
 rationem. o libidinem refranandam. o consilia disso-  
 luta, atque perditæ uectigalia locare nusquam licet,  
 nisi in hac urbe, hoc ex loco, hac uestrum frequentia:  
 uenire uestras res proprias, & in perpetuum à uobis  
 alienari, in Paphlagonia tenebris, atque in Cappado-  
 ciæ solitudine licebit? L. Sylla cum bona indemnato-  
 rum ciuium funesta illa auctione sua uenderet, & se  
 prædam suam diceret uendere, tamen ex hoc loco uen-  
 didit; nec, quorum oculos offendebat, eorum ipsorum  
 conspectum fugere ausus est: decemuirum uestra uectiga-  
 lia non modo ne uobis quidem arbitris, sed ne præcone  
 quidem publico teste uendent? Sequitur, Omnes agros  
 extra Italiam, infinito ex tempore, non, ut antea, ab  
 Sylla & Pompeio consulibus. cognitio decemuirum, pri-  
 uatus sit an publicus: sicq; agro pergrande uectigal  
 imponitur. hoc quantum iudicium, quàm intoleranda  
 dum, quàm regium sit, quem præterit? posse quibuscum-

cunque locis uelint, nulla disceptatione, nullo cōsilio priuata publicare, publica liberare. Excipitur hoc capite ager in Sicilia Recentoricus; quem ego excipi, & propter hominum necessitudinem, & propter æquitatem, Quirites, sæpe uehementer gaudeo: sed quæ hæc impudentia? qui agrum Recentoricum possident, uetustate possessionis se, non iure; misericordiæ senatus, non agri conditione defendunt: nam illum agrum publicum esse fatentur; sed moueri possessionibus, amicissimis sedibus, ac dijs penatibus negant oportere. at si est priuatus ager Recentoricus, quid eum excipis? sin autem publicus, quæ est ista æquitas, ceteros, etiam si priuati sint, permittere ut publici iudicentur, hunc excipere nominatim, qui publicus esse fateatur? ergo eorum ager excipitur, qui apud nullum alia ratione ualuerunt: ceteri agri omnes, qui ubique sunt, sine ullo delectu, sine populi R. notione, sine iudicio senatus decemuiris addicentur. Atque etiam est alia superiore capite, quo omnia ueneunt, quæstiosa exceptio: quæ tegit eos agros, de quibus fœdere cautum est. audiuit hanc rem non à me sed ab alijs agitari sæpe in senatu, nonnunquam ex hoc loco, possidere agros in ora maritima regē Hiempsalet, quos P. Africanus populo R. adiudicauit; et tamen postea per C. Cottam consulem cautum esse fœdere. hoc quia uos fœdus non iusseritis, ueretur Hiempsal ut satis firmum sit et ratum. Quid, cuiusmodi est illud? tollitur uestrum iudicium, fœdus totum excipitur, comprobatur. quod minuit auctoritatem decemviralem, laudo: quod regi amico cauet, non reprehendo: quod non gratis fit, indico: uolitat



enim ante oculos istorum Iuba regis filius, adolescens non minus benenummatus, quam benecapillatus.

Vix iam uidetur locus esse, qui tantos acervos pecuniae capiat. auget, addit, accumulatur: aurum, argentum ex praeda, ex manubijs, ex coronario, ad quoscunque peruenit, neque relatum est in publicum, neque in monumento consumptum, id profiteri apud decemuiros, & ad eos referre iubet. hoc capite etiam quaestionem de clarissimis uiris, qui populi R. bella gesserunt, iudiciumque de pecunijs repetundis ad decemuiros translatum uidetis. horum erit nullum iudicium, & quantae cuiusque manubiae fuerint, quid relatum, quid residuum sit. in posterum uero lex haec imperatoribus uestris constituitur, ut, quicunque de prouincia decesserit, apud eosdem decemuiros, quantum habeat praedae, manubiarum, auri coronarii, profiteatur. hic tamen uir optimus eum, quem amat, excipit, Cn. Pompeium. unde iste amor tam improuisus, ac tam repentinus? qui honore decemuiratus excluditur prope nominatim; cuius iudicium, legumque datio, captorum agrorum ipsius uirtute cognitio tollitur; cuius non in prouinciam, sed in ipsa castra decemuiro cum imperio, infinita pecunia, maxima potestate, & iudicio rerum omnium mittuntur; cui ius imperatorium, quod semper omnibus imperatoribus est conseruatum, soli eripitur: is excipitur unus, ne manubias referre debeat. utrum tandem, hoc capite honos haberi homini, an inuidia quaeri uidetur? remittit hoc Rullo Cn. Pompeius: beneficio isto legis, benignitate decemuirali nihil utitur. nam si est aequum, praedas, ac ma-

nubias suas imperatores non in monimenta deorum im-  
 mortalium, neque in urbis ornamenta conferre, sed ad  
 decemuiros, tanquam ad dominos, reportare: nihil si-  
 bi appetit præcipue Pompeius, nihil; uult se in com-  
 muni, atque in eodem, quo cæteri, iure uersari. sin-  
 est iniquum Quirites, si turpe, si intolerandum, hos  
 decemuiros portitores omnibus omnium pecunijs constitui,  
 qui non modo reges, atque exterarum nationum homi-  
 nes, sed etiam imperatores nostros excutiant: non mihi  
 uidentur honoris causa excipere Pompeium, sed me-  
 tuere, ne ille eandem contumeliam, quam cæteri, ferre  
 non possit. Põpeius autem, cum hoc animo sit, ut, quid-  
 quid uobis placeat, sibi ferendum putet: quod uos fer-  
 re non poteritis, id, profecto perficiet, ne diutius inui-  
 ti ferre cogamini. ueruntamen cauet, ut, si qua pecu-  
 nia post nos consules ex nouis uectigalibus recipiatur,  
 ea decemuiro utantur. noua porro uectigalia uidet ea  
 fore, quæ Pompeius adiunxerit. ita remissis manubijs,  
 uectigalibus, eius uirtute partis, se frui putat oportere.  
 parta sit pecunia Quirites decemuiris tanta, quan-  
 ta sit in terris: nihil prætermisum, sed omnes urbes,  
 agri, regna denique, postremo etiam uectigalia ue-  
 stra uenierint: accesserint in cumulum manubiæ ue-  
 strorum imperatorum: quantæ & quàm immanes di-  
 uitie decemuiris in tantis auctiõibus, tot iudicijs, tam  
 infinita potestate rerum omnium quærantur, uidetis.  
 Cognoscite nunc alios immensos, atque intolerabiles  
 quæstus; ut intelligatis ad certorum hominum impor-  
 tunam auaritiam hoc populare legis agrariæ nomen  
 esse quæsitum. Hac pecunia iubet agros emi, quò de-

ducamini: Non consueui homines appellare asperius Quirites, nisi laceffitus. uelim fieri posset, ut à me sine contumelia nominarentur ij, qui se decemuiros sperant futuros: iam uideretis, quibus hominibus omnium rerum & uendendarum, & emendarum potestatem permetteretis. sed, quod ego nondum statuo mihi esse dicendum, uos tamen id potestis cum animis uestris cogitare. unum hoc certe uideor mihi uerissime posse dicere. tum cum haberet hæc res. Lusinos, Calatinos, Acidinos, homines non solum honoribus populi, rebusq; gestis, uerum etiam patientia paupertatis ornatos; & tum, cum erant Catones, Philippi, Lælij; quorum sapientiam, temperantiamq; in publicis, priuatisq; forensibus; domesticisq; rebus perspexeratis; tamen huiusmodi res commissæ nemini est, ut idem iudicaret & uenderet, & hoc faceret per quinquennium toto in orbe terrarum; idemq; agros uectigales populi R. abalienaret; & cum summam tantæ pecuniæ nullo teste sibi ipse ex sua uoluntate fecisset, tum denique emeret à quibus uellet, quod uideretur. committite uos nunc Quirites his hominibus hæc omnia, quos odorari hunc decemutratum suspicamini: reperietis, partem esse eorum, quibus ad habendum; partem, quibus ad consumendum nihil satis esse uideatur. Hic ego iam illud, quod expeditissimum sit, ne disputo quidem Quirites, non esse hanc uobis à maioribus relictam consuetudinem, ut emantur agri à priuatis, quò plebs publice deducatur; omnibus legibus agris publicis priuatos esse deductos; huiusmodi me aliquid ab hoc horrido, ac truce tribuno pl. expectasse: hanc uero emendi, &

uendendi quæstuosissimam, ac turpissimam mercatu-  
ram, alienam actione tribunicia, alienam dignitate po-  
puli R. semper putavi. Libet agros emi. primum quæ-  
ro, quos agros? & quibus in locis? nolo suspensam &  
incertam plebem R. obscura spe & cæca expectatione  
pendere. Albanus ager est, Setinus, Priuernas, Fun-  
danus, Vestinus, Falernus, Linternus, Cumanus,  
Casinas: audio. ab alia porta, Capenas, Faliscus, Sa-  
binus ager, Reatinus, Venafranus, Alifanus, Trebu-  
lanus. habes tãtam pecuniam, qua hosce omnes agros,  
et ceteros horum similes non modo emere, uerum etiam  
coacervare possis: cur eos non definis, neque nominas?  
ut saltem deliberare plebs Romana possit, quid inter-  
sit sua, quid expediat, quantum tibi in emendis, &  
in uendendis rebus committendum putet. Definio, in-  
quit, Italiam. satis certa regio: etenim quantulum in-  
terest, utrum in Massici radices, an in Italiam aliò ue-  
deducamini? Age uero definis locum: quidnam agrì  
uero, inquit? qui arari, aut coli possit. qui possit ara-  
ri, inquit, aut coli, non qui aratus aut cultus sit. utrum  
hac lex est, an tabula Veratianæ auctioris? in qua  
scriptum fuisse aiunt: iugera CC, in quibus oliuetum  
fieri potest: iugera CCC, ubi institui uineæ possunt.  
hoc tu emes ista innumerabili pecunia, quod arari aut  
coli possit? quod solum tam exile & macrum est, quod  
aratro perstringi non possit? aut quod est tam asperum  
saxetum, in quo agricolarum cultus non elaboret? iccir-  
co, inquit, agros nominare non possum, quia tangam  
nullum ab inuito. hoc quoque multo est quæstuosius,  
quàm si ab inuito sumeret: inibitur enim ratio quæstus



de uestra pecunia, & tum denique ager emetur, cum idem expedierit emptori et uenditori. Sed uidete uim legis agrariae: ne ij quidem, qui agros publicos possident, decedent de possessione, nisi erunt deducti optima conditione, & pecunia maxima. conuersa ratio. antea, cum erat à tribuno pl. mentio legis agrariae facta, continuo, qui agros publicos, aut qui possessiones inuidiosas tenebant, pertimescebant: hæc lex eos homines fortunis locupletat, inuidia liberat. quàm multos enim Quirites existimatis esse, qui latitudinem possessionum tueri, qui inuidiam Syllanorum agrorum ferre non possint? qui uendere cupiant, emptores non reperiant? perdere iam denique illos agros ratione aliqua uelint? qui paulo ante diem noctemq; tribunicium nomen horrebant, uestram uim metuebant, mentionem legis agrariae pertimescebant, ij nunc etiam ultro rogabuntur, atque orabuntur, ut agros partim publicos, partim plenos inuidiae, plenos periculi, quanti ipsi uelint, decemuiris tradant. atque hoc carmen hic tribu nus pl. non uobis, sed sibi intus canit. habet socerum uirum optimum, qui tantum agri in illis reip. tenebris occupauit, quantum concupiuit. huic subuenire uult succumbenti, iam oppresso, Syllanis oneribus graui, sua lege, ut liceat illi inuidiam deponere, pecuniam condere. et uos non dubitatis, quin uectigalia uestra uendatis plurimo maiorum uestrorum sanguine, & sudore quaesita, ut Syllanos possessores diuitijs augeatis, periculoliberetis? nam ad hanc emptionem decemuiralem duo genera agrorum spectant Quirites. eorum unum propter inuidiam domini fugiunt, alterum propter uasitatem.

Syllanus ager à certis hominibus latissime continuatus  
 tantam habet inuidiam, ut ueri ac fortis tribuni pl.  
 stridorem unum perferre non possit: hic ager omnis,  
 quoquo pretio coemptus erit, tamen ingenti pecunia uo-  
 bis inducetur. alterum genus agrorum propter sterili-  
 tatem incultum, propter pestilentiam uastum, atque  
 desertum, emetur ab ijs, qui eos uident sibi esse, si non  
 uendiderint, relinquendos. & nimirum istud est, quod  
 ab hoc tribuno pl. dictum est in senatu, urbanam ple-  
 bem nimium in rep. posse, exhaustiendam esse: hoc es-  
 nim uerbo est usus, quasi de aliqua sentina, ac non de  
 optimorum ciuium genere loqueretur. uos uero Quiri-  
 tes, si me audire uultis, retinete istam possessionem  
 gratiæ, libertatis, suffragiorum, dignitatis, urbis, fo-  
 ri, ludorum, festorum dierum, cæterorum omnium  
 commodorum. nisi forte mauultis, relictis his rebus,  
 atque hac luce reip. in Sipontina siccitate, aut in Sala-  
 pinorum pestilentia finibus Rullo duce collocari. At di-  
 cat, quos agros empturus sit: ostendat, & quid, &  
 quibus daturus sit. ut uero, cum omnes urbes, agros,  
 uectigalia, regna uendiderit, tum arenam aliquam,  
 aut paludes emat, id uos potestis quæso concedere?  
 quanquam illud est egregium, quod hac lege ante om-  
 nia ueneunt, ante pecuniæ coguntur, & coacervan-  
 tur, quàm gleba una ematur. deinde emi iubet, ab in-  
 uito uetat. quæro, si, qui uelint uendere, non fuerint:  
 quid pecunia fiet? referre in ærarium lex uetat, exigi  
 prohibet. igitur pecuniam omnem decemui ri tenebunt,  
 uobis ager non emetur. uectigalibus abalienatis, socijs  
 uexatis, regibus, atque omnibus gentibus exinanitis,

illi pecunias habebunt, uos agros non habebitis. facile, inquit; adducentur pecuniæ magnitudine, ut uelint uendere. ergo ea lex est, qua nostra uendamus, quanti possumus; aliena emamus, quanti possessores uelint. atque in hos agros, qui hac lege empti sint, colonias ab ijs decemuiris deduci iubet. quid? omnis ne eiusmodi locus est, ut nihil intersit reip. colonia deducatur in eum locum, nec ne: an est locus, qui coloniam postulet? est plane rectius &. quo in genere sicut \* in cæteris reip. partibus, est operæ pretium diligentiam maiorum recordari, qui colonias sic idoneis in locis contra suspicionem periculi collocarunt, ut esse non oppida Italiæ, sed propugnacula imperij uiderentur. hi deducant colonias in eos agros, quos emerint. etiam ne, si reip. non expediat? & in quæ loca præterea uidebitur. quid igitur est causæ, quin coloniam in Ianiculum possint deducere, & suum præsidium in capite, atque ceruicibus uestris possint collocare? tu non definias, quò colonias, in quæ loca, quo numero colonorum deduci uelis? tu occupes locum, quem idoneum ad uim tuam iudicaris? compleas numero? confirmes præsidio, quo uelis? populi R. uectigalibus, atque omnibus copijs ipsum populum R. coerceas? opprimas? redigas in istam decemuiralem ditionem ac potestatem? Ut uero totam Italiam suis præsijs obsidere atque occupare cogitet, quæso Quirites cognoscite. permittit decemuiris ut in omnia municipia, in omnes colonias totius Italiæ colonos deducant, quos uelint: ijsq; colonis agrum dari iubet. num obscure maiores opes, quàm libertas uestra pati potest, & maiora præsidia quærunt.

tur? num obscure regnum constituitur? num obscure libertas uestra tollitur? nam cum iidem omnem pecuniam, maximam multitudinem, idest totam Italiam, suis opibus obsidebunt, iidem uestram libertatem suis praesidijs & colonijs interclusam tenebunt: quæ spes tandem, quæ facultas recuperandæ uestræ libertatis relinquetur? At enim ager Campanus hac lege diuidetur, orbis terræ pulcherrimus: & Capuam colonia deducetur, urbem amplissimam atque ornatissimam. atqui quid ad hæc possumus dicere? de commodo uestro prius dicam Quirites: deinde ad amplitudinem, & dignitatem reuertar: ut, si quis agri aut oppidi bonitate delectetur, ne quid expectet; si quem rei dignitas commouet, ut huic simulatæ largitioni resistat. ac primum de oppido dicam; si quis est forte, quem Capua magis, quàm Roma delectat. Quinque millia colonorum Capuam scribi iubet. ad hunc numerum quingenos sibi singuli sument. quæso nolite uosmet ipsos consolari: uere & diligenter considerate. num uobis, aut uestri similibus, integris, quietis, otiosis hominibus, in hoc numero locum fore putatis? si est omnibus uobis, aut maiori uestrum parti: quanquam me uester honos uigilare dies, atque noctes, et intentis oculis omnes reip. partes intueri iubet; tamen paulisper, si ita commodum uestrum feret, connuebo. sed si quinque hominum millibus ad uim, facinus, cædemq; delectis locus atque urbs, quæ bellum facere atque instruere possit, quaeritur: tamen ne patiemini uestro nomine contra uos firmari opes, armari praesidia, urbes, agros, copias comparari? nam agrum quidem Campanum, quem uobis



ostendant, ipsi concupiuerunt: deducunt suos, quorum nomine ipsi teneant & fruantur: coement prater ea: ista dena iugera continuabunt. nam si dicent per legem id non licere: ne per Corneliam quidem licet: at uideamus (ut longinqua mittamus) agrum Prænestinum à paucis possideri: neque istorum pecunijs quidquam aliud deesse uideo, nisi eiusmodi fundos, quorum subsidio familiarum magnitudines, & Cumanorum, ac Puteolanorum prædiorum sumptum sustinere possint. quòd si uestrum commodum spectat, ueniat, & coram mecum de agri Campani diuisione disputet. quæsiui ex eo calendis Ian. quibus hominibus, & quemadmodum illum agrum esset distributurus. respondit, à Romilia tribu se initium esse facturum. primum quæ est ista superbia, & contumelia, ut populi pars amputetur, ordo tribuum negligatur? ante rusticis detur ager, qui habent, quàm urbanis, quibus ista agri spes & iucunditas ostenditur? aut si hoc ab se dictum negat, & satisfacere omnibus uobis cogitat: proferat, in iugera dena describat, ab usura nam usque ad Narniensem nomina uestra proponat. si non modo dena iugera dari uobis, sed ne constipari quidem tantum numerum hominum posse in agrum Campanum intelligetis: tamen ne uexari remp. contemni maiestatem populi R. deludi uosmet ipsos diutius à tribuno pl. patiemini? quòd si posset ager iste ad uos peruenire, non ne eum tamen in patrimonio uestro remanere malletis? unum ne fundum pulcherrimum populi R. caput uestre pecunie, pacis ornamentum, subsidium belli, fundamentum uectigalium, horreum legionum, solatium annonæ, disperia

re patiemini? an obliti estis, Italico bello, amissis ceteris  
 uectigalibus, quantos agri Campani fructibus exerci-  
 tus alueritis? an ignoratis, cetera illa magnifica popu-  
 li R. uectigalia perleui saepe momento fortunæ, inclina-  
 tione temporis pendere? quid nos Asia portus, quid Sy-  
 ria rura, quid omnia transmarina uectigalia inua-  
 bunt, tenuissima suspitione prædonum, aut hostium  
 iniecta? at uero hoc agri Campani uectigal cum eius-  
 modi est, ut domi sit, & omnibus præsidijs oppidorum  
 tegatur: tum neque bellis infestum, nec fructibus ua-  
 rium, nec cælo ac loco calamitosum esse solet. maiores  
 nostri non solum id, quod à Campanis ceperant, non im-  
 minuerunt, uerum etiam, quod & tenebant, quibus  
 adimi iure non poterat, coemerunt. qua de causa  
 nec duo Gracchi, qui de plebis R. commodis plurimum  
 cogitauerunt; nec L. Sylla, qui omnia sine ulla reli-  
 gione, quibus uoluit, est dilargitus, agrum Campa-  
 num attingere ausus est. Rullus extitit, qui ex ea pos-  
 sessione remp. dimoueret, ex qua nec Gracchorum be-  
 nignitas eam, nec Syllæ dominatio deieciisset. quem a-  
 grum nunc prætereuntes uestrum esse dicitis; & quem  
 pariter, qui iter faciunt, externi homines uestrum esse  
 audiunt: is, cum erit diuisus, neque erit, neque uester  
 esse dicetur. at qui homines possidebunt? primo qui-  
 dem acres, ad uim prompti, ad seditionem parati, qui,  
 simulac decemuirî concrepuerint, armati in ciues, &  
 expediti ad cædem esse possint. deinde ad paucos opi-  
 bus, & copijs affluenteis totum agrum Campanum  
 perferri uidebitis. uobis interea, qui illas à maioribus  
 pulcherrimas uectigalium sedes armis captas accepistis,

gleba nulla de paternis, atque avitis possessionibus re-  
linquetur: ac tantum intererit inter uestram, & pri-  
uatorum diligentiam, quod, cum à maioribus uestris P.  
Lentulus, princeps senatus, in ea loca missus esset, ut  
& priuatos agros, qui in publicum Campanum incur-  
rebant, pecunia publica coemeret, dicitur renunciaſſe,  
nulla se pecunia fundum cuiusdam emere potuiſſe;  
eumq; qui nollet uendere, ideo negaſſe se adduci poſſe  
ut uenderet, quod, cum plures fundos haberet, ex illo  
ſolo fundo nunquam malum nuncium audiſſet: ita ne  
uero? priuatum hæc cauſa commouit; populum R. ne  
agrum Campanum priuatis gratis Rullo rogante tra-  
dat, non commouebit? atqui idem populus R. de hoc  
uectigali poteſt dicere, quod ille de ſuo fundo dixiſſe di-  
citur. Aſia multos annos uobis fructum Mithridatico  
bello non tulit: Hispaniarum uectigal temporibus Ser-  
torianis nullum fuit: Sicilia ciuitatibus bello fugitiuo-  
rum M. Aquillius etiam mutuum frumentum dedit:  
at ex hoc uectigali nunquam malus nuncius auditus  
eſt. cætera uectigalia belli facultatibus affliguntur:  
hoc uectigali etiam belli facultates ſuſtentantur. dein-  
de in hac aſſignatione agrorum ne illud quidem dici po-  
teſt, quod in cæteris, agros deſertos à plebe, atque à cul-  
tura hominum liberorum eſſe non oportere. ſic enim di-  
co; ſi Campanus ager diuidatur, exturbari & expelli  
plebem ex agris, non conſtitui, et collocari: totus enim  
ager Campanus colitur, et poſſidetur à plebe, & à ple-  
be optima, & modeſtiſſima: quod genus hominum os-  
ptime moratum, optimorum & aratorum, & mili-  
tum, ab hoc plebicola tribuno funditus eiicitur. atque

illi miseri nati in illis agris, & educati, glebis subigen-  
dis exercitati, quò se subito conferant, non habebunt :  
his robustis, & ualentibus, & audacibus decemuirum  
satellitibus agri Campani possessio tota tradetur . & ut  
uos nunc de uestris maioribus prædicatis, hunc agrum  
nobis maiores nostri reliquerunt : sic uestri posteri de  
uobis prædicabunt, hunc agrum patres nostri acceptum  
à patribus suis perdiderunt . equidem existimo, si iam  
campus Martius diuidatur, et unicuique uestrum, ubi  
consistat, bini pedes assignentur : tamen promiscue to-  
to, quàm proprie parua frui parte malletis . quare es-  
tiam si ad uos esset singulos aliquod ex hoc agro peruen-  
turum, qui uobis ostenditur, alijs comparatur : tamen  
honestius eum uos uniuersi, quàm singuli possideretis.  
nunc uero cum ad uos nihil pertineat, sed paretur a-  
lijs, eripiatu'r uobis : non'ne acerrime, tanquam arma-  
to hosti, sic huic legi pro uestris agris resistetis ? Adiu-  
git Stellatam campum agro Campano, & in eo duo-  
dena describit in singulos homines iugera . quasi uero  
paulum differat ager Campanus, ac Stellatis . & mula-  
titudo Quirites quæritur, qua illa oppida omnia com-  
pleantur . nam dixi antea, lege permitti, ut, quæ ue-  
lint municipia, quas uelint ueteres colonias, colonis suis  
occupent . Calenum municipium complebunt : Thea-  
num opprimunt : Atellam, Cumas, Neapolin, Pomo-  
peios, Nuceriam suis præsijs deuincient : Puteolos ue-  
ro, qui nunc in sua potestate sunt, suo iure libertateq;  
utuntur, totos nouo populo, atque aduentitijs copijs  
occupabunt . tunc illud exilium Campanæ coloniae, ue-  
hementer huic imperio timendum, Capuam à decem-  
uiris



uiris inferetur : tunc contra hanc Romam, communem patriam omnium nostrum, illa altera Roma quaeretur, in id oppidum homines nefarii remp. nostram transferre conantur, quo in oppido maiores uestri nullam omnino remp. esse uoluerunt : qui tres solum urbes in terris omnibus, Carthaginem, Corinthum, Capuam, statuerunt posse imperij gravitatem ac nomen sustinere. deleta Carthago est, quod cum hominum copijs, tum ipsa natura, ac loco, succincta portibus, armata muris, excurrere ex Africa, imminere ita fructuosissimis insulis populi R. uidebatur. Corinthi uestigium uix relictum est : erat enim posita in angustijs, atque in faucibus Graeciae, sic, ut terra claustra locorum teneret, & duo maria maxime nauigationi diuersa pene coniungeret, cum pertenui discrimine separarentur. hac, quae procul erant à conspectu imperij, non solum affligerunt, sed etiam, ne quando recreata exurgere, atque erigere se possent, funditus, ut dixi, sustulerunt. de Capua multum est & diu consultum. extant literae Quirites publicae : sunt S. C. complura. statuerunt homines sapientes, si agrum Campanis ademissent, magistratus, senatum, publicum ex illa urbe consilium sustulissent, imaginem reip. nullam reliquissent, nihil fore quod Capuam timeremus. itaque hoc perscriptum in monumentis ueteribus reperietis : ut esset urbs, quae res eas, quibus ager Campanus coleretur, suppeditare posset ; ut esset locus comparandis, condendisq; fructibus ; ut aratores cultu agrorum defessi, urbis domicilijs uterentur ; iccirco illa aedificia non esse deleta. uidete, quantum interuallum sit interiectum inter maiorum

nostrorum consilia, & inter istorum hominum dementiam. illi Capuam receptaculum aratorum, nundinas rusticorum, cellam atque horreum Campani agri esse uoluerunt: hi expulsis aratoribus, effusis ac dissipatis fructibus uestris, eandem Capuam sedem nouæ reip. constituunt, moleni contra ueterem remp. comparant. quod si maiores nostri existimassent, quenquam in tam illustri imperio, & tam præclara populi R. disciplina Bruti aut P. Rulli similem futurum, (hos enim nos duos adhuc uidemus, qui hanc remp. Capuam totam transferre uellent) profecto nomen illius urbis non reliquissent. uerum arbitrabantur, Corintho, & Carthagini, etiam si senatum, & magistratum sustulissent, agrumq; ciuibus ademissent, tamen non defore, qui illa restituerent, atque qui ante omnia commutarent, quam nos audire possemus; hic uero, in oculis senatus, populiq; R. nihil posse existere, quod non ante extinguï, atque opprimi posset, quam plane exortum ac natum esset. neque uero ea res fefellit homines diuina mente, & consilio præditos: nam post Q. Fuluium, Q. Fabium consules, quibus consulibus Capua deuicta, atque capta est, nihil est in ea urbe contra hanc remp. non dico factum, sed omnino excogitatum. multa postea bella gesta cum regibus, Philippo, Antiocho, Persa, Pseudophilippo, Aristonico, Mithridate, & cæteris: multa præterea bella grauiâ, Carthaginensium, Corinthium, Numantinum: multæ in hac rep. seditiones domesticæ, quas prætermitto: bella cum socijs, Fregellanum, Marficum: quibus omnibus domesticis externisq; bellis Capua non modo non

obfuit, sed opportunissimam se nobis præbuit, & ad bellum instruendum, & ad exercitus ornandos, & rectis, ac sedibus suis recipiendos. homines non inerant in urbe, qui malis concionibus, turbulentis S. C. iniquis imperijs remp. miscerent, & rerum nouarum causam aliquam quærerent: neque enim concionandi potestas erat cuiquam, nec consilij capiundi publici: non gloriæ cupiditate efferebantur: propterea quòd, ubi hos publice non est, ibi gloriæ cupiditas esse non potest: non contentione, non ambitione discordes: nihil enim supererat, de quo certarent; nihil, quod contra peterent; nihil, ubi dissiderent. itaque illam Campanam arrogantiam, atque intolerandam ferociam ratione, & consilio maiores nostri ad inertissimum, & desidiosissimum otium perduxerunt. sic & crudelitatis infamiam effugerunt, quòd urbem ex Italia pulcherrimam non sustulerunt: & multum in posterum prouiderunt, quòd, neruis urbis omnibus exectis, urbem ipsam solutam, ac debilitatam reliquerunt. hæc consilia maiorum M. Bruto, ut antea dixi, reprehendenda, & P. Rullo uisa sunt: neque te P. Rulle omina illa M. Bruti, atque auspicia à simili furore deterrent. nam & ipse, qui deduxit, & qui magistratum Capuæ, & Leocranti ceperunt, & qui aliquam partem illius deductionis, honoris, muneris attigerunt, omnes acerbissimas impiorum pœnas pertulerunt. Et quoniam Brutus, atque illius temporis feci mentionem, commemorabo id, quod egomet uidi, cum uenissem Capuam, coloniam deductam L. Confidio, & Sex. Saltio, quemadmodum ipsi loquebantur, prætoribus: ut intelligatis,



quantam locus ipse afferat superbiam: quæ paucis diebus, quibus illo colonia deducta fuit, perspicere atque intelligi potuit. nam primum, id quod dixi, cum cæteris in coloniis duumviri appellantur, hi se prætores appellari uolebant. quibus primus annus hanc cupiditatem attulisset, non ne arbitramini paucis annis fuisse consulum nomen appetituros? deinde anteibant lictores, non cum bacillis, sed, ut hic prætoribus antecunt, cum fascibus duobus. erant hostiæ maiores in foro constitutæ, quæ ab his prætoribus de tribunali, sicut à nobis consilibus de consilij sententia probatis, ad præconem, & ad tibicinem immolabantur. deinde patres conscripti uocabantur. iam uero uultum Considij uidere, ferendum uix erat. quem hominem ut grandi macie torridum, Romæ contemptum, abiectum uidebamus, hunc Capuæ Campano supercilio, ac regio spiritu cum uideremus, Magios, Blossios mihi uidebar illos uidere, ac Iubelios. iam uero qui metus erat tunicatorum illorum? & in Albana, & Seplasia quæ concursatio percontantium, quid prætor edixisset? ubi coenaret? quid enunciaisset? nos autem, hinc Roma qui ueneramus, iam non hospites, sed peregrini, atque aduenæ nominabamur. hæc qui prospexerint, maiores nostros dico Quirites, non eos in deorum immortalium numero uenerandos à nobis, & colendos putatis? quid enim uiderunt? hoc, quod nunc uos quæso perspicite, atque cognoscite. non ingenerantur hominibus mores tam à stirpe generis, ac seminis, quam ex ijs rebus, quæ ab ipsa natura loci, & à uitæ consuetudine suppeditantur, quibus alimur, & uiuimus. Carthaginenses fraudu=



lenti, & mendaces, non genere, sed natura loci, quòd propter portus suos multis & varijs mercatorum & aduenarum sermonibus ad studium fallendi studio quæstus uocabantur. Ligures montani, duri, atque agrestes: docuit ager ipse, nihil ferendo, nisi multa cultura, & magno labore quæsitum. Campani semper superbi bonitate agrorum, & fructuum, magnitudine urbis, salubritate, descriptione, pulchritudine. ex hac copia, atque omnium rerum affluentia primum illa nata sunt; arrogantia, qua à maioribus nostris alterum Capua consulem postulauit; deinde ea luxuries, quæ ipsum Annibalem armis etiam tum inuictum uoluptate uicit. huc isti decemuii cum numerum colonorum ex lege Rulli deduxerint, centum decuriones, decem augures, sex pontifices constituerint: quos illorum animos, quos impetus, quam ferociam fore putatis? Romam in montibus positam, & conuallibus, cornaculis sublatam atque suspensam, non optimis uijs, angustissimis semitis, præ sua Capua planissimo in loco explicata, ac præ illis semitis irridebunt, atque contemnunt. agros uero, Vaticanum, et Pupiniam, cum suis optimis atque uberibus campis conferendos scilicet putabunt. oppidorum autem finitimorum illam copiam cum hac per risum, ac per iocum contendunt: Labicos, Fidenas, Collatiam, ipsum hercle Lanuuium, Ariciam, Tusculum, cum Calibus, Theano, Neapoli, Puteolis, Cumis, Pompeijs, Nuceria comparabunt. quibus illi rebus elati, & inflati, fortasse non continuo, sed certe si paulum assumpserint uetustatis, ac roboris, non continebuntur, progredientur longius, efferentur. singularis homo

priuatus, nisi magna sapientia præditus, uix facile se-  
 se regionibus officij, magnis in fortunis, & copijs con-  
 tinet: nedum isti ab Rullo, & Rulli similibus conqui-  
 sti, atque electi coloni; Capuæ, in domicilio superbiæ,  
 atque in sedibus luxuriæ collocati, non statim conqui-  
 situri sint aliquid sceleris, & flagitij: immo uero etiam  
 hoc magis, quàm illi ueteres, germaniq; Campani,  
 quòd in uetere fortuna illos natos & educatos nimis  
 tamen rerum omnium copię deprauabant; hi ex sum-  
 mæ egestate in eandem rerum abundantiam traducti,  
 non solum copia, uerum etiam insolentia commouebun-  
 tur. hæc tu P. Rulle M. Bruti sceleris uestigia, quàm mo-  
 nimenta maiorum sapientiæ, sequi maluisti: hæc tri-  
 cum istis tuis auctoribus excogitasti, ut uetera uectiga-  
 lia uenderetis, et expleretis noua; ut urbi Capuam ad-  
 certamen dignitatis opponeretis; ut sub uestrum ius, iu-  
 risdictionem, potestatem, urbes, nationes, prouincias, li-  
 beros populos, reges, terrarum denique orbem subiun-  
 geretis; ut, cum omnem pecuniam ex ærario exhaustis-  
 setis, ex uectigalibus redegetis, ab omnibus regibus,  
 gentibus, imperatoribus nostris coegissetis, tamen omnes  
 uobis pecunias ad nutum uestrum penderent; ut ijdem  
 partim inuidiosos agros à Syllanis possessoribus, partim  
 desertos ac pestilentes à uestris necessarijs, à uobismet ip-  
 sis emptos, quanti uelletis populo R. induceretis; ut om-  
 nia municipia, coloniasq; Italiæ nouis colonis occupare-  
 tis; ut, quibuscunque in locis uobis uideretur, ac quàm  
 multis uideretur, colonias collocaretis; ut omnem remp-  
 uestris militibus, uestris urbibus, uestris præsijs cin-  
 geretis, atque oppressam teneretis; ut ipsum Cn. Poma

peium, cuius praesidio sapissime populus R. contra acerrimos hostes, & contra improbissimos ciues uictor extitit; proscribere, atque horum conspectu priuare possitis; ut nihil auro & argento uiolari, nihil numero, & suffragiis declarari, nihil elata manu perfringi posset, quod non uos oppressum, atque ereptum teneretis; ut uolitareris interea per gentes, per regna omnia cum imperio summo, cum iudicio infinito, cum omni pecunia; ut ueniretis in castra Cn. Pompeij, atque ipsa castra, si commodum uobis esset, uenderetis; ut interea magistratus reliquos legibus omnibus soluti, sine metu iudiciorum, sine periculo petere possitis; ut nemo ad populum R. uos adducere, nemo producere, non senatus cogere, non consul coercere, non tribunus pl. retinere possit: hac ego uos concapuisse pro uestra stultitia, atque intemperantia, non miror; sperasse me consule assequi posse, demiror. nam cum omnium consulum gratia in rep. custodienda cura, ac diligentia debet esse, tum eorum maxime, qui non in cunabulis, sed in campo sunt consules facti: nulli populo R. pro me maiores mei spoponderunt: mihi creditum est: à me petere, quod debeo, me ipsum appellare debetis. quemadmodum, cum petebam, nulli me uobis auctores generis mei commendarunt: sic, si quid deliquero, nullae sunt imagines, quae me à uobis deprecantur. quare, modo ut uita suppetat; quanquam ego sum is, qui eam possim ab istorum scelere, insidijsq; defendere: polliceor hoc uobis Quirites bona fide, remp. uigilanti homini, non timido; diligenti, non ignauo commisistis. ego is consul, qui concionem metuum? qui tribunos pl. perhorrescam?

qui sæpe & sine causa tumultuer? qui timeam, ne  
 mihi in carcere habitandum sit, si tribunus pl. duci ius-  
 sisset? ego nondum uestris armis armatus, insignibusq;  
 amplissimis ornatus, imperio, auctoritate, non horru-  
 in hunc locum progredi posse, vobisq; auctoribus impro-  
 bitati hominis resistere: nunc verear, ne resp. tantis mu-  
 nita praesidijs ab istis uinci, aut opprimi possit? si an-  
 tea timuisssem, hac concione, hoc populo certe non vere-  
 rer: quis enim unquam tam secunda concione legem  
 agrariam suasit, quam ego dissuasi? si hoc dissuadere  
 est, ac non disturbare, ac peruertere. ex quo intelligi  
 Quirites potest, nihil esse tam popolare, quam id, quod  
 ego vobis in hunc annum consul popularis afferro, pa-  
 cem, tranquillitatem, otium. quæ nobis designatis ti-  
 mebatis; ea ne accidere possent, consilio meo, ac ratio-  
 ne prouisa sunt. non modo uos eritis in otio, qui sem-  
 per esse uolueratis, uerum etiam istos, quibus otiosi  
 negotium fecissemus, otiosissimos reddam. etenim illis  
 honores, potestates, diuitiæ ex tumultu, atque ex dis-  
 sensionibus ciuium comparari solent; uos, quorum gra-  
 tia in suffragijs consistit, libertas in legibus, honos in  
 iudicijs & æquitate magistratus, res familiaris in pa-  
 ce, omni ratione otium tenere debetis. nam etsi ij, qui  
 propter desidiā in otio uiuunt, tamen in sua turpi  
 inertia capiunt uoluptatem: sub ipso otio, quo uos for-  
 tunam regitis, hūc statum, quem habetis, esse meliorem  
 \* non ignoratis, non ut quæsitum, sed uita partum otii  
 tenueritis. quod ego et concordia, quam mihi constitui  
 cum collega, inuitissimis ijs hominibus, quos in consula-  
 tu inimicos esse & animis, & corporis actibus prouidi



omnibus prospexi, et sane \* renocavi: idem tribunis pl. denunciaui, ne quid turbulenti me consule conflarent. summum et firmissimum est illud communibus fortunis praesidium Quirites, ut, quales uos hodierna die maxima concione mihi pro salute uestra praebuistis, tales reliquis temporibus populo R. praebatis. pro certo polliceor hoc uobis, atque confirmo, me esse perfecturum, ut iam tandem illi, qui honori inuiderunt meo, tamen uos uniuersos in consule deligendo plurimum uidisse fateantur.

DE LEGE AGRARIA CONTRA  
P. SERVILIUM RULLUM  
TRIB. PL. AD POPULUM.  
ORATIO XVII.

Commodius fecissent tribuni pl. *Quirites*, si, quæ apud uos de me deferunt, ea coram potius me præsentem dixissent: nam & æquitatem uestre disceptationis, & consuetudinem superiorum, & ius suæ potestatis retinuissem. sed quoniam adhuc præsens certamen, contentionemq; fugerunt, nunc, si uidetur eis, in meam concionem prodeant, & quò provocati à me uenire noluerunt, reuocati saltem reuertantur. Video quosdam *Quirites* strepitu significare nescio quid, & non eosdem uultus, quos proxima mea concione præbuerunt, in hanc concionem mihi retulisse. quare à uobis, qui nihil de me credidistis, ut eam uoluntatem, quam semper habuistis erga me, retineatis, peto: à uobis autem, quos leuiter immutatos esse sentio, paruam exigui temporis usuram bonæ de me opinionis postulo, ut eam, si, quæ dixero, uobis probabo, perpetuo retineatis; sin aliter, hoc ipso in loco depositam, atque abiectam relinquantis. Completi sunt animi, auresq; uestre *Quirites*, me gratificantem septem tyrannis, ceterisq; Syllanarum assignationum possessoribus, agrariæ legi, & commodis uestris obsistere. hæc si qui crediderunt, illud prius crediderint necesse est, hac lege agraria, quæ promulgata sit, adimi Syllanos agros, uobisq; diuidi,

aut denique minui priuatorum possessiones, ut in eas uos deducamini. si ostendo, non modo non adimi cuiquam gl'iam de Syllanis agris, sed etiam genus id agrorum certo capite legis impudentissime confirmari atque sanciri; si doceo, agris ijs, qui a Sylla sunt dati, sic diligenter Rullum sua lege consulere, ut facile appareat eam legem non a uestrorum commodorum patrono, sed a Valgij genero esse conscriptam: num quid est cause Quirites, quin illa criminatione, qua in me absentem usus est, non solum meam, sed etiam uestram diligentiam prudentiamq; despexerit? Caput est legis XL. de quo ego consulto Quirites neque apud uos ante feci mentionem, ne aut refricare obductam iam reip. cicatricem uiderer, aut aliquid alienissimo tempore nouae dissensionis commouere; neque uero nunc ideo disputabo, quod hunc statum reip. non magnopere defendendum putem, praesertim qui otij, & concordiae patronum me in hunc annum reip. professus sim; sed ut doceam, Rullum posthac in ijs saltem tacere rebus, in quibus de se, & de suis factis taceri uelit. Omnium legum iniquissimam, dissimillimamq; legis esse arbitror eam, quam L. Flaccus interrex de Sylla tulit, ut omnia, quaecunque ille fecisset, essent rata. nam cum ceteris in ciuitatibus, tyrannis institutis, leges omnes extinguantur, atque tollantur; hic reip. tyrannum lege constituit. est inuidiosa lex, sicut dixi: uerumtamen habet excusationem: non enim uidetur hominis lex esse, sed temporis. quid, si est haec multo impudentior? nam Valeria lege Cornelijq; legibus, cum eripitur, datur: coniungitur impudens gratificatio cum

acerba iniuria: sed tamē habet in illis legibus spem nonnullam ille, cui ademptus est; aliquem scrupulum, cui datus est: Nulli cautio est hæc: QVAE POST C. MARIVM CN. PAPIRIVM CONSVLES. quān procul à suspitione fugit, quòd eos consules, qui aduersarij Syllæ maxime fuerunt, potissimum nominavit. si enim Syllam dictatorem nominasset, perspicuum fore, & invidiosum arbitratus est. sed quem uestrum tam tardo ingenio fore putavit, cui post eos consules Syllam dictatorem fuisse in mentem uenire non posset? quid ergo ait Marianus tribunus pl. quī nos Syllanos in inuidiam rapit? QVAE POST MARIVM ET CARBONEM CONSVLES. agros, ædificia, lacus, stagna, loca, possessiones: cælum, et mare prætermisit, cætera complexus est. PVBLICE DATA, ASSIGNATA, VENDITA, CONCESSA SVNT. à quo Rulle? post Marium et Carbonem consules quis assignavit? quis dedit? quis concessit, præter Syllam? EA OMNIA EO IVRE SINT. quo iure? labefactat uidelicet nescio quid. nimium acer, nimium uehemens tribunus plebis Syllana rescindit. VT QVAE OPTIMO IVRE PRIVATA SINT. etiam ne meliore, quān paterna & auita? meliore. at hoc Valeria lex non dicit, Corneliæ leges non sanciant, Sylla ipse non postulat. si isti agrī partem aliquam iuris, aliquam similitudinem propriæ possessionis, aliquam spem diuturnitatis attingunt: nemo est tam impudens istorum, quin agi secum præclare arbitretur. tu uero Rulle quid quæris?



quod habent, ut habeant? quis uetat? ut priuatum. sed ita latum est, ut melior tui soceri fundus Irpinus sit, siue ager Irpinus, (totum enim possidet) quàm meus paternus auitusq; fundus Arpinas: id enim caues: optimo enim iure ea sunt profecto prædia, quæ optima conditione sunt: libera meliore iure sunt, quàm serua. capite hoc omnia, quæ seruiebant, non seruiunt: soluta meliore in causa sunt, quàm obligata. eodem capite obligata omnia, si modo Syllana sunt, liberantur: immunia cōmodiore conditione sunt, quàm illa, quæ pensitant. ego Tusculanis pro aqua Crabra uectigal pendam, quia à municipio fundum accepi: si à Sylla mihi datus esset, Rulli lege non penderem. Video uos Quirites, sicuti res ipsa cogat, commoueri, uel legis, uel orationis impudentia: legis, quæ ius melius Syllanis prædijs constituat, quàm paternis: orationis, quæ eiusmodi causa in simulare quenquam audeat, rationes Syllæ nimium uehementer defendere. at si illa solum sanciret, quæ à Sylla essent data, tacerem, modo ipse se Syllanum esse confiteretur: sed non modo illis cauet, uerum etiam aliud quoddam genus donationis inducit; & is, qui à me Syllanas possessiones defendi criminatur, non eas solum sancit, uerum ipse novas assignationes instituit, & repentinus Sylla nobis exoritur. nam attendite, quantas concessiones agrorum hic noster obiurgator uno uerbo facere conatur. QVÆ DATA, DONATA, CONCESSA, VENDITA. patior, audio: quid deinde? POSSESSA. hoc tribunus pl. promulgare ausus est, ut, quod quisque post Marium & Carbonem

consules possidet, id eo iure teneret, quo optimo priuatum? etiam'ne si ui eiecit? etiam'ne si clam, si precario uenit in possessionem? ergo hac lege ius ciuile, causa possessionum, praetorum interdicta tollentur. non mediocres res, neque paruum sub hoc uerbo furtum Quirites latet: sunt enim multi agri lege Cornelia publicati, nec cuiquam assignati, neque uenditi, qui à paucis hominibus impudentissime possidentur: his cauet, hos defendit, hos priuatos facit: hos inquam agros, quos Sylla nemini dedit, Rullus non uobis assignare uult, sed eis condonare, qui possident. causam quaero, cur ea, quae maiores uobis in Italia, Sicilia, duabus Hispanijs, Macedonia, Asia quaesuerunt, uenire patiamini, cum ea, quae uestra sunt, condonari possessoribus eadem lege uideatis. iam totam legem intelligetis, cum ad paucorum dominationem scripta sit, ad Syllanae assignationis rationes esse accommodatissimam, nam socer huius uir multum bonus est: neque ego nunc de illius bonitate, sed de generi impudentia disputo. ille enim, quod habet, retinere uult, neque se Syllanum esse dissimulat: hic, ut ipse habeat, quod non habet, quae dubia sunt, per uos sancire uult: et cum plus appetat, quam ipse Sylla, quibus ego rebus resisto, Syllanas res defendere criminatur. habet agros nonnullos, inquit, socer meus, desertos atque longinquos: uendet eos mea lege, quanti uolet. habet incertos ac nullo iure possessos; confirmabuntur optimo iure. habet publicos: reddam priuatos. denique cos fundos, quos in agro Casinati optimos, fructuosissimos continuauit, cum usque eò uicinos proscriberet, quoad oculos continuauit.

do, ex multis prædijs unam fundi regionem formamq;  
 perfecit, quos nunc cum aliquo metu tenet, sine ulla  
 cura possidebit. & quoniam, qua de causa, & quo-  
 rum causa ille hoc promulgauit, ostendi; doceat ipse,  
 num ego quem possessorem defendam, cum agrariae le-  
 gi resisto. siluam scantiam uendis: resp. possidet: de-  
 fendo. Campanum agrum diuidis: uos estis in posses-  
 sione: non cedo. deinde Italiae, Siciliae, cæterarumq;  
 prouinciarum possessiones uenales, ac proscriptas hac  
 lege uideo: uestra sunt prædia, uestræ possessiones: res-  
 sistam, atque repugnabo, neque patiar à quoquam  
 populum R. de suis possessionibus me consule dimoue-  
 ri, præsertim cum uobis nihil quærat: hoc enim uos  
 in errore uersari diutius non oportet. num qui uestrum  
 ad uim, ad facinus, ad cædem accommodatus est?  
 nemo. atqui ei generi hominum, mihi credite, Cam-  
 panus ager, & præclara illa Capua seruetur: exerci-  
 tus contra uos, contra libertatem uestram, contra Cn.  
 Pompeium constituitur: contra hanc urbem Capua,  
 contra uos manus hominum audacissimorum, contra  
 Cn. Pompeium decem duces comparantur. ueniant co-  
 ram, et, quoniam me in uestram concionem uobis fla-  
 gitantibus conuocauerunt, differant.

PRO C. RABIRIO PERDVELLIO-  
NIS REO, AD QVIRITES.  
ORATIO XVIII.

TSI Quirites non est mea consue-  
tudinis, initio dicendi rationem redde-  
re, qua de causa quenque defendam;  
propterea quod cum omnibus ciuibus  
in eorum periculis semper satis iustam  
mihi causam necessitudinis esse duxi: tamen in hac de-  
fensione capitis, famæ, fortunarum omnium C. Ra-  
birij, proponenda ratio uidetur esse officij mei; propte-  
rea quod quæ iustissima mihi causa ad hunc defenden-  
dum esse uisa est, eadem uobis ad absoluendum debet  
uideri. nam me cum amicitie uetustas, tum dignitas  
hominis, tum ratio humanitatis, tum mea uitæ per-  
petua consuetudo ad C. Rabirium defendendum est ad-  
hortata: tum uero, ut id studiosissime facerem, salus  
reip. consulare officium, consulatus denique ipse mihi  
una uobiscum cum salute reip. commendatus coegit.  
non enim C. Rabirium culpa delicti, non inuidia, ui-  
tæq; turpitudine, non denique ueteres, iustæ, grauesq;  
inimicitie ciuium in discrimen capitis uocauerunt: sed,  
ut illud summum auxilium maiestatis atque imperij,  
quod nobis à maioribus est traditum, de rep. tollere-  
tur, ut nihil posthac auctoritas senatus, nihil consu-  
lare imperium, nihil consensus bonorum contra pe-  
stem, ac perniciem ciuitatis ualeret, iccirco in his rebus  
euertendis unius hominis senectus, infirmitas, solitu-  
doq; tentata est. quamobrem si est boni consulis, cum  
cuncta



cuncta auxilia reip. labefactari conuelliq; uideat, ferre opem patriæ, succurrere saluti fortunisq; communibus, implorare ciuium fidem, suam salutem posteriore salute communi ducere: est etiam bonorum, & fortium ciuium, quales uos omnibus reip. temporibus extitistis, intercludere omnes seditionum uias, munire præsidia reip. summum in consulibus imperium, summum in senatu consilium putare; ea qui secutus sit, laude potius & honore, quam pœna & supplicio dignum iudicari. quamobrem labor in hoc defendendo præcipue meus est, studium uero conseruandi hominis commune mihi uobiscum esse debet. sic enim existimare debetis Quirites, post hominum memoriam rem nullam maiorem, magis periculosam, magis ab omnibus uobis prouidendam, neque à tribuno pl. susceptam, neque à consule defensam, neque ad populum R. esse delatam. agitur enim nihil aliud in hac causa Quirites, quam ut nullum sit posthac in rep. publicum consilium, nulla bonorum consensio contra improborum furorem, & audaciam, nullum extremis reip. temporibus perfugium, & præsidium salutis. quæ cum ita sint, primum, quod in tanta dimicatione capitis, famæ, fortunarumq; omnium fieri necesse est, ab Ioue optimo Maximo, cæterisq; dijs, deabusq; immortalibus, quorum ope, & auxilio multo magis hæc resp. quam ratione hominum, & consilio gubernatur, pacem ac ueniam peto, precorq; ab ijs, ut hodiernum diem & ad huius salutem conseruandam, & ad rep. constituendam illuxisse patiantur: deinde uos Quirites, quorum potestas proxime ad deos

rum immortalium numen accedit, oro, atque obsecro, quoniam uno tempore uita C. Rabirij, hominis miserrimi atque innocentissimi, salus reip. uestris manibus suffragijsq; permittitur, adhibeatis in hominis fortunis misericordiam, in reip. salute sapientiam, quam soletis. Nunc quoniam T. Labiene diligentiae meae temporis angustijs obstitisti, meq; ex comparato et constituto spatio defensionis in semihorae curriculum coegisti: parebitur & , quod iniquissimum est, accusatoris conditioni, & , quod miserrimum, inimici potestati. quanquam in hac praescriptione semihorae patroni mihi partes reliquisti, consilia ademisti: propterea quod ad defendendum propemodum satis erit hoc mihi temporis, uerum ad conquerendum parum. Nisi forte de locis religiosis, ac de lucis, quos ab hoc uiolatos esse dixisti, pluribus uerbis tibi respondendum putas. quo in crimine nihil est unquam ab te dictum, nisi, à C. Macro obiectum esse crimen id C. Rabirio. in quo ego demorror, meminisse te, quid obiecerit C. Rabirio Macer inimicus; oblitum esse, quid aequi, & iurati iudices iudicarint. An de peculatu facto, an de tabulario incendio longa oratio est expromenda? quo in crimine propinquus C. Rabirij, iudicio clarissimo, C. Curtius pro uirtute sua est honestissime liberatus: ipse uero Rabirius non modo in iudicium horum criminum, sed ne in tenuissimam quidem suspicionem uerbo est unquam uocatus. An de sororis filio diligentius respondendum est, quem ab hoc necatum esse dixisti, cum ad iudicii moram familiaris funeris excusatio quaereretur? quid enim est tam uerisimile, quam, cariorem huic sororis maritum,

quàm sororis filium fuisse? atque ita cariorem, ut alter uita crudelissime priuaretur, cum alteri ad prolationem iudicij biduum quæreretur? An de seruis alienis contra legem Fabiam retentis, aut de ciuibus R. contra legem Porciam uerberatis, aut necatis plura dicenda sunt? cum tanto studio C. Rabirius totius Appulie, singulari uoluntate Campanie uicinitatis ornatur; cumq; ad eius propulsandum periculum non modo homines, sed prope regiones ipsæ conuenerint, aliquanto etiam latius excitata, quàm ipsius uicinitatis nomen ac termini postulabant. Nam quid ego ad id longam orationem comparem, quod est in eadem multa irrogatione perscriptum, hunc nec suæ, nec alienæ pudicitie pepercisse? quin etiam suspicor eo mihi semihoram à Labieno præstitutam esse, ut ne plura de pudicitia dicerem. ergo ad hæc crimina, quæ patroni diligētiam desiderant, intelligis mihi semihoram istam nimium longam fuisse. Illam alteram partem, de nece Saturnini, nimis exiguam, atque angustam esse uoluisti: quæ non oratoris ingenium, sed consulis auxilium implorat, & flagitat. nam de perduellionis iudicio, quod à me sublatum esse criminari soles, meum crimen est, non Rabirij. quod utinam Quirites ego id aut primus, aut solus ex hac rep. sustulissem: uinam, quod ille crimen esse uult, proprium testimonium meæ laudis esset. quid enim optari potest, quod ego mallet, quàm me in consulatu meo carnisicem de foro, crucem de campo sustulisse? sed ista laus primum est maiorum nostrorum Quirites, qui, expulsis regibus, nullum in libero populo uestigium

crudelitatis regiae retinuerunt: deinde multorum uiro-  
 rum fortium, qui uestram libertatem non acerbitate  
 suppliciorum infestam, sed lenitate legum munitam  
 esse uoluerunt. quamobrem uter nostrum tandem La-  
 biene popularis est; tu ne, qui ciuibus R. in concione  
 ipsa carnificem, qui uincla adhiberi putas oportere;  
 qui in campo Martio, comitijs centuriatis, auspicato in  
 loco, crucem ad ciuium supplicium desigi, & constitui  
 iubes: an ego, qui funestari concionem contagione car-  
 nificis ueto; qui expiandum forum populi R. ab illis  
 nefarijs sceleris uestigijs esse dico; qui castam concio-  
 nem, sanctum campum, inuiolatum corpus omnium  
 ciuium R. integrum ius libertatis defendo seruari opor-  
 tere? popularis uero tribunus pl. custos, defensorq;  
 iuris, & libertatis. Porcia lex uirgas ab omnium ci-  
 uium R. corpore amouit: hic misericors flagella retu-  
 lit. Porcia lex libertatem ciuium licitori eripuit: La-  
 bienus, homo popularis carnifici tradidit. C. Gracchus  
 legem tulit, ne de capite ciuium R. iniussu uestro iu-  
 dicaretur: hic popularis, à duumuiris iniussu uestro  
 non iudicari de ciue R. sed indicta causa ciuem R. ca-  
 pitis condemnari coegit. tu mihi etiam legis Porciae,  
 tu C. Gracchi, tu horum libertatis, tu cuiusquam  
 denique hominis popularis mentionem facis, qui non  
 modo supplicijs inusitatis, sed etiam uerborum inau-  
 dita crudelitate uiolare libertatem huius populi, ten-  
 tare mansuetudinem, commutare disciplinam cona-  
 tus es? nanque haec tua, quae te hominem clementem,  
 popularemq; delectant; I licitor, colliga manus; quae  
 non modo huius libertatis; mansuetudinisq; non sunt,



sed ne Romuli quidem, aut Numæ Pompilij, sed Tarquinij, superbissimi, atque crudelissimi regis: ista sunt cruciatus carmina, quæ tu, homo lenis, ac popularis, libentissime commemoras: Caput obnubito, arbori infelici suspendito: quæ uerba Quirites iampridem in hac rep. non solum tenebris uetustatis, uerum etiam luce libertatis oppressa sunt. an uero, si actio ista popularis esset, & si ullam partem æquitatis haberet, aut iuris; C. Gracchus eam reliquisset? scilicet tibi grauiorem dolorem patrui tui mors attulit, quàm C. Graccho fratris: & tibi acerbior eius patrui mors est, quem nunquam uidisti, quàm illi eius fratris, quicum concordissime uixerat: & similis uiri tu ulcisceris patrui mortem, atque ille persequeretur fratris sui, si ista ratione agere uoluisset: et par desiderium sui reliquit apud populum R. Labienus iste patruus uester, quisquis fuit, ac Ti. Gracchus reliquerat. an pietas tua maior, quàm Gracchi? an animus? an consilium? an opes? an auctoritas? an eloquentia? quæ si in illo minima fuissent; tamen præ tuis facultatibus maxima putarentur. cum uero his rebus omnibus C. Gracchus omnes uicerit, quantum interuallum tandem inter te atque illum interlectum putas? sed moreretur prius acerbissima morte millies Gracchus, quàm in eius concione carnifex consisteret; quem non modo foro, sed etiam coelo hoc, ac spiritu censorie leges, atque urbis domicilio carere uoluerunt. hic se popularem dicere audet, me alienum à commodis uestris? cum iste omnes & suppliciorum, & uerborum acerbitates non ex memoria uestra, ac patrum uestrorum, sed ex annalium

monumentis, atque ex regum commentarijs conqui-  
 sivit; ego omnibus meis opibus, omnibus consilijs, om-  
 nibus dictis, atque factis repugnarim, & restiterim  
 crudelitati. nisi forte hanc conditionem uobis esse uul-  
 tis, quam serui, si libertatis spem propositam non ha-  
 berent, ferre nullo modo possent. misera est ignominia  
 iudiciorum publicorum, misera multatio bonorum, mi-  
 serum exilium: sed tamen in omni calamitate retine-  
 tur aliquod uestigium libertatis. mors denique si pro-  
 ponitur, in libertate moriamur: carnifex uero, & ob-  
 ductio capitis, & nomen ipsum crucis absit non modo  
 à corpore ciuium R. sed etiam à cogitatione, oculis, au-  
 ribus: harum enim omnium rerum non solum euen-  
 tus, atque perperessio, sed etiam conditio, expectatio,  
 mentio ipsa denique indigna ciue R. atque homine libe-  
 ro est. an uero seruos nostros horum suppliciorum o-  
 mnium metu dominorū benignitas una uindicta libe-  
 rabit: uos à uerberibus, ab unco, à crucis denique ter-  
 rore neque res gestæ, neque acta ætas, neque nostri ho-  
 nores uindicabunt? quamobrem fateor, atque etiam  
 T. Labiene profiteor, & præ me fero, te ex illa cru-  
 deli, importuna, non tribunicia actione, sed regia, meo  
 consilio, uirtute, auctoritate esse depulsum. qua tu in  
 actione quanquā omnia exempla maiorum, omnes le-  
 ges, omnem auctoritatem senatus, omnes religiones, at-  
 que auspiciorum publica iura neglexisti: tamen à me  
 hæc in hoc tam exiguo meo tempore non audies. libe-  
 rum tempus nobis dabitur ad istā disceptationem. nunc  
 de Saturnini crimine, ac de clarissimi patruī tui morte  
 dicemus. Arguis, occisum esse à C. Rabirio L. Sa-

turninum: et id C. Rabirius multorum testimonijs, Q. Hortensio copiosissime defendente, antea falsum esse docuit. ego autem, si mihi esset integrum, susciperem hoc crimen, agnoscerem, confiterer. utinam hanc mihi facultatem causa concederet, ut possem hoc prædicare, C. Rabirij manu L. Saturninum, hostem populi R. interfectum. nihil me clamor iste commouet, sed consolatur; cum indicat esse quosdam ciues imperitos, sed non multos. nunquam, mihi credite, populus R. hic, qui silet, consulem me fecisset, si uestro clamore perturbatum iri arbitraretur. quanto iam leuior est acclamatio. quin continetis uocem indicem stultitiæ uestræ, testem paucitatis? libenter, inquam, confiterer, si uere possem, aut etiam si mihi esset integrum, C. Rabirij manu L. Saturninum esse occisum; et id facinus pulcherrimum esse arbitrarer. sed quoniam id facere non possum, confitebor id, quod ad laudem minus ualebit, ad crimen non minus. confiteor, interficiendi Saturnini causa C. Rabirium arma cepisse. quid est Labiene? quam a me grauiorē confessionem, aut quod in hunc maius crimen expectas? nisi uero interesse aliquid pietas inter eum, qui hominem occidit, et eum, qui cum telo occidendi hominis causa fuit. si interfici Saturninum nefas fuit: arma sumpta esse contra Saturninum sine scelere non possunt. si arma iure sumpta concedis: interfectum iure concedas, necesse est.

Pauca quædam deesse uidentur.

fit S. C. ut C. Marius, L. Valerius consules adhiberent tribunos pl. & prætores, quos eis uideretur; operamq;

darent, ut imperium populi R. maiestasq; conseruaretur. adhibent omnes tribunos pl. præter Saturninum, præter Glauciam: qui remp. saluam esse uellent, arma capere, & se sequi iubent. parent omnes. ex ædificijs armamentarijsq; publicis arma populo R. C. Mario consule distribuentem dantur. hic iam, ut omittam cætera, de te ipso Labiene quæro; cum Saturninus Capitolium teneret, armatus esset una C. Glaucia C. Sauri; etiam ille ex compedibus, atque ergastulo Gracchus; addam, quoniam ita uis, eodem Q. Labienum patrum tuum; in foro autem C. Marius, et L. Valerius Flaccus consules, post cunctus senatus, atque ille senatus, quem etiam uos ipsi, qui hos patres conscriptos, qui nunc sunt, in inuidiam uocatis, quo facilius de hoc senatu detrahere possitis, laudare consueuistis; cum equester ordo, at quorum equitum R. dij immortales & patrum nostrorum, atque eius ætatis, quæ tum magnam partem reip. atque omnem dignitatem iudiciorum tenebat; cum omnes omnium ordinum homines, qui in salute reip. salutem suam repositam esse arbitrabantur, arma cepissent: quid tandem C. Rabirio faciendum fuit? de te ipso, inquam, Labiene quæro; cum ad arma consules ex S. C. uocauissent; cum armatus M. Aemilius princeps senatus in Comitio constitisset; qui cum ingredi uix posset, non ad insequendum sibi tarditatem pedum, sed ad fugiendum impedimento fore putabat; cum denique Q. Scæuola confectus senectute, præpeditus morbo, mancus, & membris omnibus captus, ac debilis, hastili nixus & animi uim & infirmitatem corporis ostenderet; cum L.



Metellus, Ser. Galba, C. Serranus, P. Rutilius, C. Fimbria, Q. Catulus, omnesq; qui tum erant, consulares pro salute communi arma cepissent; cum omnes prætores, cuncta nobilitas, ac iuuentus accederet, Cn. et L. Domitij, L. Crassus, Q. Mucius, C. Claudius, M. Drusus; cum omnes Octavij, Metelli, Iulij, Cassij, Cato=nes, Pompeij, cum L. Philippus, L. Scipio, cum M. Lepidus, cum D. Brutus, cum hic ipse P. Servilius, quo tu imperatore Labiene meruisti, cum hic Q. Catulus admodum tum adolescens, cum hic C. Curio, cum denique omnes clarissimi uiri cum consulibus essent: quid tandem C. Rabirium facere conuenit? utrum, inclusum, atque abditum latere in occulto, atque ignauiam suam tenebrarum, ac parietum custodijs tegere; an in Capitolium pergere, atque ibi se cum tuo patruo, et cæteris ad mortem propter uitæ turpitudinem confugientibus congregare; an cum Mario, Scauro, Catulo, Metello, Scauola, cum bonis denique omnibus coire non modo salutis, uerum etiam periculi societatem? tu denique Labiene quid faceres tali in re, ac tempore? cum ignauiae ratio te in fugam, atque in latebras impelleret; improbitas, et furor L. Saturnini in Capitolium arcesseret; consules ad patriæ salutem, ac libertatem uocarent: quam tandem auctoritatem, quam uocem, cuius sectam sequi, cuius imperio parere potissimum uelles? patruus, inquit, meus cum Saturnino fuit. quid pater? quicum? quid propinqui uestri equites R.? quid omnis præfectura, regio, uicinitas uestra? quid ager Picenus uniuersus, utrum tribunicium suorem, an consularem auctoritatem secutus est? equi=

dem hoc affirmo, quod tu nunc de tuo patruo prædi-  
 cas, neminem unquam adhuc de sese esse confessum.  
 nemo est unquam inuentus tam profligatus, tam perdi-  
 tus, tam ab omni non modo honestate, sed etiam simu-  
 latione honestatis relictus, qui se in Capitolio fuisse  
 cum Saturnino fateretur. at fuit uester patruus. fue-  
 rit, & fuerit nulla desperatione rerum suarum, nullis  
 domesticis uulneribus coactus: induxerit eum L. Sa-  
 turnini familiaritas, ut amicitiam patriæ præponeret:  
 iccirco ne oportuit C. Rabirium desciscere à rep. ? nõ com-  
 parere in illa armata multitudo bonorum? consulum  
 uoci, atque imperio non obedire? atqui uidemus hæc in  
 rerum natura tria fuisse, ut aut cum Saturnino esset,  
 aut cum bonis, aut lateret. latere, mortis erat instar  
 turpissimæ: cum Saturnino esse, furoris, & sceleris:  
 uirtus, & honestas, & pudor cum consulibus esse co-  
 gebat. hoc tu igitur in crimen uocas, quod cum ijs fue-  
 rit C. Rabirius, quos, amentissimus fuisset, si oppugnase-  
 set; turpissimus, si reliquisset? at C. Decianus, de quo  
 tu sæpe commemoras, quia, cum hominem omnibus in-  
 signem notis turpitudinis P. Furium accusaret summo  
 studio bonorum omnium, queri est ausus in concione de  
 morte Saturnini, condemnatus est; at Sex. Titius,  
 quod habuit imaginem L. Saturnini domi suæ, con-  
 demnatus est. statuerunt equites R. illo iudicio, impro-  
 bum ciuem esse, & non retinendum in ciuitate, qui ho-  
 minis hostilem in modum seditiosi imagine aut mortem  
 eius honestaret, aut desideria imperitorum misericordiæ  
 commoueret, aut suam significaret imitandæ improbi-  
 tatis uoluntatem. itaque mihi mirum uidetur, unde

hanc tu Labiene imaginem, quam habes, inueneris :  
nam Sex. Titio damnato, qui istam habere auderet, in-  
uentus est nemo. quod tu si audisses, aut si per ætatem  
scire potuisses : nunquam profecto istam imaginem,  
quæ domi posita pestem, atque exilium Sex. Titio at-  
tulisset, in Rostra atque in concionem attulisses, nec tuas  
unquam rationes ad eos scopulos appulisses, ad quos  
Sex. Titij afflictam nauem, & in quibus C. Deciani  
naufragium fortunarum uideres. sed in his rebus o-  
mnibus imprudentia laberis: causam enim suscepisti an-  
tiquiorem memoria tua: quæ causa ante mortua est,  
quàm tu natus esses. qua in causa tute profecto fuiss-  
ses, si per ætatem esse potuisses; eam causam in iudici-  
um uocas. an non intelligis, primum, quos homines,  
& quales uiros mortuos summi sceleris arguas; dein-  
de, quot ex ijs, qui uiuunt, eodem crimine in summum  
capitis periculum arcessas? nam si C. Rabirius frau-  
dem capitale[m] admisit, quòd arma contra M. Satur-  
ninum tulit: huic quidem affert aliquam deprecatio-  
nem periculi ætas illa, qua tum fuit: Q. uero Catu-  
lum, patrem huius, in quo<sup>9</sup> summa sapientia, eximia  
uirtus, singularis humanitas fuit; M. Scaurum, illa  
grauitate, illo consilio, illa prudentia; duos Mucios, L.  
Crassum, M. Antonium, qui tum extra urbem cum  
præsidio fuit, quorum in hac ciuitate longe maxima  
consilia atque ingenia fuerunt; ceteros, pari dignitate  
preditos, custodes, gubernatoresq; reip. quemadmo-  
dum mortuos defendemus? quid de illis honestissimis ui-  
ris, atque optimis ciuib[us] equitibus R. dicemus, qui tum  
una cum senatu salutem reip. defenderunt? quid de tri-

bunis ararijs, ceterorumq; ordinum omnium hominibus, qui tum arma pro communi libertate ceperunt? sed quid ego de ijs omnibus, qui consulari imperio paruerunt, loquor? de ipsorum consulum fama quid futurum est? L.Flaccum, hominem cum semper in re. tum in magistratibus gerendis, in sacerdotio, cerimonijsq; quibus præerat, diligentissimum, nefarij sceleris, ac parricidij mortuum condemnabimus? adiungemus ad hanc labem, ignominiamq; mortis etiam C. Marij nomen? C. Marium, quem uere patrem patriæ, parentem, inquam, uestræ libertatis, atque huiusce reip. possumus dicere, sceleris, ac parricidij nefarij mortuum condemnabimus? etenim si C. Rabirio, quod ijt ad arma, crucem T. Labienus in campo Martio defigendam putauit: quod tandem excogitabitur in eum supplicium, qui uocauit? ac si fides Saturnino data est, quod abs te sæpissime dicitur; non eam C. Rabirius, sed C. Marius dedit; idemq; uiolauit, si in fide non stetit. quæ fides Labiene qui potuit sine S.C. dari? adeo ne spes huiusce urbis, adeo ne ignarus es disciplinæ consuetudinisq; nostræ, ut hæc nescias? ut peregrinari in aliena ciuitate, non in tua magistratum gerere uideare? quid iam ista C. Mario, inquit, nocere possunt, quoniam sensu, & uita caret? ita ne uero? tantis in laboribus C. Marius periculisq; uixisset, si nihil longius, quam uitæ termini postulabant, spe atque animo de se, & gloria sua cogitasset? at, credo, cum innumerales hostium copias in Italia fudisset, atque obsidione remp. liberasset, omnia sua secum una moritura arbitrabatur, non est ita Quirites: neque quisquam no-



strum in reip. periculis cum laude ac uirtute uersatur, quin spe posteritatis fructuq; ducatur. itaque cum multis alijs de causis uirorum bonorum mentes diuinæ mihi atque æternæ uidentur esse, tum maxime quod optimi, & sapientissimi cuiusque animus ita præsentit in posterum, ut nihil nisi sempiternum spectare uideatur. quapropter equidem & C. Marij, & cæterorum uirorum sapientissimorum, ac fortissimorum ciuium mentes, quæ mihi uidentur ex hominum uita ad deorum religionem, & sanctimoniam demigrasse, testor, me pro illorum fama, gloria, memoria non secus, ac pro patrijs fanis, atque delubris, propugnandum putare. ac si pro illorum laude mihi arma capienda essent; non minus strenue caperem, quàm illi pro communi salute ceperunt. etenim Quirites exiguum nobis uitæ curriculum natura circumscripsit, immensum gloriæ. quare si eos, qui iam de uita decesserunt, ornabimus: iustior nobis mortis conditionem relinquemus. sed si illos Labiene, quos iam uidere non possumus, negligis: ne his quidem, quos uides, consuli putas oportere? neminem esse dico ex ijs omnibus, qui illo die Romæ fuerint, quem tu diem in iudicium uocas, pubesq; tum fuerit, quin arma ceperit, quin consules secutus sit. omnes ij, quorum tu ex ætate coniecturam facere potes, quid tum fecerint, abs te rei capitis, C. Rabirij nomine, citantur. at occidit Saturninum Rabirius. utinam fecisset: non supplicium deprecarer, sed præmium postulare. etenim si Scæuæ, seruo Q. Crotonis, qui occidit L. Saturninum, libertas data est: quod equiti R. præmium

dari par fuisset? & si C. Marius, quod fistulas, quibus aqua suppeditabatur Iouis Optimi Maximi templis ac sedibus, præcidi imperarat, quod in clivo Capitolino improborum ciuium.

Desunt non pauca.

IN L. CATILINAM, IN SENATU,  
O R A T I O IX.

q Vousque tandem abutere Catilina patientia nostra? quandiu nos etiam furor iste tuus eludet? quem ad finem sese effrænata iactabit audacia? nihil ne te nocturnum præsidium Palatij, nihil urbis uigiliæ, nihil timor populi, nihil consensus bonorum omnium, nihil hic munitissimus habendi senatus locus, nihil horum ora, uultusq; mouerunt? patere tua consilia non sentis? constrictam iam omnium horum conscientia teneri coniurationem tuam non uides? quid proxima, quid superiore nocte egeris, ubi fueris, quos conuocaueris, quid consilij ceperis, quem nostrum ignorare arbitraris? o tempora, o mores. senatus hoc intelligit, consul uidet: hic tamen uiuit. uiuit? immo uero etiam in senatum uenit: fit publici consilij particeps: notat & designat oculis ad eandem unumquemque nostrum. nos autem uiri fortes

satisfacere reip. uidemur, si istius furorem ac tela uite-  
 mus. ad mortem te Catilina duci iussu consulis iam-  
 pridem oportebat, in te conferri pestem istam, quam tu  
 in nos omnes iamdiu machinaris. an uero uir amplissi-  
 mus P. Scipio pontifex maximus Ti. Gracchum medio-  
 criter labefactantem statum reip. priuatus interfecit:  
 Catilinam orbem terræ cæde, atque incendijs uastare  
 cupientem nos consules perferemus? nam illa nimis an-  
 tiqua prætereo, quod Q. Seruilius Ahala sp. Melium  
 nouis rebus studentem manu sua occidit. fuit, fuit ista  
 quondam in hac rep. uirtus, ut uiri fortes acrioribus  
 supplicijs ciuem perniciosum, quàm acerbissimum ho-  
 stem, coercerent. habemus enim S. C. in te Catilina ue-  
 hemens, & graue: non deest reip. consilium, neque au-  
 thoritas huius ordinis: nos, nos, dico aperte, consules  
 desumus. decreuit quondam senatus, ut L. Opimius  
 consul uideret, ne quid resp. detrimenti caperet. nox  
 nulla intercessit: interfectus est propter quasdam sedi-  
 tionum suspiciones C. Gracchus clarissimo patre natus,  
 auis, maioribus: occisus est cum liberis M. Fuluius con-  
 sularis. simili S. C. C. Mario & L. Valerio consulibus  
 permissa est resp. num unum diem postea L. Saturni-  
 num trib. pl. & C. Seruilius mors à reip. poena remo-  
 rata est? at nos uigesimalum iam diem patimur hebesce-  
 re aciem horum auctoritatis: habemus enim huiusmo-  
 di S. C. ueruntamen inclusum in tabulis, tanquam  
 gladium in uagina reconditum, quo ex S. C. confestim  
 interfectum te esse Catilina conuenit. uiuis: & uiuis  
 non ad deponendam, sed ad confirmandam audaciam.  
 cupio P. C. me esse clementem, cupio in tantis reip. pe-

rieuilis non dissolutum uideri: sed iam me ipsum inera-  
 tia nequitiaq; condemnō. castra sunt in Italia contra  
 remp. in Hetruria faucibus collocata: crescit in dies sin-  
 gulos hostium numerus: eorum autem imperatorem ca-  
 strorum, ducemq; hostium intra moenia, atque adeo  
 in senatu uidemus, intestinam aliquam quotidie per-  
 niciem reip. molientem. si te iam Catilina comprehen-  
 di, si interfici iussero: credo, erit uerendum mihi, ne  
 non hoc potius omnes boni serius à me, quàm quis-  
 quam crudelius, factum esse dicant. uerum ego hoc,  
 quod iampridem factum esse oportuit, certa de causa  
 nondum adducor ut faciam. tum denique interficiam  
 te, cum iam nemo tam improbus, tam perditus, tam  
 tui similis inueniri poterit, qui id non iure factum esse  
 fateatur. quandiu quisquam erit, qui te defendere au-  
 deat, uiues, & uiues ita, ut nunc uiuis, multis meis  
 & firmis praesidijs obsessus, ne commouere te contra  
 remp. possis: multorum te etiam oculi, & aures non  
 sentientem, sicut adhuc fecerunt, speculabuntur at-  
 que custodient. etenim quid est Catilina, quod iam am-  
 plius expectes, si neque nox tenebris obscurare coetus  
 nefarios, nec priuata domus parietibus continere uo-  
 cem coniurationis tuae potest? si illustrantur, si erum-  
 punt omnia? muta iam istam mentem, mihi crede:  
 obliuiscere caedis, atque incendiorum: teneris undique:  
 luce sunt clariora nobis tua consilia omnia: quae etiam  
 mecum licet recognoscas. Meministi ne, me ante diem  
 XII. cal. Nov. dicere in senatu, certo die fore in armis,  
 qui dies futurus esset ante diem VIII. Cal. Nov. C.  
 Manlium audaciae satellitem atque administrum tuae?



num me fefellit Catilina non modo res tanta, tam atrox, tam incredibilis, uerum, id, quod multo magis est admirandum, dies? dixi ego idem in senatu, eadem te optimatum contulisse in ante diem V. cal. Nou. tum cum multi principes ciuitatis Roma non tam sui conseruandi, quam tuorum consiliorum reprimendorum causa profugerunt? num inficiari potes, te illo ipso die meis praesidijs, mea diligentia circunclusum, commouere te contra remp. non potuisse, cum tu, discessu ceterorum, nostra tamen, qui remansissemus, caede contentum te esse dicebas? quid, cum te Praeneste cal. ipsis Nou. occupaturum nocturno impetu esse confidere? sensisti ne illam coloniam meo iussu meis praesidijs, custodijs, uigilijs esse munitam? nihil agis, nihil moliris, nihil cogitas, quod ego non modo audiam, sed etiam uideam, planeq; sentiam. recognosce tandem mecum noctem illam superiorem: iam intelliges multo me uigilare acrius ad salutem, quam te ad perniciem reip. dico te priori nocte uenisse inter falcarios (non agam obscure) in M. Leccae domum, conuenisse eodem complures eiusdem amentiae scelerisq; socios: num negare audes? quid taces? conuincam, si negas: uideo enim esse hic in senatu quosdam, qui tecum una fuere. o dii immortales, ubinam gentium sumus? quam remp. habemus? in qua urbe uiuimus? hic, hic sunt, in nostro numero P. C. in hoc orbis terrae sanctissimo grauiissimoq; consilio, qui de meo, nostrumq; omnium interitu, qui de huius urbis, atque adeo orbis terrarum exitio cogitent. hosce ego uideo consul, & de rep. sententiam rogo, & quos ferro trucidari oportebat, eos nondum uoce uulnero.

fuisti igitur apud Leccam ea nocte Catilina : distribuisti partes Italiae : statuisti, quò quenque proficisci placeret : delegisti, quos Romæ relinqueres, quos tecum educeres : descripsisti urbis partes ad incendia : confirmasti, te ipsum iam esse exiturum : dixisti, paululum tibi esse etiam tum mora, quòd ego uiuerem . reperti sunt duo equites R. qui te ista cura liberarent, & sese illa ipsa nocte paulo ante lucem me in meo lectulo interfecturos pollicerentur . hæc ego omnia, uix dum etiam coetu uestro dimisso, comperi : domum meam maioribus praesidijs munivi, atque firmaui : exclusi eos, quos tu mane ad me salutatum miseras, cum illi ipsi uenissent, quos ego iam multis uiris ad me uenturos id temporis esse prædixeram . quæ cum ita sint Catilina, perge quò coepisti, egredere aliquando ex urbe : patent portæ, proficiscere : nimium diu te imperatorem illa tua Manliana castra desiderant : educ tecum etiam omnes tuos ; si minus, quamplurimos : purga urbem . magno me metu liberabis, dummodo inter me atque te murus intersit . nobiscum uersari iam diutius non potes : non feram, non patiar, non sinam . magna dijs immortalibus habenda est gratia, atque huic ipsi Ioui Statori, antiquissimo custodi huius urbis, quòd hanc tam tetram, tam horribilem, tamq; infestam reip. pestem toties iam effugimus . non est sepius in uno homine salus summa periclitanda reip. quandiu mihi consuli designato Catilina insidiatus es, non publico me praesidio, sed priuata diligentia defendi . cum proximis comitijs consularibus me consulem in campo, & competitores tuos interficere uoluisti, compressi tuos nefarios conatus ami-

corum praesidio, & copijs, nullo tumultu publice con-  
citato: denique quotiescunque me petisti, per me tibi  
obstiti: quanquam uidebam, perniciem meam cum ma-  
gna calamitate reip. esse coniunctam. nunc iam aper-  
te remp. uniuersam petis: templa deorum immorta-  
lium, tecta urbis, uitam omnium ciuium, Italiam de-  
nique totam ad exitium, & uastitatem uocas. quare,  
quoniam id, quod primum, atque huius imperij, dis-  
ciplineq; maiorum proprium est, facere non audeo, fa-  
ciam id, quod est ad seueritatem lenius, ad communem  
salutem utilius. nam si te interfici iussero, residebit in  
rep. reliqua coniuratorum manus: sin tu, quod te ian-  
dudum hortor, exieris, exhaurietur ex urbe tuorum  
comitum magna, & perniciosa sentina reip. quid est  
Catilina? num dubitas id me imperante facere, quod  
iam tua sponte faciebas? exire ex urbe consul hostem  
iubet: interrogas me, num in exilium? non iubeo: sed,  
si me consulis, suadeo: quid enim Catilina est, quod te  
iam in hac urbe delectare possit, in qua nemo est extra  
istam coniurationem perditorum hominum, qui te non  
metuat; nemo, qui te non oderit? quae nota dome-  
stica turpitudinis non iniusta uitae tuae est? quod pri-  
uatarum rerum dedecus non haeret infamiae? quae li-  
bido ab oculis, quod facinus à manibus unquam tuis,  
quod flagitium à toto corpore absuit? cui tu adolescen-  
tulo, quem corruptelarum illecebris irretisses, non  
aut ad audaciam ferrum, aut ad libidinem facem  
praetulisti? quid uero nuper? cum morte superioris u-  
xoris nouis nuptijs domum uacuam fecisses, non ne et-  
iam alio incredibili scelere hoc scelus cumulaisti? quod

## O R A T I O I.

ego præmitto, & facile patior sileo, ne in hac ciuitate  
 te tanti facinoris immanitas aut extitisse, aut non uin-  
 dicata esse uideatur. præmitto ruinas fortunarum  
 tuarum, quas omnes impendere tibi proximis idibus  
 senties. ad illa uenio, quæ non ad priuatam ignomi-  
 niam uitiorum tuorum, non ad domesticam tuam dif-  
 ficultatem ac turpitudinem, sed ad summam reip. at-  
 que ad omnium nostrum uitam salutemq; pertinent.  
 potest ne tibi huius uitæ hæc lux Catilina, aut huius  
 cœli spiritus esse iucundus, cum scias horum esse nemi-  
 nem, qui nesciat te pridie cal. ian. Lepido & Tullo  
 consulibus stetisse in Comitio cum telo? manum, consu-  
 lum & principum ciuitatis interficiendorum causa,  
 paruissse? scelere ac furori tuo non mentem aliquam,  
 aut timorem tuum, sed fortunam reip. obstitisse? ac  
 iam illa omitto: neque enim sunt aut obscura, aut non  
 multo post commissa. quoties tu me designatum, quo-  
 ties me consulem interficere uoluisti? quot ego tuas pe-  
 titiones ita coniectas, ut uitari posse non uiderentur,  
 parua quadam declinatione, & ut aiunt, corpore ef-  
 fugi? nihil agis, nihil assequeris, nihil moliris, quod  
 mihi latere ualeat in tempore: neque tamen conari ac  
 uelle desistis. quoties iam, quoties iam tibi extorta est si-  
 ca ista de manibus? quoties uero excidit casu aliquo &  
 elapsa est? tamen ea carere diutius non potes: quæ qui-  
 dem quibus abs te initiata sacris ac deuota sit, nescio,  
 quod eam necesse putas consulis in corpore defigere.  
 nunc uero quæ tua est ista uita? sicut enim iam tecum lo-  
 quar, non ut odio peremptus esse uidear, quo debeo; sed  
 ut misericordia, quæ tibi nulla debetur. uenisti paulo



ante in senatum : quis te ex hac tanta frequentia, ex tot tuis amicis ac necessarijs salutauit ? si hoc post hominum memoriam contigit nemini, uocis expectas contumeliam, cum sis grauissimo iudicio taciturnitatis oppressus ? quid, quod aduentu tuo ista subsellia uacua facta sunt ? quid, quod omnes consulares, qui tibi persæpe ad cædem constituti fuerunt, simul atque assedisti, partem istam subselliorum nudam atque inanem reliquerunt ? quo tandem animo hoc tibi ferendum putas ? serui mehercle mei si me isto pacto metuerent, ut te metuunt omnes ciues tui ; domum meam relinquendam putarem : tu tibi urbem non arbitraris ? Et, si me meis ciuibus iniuria suspectum tam grauitè, atque offensum uiderem ; carere me aspectu ciuium, quàm infestis oculis omnium conspici, mallet : tu cum conscientia scelerum tuorum agnoscas odium omnium iustum, Et iam tibi diu debitum, dubitas, quorum mentes, sensusq ; uulneras, eorum aspectum præsentiamq ; uitare ? si te parentes timerent, atque odissent tui, neque eos ulla ratione placare posses : ut opinor, ab eorum oculis aliquò concederes : nunc te patria, quæ communis est omnium nostrum parens, odit, ac metuit, et iandiu te nihil iudicat nisi de parricidio suo cogitare. huius tu neque auidioritatem uerebere, neque iudicium sequere, neque uim pertimesces ? quæ tecum Catilina sic agit, Et quodam modo tacita loquitur. Nullum iam tot annos facinus extitit nisi per te, nullum flagitium sine te : tibi unimultorum ciuium neces, tibi uexatio, direptioq ; sociorum impunita fuit ac libera : tu non solum ad negligendas leges Et quæstiones, uerum etiam ad euertend-

das, perfringendasq; ualuidisti. superiora illa, quam ferenda non fuerunt, tamen, ut potui, tuli: nunc uero, me totam esse in metu propter te unum; quidquid increpuerit, Catilinam timeri; nullum uideri contra me consilium iniri posse, quod à tuo scelere abhorreat; non est ferendum. quamobrem discede, atque hunc mihi timorem eripe; si uerus, ne opprimar; si falsus, ut tandem aliquando timere desinam. hæc si tecum, ut dixi, patria loquatur, non ne impetrare debeat, etiam si uim adhibere non possit? quid, quod tu te ipse in custodiam dedisti? quid, quod uitandæ suspicionis causa apud M. Lepidum te habitare uelle dixisti? à quo non receptus, etiam ad me uenire ausus es, atque, ut domi meæ te asseruarem, rogasti. cum à me quoque id responsum tulisses, me nullo modo posse iisdem parietibus tuto esse tecum, qui magno in periculo essem, quod iisdem mœnibus contineremur: ad Q. Metellum prætorem uenisti. à quo repudiatus, ad sodalem tuum, uirum optimum, M. Marcellum demigrasti: quem tu uidelicet et ad custodiendum te diligentissimum, & ad suspicandum sagacissimum, & ad uindicandum fortissimum fore putasti. sed quàm longe uidetur à carcere atque à uinculis abesse debere, qui se ipsum iam dignum custodia iudicauerit? quæ cum ita sint Catilina, dubitas, si hic emori æquo animo non potes, abiire in aliquas terras, & uitam istam, multis supplicijs iustis debitisq; ereptam, fugæ solitudiniq; mandare? refer, inquis, ad senatum: id enim postulas, & si hic ordo sibi placere decreuerit, te ire in exilium, obtemperaturum te esse dicis. non referam id, quod abhorret à

meis moribus : & tamen faciam, ut intelligas, quid hi de te sentiant. egredere ex urbe Catilina : libera remp. metu : in exilium, si hanc uocem expectas, proficiscere. quid est Catilina ? ecquid attendis, ecquid animaduertis horum silentium ? patiuntur, tacent : quid expectas auctoritatem loquentium, quorum uoluntatem tacitorum perspicias ? at si hoc idem huic adolescenti optimo P. Sestio, si fortissimo uiro M. Marcello dixissem, iam mihi consuli hoc ipso in templo iure optimo senatus uim, & manus intulisset : de te autem Catilina, cum quiescunt, probant ; cum patiuntur, decernunt ; cum tacent, clamant ; neque hi solum, quorum tibi auctoritas est uidelicet cara, uita uilissima, sed etiam illi equites R. honestissimi atque optimi uiri, cateriq; fortissimi ciues, qui circumstant senatum, quorum tu & frequentiam uidere, & studia perspicere, & uoces paulo ante exaudire potuisti. quorum ego uix abs te iandiu manus ac tela contineo, eosdem facile adducam, ut te hæc, quæ iam pridem uastare studes, relinquentem usque ad portas prosequantur. quanquam quid loquor ? te ut ulla res frangat ? tu ut unquam te corrigas ? tu ut ulla fugam meditare ? tu ullum ut exilium cogites ? utinam tibi istam mentem dii immortales donarent. tametsi uideo, si mea uoce perterritus ire in exilium animum induxeris, quanta tempestas inuidiæ nobis, si minus in præsens tempus, recenti memoria scelerum tuorum, at in posteritatem impendeat. sed non est mihi tanti, dummodo ista tua priuata sit calamitas, & de reip. periculis seiungatur. sed tu ut uitij tuis commoueare, ut legum poenas pertimescas, ut temporibus reip.



## O R A T I O I.

concedas, non est postulandum : neque enim Catilina is es, ut te aut pudor à turpitudine, aut metus à periculo, aut ratio à furore reuocarit. quamobrem, ut sæpe iam dixi, proficiscere : ac si mihi inimico, ut prædicas, tuo conflare uis inuidiam, recta perge in exilium. uix feram sermones hominum, si id feceris : uix molem istius inuidiæ, si in exilium ieris iussu consulis, sustinebo. sin autem seruire meæ laudi & gloriæ mauis, egredere cum importuna sceleratorum manu, confer te ad Manlium, concita perditos ciues, secerne te à bonis, infer patriæ bellum, exulta impio latrocinio : ut à me non eiectus ad alienos, sed inuitatus ad tuos isse uidearis. quanquam quid ego te inuitem, à quo iam sciam, esse præmissos, qui tibi ad forum Aurelium præstolarentur armati? sciam pactam & constitutam esse cum Manlio diem? à quo etiam Aquilam illam argenteam, quam tibi ac tuis omnibus perniciosam esse confido & funestam futuram, cui domi tuæ sacrarium scelerum tuorum constitutum fuit, sciam esse præmissam? tu ut illa diutius carere possis? quam uenerari ad cædem proficiscens solebas : à cuius altaribus sæpe istam dextram impiam ad necem ciuium transtulisti. ibis tandem aliquando, quò te iam pridem tua ista cupiditas effrenata ac furiosa rapiebat. neque enim tibi hæc res affert dolo rem, sed quandam incredibilem uoluptatem. ad hanc te amentiam natura peperit, uoluntas exercuit, fortuna seruauit. nunquam tu non modo otium, sed ne belalum quidem, nisi nefarium, concupisti : nactus es ex perditis, atque ab omni nō modo fortuna, uerum etiam spe derelictis conflata improborum manum. hic tu



qua letitia perfruere, quibus gaudijs exultabis, quanta in uoluptate bacchabere, cum in tanto numero tuorum neque audies uirum bonum quenquam, neque uidebis? ad huius uitæ studium meditati sunt, qui feruntur, labores tui; iacere humi non modo ad obsidendum stuprum, uerum etiam ad facinus obeundum; uigilare non solum ad infidiandum somno maritorum, uerum etiam bonis otiosorum. habes, ubi ostentes illam præclaram tuam patientiam famis, frigoris, inopiæ rerum omnium, quibus te breui tempore confectum esse senties. tantum profeci tum, cum te à consulatu repuli, ut exul potius tentare, quàm consul uexare temp. posses, atque ut id, quod esset à te sceleratè susceptum, latrocinium potius, quàm bellum, nominaretur.

Nunc ut à me P.C. quandam prope iustam patriæ querimoniam detester, ac deprecer, percipite quæ so diligenter quæ dicam, et ea penitus animis uestris mentibusq; mandate. etenim si mecum patria, quæ mihi uita mea multo est carior, si cuncta Italia, si omnis resp. loquatur, M. Tulli quid agis? tu' ne eum, quem esse hostem comperisti, quem ducem belli futurum uides, quem expectari imperatorem in castra hostium sentis, auctorem sceleris, principem coniurationis, euocatorem seruorum & ciuium perditorum, exire patieris, ut abs te non emissus ex urbe, sed immissus in urbem esse uideatur? non ne hunc in uincula duct, non ad mortem rapi, non summo supplicio maectari imperabis? quid tandem impedit te? mos'ne maiorum? at persæpe etiam priuati in hac rep. perniciosos ciues morte multarunt. an leges, quæ de ciuium R. supplicio rogata

sunt? at nunquam in hac urbe ij, qui à rep. defecerunt, ciuium iura tenuerunt. an inuidiam posteritatis times? præclaram uero populo R. refers gratiam, qui te hominem per te cognitum, nulla cõmendatione maiorum, tam mature ad summum imperium per omnes honorum gradus extulit, si propter inuidiam, aut alicuius periculi metum, salutem ciuium tuorum negligis. sed si quis est inuidiæ metus, non est uehementius seueritatis, ac fortitudinis inuidia, quàm inertiae, ac nequitiae, pertimescenda. an, cum bello uastabitur Italia, uexabuntur urbes, teëta ardebunt, tum te non existimas inuidiæ incendio conflagraturum? His ergo sanctissimis reip. uocibus, & eorum hominum, qui idem sentiunt, mentibus pauca respondebo. v Ego, si hoc optimum factu iudicarem P. C. Catilinam morte multari, unius usuram horæ gladiatori isti ad uiuendum non dedissem. etenim si summi uiri, & clarissimi ciues Saturnini, & Gracchorum, & Flacci, et superiorum complurium sanguine non modo se non contaminarunt, sed etiam honestarunt: certe uerendum mihi non erat, ne quid, hoc parricida ciuium interfecisseto, inuidiæ mihi in posteritatem redundaret. quod si ea maxime impenderet, tamen hoc animo semper fui, ut inuidiam uirtute partam, gloriam, non inuidiam putarem. quanquam nonnulli sunt in hoc ordine, qui aut ea, quæ imminet, non uideant; aut ea, quæ uident, dissimulent: qui spem Catilinæ mollibus sententijs aluerunt, coniurationemq; nascentem non credendo corroborauerunt: quorum auctoritatem secuti multi non solum improbi, uerum etiam imperiti, si in

hunc animaduertissem, crudeliter & regie factum esse  
dicerent. nunc intelligo, si iste, quò intendit, in Man-  
liana castra peruenerit, neminem tam stultum fore,  
qui non uideat coniurationem esse factam; neminem  
tam improbum, qui non fateatur. hoc autem uno in-  
terfecto, intelligo hanc reip. pestem paulisper reprimi,  
non in perpetuum comprimi posse. quòd si se eiecerit,  
secumq; suos eduxerit, & eodem ceteros undique col-  
lectos naufragos aggregauerit: extinguetur atque de-  
lebitur non modo hæc tam adulta reip. pestis, uerum  
etiam stirps, ac semen malorum omnium. etenim ian-  
diu P. C. in his periculis coniurationis, insidijsq; uersa-  
mur: sed nescio quo pacto omnium scelerum, ac uete-  
ris furoris, & audaciæ maturitas in nostri consulatus  
tempus erupit. quòd si ex tantolatrocínio iste unus tol-  
letur, uidebimur fortasse ad breue quoddam tempus  
cura, & metu esse releuati; periculum autem residea-  
bit, & erit inclusum penitus in uenis, atque in uiscer-  
ibus reip. ut sæpe homines ægri, morbo graui, cum  
æstu febriq; iactantur, si aquam gelidam biberint, pri-  
mo releuari uidentur, deinde multo grauius uehemen-  
tiusq; afflictiuntur: sic hic morbus, qui est in republica,  
releuatus istius pœna uehementius uiuis reliquis ingra-  
uescet. quare P. C. secedant improbi, secernant se à  
bonis, unum in locum congregentur, muro denique,  
id quod sæpe iam dixi, secernantur à nobis, desinant  
insidiari domi suæ consuli, circumstare tribunal præto-  
ris urbani, obsidere cum gladijs curiam, malleolos ad  
incendendam urbem, facesq; comparare: sit denique  
inscriptum in fronte uniuscuiusque ciuis, quid de rep.

sentiat. Polliceor uobis hoc P. C. tantam in nobis consuli-  
bus fore diligentiam, tantā in uobis auctoritatem, tan-  
tam in equitibus R. uirtutem, tantam in omnibus bo-  
nis consensionem, ut Catilinæ profectione omnia pate-  
facta, illustrata, oppressa, uindicta esse uideatis.  
Hisce ominibus Catilina cū summa reip. salute, et cum  
tua peste, ac pernicie, cumq; eorum exitio, qui se te-  
cum omni scelere, parricidioq; iunxerunt, proficisce-  
re ad impium bellum, ac nefarium. tum tu Iupiter,  
qui iisdem, quibus hæc urbs, auspicijs à Romulo es con-  
stitutus, quem Statorem huius urbis, atque imperij  
uere nominamus; hunc, & huius socios à tuis aris,  
cæterisq; templis, à teētis urbis, ac mœnibus, à uita,  
fortunisq; ciuium omnium arcebis; & omnes inimicos  
bonorum, hostes patriæ, latrones Italiæ, scelerum fœ-  
dere inter se, ac nefaria societate coniunctos, æternis  
supplicijs uiuos, mortuosq; mactabis.



IN L. CATILINAM,  
AD QUIRITES.  
ORATIO XX.

Andem aliquando Quirites L. Catilinam, furem audacia, scelus anhelantem, pestem patriæ nefarie molientem, uobis, atque huic urbi ferrum flammamq; minitantem, ex urbe uel eiecimus, uel emisimus, uel ipsum egredientem urbe persecuti sumus. abiit, excessit, euasit, erupit. nulla iam perniciēs à monstro illo, atque prodigio mœnibus ipsis intra mœnia comparabitur. atque hunc quidem unum huius belli domestici ducem sine controuersia uicimus: non enim iam inter latera nostra sica illa uersabitur: non in campo, non in foro, non in curia, non denique intra domesticos parietes pertimescemus. loco ille motus est, cum est ex urbe depulsus: palam iam cum hoste, nullo impediēte, bellum iustum geremus. sine dubio perdidimus hominem, magnificēq; uicimus, cum illum ex occultis insidijs in apertum latrocinium coniecimus. quod uero non cruentum mucronem, ut uoluit, extulit; quod uiuis nobis egressus est; quod ei ferrum de manibus extorsimus; quod incolumes ciues, quod stantem urbem reliquit; quanto tandem illum mœrore afflictum esse, et profligatum putatis? iacet ille nunc prostratus Quirites, et se perculsum, atque abiectum esse sentit, et retorquet oculos profecto sæpe ad hanc urbem, quam ex suis faucibus ereptam esse luget. quæ quidem letari mihi uide-

tur, quòd tantam pestem euomuerit, forasq; proiece-  
 rit. at si quis est talis, quales esse omnes oportebat, qui  
 in hoc ipso, in quo exultat, & triumphat oratio mea,  
 me uehementer accuset, quòd tam capitale[m] hostem  
 non comprehenderim potius, quàm emisserim: non est  
 ista mea culpa Quirites, sed temporum. interemptum  
 esse L. Catilinam, & grauissimo supplicio affectum  
 iam pridem oportebat; idq; à me & mos maiorum, et  
 huius imperij seueritas, et resp. postulabat: sed quàm  
 multos fuisse putatis, qui, quæ ego deferrem, non  
 crederent? quàm multos, qui propter stultitiam non  
 putarent? quàm multos, qui etiam defenderent? quàm  
 multos, qui propter improbitatem facerent? ac si subla-  
 to illo depelli à uobis omne periculum iudicaret, iam-  
 pridem ego L. Catilinam non modo inuidie meæ, ue-  
 rum etiam uitæ periculo sustulissem. sed cum uiderem,  
 ne uobis quidem omnibus re etiam probata, si illum,  
 ut erat meritis, morte multassem, fore, ut eius so-  
 cios inuidia oppressus persequi non possem; rem huc de-  
 duxi, ut tum palam pugnare possetis, cum hostem aper-  
 te uideretis. quem quidem ego hostem, Quirites, quàm  
 uehementer foris esse timendum putem, licet hinc in-  
 telligatis, quòd illud etiam moleste fero, quòd ex ur-  
 be parum comitatus exierit. utinam ille omnes secum  
 suas copias eduxisset. Tongillum mihi eduxit, quem  
 \* amare in prætexta calumnia coeperat; Publitium, &  
 Munatium, quorum æs alienum contractum in popu-  
 lum nullum reip. motum afferre poterat: reliquit,  
 quos uiros, quanto alieno ære, quàm ualentes, quàm  
 nobiles, uos uidetis. itaque ego illum exercitum ex

Gallicanis legionibus, et cum hoc delectu, quem in agro Piceno, & Gallico Q. Metellus habuit, ex his copijs, quæ à nobis quotidie comparantur, magnopere contemno, collectum ex senibus desperatis, ex agresti luxuria, ex rusticis mendiculis, & decoctoribus, ex ijs, qui uadimonia deserere, quàm illud exercitum, maluerunt: quibus ego non modo si aciem exercitus nostri, uerum etiam si edictum prætoris ostendero, concident. hos, quos uideo uolitare in foro, quos stare ad curiam, quos etiam in senatum uenire, qui nitent unguentis, qui fulgent purpura, malletm secum suos milites eduxisset: qui si hic permanent, mementote non tam exercitum illum esse nobis, quàm hos, qui exercitum deseruerunt, pertimescendos. atque etiam hoc magis sunt timendi, quòd, quid cogitent, me scire sentiunt, neque tamen permouentur. uideo, cui Apulia sit attributa, qui habeat Etruriam, qui agrum Picenum, qui Gallicum, qui sibi has urbanas insidias cædis, atque incendiorum depoposcerit. omnia superioris noctis consilia ad me perlata esse sentiunt: patefeci in senatu hesterno die: Catilina ipse pertimuit, profugit: hi quid expectant? nã illi uehementer errant, si illam meam pristinam lenitatem perpetuam sperant futuram. quod expectaui, iam sum assecutus, ut uos omnes factam esse aperte coniurationem contra remp. uideretis. nisi uero si quis est, qui Catilinæ similes cum Catilina sentire non putet. non est iam lenitati locus: seueritatem res ipsa flagitat. unum etiam nunc concedam: exeant, proficiantur, ne patiantur desiderio sui Catilinam miserum tabescere: demonstrabo iter: Au-

relia uia profectus est : si accelerare uolent , ad uesperum consequentur . o fortunata temp. si quidem hanc sentinam huius urbis eiecerit . uno mehercule Catilina exhausto , releuata mihi , & recreata resp. uidetur : quid enim mali aut sceleris fingi aut excogitari potest , quod non ille conceperit ? quis tota Italia ueneficus , quis gladiator , quis latro , quis sicarius , quis parricida , quis testamentorum subiecto , quis circumscriptor , quis ganeo , quis nepos , quis adulter , quæ mulier infamis , quis corruptor iuuentutis , quis corruptus , quis perditus inueniri potest , qui se cum Catilina non familiarissime uixisse fateatur ? quæ cades per hosce annos sine illo facta est ? quod nefarium stuprum non per illum ? iam uero quæ tanta in ullo unquam homine iuuentutis illecebra fuit , quanta in illo ? qui alios ipse amabat turpissime , aliorum amoris flagitiosissime seruebat : alijs fructum libidinum , alijs mortem parentum non modo impellendo , uerum etiam adiuuando pollicebatur . nunc uero quàm subito non solum ex urbe , uerum etiam ex agris ingentem numerum perditorum hominum collegerat ? nemo non modo Romæ , sed nec ullo in angulo totius Italiae oppressus ære alieno fuit , quem non ad hoc incredibile sceleris foedus asciuerit . atque ut eius diuersa studia in dissimili ratione perspicere possitis ; nemo est in ludo gladiatorio paulo ad factus audacior , qui se non intimum Catilinæ esse fateatur ; nemo in scena leuior , et nequior , qui se non eiusdem prope sodalem fuisse commemoret . atque idem tamen stuprorum , & scelerum exercitatione assuefactus , frigore , & fame , & siti , ac uigilijs perferendis ,



dis, fortis ab his istis suis socijs prædicabatur, cum industria subsidia, atque instrumenta uirtutis in libidine, audaciaq; consumerentur. hunc uero si sui fuerint comites secuti, si ex urbe exierint, desperatorum hominum flagitiosi greges: o nos beatos, o temp. fortunatam, o præclaram laudem consulatus meus. non enim iam sunt mediocres hominum libidines, non humanae audaciae, ac tolerandae: nihil cogitant, nisi caedes, nisi incendia, nisi rapinas: patrimonia sua profuderunt, fortunas suas obligauerunt: res eos iam pridem, fides deficere nuper coepit: eadem tamen illa, quæ erat in abundantia, libido permanet. quod si in uino, et alea comestiones solum, et scorta quærerent, essent illi quidem desperandi, sed tamen essent ferendi: hoc uero quis ferre possit, inertes homines fortissimis uiris insidiari, stultissimos prudentissimis, ebriosos sobrijs, dormientes uigilantibus et qui mihi accubantes in conuiuijs, complexi mulieres impudicas, uino languidi, confecti cibo, sertis redimiti, unguentis oblit, debilitati stupris, eructant sermonibus suis eadem bonorum, atque urbis incendia. quibus ego confido impendere fatum aliquod, et poenas iandiu improbitati, nequitiae, sceleri, libidini debitas aut instare iam plane, aut certe iam appropinquare. quos si meus consulatus, quoniam sanare non potest, sustulerit: non breue nescio quod tempus, sed multa secula propagabit reip. nulla est enim natio, quam pertimescamus; nullus rex, qui bellum populo R. inferre possit: omnia sunt aeterna unius uirtute terra, mariq; pacata: domesticum bellum manet: intus insidiae sunt: intus in-

clusum periculum est ; intus est hostis : cum luxuria nobis , cum amentia , cum scelere certandum est , huic ego me bello ducem profiteor Quirites : suscipio inimicitias hominum perditorum . quæ sanari poterunt , quacunque ratione sanabo : quæ resecanda erunt , non patiar ad perniciem ciuitatis manare . proinde aut ex eant , aut quiescant , aut , si & in urbe , & in eadem mente permanent , ea , quæ merentur , expectent . At etiam sunt Quirites , qui dicant à me in exilium eiec- tum esse Catilinam . quod ego si uerbo assequi possem , istos ipsos eijcerem , qui hæc loquuntur . homo enim uidelicet timidus & permodestus uocem consulis ferre non potuit : simul atque ire in exilium iussus est , paruit . quid , quod hesterno die , cum domi mea pene interfectus essem , senatum in ædem Iouis Statoris uocaui , rem omnem ad patres conscriptos detuli ? quò cum Catilina uenisset , quis eum senator appellauit ? quis salutauit ? quis denique ita aspexit ut perditum ciuem , ac non potius ut importunissimum hostem ? quinetiam principes eius ordinis partem illam subselliorum , ad quam ille accesserat , nudam , atque inanem reliquerunt . hic ego uehemens ille consul , qui uerbo ciues in exilium eicio , quæsiui à Catilina , an nocturno conuentu apud M. Leccam fuisset , nec ne . cum ille , homo audacissimus , conscientia conuietus primo , reticuisset , patefeci cetera : quid ea nocte egisset , ubi fuisset , quid in proxima constituisset , quemadmodum esset ei ratio totius belli descripta , docui . cum hæsitaret , cum cunctaretur , quæsiui , quid dubitaret proficisci eò , quò iam pridem pararat , cum arma , cum secures , cum fasces ,

eum tubas, cum signa militaria, cum Aquilam illam argenteam, cui ille etiam sacrarium scelerum domi sue fecerat, scirem esse præmissam. in exilium eieciēbam, quem iam ingressum in bellum esse uidebam? etenim, credo, Manlius iste centurio, qui in agro Fesulano castra posuit, bellum populo R. suo nomine indixit; & illa castra nunc non Catilinam ducem expectant; & ille eiectus in exilium, se Massiliam, ut ajunt, non in hac castra conferet. o conditionem miseram non modo administrandæ, uerum etiam conseruandæ reip. nunc si L. Catilina consilijs, laboribus, periculis meis circumclusus, ac debilitatus subito pertimuerit, sententiam mutauerit, deseruerit suos, consilium belli faciendi abiecerit, ex hoc cursu sceleris, & belli iter ad fugam atque in exilium conuerterit: non ille à me spoliatus armis audaciæ, non obstupefactus, ac perterritus mea diligentia, non de spe, conatuq; depulsus, sed indemnatus, innocens in exilium eiectus à consule ui, & minis esse dicetur: & erunt, qui illum, si hoc fecerit, non improbum, sed timidum; me non diligentissimum consulem, sed crudelissimum tyrannum existimari uelint. est mihi tanti Quirites huius inuidiæ falsæ, atque iniquæ tempestatem subire, dummodo à uobis huius horribilis belli, ac nefarij periculum depellatur. dicatur sane eiectus esse à me, dum modo eat in exilium: sed, mihi credite, non est iturus. nunquam ego à dijs immortalibus optabo Quirites inuidiæ meæ leuandæ causa, ut L. Catilinam ducere exercitum hostium, atque in armis uolitare audiat: sed triduo tamen audietis: multoq; magis illud timeo, ne mihi sit inuidiosum

aliquando, quòd illum emiserim potius, quàm quòd  
eiecerim. sed cum sint homines, qui illum, cum profe-  
ctus sit, eiectum esse dicant: ijdem, si interfectus esset,  
quid dicerent? quanquam isti, qui Catilinam Massi-  
liam ire disclitant, non tam hoc queruntur, quàm ueren-  
tur. nemo est istorum tam misericors, qui illum non ad  
Manlium, quàm ad Massilienses ire malit. ille autem  
si mehercules hoc, quod agit, nunquam ante cogitas-  
set, tamen latrocinantem se interfici mallet, quàm  
exulem uiuere. nunc uero, cum ei nihil adhuc præter  
ipsius uoluntatem, cogitationemq; acciderit, nisi quòd  
uiuis nobis Roma profectus est: optemus potius, ut eat  
in exilium, quàm queramur. sed cur tandiu de uno  
hoste loquimur? & de eo hoste, qui iam fatetur se es-  
se hostem? & quem, quia, quod semper uolui, mu-  
rus interest, non timeo? de ijs, qui dissimulant, qui  
Romæ remanent, qui nobiscum sunt, nihil dicimus?  
quas quidem ego, si ullo modo fieri posset, non tam ul-  
cisci studeo, quàm sanare, et ipsos placare reip. neque,  
id quare fieri non possit, si me audire uoluerint, intel-  
ligo: exponam enim uobis Quirites, ex quibus generi-  
bus hominum istæ copiae comparentur: deinde singulis  
medicinam consilij, atque orationis meæ, si quam po-  
tero, asseram. Primum genus est eorum, qui magno  
in ære alieno maiores etiam possessiones habent, quarum  
amore adducti dissolui nullo modo possunt. horum ho-  
minum species est honestissima: sunt enim locupletes:  
uoluntas uero & causa impudentissima. tu agris, tu  
aedijs, tu argento, tu familia, tu rebus omnibus or-  
natus & copiosus sis, & dubites aliquid de possessione



detrahere, ac fidem acquirere? quid enim expectas? bellum? quid? ergo in uastatione omnium tuas possessiones sacrosanctas futuras putas? an tabulas novas? errant, qui istas à Catilina expectant: meo beneficio tabulae novae proferentur, uerum auctionariae: neque enim isti, qui possessiones habent, alia ratione ulla salui esse possunt. quod si maturius facere uoluissent, neque, id quod stultissimum est, certare cum usuris fructibus praediorum: locupletioribus ijs, & melioribus ciuibus uteremur. sed hosce homines minime puto pertimescendos, quod aut deduci de sententia possunt, aut, si permanebunt, magis mihi uidentur nota facturi contra remp. quam arma laturi. Alterum genus est eorum, qui quanquam premuntur aere alieno, dominationem tamen expectant, rerum potiri uolunt, honores, quos quieta rep. desperant, perturbata consuequi se posse arbitrantur. quibus hoc praecipendum uidetur, unum scilicet & idem, quod ceteris omnibus, ut desperent se id, quod conantur, consequi posse: primum omnium me ipsum uigilare, adesse, providere reip. deinde magnos animos esse in bonis uiris, magnam concordiam, maximam multitudinem, magnas praeterea copias militum: deos denique immortales huic inuictò populo, clarissimo imperio, pulcherrimae urbi contra tantam uim sceleris praesentis auxilium esse laturos. quod si iam sint id, quod cum summo furore cupiunt, adepti: num illi in cinere urbis, & sanguine ciuium, quae mente conscelerata, ac nefaria concupiscunt, se consules, ac dictatores, aut etiam reges sperant futuros? non uident se cupere id, quod si adea-

pti fuerint, fugitiuo alicui, aut gladiatori concedi sit  
 necesse? Tertium genus est ætate iam confectum,  
 exercitatione robustum: quo ex genere est ipse Man-  
 lius, cui nunc Catilina successit: hi sunt homines ex  
 ijs colonijs, quas Fesulis Sylla constituit: quas ego uni-  
 uersas ciuium esse optimorum & fortissimorum uiro-  
 rum sentio: sed tamen hi sunt coloni, qui se insperatis  
 repentinisq; pecunijs sumptuosius insolentiusq; iacta-  
 runt: hi dum ædificant tanquam beati, dum prædijs,  
 lecticis, familijs magnis, conuiujs, apparatibus dele-  
 ctantur, in tantum æs alienum inciderunt, ut, si sal-  
 uum esse uelint, Sylla sit ijs ab inferis excitandus. qui  
 etiam non nullos agrestes, homines tenues, atque egen-  
 tes, in eandem illam spem rapinarum ueterum impu-  
 lerunt. quos ego utrosque Quirites in eodẽ genere præ-  
 datorum, direptorumq; pono. sed eos hoc moneo, de-  
 sinant furere, & proscriptiones, & dictaturas cogi-  
 tare: tantus enim illorum temporum dolor iniustus est  
 ciuitati, ut iam ista non modo homines, sed ne pecu-  
 des quidem mihi passuræ esse uideantur. Quarta  
 tum genus est sane uarium, & mixtum, & turbu-  
 lentum: qui iampridem premuntur: qui nunquam  
 emergent: qui partim inertia, partim male gerendo  
 negotio, partim etiam sumptibus in uetere ære alieno  
 uacillant: qui uadimonijs, iudicijs, proscriptionibus  
 bonorum defatigati, permulti & ex urbe, & ex a-  
 gris se in illa castra conferre dicuntur. hosce ego non  
 tam milites acres, quàm inficiatores lentos esse arbi-  
 tror. qui homines primum, si stare non possunt, cora-  
 ruant, sed ita, ut non modo ciuitas, sed ne uicini quia

dem proximi sentiant : nam illud non intelligo, quiam obrem, si uiuere honeste non possunt, perire turpiter uelint; aut cur, minore dolore perituros se cum multis, quam si soli pereant, arbitrentur. Quintum genus est parricidarum, sicariorum, denique omnium facinorosorum : quos ego à Catilina non reuoco : nam neque diuelli ab eo possunt, & pereant sane in latrocinio, quoniam sunt ita multi, ut eos capere carcer non possit. Postremum autem genus est non solum numero, uerum etiam genere ipso, atque uita, quod proprium est Catilinæ, de eius delectu, immo uero de com-  
plexu eius, ac sinu, quos pexo capillo nitidos, aut imberbes, aut bene barbatos uidetis, manicatis, & talaribus, ac tritis tunicis, uelis amictos, non togis : quorum omnis industria uitæ, & uigilandi labor in antea lucanis cœnis expromitur. In his gregibus omnes aleatores, omnes adulteri, omnes impuri, impudiciq; uersantur. hi pueri tam lepidi, ac delicati, non solum amare, et amari, neque cantare, et psallere, sed etiã sicas uibrare, et spargere uenena didicerunt : qui nisi exeunt, nisi pereunt; etiam si Catilina perierit, scitote hoc in rep. seminarium Catilinarium futurum. ueruntamen quid sibi isti miseri uolunt? num suas secum mulierculas sunt in castra ducturi? quemadmodum autem illis cingere poterunt, his præsertim iam noctibus? quo autem pacto illi Apenninum atque illas pruinas ac niues perferent? nisi iccirco se facilius hiemem toleraturos putant, quod in conuiuijs nudi saltare didicerunt. o bellum magnopere pertimescendum, cum hanc sit habiturus Catilina scortatorum cohortem pratoriam. in-



struite nunc Quirites contra has tam præclaras Catili-  
 næ copias uestra præsidia, uestrosq; exercitus: & pri-  
 mum gladiatori illi confecto, & saucio consules, im-  
 peratoresq; uestros opponite: deinde contra illam nau-  
 fragorum eiectam, ac debilitatam manum florem to-  
 tius Italiæ, ac robur educite: iam uero urbes colonia-  
 rum, ac municipiorum respondebunt Catilinæ tumu-  
 lis siluestribus. neque uero cæteras copias, ornamenta,  
 præsidia uestra cum illius latronis inopia, atque egesta-  
 te debeo conferre. sed si, omissis his rebus omnibus, qui-  
 bus nos suppeditamus, eget ille, senatu, equitibus Ro-  
 populo, urbe, ærario, uectigalibus, cuncta Italia,  
 prouincijs omnibus, exteris nationibus; si, inquam,  
 his rebus omissis, ipsas causas, quæ inter se configunt,  
 contendere uelimus: ex eo ipso, quàm ualde illi ia-  
 ceant, intelligere possumus: ex hac enim parte pudor  
 pugnat, illinc petulantia; hinc pudicitia, illinc stuprū;  
 hinc fides, illinc fraudatio; hinc pietas, illinc scelus;  
 hinc constantia, hinc furor: hinc honestas, illinc tur-  
 pitude; hinc continentia, illinc libido: denique æqui-  
 tas, temperantia, fortitudo, prudentia, uirtutes omnes  
 certant cum iniquitate, cum luxuria, cum ignauia,  
 cum temeritate, cum uitij omnibus: postremo copie  
 cum egestate, bona ratio cum perdita, mens sana cum  
 amentia, bona denique spes cum omniū rerum despera-  
 tione cōfigit. in huiusmodi certamine, ac prælio non ne  
 etiam si hominum studia deficient, di ipsi immorta-  
 les cogent ab his præclarissimis uirtutibus tot, & tan-  
 ta uitia superari? quæ cū ita sint Quirites, uos, quem-  
 admodum iā antea dixi, uestra recta custodijs, uigilijsq;



defendite; mihi, ut urbi sine uestro motu ac sine ullo tu-  
 multu satis esset. præsidiū, consulum ac prouisum est.  
 coloni omnes, municipesq; uestri certiores à me facti de  
 hac nocturna excursionē Catilinæ, facile urbes suas fi-  
 nesq; defendent: gladiatores, quam sibi ille maximam  
 manum, & certissimam fore putauit, quanquam me-  
 liore animo sunt, quàm pars patriciorum, potestate ta-  
 men in uestra continebuntur: Q. Metellus, quem  
 ego, prospiciens hoc, in agrum Gallicanum Picenumq;  
 præmisi, aut opprimet hominem, aut omnes eius mo-  
 tus, conatusq; prohibebit: reliquis autem de rebus con-  
 stituendis, maturandis, agendis iam ad senatum refe-  
 remus, quem uocari uideris. Nunc illos, qui in urbe re-  
 manserunt, atque adeo qui contra urbis salutem om-  
 niumq; uestrum in urbe à Catilina relictī sunt, quan-  
 quam sunt hostes, tamen, quia nati sunt ciues, moni-  
 tos etiam atque etiam uolo. mea lenitas adhuc si cui so-  
 lutior uisa est, hoc expectauit, ut id, quod latebat, e-  
 rumperet. quod reliquum est, iam non possum obliui-  
 sci, meam hanc esse patriam, me horum esse consulem;  
 mihi aut cum his uiuendum, aut pro his esse morien-  
 dum. nullus est portæ custos, nullus insidiator uix: si  
 qui exire uolunt, consulere sibi possunt: qui uero in ur-  
 be se commouerit, cuius ego non modo factum, sed in-  
 ceptum ullum, conatum ue contra patriam deprehen-  
 dero, sentiet in hac urbe esse consules uigilantes, esse ea-  
 gregios magistratus, esse fortem senatum, esse arma,  
 esse carcerem, quem uindicem nefariorum ac manife-  
 storum scelerum maiores nostri esse uoluerunt. atque  
 hæc omnia sic agentur Quirites, ut res maximæ mini-

mo motu, pericula summa nullo tumultu, bellum intestinum, ac domesticum, post hominum memoriam crudelissimum & maximum, me uno togato duce & imperatore sedetur. quod ego sic administrabo Quirites, ut, si ullo modo fieri poterit, ne improbus quidem quisquam in hac urbe pœnam sui sceleris sufferat. sed si uis manifestæ audaciæ, si impendens patriæ periculum me necessario de hac animi lenitate deduxerint: illud profecto perficiam, quod in tanto, & tam insidioso bello uix optandum uidetur, ut ne quis bonus intereat, paucorumq; pœna uos omnes iam salui esse possitis. quæ quidem ego neque mea prudentia, neque humanis consilijs fretus polliceor uobis Quirites, sed multis, & non dubijs deorum immortalium significationibus: quibus ego ducibus in hanc spem, sententiâq; sum ingressus: qui iam non procul, ut quondam solebant, ab extero hoste atque longinquo, sed hic presentes suo numine, atque auxilio sua templa, atque urbis tecta defendunt: quos uos Quirites precari, uenerari, atque implorare debetis, ut quam urbem pulcherrimam, florentissimam, potentissimâq; esse uoluerunt, hanc, omnibus hostium copijs terra, mariq; superatis, à perditissimorum ciuium nefario scelere defendant.

IN L. CATILINAM,  
AD QUIRITES,  
ORATIO XXI.

Emp. Quirites, uitamq; omnium uestrum, bona, fortunas, coniuges, liberosq; uestros, atque hoc domicilium clarissimi imperij, fortunatissimam pulcherrimamq; urbem, hodierno die, decorum immortalium summo erga uos amore, laboribus, consilijs, periculisq; meis, ex flamma, atque ferro, ac pene ex faucibus fati ereptam, & uobis conseruatam, ac restitutam uidetis. & si non minus nobis iucundi, atque illustres sunt ij dies, quibus conseruamur, quàm illi, quibus nascimur; quod salutis certa lætitia est, nascendi incerta conditio; & quod sine sensu nascimur, cum uoluptate conseruamur: profecto, quoniam illum, qui hanc urbem condidit, Romulum ad deos immortales beneuolentia, fama; sustulimus; esse apud uos, posterosq; uestros in honore debet dies is, qui eandem hanc urbem conditam, amplificatamq; seruauit; nam totius urbis templis, delubris, tectis omnibus subiectos prope iam ignes circumdatosq; reslinximus; iidemq; gladios in remp. distriētos reuudimus, mucronesq; eorum à iugulis uestris reiecimus. quæ quoniam in senatu illustrata, patefacta, compertaq; sunt per me: uobis iam exponam breuiter Quirites: ut, & quanta, & quàm manifesta, & qua ratione inuestigata, & comprehensa sint, uos, qui & ignoratis, & expectatis, scire possitis. Principio, ut Catilina paucis

## O R A T I O   I I I .

ante diebus erupit ex urbe, cum sceleris sui socios, & huiusce nefarii belli acerrimos duces Romæ reliquisset; semper uigilaui, & prouidi Quirites, quemadmodum in tantis, & tam absconditis insidijs salui esse possemus. nam tum, cum ex urbe Catilinam eijciebam, (non enim iam uereor huius uerbi inuidiam, cum illa magis sit timenda, quæd uiuus egressus est) sed tum, cum illum exterminari uolebam, aut reliquam coniuratorum manum simul exituram, aut eos, qui remansissent, infirmos sine illo ac debiles fore putabam. atque ego, ut uidi, quos maximo furore, et scelere esse inflammatos sciebam, eos esse nobiscum, & Romæ remansisse; in eo omnes dies noctesq; consumpsi, ut, quid agerent, quid molirentur, sentirem, ac uiderem: ut, quoniam auribus uestris propter incredibilem magnitudinem sceleris minorem fidem faceret oratio mea, rem ita comprehendere, ut tum demum animis saluti uestre prouideretis, cum oculis maleficiū ipsum uideretis. itaque ut comperi legatos Allobrogum, belli transalpinī, & tumultus Gallici excitandi causa, à P. Lentulo esse sollicitatos, eosq; in Galliam ad suos ciues, eodem itinere cum literis, mandatisq; ad Catilinam esse missos, comitemq; ijs adiunctum Vulturcium, atque huic datas esse ad Catilinam literas: facultatem mihi oblatam putauī, ut, quod erat difficillimum, quodq; ego semper optabam à dijs immortalibus, tota res non solum à me, sed etiam à senatu, & à uobis manifeste deprehenderetur. itaque hesternò die L. Flaccum & C. Pontinium prætores, fortissimos, atque amantissimos reip. uiros, ad me uocaui: rem omnem exposui: quid fieri placeret,



ostendi. illi autem, qui omnia de rep. præclara atque egregia sentirent, sine recusatione, ac sine ulla mora negotium susceperunt, & cum aduersperasceret, occulte ad pontem Miluium perueniunt, atque ibi in proximis uillis ita bipartiti fuerunt, ut Tiberis inter eos & pons interesset. eodem autem & ipsi sine cuiusquam suspitione multos fortes uiros eduxerunt: & ego de præfectura Reatina complures delectos adolescentes, quorum opera uitor assidue in reip. præsidio, cum gladijs miseram. interim tertia fere uigilia exacta, cum iam pontem cum magno comitatu legati Allobrogum ingredi inciperent, unaq; Vulturcius: fit in eos impetitus: educuntur & ab illis gladij, & à nostris. res erat prætoribus nota solis, ignorabatur à cæteris. tum intrauentu Pontini, atque Flacci pugna, quæ erat commissa, sedatur: literæ, quæcunque erant in eo comitatu, integris signis, prætoribus traduntur: ipsi comprehensi ad me, cum iam dilucesceret, deducuntur. atque horum omnium scelerum improbissimorum machinatorum Cimbrum Gabinium statim ad me nihil dum suspicantem uocaui: deinde item accersitur P. Statilius, & post eum Cethegus: tardissime autem Lentulus uenit, credo, quod in literis dandis præter consuetudinem proxima nocte uigilarat. cum uero summis ac clarissimis huius ciuitatis uiris, qui audita re frequentes ad me mane conuenerant, literas à me prius aperiri, quàm ad senatum referri placeret, ne, si nihil esset inuentum, temere à me tantus tumultus iniectus ciuitati uideretur: negaui me esse facturum, ut de periculo publico non ad consilium publicum rem integram deferrem:

etenim Quirites si ea, quæ erant ad me delata, reperi-  
ta non essent, tamen ego non arbitrabar in tantis reip.  
periculis esse mihi nimiam diligentiam pertimescen-  
dam. senatum frequentem celeriter, ut uidistis, coe-  
gi: atque interea statim, admonitu Allobrogum, C. Sul-  
pitium præ. fortem uirum misi, qui ex ædibus Cethe-  
gi, si quid telorum esset, efferret. ex quibus ille maxi-  
mum sicarum numerum, & gladiorum extulit. intro-  
duxi Vulturcium sine Gallis: fidem ei publicam iussu  
senatus dedi: hortatus sum, ut ea, quæ sciret, sine timo-  
re indicaret. tum ille dixit, cum uix se ex magno timo-  
re recreasset, à P. Lentulo se habere ad Catilinam man-  
data, & literas, ut seruorum præsidio uiteretur, et ad  
urbem quamprimum cum exercitu accederet: id au-  
tem eo consilio, ut, cum urbem omnibus ex partibus,  
quemadmodum descriptum, distributumq; erat, incen-  
dissent, cædemq; infinitam ciuium fecissent, præsto es-  
set ille, qui & fugientes exciperet, & se cum his urba-  
nis ducibus coniungeret. introducti autem Galli, ius-  
iurandum sibi, & literas à P. Lentulo, Cethego, Stati-  
lio ad suam gentem datas esse dixerunt, atque ita sibi  
ab his & à L. Cassio esse præscriptum, ut equitatum in  
Italiam quamprimum mitterent, pedestres sibi copias  
non defuturas: Lentulum autem sibi confirmasse, ex  
fatis sibyllinis, aruspicumq; responsis se esse tertium il-  
lum Cornelium, ad quem regnum huius urbis, atque  
imperium peruenire esset necesse: Cinnam ante se, &  
Syllam fuisse: eundemq; dixisse, fatalem hunc esse an-  
num ad interitum huius urbis, atque imperij, qui esset  
decimus annus post uirginum absolutionem, post Ca-

pitoliꝝ autem incensionem uigessimus . hanc autem Cethego cum ceteris controuersiam fuisse dixerunt , quòd , cum Lentulo , & ceteris Saturnalibus eadem fieri , atque urbem incendi placeret , Cethego nimium id longum uideretur . ac , ne longum sit Quirites , tabellas proferri iussimus , quæ à quoque dicebantur datæ . primum ostendimus Cethego : signum cognouit . nos lianum incidimus , legimus . erat scriptum ipsius manu Allobrogum senatui , & populo , sese , quæ eorum legis confirmasset , esse facturum : orare , ut item illi facerent , quæ sibi legati eorum præcepissent . tum Cethegus , qui paulo ante aliquid de gladijs , ac sicis , quæ apud illum itidem erant deprehensæ , respondisset , dixissetq; se semper bonorum ferramentorum studiosum fuisse ; recitatis literis , debilitatus , atque abiectus , conscientia conuictus repente conticuit . Introductus Statilius , cognouit manum et signum suum . recitatæ sunt tabellæ in eandem fere sententiam : confessus est . Tum ostendi tabellas Lentulo , & quæsiui , cognosceret ne signum : annuit . est uero , inquam , signum quidem notum , imago aut tui clarissimi uiri , qui amauit unice patriam , & ciues suos : quæ quidem te à tanto scelere etiam muta reuocare debuit . Leguntur eadem ratione ad senatum Allobrogum populumq; literæ . si quid de his rebus dicere uellet , feci potestatem . atque ille quidem primo negauit : post autem aliquando , toto indicio exposito atque edito , surrexit : quæsiuit à Gallis , quid sibi esset cum ijs , quamobrem domum suam uenissent ; itemq; à Vulturcio . qui cum illi breuiter constanterq; respondissent , per quem ad eum , quotiesq; ue-

nissent; quæsisissentq; ab eo, nihil ne secum esset de fatis  
 sibyllinis locutus: tum subito ille scelere demens, quan-  
 ta vis conscientiæ esset, ostendit: nam cum id posset in-  
 ficiari, repente præter opinionem omnium confessus est:  
 ita eum non modo ingenium illud, & dicendi exercita-  
 tio, quæ semper ualuit, sed etiam, propter uim sceleris  
 manifesti atque deprehensi, impudentia, quæ superabat  
 omnes, improbitasq; defecit. Vulturcius uero subito pro-  
 ferri literas atque aperiri iussit, quas sibi à Lentulo ad  
 Catilinam datas esse dicebat: atque ibi uehementissime  
 perturbatus Lentulus, tamen signum et manum suam  
 cognouit. erant autem scriptæ sine nomine, sed ita.  
 QVI SIM, EX EO, QVEM AD TE MI-  
 SI, COGNOSCES. CVRA, VT VIR SIS:  
 ET COGITA, QVEM IN LOCVM SIS  
 PROGRESSVS: ET VIDE, QVID IAM  
 TIBI SIT NECESSE: CVRA, VT OM-  
 NIVM TIBI AVXILIA ADIVNGAS,  
 ETIAM INFIMORVM. Gabinius deinde in-  
 troductus, cum primo impudenter respondere cœpisset,  
 ad extremum nihil ex ijs, quæ Galli insimulabant, ne-  
 gavit. ac mihi quidem Quirites cum illa certissima sunt  
 uisa argumenta, atque indicia sceleris, tabellæ, signa,  
 manus, denique uniuscuiusque confessio: tum multo  
 illa certiora, color, oculi, uultus, taciturnitas: sic enim  
 obstupuerant, sic terram intuebantur, sic furtim non  
 nunquam inter se aspiciebant, ut non iam ab alijs indi-  
 cari, sed ipsi à se uiderentur. Indicijs expositis, atque  
 editis Quirites, senatum consului, de summa reip. quid  
 fieri placeret. dictæ sunt à principibus acerrimæ ac for-  
 tissimæ



tissima sententiæ, quas senatus sine ulla uarietate est consecutus. & quoniam nondum est perscriptum S. C. ex memoria uobis Quirites, quid senatus censuerit, exponam. Primum mihi gratiæ uerbis amplissimis aguntur, quod uirtute, consilio, providentia mea resp. periculis sit maximis liberata: deinde L. Flaccus & C. Pontinus prætores, quod eorum opera forti fideliq; usus essem, merito ac iure laudantur: atque etiam uiro forti, collegæ meo, C. Antonio laus imperitur, quod eos, qui huius coniurationis participes fuissent, à suis & reip. consilijs remouisset. atque ita censuerunt, ut P. Lentulus, cum se prætura abdicasset, tum in custodiam traderetur; itemq; ut C. Cethegus, L. Statilius, P. Gabinius, qui omnes præsentēs erant, in custodiam traderentur: atque idem hoc decretum est in L. Cassium, qui sibi procurationem incendiendæ urbis depoposcerat; in M. Ceparium, cui ad sollicitandos pastores Apuliam esse attributam erat indicatum; in P. Furium, qui est ex ijs colonis, quos Fesulas L. Sylla deduxit; in Q. Manlium Chilonem, qui una cum hoc Furio semper erat in hac Allobrogum sollicitatione uersatus; in P. Vmbrenum, libertinum hominem, à quo primum Gallos ad Gabinium perductos esse constabat. atque ea lenitate senatus est usus Quirites, ut ex tanta coniuratione, tantâq; ui ac multitudine domesticorum hostium nouem hominum perditissimorum pœna rep. cōseruata, reliquorum mentes sanari posse arbitraretur. atque etiam supplicatio dijs immortalibus pro singulari eorum merito, meo nomine decreta est Quirites: quod mihi primum post hanc urbem conditam togato contigit: et ijs decreta uer

bis est, quòd urbem incendijs, cade ciues, Italiam bello li-  
 berassem. quæ supplicatio si cum cæteris conferatur Qui-  
 rites, hoc intersit, quòd cætera bene gesta, hæc una cõser-  
 uata rep. constituta est. atque illud, quod faciendum pri-  
 mum fuit, factum atque transactum est. nam P. Lentu-  
 lus, quanquam patefactus indicijs, et cõfessionibus suis,  
 iudicio senatus non modo prætoris ius, uerum etiam ci-  
 uis amiserat; tamen magistratu se abdicauit; ut, quæ re-  
 ligio C. Mario clarissimo uiro non fuerat, quo minus C.  
 Glauciam, de quo nihil nominatim erat decretum, præ-  
 torem occideret, ea nos religione in privato P. Lentulo  
 puniendo liberaremur. Nunc, quoniam Quirites scele-  
 ratissimi periculosissimiq; belli nefarios duces captos  
 iam, et comprehensos tenetis, existimare debetis, om-  
 nes Catilinæ copias, omnes spes, atque opes his depulsis  
 urbis periculis concidisse. quem quidem ego cum ex ur-  
 be pellebam, hoc prouidebam animo Quirites, remoto  
 Catilina, nec mihi esse P. Lentuli somnum, nec L. Cassij  
 adipem, nec C. Cethegi furiosam temeritatem pertime-  
 scendam. ille erat unus timendus ex his omnibus, sed  
 tandiu, dum mœnibus urbis continebatur: omnia no-  
 rat: omnium aditus tenebat: appellare, tentare, solici-  
 tare poterat, audebat: erat ei consilium ad facinus ap-  
 tum: consilio autem neque lingua, neque manus dee-  
 rat: iam ad cæteras res conficiendas certos homines de-  
 lectos ac descriptos habebat: neque uero, cum aliquid  
 mandauerat, confectum putabat; nihil erat, quod non  
 ipse obiret, occurreret, uigilaret, laboraret: frigus, sitim,  
 famem ferre poterat. hunc ego hominem tam acrem,  
 tam paratum, tam audacem, tam callidum, tam in sce-

lere uigilantem, tam in perditis rebus diligentem nisi ex domesticis insidijs in castrēse latrocinium compulissem; (dicam id, quod sentio, Quirites) non facile hanc tantam molem mali à ceruicibus uestris depulissem. non ille uobis Saturnalia constituisset; neque tanto ante exitium, ac fati diem reip. denunciasset; neque commississet, ut signum, ut literæ suæ, testes denique manifesti sceleris deprehenderetur. quæ nunc illo absente sic gesta sunt, ut nullum in priuata domo furtum unquam sic tam palam inuentum, quàm hæc tanta in remp. coniuratio manifesto inuenta atque deprehensa est. quod si Catilina in urbe ad hanc diem remansisset: quanquam, quoad fuit, omnibus eius consilijs occurrere, atque obstiti; tamen, ut leuissime dicam, dimicandum nobis cum illo fuisset; neque nos unquam, dum ille in urbe hostis fuisset, tantis periculis remp. tanta pace, tanto otio, tanto silentio, liberaassemus. quanquam hæc omnia Quirites ita sunt à me administrata, ut deorum immortalium nutu atque consilio et gesta & prouisa esse uideantur. idq; cum coniectura consequi possumus, quod uix uidetur humani consilij tantarum rerum gubernatio esse potuisse: tum uero ita præsentibus his temporibus opem & auxilium nobis tulerunt, ut eos pene oculis uidere possemus. nam ut illa omittam, uisas nocturno tempore ab occidente faces, ardoremq; cœli, ut fulminum instantus, ut terræ motus, ceteraq; quæ tam multa nobis consulibus facta sunt, ut hæc, quæ nunc fiunt, canere dii immortales uiderentur: hoc certe Quirites, quod sum dicturus, neque prætermittendum, neque relinquendum est. nam profecto memoria tenetis, Cotta, et



Torquato consulibus , complures in Capitolio turres de  
coelo esse percussas , cum et simulacra deorum immorta-  
lium depulsa sunt , & statuæ ueterum hominum deie-  
ctæ , & legum æra liquefacta. tactus est etiam ille , qui  
hanc urbem condidit , Romulus , quem inauratum in Ca-  
pitolio , paruum , atque lactentem , uberibus lupinis in-  
hiantem , fuisse meministis . quo quidem tempore , cum  
aruspices ex tota Etruria conuenissent , cædes , atque  
incendia , et legum interitum , & bellum ciuile ac dome-  
sticum , et totius urbis ac imperij occasum appropinqua-  
re dixerunt , nisi dij immortales omni ratione placati  
suo numine prope fata ipsa flexissent . itaque illorum re-  
sponsis tunc & ludi decem per dies facti sunt , neque res  
ulla , quæ ad placandum deos pertineret , prætermissa  
est : ijdemq; iusserunt simulacrum Iouis facere maius ,  
& in excelsa collocare , & , contra atque ante fuerat ,  
ad orientem conuvertere : ac se sperare dixerunt , si illud  
signum , quod uidetis , solis ortum , & forum curiamq;  
conspiceret , fore , ut ea consilia , quæ clam essent inita  
contra salutem urbis , atque imperij , illustrarentur , ut  
à senatu , populoq; R. perspicere possent . atque illud ita col-  
locandum consules illi statuerunt : sed tanta fuit operis  
tarditas , ut neque à superioribus consulibus , neque à no-  
bis ante hodiernum diem collocaretur . hic quis potest es-  
se Quirites tam auersus à uero , tam præceps , tam men-  
te captus , qui neget hæc omnia , quæ uidemus , præci-  
pueq; hanc urbem deorum immortalium nutu , atque po-  
testate administrari ? etenim cum esset ita responsum , cæ-  
des , incendia , interitumq; reip. comparari , & ea à per-  
ditis ciuibus : quæ tum propter magnitudinem scele-



rum nonnullis incredibilia uidebantur, ea non modo cogitata à nefarijs ciuibus, uerum etiam suscepta esse sensistis. illud uero non ne ita præsens est, ut nictu Iouis optimi Maximi factum esse uideatur? ut, cum hodie no die mane per forum meo iussu et coniurati, et eorum indices in ædem Concordiæ ducerentur, eo ipso tempore signum statueretur: quo collocato, atque ad uos, senatumq; conuerso, omnia et senatus, et uos, quæ erant contra salutem omnium cogitata, illustrata, et patefacta uidistis. quo etiam maiore sunt isti odio supplicioq; digni, qui non solum uestris domicilijs atque tectis, sed etiam deorum templis atque delubris sunt funestos ac nefarios ignes inferre conati: quibus ego si me restitisse dicam, nimium mihi sumam, et non sim ferendus: ille, ille Iupiter restitit: ille Capitolium ille hæc templa, ille hanc urbem, ille uos omnes saluos esse uoluit. dijs ego immortalibus ducibus hanc mentem Quirites uoluntatemq; suscepi, atque ad hæc tanta indicia perueni. iam uero illa Allobrogum sollicitatio à Lentulo, cæterisq; domesticis hostibus, tanta res tam demèter credita et ignotis, et barbaris, commissæq; literæ nunquam essent profecto, nisi à dijs immortalibus huic tantæ audaciæ consilium esset ereptum. quid uero, ut homines Galli, ex ciuitate male pacata, quæ gens una restat, quæ populo R. bellum facere et posse, et non nolle uideatur, spem imperij et rerum amplissimarum, ultero sibi à patricijs hominibus oblatam, negligerent, uestramq; salutem suis opibus anteponerent; id non ne diuinitus factum esse putatis? præsertim qui nos non pugnando, sed tacendo superare potuerunt. quamobrem Quirites, quoniam ad

omnia pulvinaria supplicatio decreta est, celebratote illos dies cum coniugibus, ac liberis uestris: nam multi sæpe honores dijs immortalibus iusti habiti sunt, ac debiti, sed profecto iustiores nunquam. erepti enim ex crudelissimo ac miserrimo interitu, & erepti sine cade, sine sanguine, sine exercitu, sine dimicatione, togati me uno rogato duce & imperatore uicistis: etenim recordamini Quirites omnes ciuiles dissensiones, neque solum eas, quas audistis; sed & has, quas uosmet ipsi meministis et uidistis. L. Sylla P. Sulpicium oppressit: C. Marium, custodem huius urbis, multosq; fortes uiros partim eiecit ex ciuitate, partim interemit. Cn. Octavius consul armis ex urbe collegam suum expulit. omnis hic locus aceruis corporum, & ciuium sanguine redundauit. superauit postea Cinna cum Mario. tum uero clarissimis uiris interfectis, lumina ciuitatis extincta sunt. ultus est huius uictoriæ crudelitatem postea Sylla. ne dici quidem opus est quanta diminutione ciuium, et quanta calamitate reip. dissensit M. Lepidus à clarissimo, & fortissimo uiro Q. Catulo: attulit non tam ipsius interitus reip. luctum, quàm cæterorum. atque illæ dissensiones erant huiusmodi Quirites, quæ non ad delendam, sed ad commutandam remp. pertinerent. non illi nullam esse remp. sed in ea, quæ esset, se esse principes; neque hanc urbem cõflagrare, sed se in hac urbe florere uoluerunt. atque illæ tamen omnes dissensiones, quarum nulla exitium reip. quæsiuit, eiusmodi fuerunt, ut non reconciliatione concordie, sed internicione ciuium dijudicata sint. in hoc autem uno post hominum memoriam maximo, crudelissimoq; bello, quale bellum nul-

la unquam barbaria cum sua gente gessit, quo in bello  
 lex hæc fuit à Lentulo, Catilina, Cassio, Cethego consti-  
 tuta, ut omnes, qui salua urbe salui esse possent, in ho-  
 stium numero ducerentur, ita me gessi Quirites, ut om-  
 nes salui conseruaremini. & cum hostes uestri tantum  
 superfuturum putassent, quantum infinita cædi resti-  
 tisset; tantum autem urbis, quantum flamma obire  
 non potuisset: & urbem, et ciues integros incolumesq;  
 seruaui. quibus pro tantis rebus Quirites nullum ego  
 à uobis præmium uirtutis, nullum insigne honoris, nul-  
 lum monimentum laudis postulo, præterquam huius  
 diei memoriam sempiternam. in animis ego uestris om-  
 nes triumphos meos, omnia ornamenta honoris, moni-  
 menta gloriæ, laudis insignia condi et collocari uolo. ni-  
 hil me mutum potest delectare, nihil tacitum, nihil de-  
 nique huiusmodi, quod etiam minus digni assequi pos-  
 sint. memoria uestra Quirites nostræ res alentur, sera-  
 monibus crescent, literarum monumentis inuetera-  
 scent, & corroborabuntur: eandemq; diem intelligo,  
 quam spero æternam fore, & ad salutem urbis, &  
 ad memoriam consulatus mei propagatam; unoq; tem-  
 pore in hac rep. duos ciues exitisse, quorum alter fines  
 uestri imperij non terræ, sed cœli regionibus termina-  
 ret, alter eiusdem imperij domicilium, sedemq; serua-  
 ret. sed quoniam earum rerum, quas ego gessi, non est  
 eadem fortuna, atque conditio, quæ illorum, qui exter-  
 na bella gesserunt; quod mihi uiuendum sit cum illis,  
 quos uici, ac subegi; illi hostes aut interfectos, aut op-  
 pressos reliquerunt: uestrum est Quirites, si cæteris re-  
 cta sua facta profunt, mihi mea ne quando obsint, pro-

uidere : mentes enim hominum audacissimorum scele-  
ratae, ac nefariae ne uobis nocere possent, ego prouidi; ne  
mihi noceant, uestrum est prouidere. quanquam Qui-  
rites mihi quidem ipsi nihil iam ab istis noceri potest :  
magnum enim est in uobis praesidium, quod mihi in  
perpetuum comparatum est; magna in rep. dignitas,  
quae me semper tacita defendet; magna uis est con-  
scientiae; quam qui negligent, cum me uiolare uolent,  
se ipsi indicabunt. est etiam in nobis is animus Qui-  
rites, ut non modo nullius audaciae cedamus, sed etiam  
omnes improbos ultro semper laceffamus. quod si om-  
nes impetus domesticorum hostium, depulsi à uobis, se  
in me unum cōuerterint : uobis erit prouidendum Qui-  
rites, quā conditione posthac eos esse uelitis, qui se pro sa-  
lute uestra obtulerint inuidiae periculisq; omnibus : mi-  
hi quidem ipsi, quid est, quod iam ad uitae fructum  
possit acquiri? praesertim cum neque in honore uestro,  
neque in gloria uirtutis quidquam uideam altius, quò  
quidem mihi libeat ascendere : illud perficiam profecto  
Quirites, ut ea, quae gessi in consulatu, priuatus tuear,  
atque ornem: ut, si qua est inuidia in conseruanda rep.  
suscepta, laedat inuidos, mihi ualeat ad gloriam. deni-  
que ita me in rep. tractabo, ut meminerim semper quae  
gesserim, curemq; ut ea uirtute, non casu gesta esse ui-  
deatur. Vos Quirites, quoniam iam nox est, uenerami-  
ni illum Iouem custodem huius urbis, ac uestrum, atque  
in uestra tecta discedite, et ea, quanquam iam periculū  
est depulsum, tamen aequae, ac priori nocte fecistis, custo-  
dijs, uigilijsq; defendite. id ne uobis diutius faciundum  
sit, atque ut in perpetua pace esse possitis, prouidebo.



IN L. CATILINAM,  
IN SENATU.  
ORATIO XXII.

Idco P. C. in me omnium uestrum ora,  
atque oculos esse conuersos : uideo uos  
non solum de uestro, ac reip. uerum  
etiam, si id depulsum sit, de meo pe-  
riculo esse sollicitos. est mihi iucunda  
in malis, & grata in dolore uestra erga me uoluntas;  
sed eam per deos immortales quæso deponite, atque obli-  
ti salutis meæ, de uobis, ac de liberis uestris cogitate.  
mihi quidem si hæc conditio consulatus data est; ut om-  
nes acerbitates, omnes dolores, cruciatusq; perferrem,  
feram non solum fortiter, sed etiam libenter, dum mo-  
do meis laboribus uobis populoq; R. dignitas, salusq;  
pariatur. ego sum ille consul P. C. cui non foris, in quo  
omnis æquitas continetur; non campus, consularibus  
auspicijs consecratus; non curia, summum auxilium  
omnium gentium; non domus, commune perfugium;  
non lectus, ad quietem datus; non denique hæc sedes  
honoris, sella curulis unquam uacua mortis periculo,  
atque insidijs fuit. ego multa tacui, multa pertuli,  
multa concessi, multa meo quodam dolore in uestro  
timore sanaui. nunc si hunc exitum consulatus mei dii  
immortales esse uoluerunt, ut uos P. C. populumq; R.  
ex cade misera, coniuges, liberosq; uestros, uirginesq;  
Vestales ex acerbissima uexatione, templa, atque de-  
lubra, hanc pulcherrimam patriam omnium nostrum  
ex foedissima flamma, totam Italiam ex bello, et ua-

stitate eriperem : quæcunque mihi uni proponetur fortuna, subeat. etenim si P. Lentulus suum nomen inductus à uatibus fatale ad perniciem reip. fore putauit : cur ego non later meum consulatum ad salutem reip. prope fatalem extitisse? quare P. C. consulite uobis, prospicite patriæ, conseruate uos, coniuges, liberos, fortunasq; uestras, populi R. nomen, salutemq; defendite, mihi parcere, ac de me cogitare desinite. nam primum deo sperare omnes deos, qui huic urbi præsident, pro eo mihi, ac mereor, relaturos gratiam esse : deinde, si quid obtigerit, æquo animo, paratoq; moriar : neque enim turpis mors forti uiro potest accideret, neque immatura consulari, nec misera sapienti. nec tamen ego sum ille ferreus, qui fratris carissimæ atque amantissimæ præsentis mœrore non mouear, horumq; omnium lacrymis, à quibus me circumfessum uidetis : neque meam mentem non domum sæpe reuocat exanimata uxor, abiecta metu filia, & paruulus filius, qui mihi uidetur amplecti remp. tanquam obsidem consulatus mei ; neque ille, qui expectans huius exitum diei astat in conspectu meo, gener. moueor his rebus omnibus, sed in eam partem, ut salui sint nobiscum omnes, etiam si uis aliqua me oppresserit, potius, quàm ut illi et nos una reip. peste pereamus. quare P. C. incumbite ad reip. salutem, circumspecte omnes procellas, quæ impendent, nisi prouideritis. non T. Gracchus, qui iterum tribunus pl. fieri uoluit ; non C. Gracchus, qui agrarios concitare conatus est ; non L. Saturninus, qui C. Memmium occidit, in discrimen aliquod, atque in uestre seueritatis iudicium adduci

tur : sed tenentur ij, qui ad urbis incendium, ad ues-  
trum omnium cadem, ad Catilinam accipiendum Ro-  
mæ restiterunt : tenentur literæ, signa, manus, deni-  
que uniuscuiusque confessio : sollicitantur Allobroges :  
seruitia excitantur : Catilina accersitur : id est initum  
consilium, ut, interfectis omnibus, nemo ne ad deplo-  
randum quidem populi R. nomen atque ad lamentan-  
dam tãti imperij calamitatem relinquatur. hæc omnia  
indices detulerunt, rei confessi sunt, uos multis iam indi-  
cijs iudicauistis : primum, quod mihi gratias egistis sin-  
gularibus uerbis, et mea uirtute, atque diligentia per-  
ditorum hominum patefactam esse coniurationem de-  
creuistis : deinde, quod P. Lentulum, ut se abdicaret  
prætura, coegistis : tum, quod eum, & ceteros, de  
quibus iudicauistis, in custodiam dandos censuistis : ma-  
ximeq; quod meo nomine supplicationem decreuistis ;  
qui honos togato habitus ante me est nemini : postremo,  
hesterno die præmia legatis Allobrogum, Titoq; Vul-  
turcio dedistis amplissima. quæ sunt omnia eiusmodi,  
ut ij, qui in custodiam nominatim dati sunt, sine ulla  
dubitatione à uobis damnati esse uideantur. sed ego in-  
stitui referre ad uos P. C. tanquam integrum, & de  
facto, quid iudicetis ; & de pœna, quid censeatis. illa  
prædicam, quæ sunt consulis. Ego magnum in rep.  
uersari furorem, & noua quædam misceri, & con-  
citari mala iam pridem uidebam : sed hanc tantam, tam  
exitiosam haberi coniurationem à cluibus, nunquam  
putaui. nunc, quidquid est, quocunque uestra men-  
tes inclinant atque sententiæ, statuendum uobis ante  
noctem est. quantum facinus ad nos delatum sit, uia



detis . huic si paucos putatis affines esse , uehementer  
 erratis . latius opinione disseminatum est hoc malum :  
 manauit non solum per Italiam , uerum etiam tran-  
 scendit alpes , & obscure serpens multas iam prouin-  
 cias occupauit . id opprimi sustentando ac prolatando  
 nullo pacto potest . quacunque ratione placet , celeri-  
 ter uobis uindicandū est . uideo duas adhuc esse senten-  
 tias ; unam D. Silani , qui censet eos , qui hæc delere co-  
 nati sunt , morte esse multandos ; alteram C. Cæsaris ,  
 qui mortis poenam remouet , cæterorum suppliciorum  
 omnes acerbitates amplectitur . uterque & pro sua di-  
 gnitate , & pro rerum magnitudine in summa seueri-  
 tate uersatur . alter eos , qui nos omnes , qui populum  
 R . uita priuare conati sunt , qui delere imperium , qui  
 populi R . nomen extinguere , puncto temporis frui ui-  
 ta , & hoc communi spiritu non putat oportere : atque  
 hoc genus poenæ sæpe in improbos ciues in hac rep . esse  
 usurpatum recordatur . alter intelligit , mortem à dijs  
 immortalibus non esse supplicij causa constitutam , sed  
 aut necessitatem naturæ , aut laborum , ac miseriarum  
 quietem esse : itaque eam sapientes nunquam inuiti ,  
 fortes etiam sæpe libenter oppetiuerunt . uincula uero ,  
 & ea sempiterna , certe ad singularem poenam nefa-  
 rij sceleris inuenta sunt . itaque municipijs dispertiri  
 iubet . habere uidetur ista res iniquitatem , si imperare  
 uelis ; difficultatem , si rogare . decernatur tamen , si  
 placet : ego enim suscipiam , & , ut spero , reperi-  
 am , qui id , quod salutis omnium causa statueritis , non  
 putet esse suæ dignitatis recusare . adiungit grauem  
 poenam municipibus , si quis eorum uincula ruperit :



horribiles custodias circumdat: & digna scelere hominū perditorum sancit, ne quis eorum pœnam, quos condemnat, aut per senatum, aut per populum leuare possit: eripit etiam spem, quæ sola hominem in miseris consolari solet: bona præterea publicari iubet: uitam solam relinquit nefarijs hominibus: quam si eripuisset, multas uno dolore animi, ac corporis, & omnes scelerum pœnas ademisset, itaque, ut aliqua inuita formido improbis esset posita, apud inferos eiusmodi quædam illi antiqui supplicia impijs constituta esse uoluerunt; quod uidelicet intelligebant, his remotis, non esse mortem ipsam pertimescendam. nunc P. C. ego mea uideo quid intersit. si eritis secuti sententiam C. Caesaris; quoniam hanc is in rep. uiam, quæ popularis habetur, secutus est, fortasse minus erunt hoc monitoire & auctore huiusce sententiæ mihi populares impetus pertimescendi. sin illam alteram secuti eritis, nescio an amplius mihi negotij contrahatur: sed tamen meorum periculorum rationes utilitas reip. uendicat: habemus enim à C. Cesare, sicut ipsius dignitas, et maiorum eius amplitudo postulabat, sententiā tanquam obsidem perpetuā in remp. uoluntatis: intellectum est, quid interest inter leuitatem concionatorum, & animum uere popularem, salutē populi consulentem. uideo, de istis, qui se populares haberi uolunt, abesse non neminem; ne de capite uidelicet ciuium R. sententiā ferat. is & nudius tertius in custodiam ciues R. Cethegum, et P. Lentulum dedit; & supplicationem mihi decreuit; & indices hesterno die maximis præmijs affecit. iam hoc nemini dubium est, qui reo custodiam,

nissent; quæssissentq; ab eo, nihil ne secum esset de fati-  
 sibyllinis locutus: tum subito ille scelere demens, quan-  
 ta uis conscientia esset, ostendit: nam cum id posset in-  
 ficiari, repente præter opinionem omnium confessus est:  
 ita eum non modo ingenium illud, & dicendi exercita-  
 tio, qua semper ualuit, sed etiam, propter uim sceleris  
 manifesti atque deprehensi, impudentia, qua superabat  
 omnes, improbitasq; defecit. Vulturcius uero subito pro-  
 ferri literas atque aperiri iussit, quas sibi à Lentulo ad  
 Catilinam datas esse dicebat: atque ibi uehementissime  
 perturbatus Lentulus, tamen signum et manum suam  
 cognouit. erant autem scriptæ sine nomine, sed ita.  
 QVI SIM, EX EO, QVEM AD TE MI-  
 SI, COGNOSCES. CVRA, VT VIR SIS:  
 ET COGITA, QVEM IN LOCVM SIS  
 PROGRESSVS: ET VIDE, QVID IAM  
 TIBI SIT NECESSE: CVRA, VT OM-  
 NIVM TIBI AVXILIA ADIVNGAS,  
 ETIAM INFIMORVM. Gabinius deinde in-  
 troductus, cum primo impudenter respondere cœpisset,  
 ad extremum nihil ex ijs, quæ Galli insimulabant, ne-  
 gavit, ac mihi quidem Quirites cum illa certissima sunt  
 uisa argumenta, atque indicia sceleris, tabellæ, signa,  
 manus, denique uniuscuiusque confessio: tum multo  
 illa certiora, color, oculi, uultus, taciturnitas: sic enim  
 obstupuerant, sic terram intuebantur, sic furtim non  
 nunquam inter se aspiciebant, ut non iam ab alijs indi-  
 cari, sed ipsi à se uiderentur. Indicijs expositis, atque  
 editis Quirites, senatum consului, de summa reip. quid  
 fieri placeret. dictæ sunt à principibus acerrimæ ac for-  
 tissimæ

tissimæ sententiæ, quas senatus sine ulla uarietate est consecutus. & quoniam nondum est perscriptum S. C. ex memoria uobis Quirites, quid senatus censuerit, exponam. Primum mihi gratiæ uerbis amplissimis aguntur, quòd uirtute, consilio, providentia mea resp. periculis sit maximis liberata: deinde L. Flaccus & C. Pontinus prætores, quòd eorum opera forti fideliq; usus essem, merito ac iure laudantur: atque etiam uiro forti, collegæ meo, C. Antonio laus impertitur, quòd eos, qui huius coniurationis participes fuissent, à suis & reip. consilijs remouisset. atque ita censuerunt, ut P. Lentulus, cum se prætura abdicasset, tum in custodiam traderetur; itemq; ut C. Cethegus, L. Statilius, P. Gabinius, qui omnes præsentés erant, in custodiam traderentur: atque idem hoc decretum est in L. Cassium, qui sibi procurationem incendendæ urbis depoposcerat; in M. Ceparium, cui ad sollicitandos pastores Apuliam esse attributam erat indicatum; in P. Furium, qui est ex ijs colonis, quos Fesulas L. Sylla deduxit; in Q. Manlium Chilonem, qui una cum hoc Furio semper erat in hac Allobrogum sollicitatione uersatus; in P. Vmbrenum, libertinum hominem, à quo primum Gallos ad Gabinium perductos esse constabat. atque ea lenitate senatus est usus Quirites, ut ex tanta coniuratione, tantaq; ui ac multitudine domesticorum hostium nouem hominum perditissimorum pœna rep. cōseruata, reliquorum mentes sanari posse arbitraretur. atque etiam supplicatio dijs immortalibus pro singulari eorum merito, meo nomine decreta est Quirites: quod mihi primum post hanc urbem conditam togato contigit: et ijs decreta uer

bis est, quod urbem incendijs, cade ciues, Italiam bello liberasset. quæ supplicatio si cum cæteris conferatur Quirites, hoc intersit, quod cætera bene gesta, hæc una cõseruata rep. constituta est. atque illud, quod faciendum primum fuit, factum atque transactum est. nam P. Lentulus, quanquam patefactus indicijs, et cõfessionibus suis, iudicio senatus non modo prætoris ius, uerum etiam ciuicis amiserat; tamen magistratu se abdicauit; ut, quæ religio C. Mario clarissimo uiro non fuerat, quo minus C. Glauciam, de quo nihil nominatim erat decretum, prætorem occideret, ea nos religione in priuato P. Lentulo puniendo liberaremur. Nunc, quoniam Quirites sceleratissimi periculosissimiq; belli nefarios duces captos iam, et comprehensos tenetis, existimare debetis, omnes Catilinæ copias, omnes spes, atque opes his depulsis urbis periculis concidisse. quem quidem ego cum ex urbe pellebam, hoc prouidebam animo Quirites, remoto Catilina, nec mihi esse P. Lentuli somnum, nec L. Cassij adipem, nec C. Cethegi furiosam temeritatem pertimescendam. ille erat unus timendus ex his omnibus, sed tandiu, dum mœnibus urbis continebatur: omnia norat: omnium aditus tenebat: appellare, tentare, sollicitare poterat, audebat: erat ei consilium ad facinus aptum: consilio autem neque lingua, neque manus deerat: iam ad cæteras res conficiendas certos homines delectos ac descriptos habebat: neque uero, cum aliquid mandauerat, confectum putabat; nihil erat, quod non ipse obiret, occurreret, uigilaret, laboraret: frigus, sitim, famem ferre poterat. hunc ego hominem tam acrem, tam paratum, tam audacem, tam callidum, tam in sce-



lere uigilantem, tam in perditis rebus diligentem nisi ex domesticis insidijs in castrēse latrocinium compulissem; (dicam id, quod sentio, Quirites) non facile hanc tantam molem mali à ceruicibus uestris depulissem. non ille uobis Saturnalia constituisset; neque tanto ante exitium, ac fati diem reip. denunciasset; neque commississet, ut signum, ut literæ suæ, testes denique manifesti sceleris deprehenderetur. quæ nunc illo absente sic gesta sunt, ut nullum in priuata domo furtum unquam sit tam palam inuentum, quàm hæc tanta in remp. contratio manifesto inuenta atque deprehensa est. quod si Catilina in urbe ad hanc diem remansisset: quanquam, quoad fuit, omnibus eius consilijs occurrī, atque obstiti; tamen, ut leuissime dicam, dimicandum nobis cum illo fuisset; neque nos unquam, dum ille in urbe hostis fuisset, tantis periculis remp. tanta pace, tanto otio, tanto silentio, liberaassemus. quanquam hæc omnia Quirites ita sunt à me administrata, ut deorum immortalium nutu atque consilio et gesta & prouisa esse uideantur. idq; cum coniectura consequi possumus, quod uix uidetur humani consilij tantarum rerum gubernatio esse potuisse: tum uero ita præsentibus his temporibus operam & auxilium nobis tulerunt, ut eos pene oculis uidere possemus. nam ut illa omittam, uisas nocturno tempore ab occidente faces, ardoremq; cæli, ut fulminum lætus, ut terræ motus, cæteraq; quæ tam multa nobis consulibus facta sunt, ut hæc, quæ nunc fiunt, canere dii immortales uiderentur: hoc certe Quirites, quod sum dicturus, neque prætermittendum, neque relinquendum est. nam profecto memoria tenetis, Cotta, et

Torquato consulibus , complures in Capitolio turres de  
coelo esse percussas , cum et simulacra deorum immorta-  
lium depulsa sunt , & statuæ ueterum hominum deie-  
ctæ , & legum æra liquefacta. tactus est etiam ille , qui  
hanc urbem condidit , Romulus , quem in auratum in Ca-  
pitolio , paruum , atque lactentem , uberibus lupinis in-  
hiantem , fuisse meministis . quo quidem tempore , cum  
aruspices ex tota Etruria conuenissent , cædes , atque  
incendia , et legum interitum , & bellum ciuile ac dome-  
sticum , et totius urbis ac imperij occasum appropinqua-  
re dixerunt , nisi dij immortales omni ratione placati  
suo numine prope fata ipsa flexissent . itaque illorum re-  
sponsis tunc & ludi decem per dies facti sunt , neque res  
ulla , quæ ad placandum deos pertineret , prætermissa  
est : iidemq; iusserunt simulacrum Iouis facere maius ,  
& in excelsa collocare , & , contra atque ante fuerat ,  
ad orientem conuvertere : ac se sperare dixerunt , si illud  
signum , quod uidetis , solis ortum , & forum curiamq;  
conspiceret , fore , ut ea consilia , quæ clam essent inita  
contra salutem urbis , atque imperij , illustrarentur , ut  
à senatu , populoq; R. perspicere possent . atque illud ita col-  
locandum consules illi statuerunt : sed tanta fuit operis  
tarditas , ut neque à superioribus consulibus , neque à no-  
bis ante hodiernum diem collocaretur . hic quis potest es-  
se Quirites tam auersus à uero , tam præceps , tam men-  
te captus , qui neget hæc omnia , quæ uidemus , præci-  
pueq; hanc urbem deorum immortalium nutu , atque po-  
testate administrari ? etenim cum esset ita respo'sum , cæ-  
des , incendia , interitumq; reip. comparari , & ea à per-  
ditis ciuibus : quæ tum propter magnitudinem scele-

rum nonnullis incredibilia uidebantur, ea non modo cogitata à nefarijs ciuibus, uerum etiam suscepta esse sensistis. illud uero non ne ita præsens est, ut nuntius Iouis optimi Maximi factum esse uideatur? ut, cum hodie no die mane per forum meo iussu et coniurati, et eorum indices in ædem Concordiæ ducerentur, eo ipso tempore signum statueretur: quo collocato, atque ad uos, senatumq; conuerso, omnia et senatus, & uos, quæ erant contra salutem omnium cogitata, illustrata, & patefacta uidistis. quo etiam maiore sunt isti odio supplicioq; digni, qui non solum uestris domicilijs atque tectis, sed etiam deorum templis atque delubris sunt funestos ac nefarios ignes inferre conati: quibus ego si me restitisse dicam, nimium mihi sumam, et non sim ferendus: ille, ille Iupiter restitit: ille Capitolium ille hæc templa, ille hanc urbem, ille uos omnes saluos esse uoluit. dijs ego in mortalibus ducibus hanc mentem Quirites uoluntatemq; suscepi, atque ad hæc tanta indicia perueni. iam uero illa Allobrogum sollicitatio à Lentulo, ceterisq; domesticis hostibus, tanta res tam demèter credita et ignotis, et barbaris, commissæq; literæ nunquam essent profecto, nisi à dijs immortalibus huic tantæ audaciæ consilium esset ereptum. quid uero, ut homines Galli, ex cinitate male pacata, quæ gens una restat, quæ populo R. bellum facere & posse, & non nolle uideatur, spem imperij & rerum amplissimarum, ultro sibi à patricijs hominibus oblatam, negligerent, uestramq; salutem suis opibus anteponerent; id non ne diuinitus factum esse putatis? præsertim qui nos non pugnando, sed tacendo superare potuerunt. quamobrem Quirites, quoniam ad

omnia puluinaria supplicatio decreta est, celebratote illos dies cum coniugibus, ac liberis uestris: nam multi sæpe honores dijs immortalibus iusti habiti sunt, ac debiti, sed profecto iustiores nunquam. erepti enim ex crudelissimo ac miserrimo interitu, & erepti sine cæde, sine sanguine, sine exercitu, sine dimicatione, togati me uno togato duce & imperatore uicistis. etenim recordamini Quirites omnes ciuiles dissensiones, neque solum eas, quas audistis; sed & has, quas uosmet ipsi meministis et uidistis. L. Sylla P. Sulpicium oppressit: C. Marium, custodem huius urbis, multosq; fortes uiros partim eiecit ex ciuitate, partim interemit. Cn. Octavius consul armis ex urbe collegam suum expulit. omnis hic locus acervis corporum, & ciuium sanguine redundauit. superauit postea Cinna cum Marlo. tum uero clarissimis uiris interfectis, lumina ciuitatis extincta sunt. ultus est huius uictoriæ crudelitatem postea Sylla. ne dici quidem opus est quanta diminutione ciuium, et quanta calamitate reip. dissensit M. Lepidus à clarissimo, & fortissimo uiro Q. Catulo: attulit non tam ipsius interitus reip. luctum, quam cæterorum. atque illæ dissensiones erant huiusmodi Quirites, quæ non ad delendam, sed ad commutandam remp. pertinerent. non illi nullam esse remp. sed in ea, quæ esset, se esse principes; neque hanc urbem cõflagrare, sed se in hac urbe florere uoluerunt. atque illæ tamen omnes dissensiones, quarum nulla exitium reip. quasiuit, eiusmodi fuerunt, ut non reconciliatione concordiæ, sed internicione ciuium dijudicatæ sint. in hoc autem uno post hominum memoriam maximo, crudelissimoq; bello, quale bellum nul-



la unquam barbaria cum sua gente gessit, quo in bello  
 lex hac fuit à Lentulo, Catilina, Cassio, Cethego consti-  
 tuta, ut omnes, qui salua urbe salui esse possent, in ho-  
 stium numero ducerentur, ita me gessi Quirites, ut om-  
 nes salui conseruaremini. & cum hostes uestri tantum  
 superfuturum putassent, quantum infinita cadi resti-  
 tisset; tantum autem urbis, quantum flamma obire  
 non potuisset: & urbem, et ciues integros incolumesq;  
 seruavi. quibus pro tantis rebus Quirites nullum ego  
 à uobis præmium uirtutis, nullum insigne honoris, nul-  
 lum monumentum laudis postulo, præterquam huius  
 diei memoriam sempiternam. in animis ego uestris om-  
 nes triumphos meos, omnia ornamenta honoris, moni-  
 menta gloriæ, laudis insignia condi et collocari uolo. ni-  
 hil me mutum potest delectare, nihil tacitum, nihil de-  
 nique huiusmodi, quod etiam minus digni assequi pos-  
 sint. memoria uestra Quirites nostræ res alentur, sera-  
 monibus crescent, literarum monumentis inuetera-  
 scent, & corroborabuntur: eandemq; diem intelligo,  
 quam spero aternam fore, & ad salutem urbis, &  
 ad memoriam consulatus mei propagatam; unoq; tem-  
 pore in hac rep. duos ciues extitisse, quorum alter fines  
 uestri imperij non terræ, sed cœli regionibus termina-  
 ret, alter eiusdem imperij domicilium, sedemq; serua-  
 ret. sed quoniam earum rerum, quas ego gessi, non est  
 eadem fortuna, atque conditio, quæ illorum, qui exter-  
 na bella gesserunt; quod mihi uiuendum sit cum illis,  
 quos uici, ac subegi; illi hostes aut interfectos, aut op-  
 pressos reliquerunt: uestrum est Quirites, si ceteris re-  
 cta sua facta profunt, mihi mea ne quando obsint, pro-

uidere : mentes enim hominum audacissimorum scele-  
ratæ; ac nefariæ ne uobis nocere possent, ego prouidi; ne  
mihi noceant, uestrum est prouidere. quanquam Qui-  
rites mihi quidem ipsi nihil iam ab istis noceri potest :  
magnum enim est in uobis præsidium, quod mihi in  
perpetuum comparatum est; magna in rep. dignitas,  
quæ me semper tacita defendet; magna uis est con-  
scientiæ; quam qui negligent; cum me uiolare uolent,  
se ipsi indicabunt. est etiam in nobis is animus Qui-  
rites; ut non modo nullius audaciæ cedamus, sed etiam  
omnes improbos ultro semper laceffamus. quod si om-  
nes impetus domesticorum hostium, depulsi à uobis, se  
in me unum cōuerterint : uobis erit prouidendum Qui-  
rites, quâ conditione posthac eos esse uelitis, qui se pro sa-  
lute uestra obtulerint inuidiæ periculisq; omnibus : mi-  
hi quidem ipsi, quid est, quod iam ad uitæ fructum  
possit acquiri? præsertim cum neque in honore uestro,  
neque in gloria uirtutis quidquam uideam altius, quò  
quidem mihi libeat ascendere : illud perficiam profecto  
Quirites, ut ea, quæ gessi in consulatu, priuatus tuear,  
atque ornem: ut, si qua est inuidia in conseruanda rep.  
suscepta, lædat inuidos, mihi ualeat ad gloriam. deni-  
que ita me in rep. tractabo, ut meminerim semper quæ  
gesserim, curemq; ut ea uirtute, non casu gesta esse ui-  
deatur. Vos Quirites, quoniam iam nox est, uenerami-  
ni illum Iouem custodem huius urbis, ac uestrum, atque  
in uestra tecta discedite, et ea, quanquam iam periculū  
est depulsum, tamen æque, ac priori nocte fecistis, custo-  
dijs, uigilijsq; defendite. id ne uobis diutius faciundum  
sit, atque ut in perpetua pace esse possitis, providebo.

IN L. CATILINAM,  
IN SENATV.  
ORATIO XXII.

Ideo P. C. in me omnium uestrum ora,  
atque oculos esse conuersos : uideo uos  
non solum de uestro, ac reip. uerum  
etiam, si id depulsum sit, de meo pe-  
riculo esse sollicitos. est mihi iucunda  
in malis, & grata in dolore uestra erga me uoluntas;  
sed eam per deos immortales quæso deponite, atque obli-  
ti salutis meæ, de uobis, ac de liberis uestris cogitate.  
mihi quidem si hæc conditio consulatus data est; ut om-  
nes acerbitates, omnes dolores, cruciatusq; perferrem,  
feram non solum fortiter, sed etiam libenter, dum mo-  
do meis laboribus uobis populoq; R. dignitas, salusq;  
pariatur. ego sum ille consul P. C. cui non foris, in quo  
omnis æquitas continetur; non campus, consularibus  
auspicijs consecratus; non curia, summum auxilium  
omnium gentium; non domus, commune perfugium;  
non lectus, ad quietem datus; non denique hæc sedes  
honoris, sella curulis unquam uacua mortis periculo,  
atque insidijs fuit. ego multa tacui, multa pertuli,  
multa concessi, multa meo quodam dolore in uestro  
timore sanauī. nunc si hunc exitum consulatus mei dii  
immortales esse uoluerunt, ut uos P. C. populumq; R.  
ex cæde misera, coniuges, liberosq; uestros, uirginesq;  
Vestales ex acerbissima uexatione, templa, atque de-  
lubra, hanc pulcherrimam patriam omnium nostrum  
ex foedissima flamma, totam Italiam ex bello, et uæ-

stitate eriperem : quæcunque mihi uni proponetur for-  
 tuna, subeat. etenim si P. Lentulus suum nomen in-  
 ductus à uariis fatale ad perniciem reip. fore puta-  
 uit : cur ego non later meum consulatum ad salutem  
 reip. prope fatalem extitisse? quare P. C. consulite uos-  
 bis, prospicite patriæ, conseruate uos, coniuges, libe-  
 ros, fortunasq; uestras, populi R. nomen, salutemq;  
 defendite, mihi parcere, ac de me cogitare desinite.  
 nam primum debeo sperare omnes deos, qui huic urbì  
 præsident, pro eo mihi, ac mereor, relaturos gratiam  
 esse : deinde, si quid obtigerit, æquo animo, paratoq;  
 moriar : neque enim turpis mors forti uiro potest acci-  
 dere, neque immatura consulari, nec misera sapienti.  
 nec tamen ego sum ille ferreus, qui fratris carissimì  
 atque amantissimì præsentis mœrore non mouear, hos-  
 rumq; omnium lacrymis, à quibus me circumsessum  
 uidetis : neque meam mentem non domum sæpe reuo-  
 cat exanimata uxor, abiecta metu filia, & paruum  
 filius, qui mihi uidetur amplecti temp. tanquam  
 obsidem consulatus mei; neque ille, qui expectans hu-  
 ius exitum diei astat in conspectu meo, gener. moueor  
 his rebus omnibus, sed in eam partem, ut salui sint  
 nobiscum omnes, etiam si uis aliqua me oppresserit, po-  
 tius, quàm ut illi et nos una reip. peste pereamus. qua-  
 re P. C. incumbite ad reip. salutem, circumspecte omnes  
 procellas, quæ impendent, nisi prouideritis. non Ti.  
 Gracchus, qui iterum tribunus pl. fieri uoluit; non C.  
 Gracchus, qui agrarios concitare conatus est; non L.  
 Saturninus, qui C. Memmium occidit, in discrimen  
 aliquod, atque in uestre seueritatis iudicium adduci-



tur : sed tenentur ij, qui ad urbis incendium, ad uen-  
strum omnium cadem, ad Catilinam accipiendum Ro-  
mae resisterunt : tenentur literæ, signa, manus, deni-  
que uniuscuiusque confessio : sollicitantur Allobroges :  
seruitia excitantur : Catilina accersitur : id est initum  
consilium, ut, interfectis omnibus, nemo ne ad deplo-  
randum quidem populi R. nomen atque ad lamentan-  
dam tati imperij calamitatem relinquatur. hæc omnia  
indices detulerunt, rei confessi sunt, uos multis iam indi-  
cijs iudicauistis : primum, quod mihi gratias egistis sin-  
gularibus uerbis, et mea uirtute, atque diligentia per-  
ditorum hominum patefactam esse coniurationem de-  
creuistis : deinde, quod P. Lentulum, ut se abdicaret  
prætura, coegistis : tum, quod eum, et ceteros, de  
quibus iudicauistis, in custodiam dandos censuistis : ma-  
ximeq; quod meo nomine supplicationem decreuistis ;  
qui honos togato habitus ante me est nemini : postremo,  
hesterno die præmia legatis Allobrogum, Titoq; Vul-  
turcio dedistis amplissima. quæ sunt omnia eiusmodi,  
ut ij, qui in custodiam nominatim dati sunt, sine ulla  
dubitatione à uobis damnati esse uideantur. sed ego in-  
stitui referre ad uos P. C. tanquam integrum, et de  
facto, quid iudicetis ; et de poena, quid censeatis. illa  
prædicam, quæ sunt consulis. Ego magnum in rep.  
uersari furorem, et noua quædam misceri, et con-  
citari mala iam pridem uidebam : sed hæc tantam, tam  
exitiosam haberi coniurationem à ciuibus, nunquam  
putaui. nunc, quidquid est, quocunque uestre men-  
tes inclinant atque sententiæ, statuendum uobis ante  
noctem est. quantum facinus ad nos delatum sit, uti

horribiles custodias circumdat: & digna scelere hominū  
perditorum sancit, ne quis eorum pœnam, quos con-  
demnat, aut per senatum, aut per populum leuare  
possit: eripit etiam spem, quæ sola hominem in mise-  
rijs consolari solet: bona præterea publicari iubet: ui-  
tam solam relinquit nefarijs hominibus: quam si eri-  
puisset, multas uno dolore animi, ac corporis, & o-  
mnes scelerum pœnas ademisset, itaque, ut aliqua in-  
uita formido improbis esset posita, apud inferos eius-  
modi quædam illi antiqui supplicia impijs constituta es-  
se uoluerunt; quòd uidelicet intelligebant, his remotis,  
non esse mortem ipsam pertimescendam. nunc P. C. ego  
mea uideo quid intersit. si eritis secuti sententiam C.  
Cæsaris; quoniam hanc is in rep. uiam, quæ popularis  
habetur, secutus est, fortasse minus erunt hoc monito-  
re & auctore huiusce sententiæ mihi populares impe-  
tus pertimescendi. sin illam alteram secuti eritis, ne-  
scio an amplius mihi negotij contrahatur: sed tamen  
meorum periculorum rationes utilitas reip. uendicat:  
habemus enim à C. Cesare, sicut ipsius dignitas, et ma-  
iorum eius amplitudo postulabat, sententiā tanquam  
obsidem perpetuæ in rep. uoluntatis: intellectum est,  
quid interest inter leuitatem concionatorum, & ani-  
mum uere popularem, salutē populi consulentem. ui-  
deo, de istis, qui se populares haberi uolunt, abesse non  
neminem; ne de capite uidelicet ciuium R. sententiam  
ferat. is & nudius tertius in custodiam ciues R. Cethe-  
gum, et P. Lentulum dedit; & supplicationem mihi  
decreuit; & indices hesterno die maximis præmijs affe-  
cit. iam hoc nemini dubium est, qui reo custodiam,

quesitori gratulationem, indici præmiū decreuit, quid  
 de tota re, & causa iudicarit. at uero C. Caesar intel-  
 ligit, legem Semproniam esse de ciuibus R. constitutam;  
 qui autem reip. sit hostis, eum ciuem esse nullo modo  
 posse; denique ipsum latorem legis Sempronie iussu  
 populi pœnas reip. dependisse. idem etiam ipsum lar-  
 gitorem Lentulum, & prodigum non putat, cum de  
 pernicio reip. & exitio huius urbis tam acerbe, tamq;  
 crudeliter cogitarit, appellari posse popularem. itaque  
 homo mitissimus, atque lenissimus non dubitat P. Len-  
 tulum æternis tenebris, uinculisq; mandare: & san-  
 cit in posterum, ne quis huius supplicio leuando se la-  
 etare, & in perniciem reip. posthac popularis esse pos-  
 sit. adiungit etiam publicationem bonorum; ut omnes  
 animi cruciatus, & corporis etiam egestas ac mendici-  
 citas consequatur. quamobrem siue hoc statueritis, de-  
 deritis mihi comitem ad concionem populo R. carum,  
 atque incundum: siue illam Silani sententiam sequi  
 malueritis, facile me, atque uos à crudelitatis uitupe-  
 ratione defendetis, atque obtinebo eam multo leuiorem  
 fuisse. quanquam P. C. quæ potest esse in tanti scele-  
 ris immanitate punienda crudelitas? ego enim de meo  
 sensu iudico. nam ita mihi salua rep. uobiscum per-  
 frui liceat, ut ego, quòd in hac causa uehementior sum,  
 nō atrocitate animi moueor, (quis enim est me mitior?)  
 sed singulari quadam humanitate, et misericordia. ui-  
 deor enim mihi hanc urbem uidere, lucem orbis terra-  
 rum, atque arcem omniū gentium, subito uno incendio  
 concidentem: cerno animo sepultam patriam, miseros,  
 atque insepultos acervos ciuium: uersatur mihi ante

oculos aspectus Cethegi et furor in uestra cade bacchan-  
tis. cum uero mihi proposui regnantem Lentulum,  
sicut ipse se ex fatis sperasse confessus est, purpuratum  
esse hunc Gabinium, cum exercitu uenisse Catilinam,  
tum lamentationem matrumfamilias, tum fugam uir-  
ginum, atque puerorum, ac uexationem uirginum  
Vestalium perhorresco; et, quia mihi uehemen-  
ter hæc uidentur misera, atque miseranda, iccirco in  
eos, qui ea perficere uoluerunt, me seuerum, uehe-  
mentemq; præbeo. etenim quero, si quis paterfamilia-  
s, liberis suis à seruo interfectis, uxore occisa, incen-  
sa domo, supplicium de seruis quam acerbissimū sumpse-  
rit; utrum is clemens, ac misericors, an inhumanus et  
crudelissimus esse uideatur? mihi uero importunus ac  
ferreus, qui non dolorē suum et cruciatū dolore nocen-  
tis, et cruciatu lenierit. sic nos in ijs hominibus, qui  
nos, qui coniuges, qui liberos nostros trucidare uoluerūt,  
qui singulas uniuscuiusque nostrum domos, et hoc uni-  
uersum reip. domicilium delere conati sunt, qui id,  
egerunt, ut gentem Allobrogum in uestigijs huius ur-  
bis, atque in cinere deflagrati imperij collocarent; si  
uehementissimi fuerimus, misericordes habebimur; sin  
remissiores esse uoluerimus, summæ nobis crudelitatis  
in patriæ cluiumq; perniciæ fama subeunda est. nisi  
uero cuiptam L. Cæsar, uir fortissimus, et amantissimus  
reip. crudelior nudius tertius est uisus, cum sororis suæ,  
fœminæ lectissima, uirum præsentem, et audientem  
uita priuandum esse dixit, cuius aui iussu consularē  
interfectum, filiumq; eius impuberem, legatum à pa-  
tre missum, in carcere necatum esse dixit. quorum



quod simile fuit factum? quod initum delendæ reip. consilium? largitionis uoluntas tum in rep. uersata est, & partium quædam contentio. atque illo tempore huius auus Lentuli, clarissimus uir, armatus Gracchum est persecutus, & graue tum uulnus accepit, ne quid de summa dignitate reip. minueretur: hic ad euertenda fundamenta reip. Gallos accersuit, seruitia concitauit, Catilinam euocauit, attribuit nos trucidandos Cethego, cæteros ciues interficiendos Gabinio, urbem inflammandam Cassio, totam Italiam uastandam, diripiendamq; Catilinæ. uereamini, censeo, ne in hoc scelere tam immani ac nefario nimis aliquid seuerè statuisse uideamini: cum multo magis sit uerendum, ne remissione poenæ crudeles magis in patriam, quàm ne seueritate animaduersionis nimis uehementes in acerbissimos hostes fuisse uideamini. sed quæ ex audio P. C. dissimulare non possum. iactantur enim uoces, quæ perueniunt ad aures meas, eorum, qui uereri uidentur, ut habeam satis præsidij ad ea, quæ uos statueritis hodierno die, transigenda. omnia prouisa, parata, & constituta sunt P. C. cum mea summa cura, atque diligentia, tum multo etiam maiore populi R. ad summum imperium retinendum, & ad communes fortunas conseruandas uoluntate. omnes ad sunt omnium ordinum homines, omnium denique ætatum: plenum est forum, pleni omnes aditus huius loci, ac templi: causa enim est post urbem conditam hæc inuenta sola, in qua omnes sentirent unum atque idem, præter eos, qui cum sibi uiderent esse pereundum, cum omnibus potius, quàm soli perire uoluerunt. hosce ego  
homines

homines excipio, & secerno libenter: neque enim in improborum ciuium, sed in acerbissimorum hostium numero habendos puto. cæteri uero, dii immortales, qua frequentia, quo studio, qua uirtute ad communem dignitatem, salutemq; consentiunt? quid ego hic equites R. commemorem? qui uobis ita summa ordinis consilijq; concedunt, ut uobiscum de amore reip. certent: quos ex multorum annorum dissensione ad huius ordinis societatem, concordiamq; reuocatos, hodiernus dies uobiscum, atque hæc causa coniungit: quam coniunctionem si in consulatu confirmatam meo, perpetuam in rep. tenuerimus, confirmo uobis, nullum posthac malum ciuile ac domesticum ad ullā reip. partem esse uenturum. pari studio defendendæ reip. conuenisse uideo tribunos ærarios, fortissimos uiros, scribas item uniuersos: quos cum casu hic dies ad ærarium frequentasset, uideo ab expectatione sortis ad communem salutem esse conuersos. omnis ingenuorum adest multitudo, etiam tenuissimorum: quis est enim, cui non hæc templa, aspectus urbis, possessio libertatis, lux denique hæc ipsa, & hoc commune patriæ solum cum sit carum, tum uero dulce, atque iucundum? operæpretium est P. C. libertinorum hominum studia cognoscere, qui sua uirtute fortunam ciuitatis consecuti, hanc uere suam patriam esse iudicant: quam quidam hinc nati, & summo nati loco, non patriam suam, sed urbem hostium esse iudicauerunt. sed quid ego huiusce ordinis homines commemorem? quos priuata fortuna, quos communis resp. quos denique libertas, ea, quæ dulcissima est, ad salutem patriæ de-

fendendam excitauit . seruus est nemo , qui modo tolerabili conditione sit seruitutis , qui non audaciam ciuium perditorum perhorrescat , qui non obstare cupiat , qui non tantum , quantum audet , & quantum potest , conferat ad communem salutis uoluntatem . quare si quem uestrum forte commouet hoc , quod auditum est , lenonem quendam Lentuli concurrere circum tabernas , pretio sperantem sollicitari posse animos egenarum atque imperitorum : est id quidem coeptum , atque tentatum ; sed nulli sunt inuenti tam aut fortuna miseri , aut uoluntate perditum , qui non ipsum illum sellæ , atque operis , & quæstus quotidiani locum , quæ non cubile , ac lectulum suum , qui denique non cursum hunc otiosum uitæ suæ saluum esse uelit . multa uero maxima pars eorum , qui in tabernis sunt , immo uero ( id enim potius est dicendum ) genus hoc uniuersum amantiſſimum est otij : etenim omne eorum instrumentum , omnis opera , ac quæstus frequentia ciuium sustinetur , alitur otio : quorum si quæstus occlusis tabernis minui solet , quid tandem incensis futurum est ? quæ cum ita sint P . C . uobis populi R . præſidia non defunt : uos , ne populo R . deesse uideamini , prouidete . habetis consulem ex plurimis periculis , & insidijs , atque ex media morte non ad uitam suam , sed ad salutem uestram reſeruatum : omnes ordines ad conseruandam rem p . mente , uoluntate , studio , uirtute , uoce consentiunt : obſeſſa facibus , & telis impie coniurationis , uobis supplex manus tendit patria communis : uobis se , uobis uitam omnium ciuium , uobis arcem , & Capitolium , uobis aras penatium , uobis

illum ignem Vestæ perpetuum ac sempiternum, uobis omnia templa deorum, atque delubra, uobis muros, atque urbis tecta commendat. præterea de uestra uita, de coniugum uestrarum, de liberorum anima, de fortunis omnium, de sedibus, de focis uestris hodierno die uobis iudicandum est. habetis ducem memorem uestri, oblitum sui: quæ non semper facultas datur. habetis omnes ordines, omnes homines, uniuersum populum R. id quod in ciuili causa hodierno die primum uidemus, unum atque idem sentientem. cogitate, quantis laboribus fundatum imperium, quanta uirtute stabilitam libertatem, quanta deorum benignitate auctas, exaggeratasq; fortunas una nox pene deleuerit. id ne unquam posthac non modo confici, sed ne cogitari quidem possit, uobis hodierno die prouidendum est. atque hæc, non ut uos, qui mihi studio pene præcurritis, excitarem, locutus sum; sed ut mea uox, quæ debet esse in rep. princeps, officio functa consulari uideretur. nunc, antequam ad sententiam redeo, de me pauca dicam. Ego, quanta manus est coniuratorum, quam uidetis esse permagnam, tantam me inimicorum multitudinem suscepisse uideo: sed eam esse iudico turpem, & infirmam, contemptam, & abiectam. quod si aliquando alicuius furore, et scelere concitata manus ista plus ualuerit, quam uestra, ac reip. dignitas: me tamen meorum factorum, atque consiliorum nunquam P. C. poenitebit. etenim mors, quam illi mihi fortasse minitantur, omnibus est parata: uitæ tantam laudem, quanta uos me uestris decretis honestastis, nemo est assecutus. cæteris enim semper bene gestæ, mihi uni con-



*seruata reip. gratulationem decreuistis . sit Scipio clari-*  
*rus ille , cuius consilio , atque uirtute Annibal in Africam*  
*redire , atque ex Italia decedere coactus est : ornetur*  
*alter eximia laude Africanus , qui duas urbes huic*  
*imperio infestissimas , Carthaginem , Numantiamq; ,*  
*deleuit : habeatur uir egregius L. Paulus ille , cuius*  
*currum rex potentissimus quondam , & nobilissimus*  
*Perfes honestauit : sit in æterna gloria Marius , qui bis*  
*Italiam obsidione , & metu seruitutis liberauit : ante-*  
*ponatur omnibus Pompeius , cuius res gestæ , atque uir-*  
*tutes iisdem , quibus solis cursus , regionibus , ac ter-*  
*minis continentur . erit profecto inter horum laudes alii*  
*quid loci nostræ gloriæ . nisi forte maius est patefacere*  
*nobis prouincias , quò exire possimus ; quàm curare ,*  
*ut etiam illi , qui absunt , habeant quò uictores reuer-*  
*tantur . quanquam est in uno loco conditio melior ex-*  
*ternæ uictoriæ , quàm domesticæ : quòd hostes alieni-*  
*genæ aut oppressi seruiunt , aut recepti beneficio se obli-*  
*gatos putant ; qui autem ex numero ciuium dementia*  
*aliqua deprauati , hostes patriæ semel esse coeperunt ,*  
*eos , cum à perniciæ reip. repuleris , neque uì coercere ,*  
*neque beneficio placare possis . quare mihi cum perdi-*  
*tis ciuibus æternum bellum susceptum esse uideo : quod*  
*ego uestro bonorumq; omnium auxilio , memoriaq; tan-*  
*torum periculorum , quæ non modo in hoc populo , qui*  
*seruatus est , sed etiam in omnium gentium sermoni-*  
*bus , ac mentibus semper hærebit , à me , atque à meis*  
*facile propulsari posse confido . neque ulla profecto tan-*  
*ta uis reperietur , quæ coniunctionem uestram equi-*  
*tumq; R. et tantam conspirationem bonorum omnium*

perfringere, & labefactare possit. quæ cum ita sint patres conscripti, pro imperio, pro exercitu, pro provincia, quam neglexi; pro triumpho, cæterisq; laudis insignibus, quæ sunt à me propter urbis, uestraq; salutis custodiam repudiata; pro clientelis, hospitijq; provincialibus, quæ tamen urbanis opibus non minore labore tueor, quàm comparo; pro his igitur omnibus rebus, & pro meis in uos singularibus studijs, proq; hac, quam conspiciatis, ad conseruandam remp. diligentia nihil aliud à uobis, nisi huius temporis, totiusq; mei consulatus memoriam, postulo: quæ dum erit uestris mentibus infixa, firmissimo me muro septum esse arbitrabor. quòd si meam spem uis improborum fefellerit, atque superauerit, commendo uobis paruum meum filium: cui profecto satis erit præsidij non solum ad salutem, uerum etiam ad dignitatem, si eius, qui hæc omnia suo solus periculo conseruauerit, illum esse filium memineritis. quapropter de summa salute uestra populiq; R. P. C. de uestris coniugijs, ac liberis, de aris, ac focus, de fanis, ac templis, de totius urbis tectis, ac sedibus, de imperio, de libertate, de salute Italiae, deq; uniuersa rep. decernite diligenter, ut instituistis, ac fortiter: habetis enim consulem, qui & parere uestris decretis non dubitet; & ea, quæ statueritis, quoad uiuet, defendere, & per se ipsum præstare possit.

V AE precatus sum à dijs immortalibus iudices, more institutoq; maiorum,   
 9 illo die, quo auspiciato comitijs centuriatis L. Murænam consulem renunciavi; ut ea res mihi magistratuiq; meo, populo plebiq; R. bene atque feliciter eueniret: eadem precor ab ijsdem dijs immortalibus ob eiusdem hominis consulatum una cum salute obtinendum; & ut uestre mentes atque sententiæ cum populi R. uoluntate suffragiisq; consentiant; eaq; res uobis populoq; R. pacem, tranquillitatem, otium, concordiamq; afferat. quod si illa solennis comitiorum precatio, consularibus auspicijs consecrata, tantam habet in se uim et religionem, quantam reip. dignitas postulat: idem ego sum precatus, ut ijs quoque hominibus, quibus hic consulatus me rogante datus esset, ea res fauste, feliciter, prospereq; eueniret. quæ cum ita sint iudices, & cum omnis deorum immortalium potestas aut translata sit ad uos, aut certe cōmunicata uobiscum: idem consul eum uestre fidei commendat, qui antea dijs immortalibus commendauit, ut eiusdem hominis uoce & declaratus consul, & defensus, beneficium populi R. cum uestra atque omnium ciuium salute tueatur. & quoniam in hoc officio studium meæ defensionis ab accusatoribus, atque etiam ipsa susceptio causæ reprehensa est; antequam pro L. Muræna dicere instituo,

pro me ipso pauca dicam: non quo mihi potior hoc quidem in tempore sit officij mei, quàm huiusce salutis defensio; sed ut, meo factò uobis probato, maiore auctoritate ab huius honore, fama, fortunisq; omnibus inimicorum impetus propulsare possim. Et primum M. Catoni, uitam ad certam rationis normam dirigenti, Et diligentissime perpendenti momenta officiorum omnium, de officio meo respondebo. Negat fuisse rectum Cato, me Et consulem, Et legis ambitus latorem, Et tam seuerè gesto consulatu, causam L. Muræne attingere. cuius reprehensio me uehementer mouet, non solum ut uobis iudices, quibus maxime me debeo, uerum etiam ut ipsi Catoni, grauissimo, atque integerrimo uiro, rationem facti mei probem. A quo tandem M. Cato est æquius consulè defendi, quàm à consule? quis mihi in rep. potest, aut debet esse coniunctior, quàm is, cui resp. à me una traditur sustinenda, magnis meis laboribus Et periculis sustentata? quòd si in ijs rebus repetendis, quæ mancipij sunt, is periculum iudicij præstare debet; qui se nexu obligauit: profecto etiam rectius in iudicio consulis designati is potissimum consul, qui consulem declarauit, auctor beneficij populi R. defensorq; periculi esse debet. ac si, ut nonnullis in ciuitatibus fieri solet, patronus huic causæ publice constitueretur, is potissime honore affecto defensor daretur, qui eodem honore præditus non minus afferret ad dicendum auctoritatis, quàm facultatis. quòd si è portu soluentibus ij, qui iam in portum ex alto inuehuntur, præcipere summo studio solent Et tempestatum rationem, Et prædonum, Et



## O R A T I O

locorum ; quòd natura affert , ut eis faueamus , qui  
 eadem pericula , quibus nos perfunèti sumus , ingre=  
 diantur : quo tandem animo me esse oportet , prope  
 iam ex magna iactatione terram uidentem , in hunc ,  
 cui uideo maximas reip. tempestates esse subeundas ?  
 quare si est boni consulis , non solù uidere quid agatur ,  
 uerum etiã prouidere quid futurum sit : ostendam  
 alio loco , quantum salutis communis intersit , duos  
 consules in rep. calendis Ian. esse . quod si ita est , non  
 tam me officium debuit ad hominis amici fortunas ,  
 quàm resp. consulem ad còmunem salutem defenden=  
 dam uocare . Nam quòd legem de ambitu tuli , certe  
 ita tuli , ut eam , quam mihimet ipsi iampridem tute=  
 rim de ciuium periculis defendendis , non abrogarem .  
 etenim si largitionem factam esse confiterer , idq; recte  
 factum esse defenderem : facerem improbe , etiã si  
 alius legem tulisset . cum uero nihil commissum contra  
 legem esse defendam : quid est , quod meã defensionem  
 latio legis impediatur ? Negat esse eiusdem seueritatis , Ca  
 tilinam , exitium reip. intra mœnia molientem , uerbis ,  
 & pene imperio urbe expulisse , & nunc pro L. Mu=  
 ræna dicere . ego autem has partes lenitatis , et miseri=  
 cordiæ , quas me natura ipsa docuit , semper egi liben=  
 ter : illam uero grauitatis seueritatisq; personam non  
 appetiui , sed ab rep. mihi impositam sustinui , sicut  
 huius imperij dignitas in summo periculo ciuiũ postu=  
 labat . quòd si tum , cum resp. uim & seueritatem de=  
 siderabat , uici naturam , et tam uehemens fui , quàm  
 cogebam , non quàm uolebam : nunc , cum omnes me  
 causæ ad misericordiam , atque ad humanitatē uocent ,

quanto tandem studio debeat naturæ meæ consuetudiniq; seruire? ac de officio defensionis meæ, ac de ratione accusationis tuæ fortasse etiam alia in parte orationis dicendum nobis erit. Sed me iudices non minus, hominis sapientissimi atque ornatissimi, Ser. Sulpicij conquestio, quàm Catonis accusatio commouebat: qui grauissime & acerbissime ferre dixit, me familiaritatis necessitudinisq; oblitum, causam L. Murænæ contra se defendere. huic ego iudices satisfacere cupio, uosq; adhibere arbitros. nam cum graue est, uere accusari in amicitia: tum etiam, si falso accuseris, non est negligendum. Ego Ser. Sulpici me in petitione tua tibi omnia studia, atque officia pro nostra necessitudine & debuisse confiteor, & præstituisse arbitror. nihil tibi consulatum petenti à me defuit, quod esset aut ab amico, aut à gratioso, aut à consule postulandum. abiit illud tempus: mutata ratio est: sic existimo, sic mihi persuadeo, me tibi contra honorem L. Murænæ, quantum tu à me postulare ausus sis, tantum debuisse; contra salutem, nihil debere. neque enim, si tibi tum, cum peteres consulatum, affui, iccirco nunc, cum Murænā ipsum petas, adiutor eodem pacto esse debeat. atque hoc non modo non laudari, sed ne concedi quidem potest, ut amicis nostris accusantibus non etiam alienissimos defendamus. mihi autem cum Muræna iudices & uetus, & magna amicitia est: quæ in capitis dimicatione à Ser. Sulpicio non iccirco obruetur, quòd ab eodem in honoris contentione superata est. quæ si causa non esset, tamen uel dignitas hominis, uel honoris eius, quem adeptus est, amplitudo summam mihi superbiam, crudelitatem

tisq; famam inuississet; si hominis & suis & populi R.  
 ornamentis amplissimi causam tanti periculi repudias=  
 sem. neque enim iam mihi licet, neque est integrum,  
 ut meum laborem hominum periculis subleuandis non  
 impertiam. nam cum præmia mihi tanta pro hac in=  
 dustria sint data, quanta antea nemini; labores, per  
 quos ea ceperis, cum adeptus sis, deponere, esset homi=  
 nis & astuti, & ingrati. quod si licet desinere, si te au=  
 ctore possum, si nulla inertia, nulla superbiæ turpitu=  
 do, nulla inhumanitatis culpa suscipitur: ego uero li=  
 benter desino. sin autem fuga laboris desidiam, repu=  
 diatio supplicum superbiæ, amicorum neglectio im=  
 probitatem coarguit: nimirum hæc causa est eiusmodi,  
 quam nec industrius, quam nec misericors, nec offi=  
 ciosus deferere possit. atque huiusce rei coniecturam de  
 tuo ipsius studio Serui facillime ceperis. nam si tibi ne=  
 cesse putas etiam aduersarijs amicorum tuorum de iu=  
 re consulentibus respondere; & si turpe existimas, te  
 aduocato illum ipsum, quem contra ueneris, causa cas=  
 dere: noli tam esse iniustus, ut, cum tui fontes uel ini=  
 micis tuis pateant, nostros riuulos etiam amicis putes  
 clausos esse oportere. etenim si me tua familiaritas ab  
 hac causa remouisset; et si hoc idem Q. Hortensio, M.  
 Crasso clarissimis uiris, si item cæteris, à quibus intelli=  
 go tuam gratiam magni aestimari, accidisset: in ea ci=  
 uitate consul designatus defensorem non haberet; in  
 qua nemini unquam infimo maiores nostri patronum  
 deesse uoluerunt. ego uero iudices ipse me existimarem  
 nefarium, si amico; crudelem, si misero; superbum, si  
 consuli defuisssem. quare, quod dandum est amicitie,

large dabitur à me, ut tecum agam serui non secus, ac si meus esses frater, qui mihi est carissimus: isto in loco quod tribuendum est officio, fidei, religioni, id ita moderabor, ut meminerim me contra amici studium pro amici periculo dicere. Intelligo iudices tres totius accusationis partes fuisse, & earum unam in reprehensione uitæ, alteram in contentione dignitatis, tertiam in criminibus ambitus esse uersatam. atque harum trium partium prima illa, quæ grauissima esse debebat, ita fuit infirma, & leuis, ut illos lex magis quædam accusatoria, quàm uera maledicendi facultas de uita L. Muræne dicere aliquid coegerit. obiecta est enim Asia: quæ ab hoc non ad uoluptatem et luxuriam expetita est, sed in militari labore peragrata. qui si adulescens patre suo imperatore non meruisset, aut hostem, aut patris imperium timuisse, aut à parente repudiatum uideretur. an, cum sedere in equis triumphantium prætextati potissimum filij soleant, huic donis militariibus patris triumphum decorare fugiendum fuit, ut rebus communiter gestis pene simul cum patre triumpharet? hic uero iudices & fuit in Asia, & uiro fortissimo parenti suo magno adiumento in periculis, solatio in laboribus, gratulationi in uictoriis fuit. & si habet Asia suspicionem luxuriæ quandam; non Asiam nunquam uidisse, sed in Asia continenter uixisse, laudandum est. quamobrem nō Asiæ nomen obijciendum Muræne fuit, ex qua laus familiæ, memoria generi, honos, & gloria nomini constituta est; sed aliquod aut in Asia susceptum, aut ex Asia deportatum flagitium, ac dedecus. meruisse uero stipendia in eo bello, quod tum



populus R. non modo maximum, sed etiam solum gerebat, uirtutis; patre imperatore libentissime meruisse, pietatis; finem stipendiorum patris uictoriam, ac triumphum fuisse, felicitatis fuit. maledicto quidem iccirco nihil in hisce rebus loci est, quod omnia laus occupauit. Saltatorem appellat L. Murænam Cato. maledictum est, si uere obijcitur, uehementis accusatoris; sin falso, maledici conuiciatoris. quare, cum ista sis auctoritate, non debes M. Cato arripere maledictum ex triuio, aut ex scurrarum aliquo conuicio, neque temere consulem populi R. saltatorem uocare; sed conspiceret, quibus præterea uitæ affectum esse necesse sit eum, cui uere istud obijci possit. nemo enim fere saltat sobrius, nisi forte insanit, neque in solitudine, neque in conuiuio moderato atque honesto. tempestiui conuiuij, amœni loci, multarum deliciarum comes est extrema, saltatio. tu mihi arripis id, quod necesse est omnium uitiorum esse postremum: relinquis illa, quibus remotis hoc uitium omnino esse non potest. nullum turpe conuiuium, non amor, non comeffatio, non libido, non sumptus ostenditur: & cum ea non reperiantur, quæ uoluptatis nomen habent, quæq; uitiosa sunt; in quo ipsam luxuriam reperire non potes, in eo te umbram luxuriæ reperiaturum putas? nihil igitur in uitam L. Muræne dici potest? nihil, inquam, omnino iudices. sic à me consul designatus defenditur, ut eius nulla fraus, nulla auaritia, nulla perfidia, nulla crudelitas, nullum petulans dictum in uitam proferatur. Bene habet. iacta sunt fundamenta defensionis: nondum enim nostris laudibus, quibus utar postea, sed prope inimicorum

confessione uirum bonum atque integrum hominem defendimus . quo constituto, facilius est mihi aditus ad contentionem dignitatis, quæ pars altera fuit accusationis . Summam uideo esse in te Serui Sulpici dignitatem generis, integritatis, industriæ, cæterorumq; ornamentorum omnium, quibus fretum ad consulatus petitionem aggredi par est . paria cognosco esse istam in L. Muræna, atque ita paria, ut neque ipse dignitate uinci potuerit, neque te dignitate superarit . Contempsisti L. Murænae genus, extulisti tuum . quo loco si tibi hoc sumis, nisi qui patricius sit, neminem bono esse genere natum : facis, ut rursus plebs in Auentinum se uocanda esse uideatur . sin autem sunt amplæ & honestæ familiæ plebeïæ : & proauus L. Murænae, & auus prætores fuerunt, & pater, cum amplissime atque honestissime ex prætura triumphasset, hoc faciliorem huic gradum consulatus adipiscendi reliquit, quod is iam patri debitus, à filio petebatur . tua uero nobilitas Ser. Sulpici, tametsi summa est, tamen hominibus literatis, & historicis est notior, populo uero & suffragatoribus obscurior : pater enim fuit equestri loco, auus nulla illustri laude celebratus : itaque non ex sermone hominum recenti, sed ex annalium uetustate eruenda est memoria nobilitatis tuæ. quare ego te semper in nostrum numerum aggregare soleo, quod uirtute, industriaq; perfecisti, ut, cum equitis R. esses filius, summa tamen amplitudine dignus putarere . nec mihi unquam minus in Q. Pompeio, nouo homine, & fortissimo uiro, uirtutis esse uisum est, quàm in homine nobilissimo M. Aemilio : etenim eiusdem animi, atque

ingenij est, posteris, quod Pompeius fecit, amplitudinem nominis, quam non acceperit, tradere, & ut Scaurus, memoriam prope intermortuam generis sui, uirtute renouare. quanquam ego iam putabam iudices, multis uiris fortibus ne ignobilitas obijceretur generis, meo labore esse perfectum, quinon modo Curijs, Catonibus, Pompeijs, antiquis illis fortissimis uiris, nouis hominibus, sed his recentibus Marijs, & Didijs, & Celijs commemorandis iacebant. cum ego uero tanto intervallo claustra ista nobilitatis refregissem, ut aditus ad consulatum posthac, sicut apud maiores nostros fuit, non magis nobilitati, quam uirtuti, pateret: non arbitrabar, cum ex familia uetere, & illustri consul designatus ab equitis R. filio consule defenderetur, de generis nouitate accusatores esse dicturos. etenim mihi ipsi accidit, ut cum duobus patricijs, altero improbissimo atque audacissimo, altero modestissimo atque optimo uiro, peterem: superaui tamen dignitate Catilinam, gratia Galbam. quod si id crimen homini nouo esse deberet, profecto mihi neque inimici, neque inuidi defuissent. omittamus igitur de genere dicere, cuius est magna in utroque dignitas: uideamus cetera. Quæsturam una petijt, & sum ego factus prior. Non est respondendum ad omnia: neque enim quenquam uesrum fugit, cum multi pares dignitate fiant, unus autem primum solus possit obtinere, non eundem esse ordinem dignitatis, & renunciationis; propterea quod renuntiatio gradus habeat, dignitas autem sit per sepe eadem omnium. sed quæstura utriusque propemodum pari momento sortis fuit. habuit hic lege Titia prouina-

ciam tacitam, & quietam: tu illam, cui, cum quæ-  
stores sortiuntur, etiam acclamari solet, Hostiensem,  
non tam gratiosam, et illustrem, quàm negotiosam, &  
molestam. confedit utriusque nomen in quæstura: nula-  
lum enim vobis sors campum dedit, in quo excurrere  
virtus, cognosciq; posset. reliqui temporis spatium in con-  
tentionem uocatur, ab utroque dissimillima ratione tra-  
ctatum. Seruius hic nobiscum hanc urbanam militiam  
respondendi, scribendi, cauendi, plenam solitudinis,  
ac stomachi secutus est: ius civile didicit: multum uigi-  
lauit: laborauit: præsto multis fuit: multorum stulti-  
tiam perpeffus est: arrogantiam pertulit: difficulta-  
tem exorbuit: uixit ad aliorum arbitrium, non ad suum.  
magna laus, & grata hominibus, unum hominem ela-  
borare in ea scientia, quæ sit multis profutura. quid Mu-  
ræna interea? fortissimo et sapientissimo uiro, summo  
imperator legatus L. Lucullo fuit. qua in legatione du-  
xit exercitum: signa contulit: manum conseruit: ma-  
gnas copias hostium fudit: urbes partim ui, partim ob-  
sidione cepit: Asiam istam refertam, et eandem delica-  
tam sic obiit, ut in ea neque auaritiæ, neque luxuriæ  
uestigium reliquerit: maximo in bello sic est uersatus, ut  
hic multas res & magnas sine imperatore gesserit, nul-  
lam sine hoc imperator. atque hæc, quanquam præsen-  
te L. Lucullo loquar, tamen ne ab ipso propter periculum  
nostrum concessam uideamur habere licentiam fingen-  
di, publicis literis testata sunt omnia: quibus L. Lucul-  
lus tantum laudis impertit, quātum neque ambitiosus  
imperator, neque inuidus tribuere alteri in communi-  
canda gloria debuit. summa in utroque est honestas,



*summa dignitas . quam ego , si mihi per seruium liceat , pari atque eadem in laude ponam : sed non licet : agitat rem militarem : insectatur totam hanc legationem : assiduitatis , & operarum harum quotidianarum putat esse consulatum . apud exercitum mihi fueris , inquit , tot annos : forum non attigeris : abfueris tandiu , & cum longo intervallo ueneris , cum ijs , qui in foro habitauerunt , de dignitate contendas ? primum , ista nostra assiduitas serui nescis , quantum interdum afferat hominibus fastidij , quantum satietatis . mihi quidem uehementer expedit , positam in oculis esse gratiam : sed tamen ego mei satietatem magno meo labore superauim : & tu idem fortasse : ueruntamen utrique nostrum desiderium nihil obfuisse . sed ut hoc omissum ad studiorum , atque artium contentionem reuertamur : qui potest dubitari , quin ad consulatum adipiscendum multo plus afferat dignitatis rei militaris , quam iuris ciuilis gloria ? uigilas tu de nocte , ut tuis consultoribus respondeas : ille , ut , quod intendit , mature cum exercitu perueniat . te gallorum , illum buccinarum cantus exuscitat . tu actionem instituis , ille aciem instruit . tu caues ne tui consultores , ille ne urbes aut castra capiantur . ille tenet , et scit , ut hostium copiae , tu , ut aquae pluuiæ arceantur . ille exercitatus est in propagandis finibus , tu in regendis . ac nimirum ( dicendum est enim , quod sentio ) rei militaris uirtus præstat cæteris omnibus . hæc nomen populo R . hæc huic urbi æternam gloriam peperit : hæc orbem terrarum parere huic imperio coegit . omnes urbanae res , omnia hæc nostra præclara studia , & hæc forensis laus , & indu-  
stria*

stria latent in tutela ac praesidio bellicae virtutis. simul  
atque increpuit suspicio tumultus, artes illico non  
strae conticescunt. Et quoniam mihi uideris istam  
scientiam iuris tanquam filiolarum osculari tuam, non  
patiar te in tanto errore uersari, ut istud nescio quid,  
quod tantopere didicisti, praecclarum aliquid esse arbi  
trere. alijs ego te uirtutibus, continentiae, grauitatis,  
iustitiae, fidei, ceteris omnibus, consulatu, et omni ho  
nore semper dignissimum iudicauimus: quod quidem ius  
ciuile didicisti, non dicam, operam perdidisti, sed illud  
dicam, nullam esse in illa disciplina munitam ad con  
sulatum uiam. omnes enim artes, quae nobis populi Ro  
studia conciliant, et admirabilem dignitatem, et per  
gratam utilitatem debent habere. summa dignitas est  
in ijs, qui militari laude antecellunt; omnia enim, quae  
sunt in imperio, et in statu ciuitatis, ab ijs defendi, et  
firmari putantur: summa etiam utilitas; si quidem  
eorum consilio, et periculo cum rep. tum etiam nostris  
rebus perfrui possumus. grauis etiam illa est, et plena  
dignitatis dicendi facultas, quae saepe ualuit in consule  
deligendo, posse consilio, atque oratione et senatus, et  
populi, et eorum, qui res iudicant, mentes permouere.  
quaeritur consul, qui dicendo nonnunquam comprimat  
tribunicios furores, qui concitatum populum flectat,  
qui largitioni resistat. non mirum, si ob hanc facultatem  
homines saepe etiam non nobiles consulatum conse  
cuti sunt; praesertim cum haec eadem res plurimas gra  
tias, firmissimas amicitias, maxima studia pariat. quo  
rum in isto uestro artificio Sulpici nihil est. primum,  
dignitas in tam tenui scientia quae potest esse? res enim

sunt parvæ, prope in singulis literis, atque interpunctionibus uerborum occupatæ. deinde, etiam si quid apud maiores nostros fuit in isto studio admirationis, id enunciatis uestris mysterijs totum est contemptum, et abiectum. posset agi lege, nec ne, pauci quondam sciebant: fastos enim uulgo non habebant: erant in magna potentia qui consulebantur: à quibus etiam dies tanquam à Chaldeis petebantur. inuentus est scriba quidam Cn. Flavius, qui cornicum oculos confixerit, et singulis diebus ediscendos fastos populo proposuerit, et ab ipsis cautis iuriconsultis eorum sapientiam compilarit. itaque irati illi, quod sunt ueriti, ne, dierum ratione peruulgata, et cognita, sine sua opera lege posset agi, notas quasdam composuerunt, ut omnibus in rebus ipsi interessent. cum hoc fieri bellissime posset; fundus Sabinus meus est, immo meus, deinde iudicium: noluerunt. fundus, inquit, qui est in agro, qui Sabinus uocatur. satis uerbose. cedo, quid postea? ego eum ex iure meum esse aio. quid tum? inde ego te ex iure manu confertum uoco. quid huic tam loquaciter litigioso responderet ille, unde petebatur, non habebat. transit idem iuriconsultus tibicinis Latini modo: unde tu me, inquit, ex iure manu confertum uocasti, inde ibi ego te reuoco. prætor interea ne pulchrum se ac beatum putaret, atque aliquid ipse sua sponte loqueretur, ei quoque carmen compositum est, cum cæteris rebus absurdum, tum uero nullo usu. Vtrisque superstitibus præsentibus: istam uiam dico. inite uiam. præsto aderat sapiens ille, qui in re uiam doceret. Redite uiam. eodem duce redibāt. hæc iam tum apud illos barbatos ridicula, credo, uidebantur, homines, cum recte atque in loco constitissent, iuberi abi-

re, ut, unde abissent, eodem statim redirent. iisdem ineptiis fucata sunt illa omnia, Quando te in iure conspicio et hæc, sed an ne tu dicis, qui causa uindicaueris? quæ dum erant occulta, necessario ab eis, qui ea tenebant, peatebantur: postea uero peruulgata, atque in manibus iactata, & excussa, inanissima prudentiæ reperta sunt, fraudis autem, et stultitiæ plenissima. nam cum permulta præclare legibus essent constituta, ea iureconsultorum ingenijs pleraque corrupta, ac deprauata sunt. mulieres omnes propter infirmitatem consilij maiores in tutorum potestate esse uoluerunt: hi inuenerunt genera tutorum, quæ potestate mulierum continerentur. sacra interire illi noluerunt: horum ingenio senes ad coemptiones faciendas interimædorum sacrorum causa reperti sunt. in omni denique iure civili æquitatem reliquerunt, uerba ipsa tenuerunt: ut, quia in alicuius libris exempli causa id nomen inuenerant, putarunt omnes mulieres, quæ coemptionem facerent, Caias uocari. iam illud mihi quidem mirum uideri solet, tot homines, tam ingeniosos, per tot annos etiam nunc statuere nō potuisse, utrum diem tertium, an perendinum; iudicem, an arbitrum; rem: an litem dici oporteret. itaque, ut dixi, dignitas in ista scientia consularis nunquam fuit, quæ tota ex rebus fictis commentitijsq; constaret; gratiæ uero multo etiam minus: quod enim omnibus patet, & æque promptum est mihi, & aduersario meo, id esse gratum nullo pacto potest. itaque non modo beneficii collocandi spem, sed etiam illud, quod aliquando fuit, Licet consulare, iam perdidistis. sapiens existimari nemo potest in ea prudentia, quæ neque extra Romam usquam, neque Romæ rebus prolatis quidquam ualeat. peritus ideo haberi



nemo potest, quòd in eo, quod sciunt omnes, nullo modo possunt inter se discrepare. difficilis autem res ideo non putatur, quòd & perpaucis, & minime obscuris literis continetur. itaque si mihi homini uehementer occupato stomachum moueritis, triduo me iuriscòsultum esse profitebor. etenim, quæ de scripto aguntur, scripta sunt omnia: neque tamen quidquam tam anguste scriptum est, quo ego non possim, quæ de re agitur, addere.

\* re. quæ consuluntur autem, minimo periculo respondentur. si id, quod oportet, responderis; idem uideare respondisse quod Seruius: sin aliter; etiam controuersum ius nosse, et tractare uideare. quapropter nò solum illa gloria militaris uestriis formulis, atque actionibus anteponenda est: uerum etiam dicendi consuetudo longe, & multum isti uestre exercitationi ad honorem antecellet. itaque mihi uidentur plerique initio multo hoc maluisse: post, cum id assequi non potuissent, istuc potissimum sunt delapsi. ut aiunt in Græcis artificibus, eos auletas esse, qui citharædi fieri non potuerint: sic non nullos uidemus, qui oratores euadere non potuerunt, eos ad iuris studium deuenire. magnus dicendi labor, magna res, magna dignitas, summa etiam gratia: etenim à uobis salubritas quædam, ab ijs, qui dicunt, salus ipsa petitur. deinde uestra responsa atque decreta & euertuntur sæpe dicendo, & sine defensione oratoris firma esse non possunt. in qua re si satis profecissem, parcius de eius laude dicerem: nunc nihil de me dico, sed de ijs, qui in dicendo magni sunt, aut fuerunt. Duæ sunt artes, quæ possunt locare homines in amplissimo gradu dignitatis, una imperatoris, alte-

ra oratoris boni. ab hoc enim pacis ornamenta retinentur : ab illo belli pericula repelluntur . ceteræ tamen uirtutes ipsæ per se multum ualent, iustitia, fides, pudor, temperantia : quibus te Serui excellere omnes intelligunt : sed nunc de studijs ad honorem dispositis, non de insita cuiusque uirtute disputo. omnia ista nobis studia de manibus excutiuntur, simul atque aliquis motus nouus bellicum canere cœpit . etenim, ut ait ingeniosus poeta, & auctor ualde bonus, prælijs promulgatis, TOLLITVR E' MEDIO non solum ista uestra uerbosa simulatio prudentiæ, sed etiam ipsa illa domina rerum SAPIENTIA: VI GERIATVR RES: SPERNITVR ORATOR non solum odiosus in dicendo, ac loquax, uerum etiam BO NVS: HORRIDVS MILES AMATVR: uestrum uero studium totum iacet. NON EXIVRE MANV CONSERTVM, SED MAGE FERRO, inquit, REM REPETVNT. quod si ita est, cedat opinor Sulpici forum castris, otium militia, stylus gladio, umbra soli : sit denique in ciuitate ea primæ res, propter quam ipsa est ciuitas omnium princeps . Verum hæc Cato nimium nos nostris uerbis magna facere demonstrat, & oblitos esse bellum illud omne Mithridaticum cum mulierculis esse gestum . quod ego longe secus existimo iudices, deq; eo pauca disseram: neque enim causa in hoc continetur . Nam si omnia bella, quæ cum Græcis gessimus, contemnenda sunt : derideatur de rege Pyrrho triumphus M. Curij, de Philippo T. Flaminini, de Aetolis M. Fuluij, de rege Perse L. Pauli, de Pseudophilippo Q. Metelli, de Corin-

thijs L. Mummiij . sin hæc bella grauissima , uictoriaq;  
 eorum bellorum gratissima fuerunt : cur Asiaticæ na-  
 tiones, atque ille à te hostis contemnitur ? atqui ex uete-  
 rum rerum monimentis uel maximum bellum popu-  
 lum R. cum Antiocho gessisse uideo : cuius belli uictor  
 L. Scipio, parta cum P. fratre gloria, quam laudem ille  
 Africa oppressa cognomine ipso præ se ferebat, ean-  
 dem hic sibi ex Asiæ nomine assumpsit . quo quidem in  
 bello uirtus enituit egregia M. Catonis proani tui . quò  
 ille, cum esset, ut ego mihi statuo, talis, qualem te esse  
 uideo, nunquam cum Scipione esset profectus, si cum  
 mulierculis bellandum esse arbitraretur . neque uero  
 cum P. Africano senatus egisset, ut legatus patri profici-  
 sceretur, cum ipse paulo ante Annibale ex Italia expul-  
 so, ex Africa eiecto, Carthagine oppressa, maximis peri-  
 culis remp. liberauisset, nisi illud graue bellum, & ue-  
 hemens putaretur . atqui si diligenter, quid Mithrida-  
 tes potuerit, & quid effecerit, & qui uir fuerit, conside-  
 raris, omnibus regibus, quibuscum populus R. bellum  
 gessit, hunc regem nimirum antepones . quem L. Sylla  
 maximo, & fortissimo exercitu, pugna excitatum, non  
 rudis imperator, ut aliud nihil dicam, cum bello inue-  
 ctum totam in Asiam cum pace dimisit : quem L. Mu-  
 rana pater huiusce uehementissime uigilantissimeq; ue-  
 xatum, repressum magna ex parte, non oppressum re-  
 liquit : qui rex sibi aliquot annis sumptis ad confirman-  
 das rationes, & copias belli, tantum ipse opibus cona-  
 tuq; inualuit, ut se Oceanum cum Ponto, Sertorij co-  
 pias cum suis coniuncturum putaret . ad quod bellum  
 duobus consulibus ita missis, ut alter Mithridatem per-

sequeretur, alter Bithyniam tueretur; alterius res et terra, & maricalamitosæ, uehementer & opes regis, & nomen auxerunt: L. Luculli uero res tantæ exiiterunt, ut neque maius bellum commemorari possit, neque maiore consilio, & uirtute gestum. nam cum totius impetus belli ad Cyzicenorum mœnia constitisset, eamque urbem sibi Mithridates Asiæ ianuam fore putauisset; qua effracta, & reuulsa tota pateret prouincia: perfecta ab Lucullo hæc sunt omnia, ut urbs fidelissimorum sociorum defenderetur, ut omnes copię regis diuturnitate obsidionis consumerentur. quid illam pugnam naualem ad Tenedum, cum contento cursu, acerrimis ducibus, hostium classis Italiam spe, atque animis inflata peteret, mediocri certamine, & parua dimicatione commissam arbitraris? mitto prœlia: prætereo oppugnationes oppidorum: expulsus regno tandem aliquid quando, tantum tamen consilio, atque auctoritate ualuit, ut se, rege Armeniorum adiuncto, nouis opibus copiisque renouarit. ac si mihi nunc de rebus gestis esset nostri exercitus imperatorisque dicendum, plurima et maxima prœlia commemorare possem: sed non id agimus: hoc dico: si bellum hoc, si hic hostis, si ille rex contemnendus fuisset; neque tanta cura senatus, & populus R. suscipiendum putasset, neque tot annos gessisset, neque tanta gloria L. Luculli, neque uero eius belli conficiendi curam tanto studio populus R. ad Cn. Pompeium detulisset: cuius ex omnibus pugnis, quæ sunt innumerabiles, uel acerrima mihi uidetur illa, quæ cum rege commissa est, & summa contentione pugnata. quæ ex pugna cum se ille eripuisset, & Bosphorum confugisset,



quò exercitus adire non posset, etiam in extrema fortuna, & fuga nomen tamen retinuit regium. itaque ipse Pompeius regno possesso, ex omnibus oris ac notis sedibus hoste pulso, tamen tantum in unius anima posuit, ut, cum omnia, quæ ille tenuerat, adierat, sperarat, uictoria possideret, tamen nõ ante, quàm illum uita expulit, bellum confectum iudicaret. hũc tu hostem Cato contemnis? quo cum per tot annos, tot præliis, tot imperatores bella gesserunt: cuius expulsi, & eiekti uita tanti aestimata est, ut, morte eius nunciata, tum denique bellum confectum arbitraremur. hoc igitur in bello L. Murenam legatum fortissimi animi, summi consilij, maximi laboris cognitum esse defendimus, & hanc eius operam non minus ad consulatum adipiscendum, quàm hanc nostram forenses industriam, dignitatis habuisse. At enim in prætura petitione prior renunciatus est Seruius. pergitis ne uos, tanquam ex syngrapha, agere cum populo, ut quem locum semel honoris cuiuspiam dederit, eundem reliquis honoribus debeat? quod enim fretum, quem Euripum tot motus, tantas, tam uarias habere putatis agitationes fluctuum, quantas perturbationes, & quantos aestus habet ratio comitiorum? dies intermissus unus, aut nox interposita sæpe perturbat omnia, & totam opinionem parua nonnunquam commutat aura rumoris. sæpe etiam sine ulla aperta causa fit aliud, atque existimamus; ut nonnunquam ita factum esse etiam populus admiretur; quasi uero non ipse fecerit. nihil est incertius uulgo, nihil obscurius uoluntate hominum, nihil fallacius ratione tota comitiorum. quis L. Philippum, summo ingenio,

opera, gratia, nobilitate, à M. Herennio superari posse arbitratuſ est? quis Q. Catulum, humanitate, sapientia, integritate antecellentem, à Cn. Manlio? quis M. Scaurum, hominem grauiſſimum, ciuem egregium, fortiſſimum ſenatorem, à Q. Maximo? non modo horum nihil ita fore putatum eſt, ſed ne cum eſſet factum quidem, quare ita factum eſſet, intelligi potuit. nam ut tempeſtates ſæpe certo aliquo cœli ſigno commouentur, ſæpe improuiſo, nulla ex certa ratione, obſcura aliqua ex cauſa excitantur: ſic in hac comitiarum tempeſtate populari ſæpe intelligas, quo ſigno commota ſit; ſæpe ita obſcura eſt, ut caſu excitata eſſe uideatur. ſed tamen ſi eſt reddenda ratio, duæ res uehementer in prætura deſideratæ ſunt, quæ ambæ in conſulatu tum Murænæ profuerunt; una, expectatio muneris, quæ & rumore nonnullo, & ſtudijs, ſermonibusq; competitorum creuerat; altera, quod ij, quos in prouincia, ac legatione omnis & liberalitatis, & uirtutis ſuæ teſtes habuerat, nondum deceſſerant. horum utrunque ei fortuna ad conſulatus petitionem reſeruauit: nam et L. Luculli exercitus, qui ad triumphum cōuenerat, idem comes L. Murænæ præſto fuit; & munus ampliffimum, quod petitio præturæ deſiderabat, prætura reſtituit. num tibi hæc parua uidentur adiumenta, & ſubſidia conſulatus? uoluntas militum: quæ cum per ſe ualet multitudine, tum apud ſuos gratia; tum uero in conſule declarando multum etiam apud uniuerſum populum R. auctoritatis habet ſuffragatio militaris: imperatores enim comitijs conſularibus, non uerborum interpretes deliguntur. quare

gravis est illa oratio : me saucium recreauit : me præ-  
 da donauit : hoc duce castra cepimus , signa contulim-  
 us : nunquam iste plus militi laboris imposuit , quàm  
 sibi sumpsit : ipse cum fortis , tum etiam felix . hoc  
 quanti putas esse ad famam hominum , ac uolunta-  
 tem ? etenim si tanta illis comitijs religio est , ut adhuc  
 semper omen ualuerit prærogatiuum : quid mirum  
 est , in hoc felicitatis famam , sermonemq; ualuisse ?  
 sed si hæc leuiora ducis , quæ sunt grauissima , et hanc  
 urbanam suffragationem militari anteponis : noli lu-  
 dorum huius elegantiam , & scenæ magnificentiam  
 ualde contemnere , quæ huic admodum profuerunt .  
 nam quid ego dicam populum , ac uulgus imperitorū  
 ludis magnopere delectari ? minus est mirandum : quan-  
 quam huic causæ id satis est : sunt enim populi , ac  
 multitudinis comitia . quare si populo ludorum ma-  
 gnificientia uoluptatis est , non est mirandum , eam L.  
 Muræna apud populum profuisse . sed si nosmetipsi ,  
 qui & ab delectatione omni negotijs impedimur , et in  
 ipsa occupatione delectationes alias multas habere pos-  
 sumus , ludis tamen oblectamur , & ducimur : quid  
 tu admirere de multitudine indocta ? L. Otho , uir for-  
 tis , meus necessarius , equestri ordini restituit non so-  
 lum dignitatem , sed etiam uoluptatem . itaque lex  
 hæc , quæ ad ludos pertinet , est omnium gratissima ,  
 quod honestissimo ordini cum splendore fructus quo-  
 que iucunditatis est restitutus . quare delectant homi-  
 nes , mihi crede , ludi , etiam illos qui dissimulant ,  
 non solum eos , qui fatentur : quod ego in mea petitio-  
 ne sensi : nam nos quoque habuimus scenam competi-

tricem. quod si ego, qui trinos ludos Aedilis feceram, tamen Antonij ludis commouebam: tibi, qui casu nulos feceras, nihil huius istam ipsam, quam irrides, argenteam scenam aduersatam putas? sed hæc sane sint paria omnia: sit par forensis opera militari: sit par militari suffragatio urbana: sit idem, magnificentissimos, & nullos unquam fecisse ludos: quid? in ipsa prætura nihil ne existimas inter tuam et istius sortem interfuisse? huius sors ea fuit, quam omnes tui necessarii tibi optabamus, iuris dicundi, in qua gloriam conciliat magnitudo negotij, gratiam æquitatis largitio: qua in sorte sapiens prætor, qualis hic fuit, offensionem uitat æquabilitate decernendi, beneuolentiam adiungit lenitate audiendi. egregia, & ad consulatum apta prouincia, in qua laus æquitatis, integritatis, facilitatis, ad extremum ludorum uoluptatē concluditur: quid tua sors? tristis, atrox, quæstio peculatus, ex altera parte lacrymarum, & squaloris, ex altera plena catenarum, atque iudicum. cogendi indices inuiti, retinendi contra uoluntatem, scriba damnatus, ordo totus alienus: Syllana gratificatio reprehensa: multi uiri fortes, & prope pars ciuitatis offensa est: lites seuerè æstimatæ: cui placet, obliuiscitur: cui dolet, minuit. postremo tu in prouinciam ire noluisti. non possum id in te reprehendere, quod in me ipso & prætor, & consul probaui: sed tamen L. Muræna prouincia multas bonas gratias cum optima existimatione attulit. habuit proficiscens delectum in Umbria: dedit ei facultatem resp. liberalitatis: qua usus, multas sibi tribus, quæ municipijs Umbriae conficiuntur, adiunxit.



xit. ipse autem in Gallia, ut nostri homines desperatas iam pecunias exigerent, æquitate, diligentiaque perfecit. tu interea Romæ scilicet amicis præsto fuisti. fateor. sed tamen illud cogita, nonnullorum amicorum studia minui solere in eos, à quibus prouincias contemni intelligant. & quoniam ostendi iudices parrem dignitatem ad consulatus petitionem, disparem fortunam prouincialium negotiorum in Muræna, atque in Sulpicio fuisse: dicam iam apertius, in quo meus necessarius fuerit inferior Seruius; & ea dicam uobis audientibus amisso iam tempore, quæ ipsi soli re integra sepe dixi. Petere consulatum nescire te Serui, sepe dixi: & in ijs rebus ipsis, quas te magno, & forti animo & agere, & dicere uidebam, tibi solitus sum dicere, magis te fortem senatorem mihi uideri, quam sapientem candidatum. primum accusandi terrores, & minæ, quibus tu quotidie uti solebas, sunt fortis uiri; sed & populi opinionem à spe adipiscendi auertunt, & amicorum studia debilitant. nescio quo pacto semper hoc fit, neque in uno, aut altero animaduersum est, sed iam in pluribus; simul atque candidatus accusationem meditari uisus est, ut honorem desperasse uideatur. quid ergo? acceptam iniuriam persequi non placet? immo uehementer placet: sed aliud tempus est petendi, aliud persequendi. petito rem ego, præsertim consulatus, magna spe, magno animo, magnis copijs & in forum, & in campum deduci uolo: non placet mihi inquisitio candidati, prænuncia repulse; non testium potius, quam suffragatorum comparatio; non minæ magis, quam blanditiæ; non decla-

matio potius, quam saluatio: praesertim cum iam hoc  
nouo more omnes fere domos omnium concurrant, &  
ex vultu candidatorum coniecturam faciant, quan-  
tum quisque animi, & facultatis habere uideatur.  
uides ne tu illum tristem, demissum? iacet, diffidit,  
abiecit hastas. serpit hic rumor. scis tu illum accusatio-  
nem cogitare? inquirere in competitors? testes quaere-  
re? alium faciam; quoniam sibi hic ipse desperat. eius-  
modi candidatorum amici intimi debilitantur, studia  
deponunt, aut testatam rem abiciunt, aut suam ope-  
ram, & gratiam iudicio, & accusationi reseruant.  
accedit eodem, ut etiam ipse candidatus totum animu,  
atque omnem curam, operam, diligentiamq; suam in  
petitione non possit ponere: adiungitur enim accusa-  
tionis cogitatio, non parua res, sed nimirum omnium  
maxima: magnum est enim te comparare ea, quibus  
possis hominem e ciuitate, praesertim non inopem, ne-  
que infirmum, exturbare, qui et per se, & per suos,  
& uero etiam per alienos defendatur: omnes enim ad  
pericula propulsanda concurrimus; & qui non aper-  
te inimici sumus, etiam alienissimis in capitis periculis  
amicissimorum officia, & studia praestamus. quare  
ego expertus & petendi, & defendendi, & accusan-  
di molestiam, sic intellexi, in petendo studium esse acer-  
rimum, in defendendo officium, in accusando labo-  
rem. itaque sic statuo, fieri nullo modo posse, ut idem  
accusationem, & petitionem consilatus diligenter  
adornet, atque instruat. unum sustinere pauci pos-  
sunt, utrunque nemo. tu, cum de curriculo petiti-  
onis deflexisses, animumq; ad accusandum transtulif=

ses, existimasti te utrique negotio satisfacere posse, ue-  
 hementer errasti. quis enim dies fuit, posteaquam in  
 istam accusandi denunciationem ingressus es, quem tu  
 non totum in ista ratione consumpseris? legem ambi-  
 tus flagitasti, quæ tibi non deerat: erat enim seueris-  
 sime scripta Calpurnia: gestus est mos & uoluntati,  
 et dignitati tuæ: sed tota illa lex accusationem tuam,  
 si haberes nocentem reum, fortasse armasset: petitioni  
 uero refragata est. poena grauior in plebem tua uoce  
 efflagitata est: commoti animi tenuiorum. exilium  
 in nostrum ordinem: concessit senatus postulationi tuæ,  
 sed non libenter duriorē fortunæ communi conditio-  
 nem te auctore constituit. morbi excusationi poena ad-  
 dita est: uoluntas offensa multorum, quibus aut con-  
 tra ualeitudinis commodum laborandum est, aut incom-  
 modo morbi etiā ceteri uitæ fructus relinquendi. quid  
 ergo? hæc quis tulit? is, qui auctoritati senatus, uo-  
 luntati tuæ paruit: denique is tulit, cui minime prode-  
 rant. illa, quæ mea summa uoluntate senatus fre-  
 quens repudiavit, mediocriter aduersata tibi esse exis-  
 timas? confusionem suffragiorum flagitasti, proroga-  
 tionem legis Maniliæ, æquationem gratiæ, dignita-  
 tis, suffragiorum. grauius homines honesti, atque in  
 suis ciuitatibus, et municipiis gratiosi tulerunt, a ta-  
 li uiro esse pugnatum, ut omnes & dignitatis, &  
 gratiæ gradus tollerentur. idem edititios iudices esse  
 uoluisti, ut odia occulta ciuium, quæ tacitis nunc di-  
 scordiis continentur, in fortunas optimi cuiusque erum-  
 perent. hæc omnia tibi accusandi uiam muniebant,  
 adipiscendi obsepiebant. atque ex omnibus illa plaga

est iniecta petitioni tuæ non tacete me maxima: de qua ab homine ingeniosissimo et copiosissimo Hortensio multa grauissime dicta sunt: quo etiam mihi durior locus est dicendi datus: ut, cum ante me & ille dixisset, et uir summa dignitate, & diligentia, & facultate dicendi, M. Crassus, ego in extremo non partem aliquam agerem causæ, sed de tota re dicerem, quod mihi uideretur. itaque in iisdē rebus fere uersor, et, quod possum iudices, occurro uestre sapientiæ, sed tamen Serui quam te securim putas inieciſſe petitioni tuæ, cum tu populū R. in eum metū adduxisti, ut pertimeret, ne consul Catilina fieret, dum tu accusationem cōparares, deposita atque abiecta petitione? etenim te inquirere uidebant tristem ipsum: mœstos amicos, obseruationes, testificationes, seductiones testium, secessionem subscriptorum animaduertebant: quibus rebus certe ipsi candidatorū uultus obscuriores uideri solent. Catilinam interea alacrum, atque latum, stipatum choro iuuentutis, uallatum indicibus, atque sicarijs, inflatum cum spe militū, tum collegæ mei, quemadmodum dicebat ipse, promissis, circumfluyente colonorū Aretinorū et Fesulanorum exercitu. quam turbam dissimillimo ex genere distinguebant homines percussi Syllani temporis calamitate. uultus erat ipsius plenus furoris, oculi sceleris, sermo arrogantiae, sic, ut ei iam exploratus, et domi conditus consulatus uideretur: Murænam contemnebat: Sulpiciū accusatorem suum numerabat, non competitorē: ei uim denunciabat: reip. minabatur. quibus rebus qui timor bonis omnibus iniectus sit, quantaq; desperatio reip. si ille factus esset, nolite à me commoneri



uelle, uosmet ipsi uobiscum recordamini. meministis  
 enim, cū illius nefarij gladiatoris uoces percrebuiſſent,  
 quas habuiſſe in concione domeſtica dicebatur, cum mi  
 ſerorum fidelem deſenſorem negaſſet inueniri poſſe,  
 niſi eum, qui ipſe miſer eſſet; integrorum et fortuna  
 torum promiſſis ſaucios et miſeros credere non oportere;  
 quare qui cōſumpta replere, erepta recuperare uellent,  
 ſpectarent, quid ipſe deberet, quid poſſideret, quid au  
 deret; minime timidum, et ualde calamitoſum eſſe opor  
 tere eum, qui eſſet futurus dux, et ſignifer calamitoſo  
 rum: tum igitur, his rebus auditis, meministis fieri S. C.  
 referente me, ne poſtero die comitia haberentur, ut de  
 his rebus in ſenatu agere poſſemus. itaque poſtridie fre  
 quenti ſenatu Catilinam excitauit, atque eum de ijs re  
 bus iuſſi, ſi quid uellet, quæ ad me allatæ eſſent, dice  
 re. atque ille, ut ſemper fuit apertiſſimus, non ſe pur  
 gauit, ſed indicauit atque innuit. tum enim dixit,  
 duo corpora eſſe reipublicæ, unum debile inſirmo capi  
 te, alterum firmum ſine capite: huic, cum ita de ſe  
 meritum eſſet, caput ſe uiuo non defuturum. conge  
 muſt ſenatus frequens, neque tamen ſatis ſeuere pro  
 rei indignitate decreuit: nam partim ideo fortes in de  
 cernendo non erant, quia nihil timebant; partim, quia  
 timebant. tum erupit è ſenatu triumphans gaudio,  
 quem omnino uiuum illinc exire non oportuerat, præ  
 ſertim cum idem ille in eodem ordine paucis diebus ante  
 Catoni fortiſſimo uiro iudicium minitanti, ac denun  
 cianti reſpondiſſet, ſi quod eſſet in ſuas fortunas incen  
 dium excitatum, id ſe non aqua, ſed ruina reſtinctu  
 rum. his tum rebus commotus, & quod homines iam  
 tum

tum coniuratos cum gladijs in campum deduci à Catilina sciebam, descēdi in campum cum firmissimo præsidio fortissimorum uirorum, et cum illa lata insigniq; lorica, non quæ me tegetet, (etenim sciebam Catilinam non latus aut uentrem, sed caput & collum solere petere) uerum ut omnes boni animaduertent, et, cum in metu & periculo consulem uiderent, id quod est factum, ad opem præsidiumq; meum concurrerent. itaque cum te Seruī remissiores in petendo putarent, Catilinam & spe, & cupiditate inflammatum uiderent, omnes, qui illam ab rep. pestem depellere cupiebant, ad Murænam se statim contulerunt. magna est autem comitijs consularibus repentina uoluntatum inclinatio, præsertim cum incubuit ad uirum bonum, et multis alijs adiumentis petitionis ornatum. qui cum, honestissimo patre, atque maioribus, modestissima adolescentia, clarissima legatione, prætura probata in iure, grata in munere, ornata in prouincia, petisset diligenter, et ita petisset, ut neque minantī cederet, neque cuiquam minaretur: huic mirandum est magno adiumento Catilinæ subitam spem consulatus adipiscendi fuisse? Nunc mihi tertius ille locus est orationis de ambitus criminibus, perpurgatus ab ijs, qui ante me dixerunt, à me, quoniam ita Muræna uoluit, retractandus. quo in loco Postumio, familiari meo, ornatissimo uiro, de diuisorum indicijs, & de deprehensis pecunijs; adolescenti ingenioso & bono, Ser. Sulpicio, de equitum centurijs; M. Catoni, homini in omni uirtute excellenti, de ipsius accusatione, de S. C. de rep. respondebo. sed pauca, quæ meum animum re-

pente mouerunt, prius de L. Muræna fortuna con-  
 querar. Nam cum sæpe antea iudices, & ex aliorum  
 miserijs; & ex meis curis, laboribusq; quotidianis for-  
 tunatos eos homines iudicarem, qui remoti à studijs  
 ambitionis, otium, ac tranquillitatem uitæ secuti sunt:  
 tum uero in his L. Muræna tantis, tamq; improuisis  
 periculis ita sum animo affectus, ut non queam satis  
 neque communem omnium nostrum conditionem, ne-  
 que huius euentum fortunamq; miserari: qui primum  
 dum ex honoribus continuis familiæ, maiorumq; suo-  
 rum unum ascendere gradum dignitatis conatus est,  
 uenit in periculum, ne & ea, quæ relicta, et hæc quæ  
 ab ipso parta sunt, amittat: deinde propter studium  
 nouæ laudis etiam in ueteris fortunæ discrimen addu-  
 citur. quæ cum sunt grauius iudices, tum illud acer-  
 bissimum est, quod habet eos accusatores, non qui odio  
 inimicitiarum ad accusandum, sed qui studio accusan-  
 di ad inimicitias descenderent: nam ut omittam Ser.  
 Sulpicium, quem intelligo non iniuria L. Muræna,  
 sed honoris contentione permotum; accusat paternus  
 amicus Cn. Postumius, uetus, ut ait ipse, uicinus,  
 ac necessarius, qui necessitudinis causas complures pro-  
 tulit, simultatis nullam commemorare potuit; accusat  
 Ser. Sulpicius sodalis filij, cuius ingenio paterni omnes  
 necessarij munitiores esse debebant; accusat M. Cato.  
 qui, quanquam à Muræna nulla re unquam alienus  
 fuit, tamen ea conditione nobis erat in hac ciuitate na-  
 tus, ut eius opes, & ingenium præsidio multis etiam  
 \* alienissimis, uix cuiquam inimicus esse deberet. Respon-  
 debo igitur Postumio primum, qui nescio quo pacto



mibi uidetur prætorius cādidatus in consularem, quasi desultorius in quadrigarum curriculum, incurrere. cuius competitores si nihil deliquerunt, dignitati eorum concessit, cum petere destitit: sin autem eorum aliquis largitus est, expetendus amicus est, qui alie-  
nam potius iniuriam, quàm suam persequatur.

Ea omnia, quæ & Postumio, & Ser. Sulpicio adole-  
scenti responsa sunt, desiderantur.

Venio nunc ad M. Catonem, quod est firmamentum,  
ac robur totius accusationis: qui tamen ita grauis est  
accusator, & uehemens, ut multo magis eius aucto-  
ritatem, quam criminationem pertimescam. in quo  
ego accusatore iudices primū illud deprecabor, ne quid  
L. Murænae dignitas illius, ne quid expectatio tribu-  
natus, ne quid totius uitæ splendor, & grauitas no-  
ceat; denique ne ea soli huic obsint bona M. Catonis,  
quæ ille adeptus est, ut multis prodesse posset. bis con-  
sul fuerat P. Africanus, & duos terrores huius impe-  
rij, Carthaginem, Numantiamq; deleuerat, cum ac-  
cusauit L. Cottam. erat in eo summa eloquentia, sum-  
ma fides, summa integritas, auctoritas tanta, quan-  
ta in ipso imperio populi R. quod illius opera tenebatur.  
sæpe hoc maiores natu dicere audiui, hanc accusatoris



eximiam dignitatem plurimum L. Cottæ profuisse. noluerunt sapientissimi homines, qui tum rem illam iudicabant, ita quenquam cadere in iudicio, ut nimis aduersarij uiribus abiectus uideretur. quid? Sergium Galbam (nam traditum memoriæ est) non ne proauo tuo, fortissimo, atque florentissimo uiro, M. Catoni, incubenti ad eius perniciem, populus R. eripuit? semper in hac ciuitate nimis magnis accusatorum opibus & populus uniuersus, & sapientes, ac multum in posterum proficientes iudices resisterunt. nolo, accusator in iudicium potentiam afferat, non uim maiorem aliquam, non auctoritatem excellentem, non nimiam gratiam: ualeant hæc omnia ad salutem innocentium, ad opem impotentum, ad auxilium calamitosorum; in periculo uero, & in pernicië ciuium repudientur. nam si quis hoc forte dicet, Catonem descensurum ad accusandum non fuisse, nisi prius de causa iudicasset: iniquam legem iudices, & miseram conditionem instituet periculis hominum, si existimabit iudicium accusatoris in reū pro aliquo præiudicio ualere oportere. ego tuum consilium Cato, propter singulare animi mei de tua uirtute iudicium, uituperare non audeo, nonnulla in re forsitan conformare, & leuiter emendare possim. non multa peccas, inquit ille fortissimo uiro senior magister: sed si peccas, te regere possum. at ego te uerissi me dixerim peccare nihil, neque ulla in re te esse huiusmodi, ut corrigendus potius, quàm leuiter inflectendus esse uideare. finxit enim te ipsa natura ad honestatem, grauitatem, temperantiam, magnitudinem animi, iustitiam, ad omnes denique uirtutes magnum

hominem, & excelsum. accessit his tot doctrina non moderata, nec mitis, sed, ut mihi uidetur, paulo asperior, & durior, quàm aut ueritas, aut natura patiatur. & quoniam non est nobis hæc oratio habenda aut cum imperita multitudine, aut in aliquo conuentu agrestium, audacius paulo de studijs humanitatis, quæ & mihi & uobis nota & iudicanda sunt, disputabo. In M. Catone iudices hæc bona, quæ uidemus, diuina, & egregia, ipsius scitote esse propria: quæ non nunquam requirimus, ea sunt omnia non à natura, sed à magistro. fuit enim quidam summo ingenio uir, Zenon, cuius inuentorum æmuli Stoici nominantur. huius sententiæ sunt & præcepta eiusmodi; sapientem gratia nunquam moueri, nunquam cuiusquam delictò ignoscere, neminem misericordem esse, nisi stultum & leuem; uiri non esse, neque exorari, neque placari; solos sapientes esse, si distortissimi sint, formosos; si mendicissimi, diuites; si seruitutem seruiant, reges: nos autem, qui sapientes non sumus, fugitiuos, exules, hostes, insanos denique esse dicunt; omnia peccata esse paria; omne delictum scelus esse nefarium; nec minus delinquere eum, qui gallum gallinaceum, cum opus non fuerit, quàm eum, qui patrem suffocauerit; sapientem nihil opinari, nullius rei poenitere, nulla in re falli, sententiam mutare nunquam. hæc homo ingeniosissimus M. Cato, auctoribus eruditissimis inductus, arripuit, neque disputandi causa, ut magna pars, sed ita uiuendi. petunt aliquid publicani: caue quidquam habeat momenti gratia. supplices aliqui ueniunt miseri & calamitosi: sceleratus et nefarius fueris, si quid

quam misericordia adductus feceris . fatetur aliquis se peccasse, & eius delicti ueniam petit: nefarium est facinus ignoscere . at leue delictum est : omnia peccata sunt paria . dixisti quippiam: fixum & statutum est . non re ductus es, sed opinione : sapiens nihil opinatur . errasti aliqua in re : male dici putat . hæc ex disciplina nobis illa sunt . dixi in senatu me nomen consularis candidati delaturum . iratus dixisti : nunquam , inquit , sapiens irascitur . at temporis causa: improbi, inquit , hominis est mendacio fallere ; mutare sententiã , turpe est ; exorari , scelus ; misereri , flagitium . nostri autem illi, ( fatebor enim Cato me quoque in adolescentia diffisum ingenio meo quassisse adiumenta doctrinæ ) nostri, inquam , illi à Platone & Aristotele , moderati homines & temperati , aiunt , apud sapientem ualere aliquando gratiam ; uiri boni esse , misereri ; distincta genera esse delictorum , & dispares pœnas ; esse apud hominem constantem ignoscendi locum ; ipsum sapientem sæpe aliquid opinari , quod nesciat ; irasci non nunquam , exorari eundem , & placari ; quod dixerit , interdum , si ita rectius sit , mutare ; de sententia decedere aliquando ; omnes uirtutes mediocritate quadam esse moderatas . hos ad magistros si qua te fortuna Cato cum ista natura detulisset , non tu quidem uir melior esses , nec fortior , nec temperantior , nec iustior , ( neque enim esse potes ) sed paulo ad lenitatem propensior : non accusares nullis adductus inimicijs , nulla laceffitus iniuria prudentissimum hominem , summa dignitate , atque honestate præditum : putares , cum in eiusdem anni custodia te atque L. Murenam fortuna

posuisset, aliquo te cum hoc reip. uinculo esse coniunctum: quod atrociter in senatu dixisti, aut non dixisses, aut seposuisses, aut mitiorem in partem interpretare. ac te ipsum, quantum ego opinione auguror, nunc & animi quodam impetu concitatum, et uī naturæ atque ingenij elatum, et recentibus præceptorum studijs flagrantem iam usus flectet, dies leniet, ætas mitigabit: etenim isti ipsi mihi uidentur uestri præceptores & uirtutis magistri fines officiorum paulo longius, quàm natura uellet, protulisse, ut, cum ad ultimum animo contendissemus, ibi tamen, ubi oporteret, consisteremus. nihil ignoueris: immo aliquid, non omnia. nihil gratiæ causa feceris: immo resistito gratiæ, cum officium, & fides postulabit. misericordia cōmotus ne sis: etiam in dissoluenda seueritate: sed tamen est laus aliqua humanitatis. in sententia permaturo: enim uero, nisi sententia alia uicerit melior. huiusmodi Scipio ille fuit: quem non poenitebat facere idem, quod tu; habere eruditissimum hominē, et pene diuinum domi: cuius oratione, & præceptis, quanquā erant eadem ista, quæ te delectāt, tamen asperior non est factus, sed, ut accepi à senibus, lenissimus. quis uero C. Lælio comior? quis iucundior, eodem ex studio isto? quis illo grauior? sapientior? possum de L. Philippo, de C. Gallo dicere hæc eadē: sed te domum iam deducam tuam. quenquam ne existimas Catone pro quo tuo cōmodiorem, comiorem, moderatiore fuisse ad omnem rationem humanitatis? de cuius præstanti uirtute cum uere grauiterq; diceres, domesticū te habere dixisti exemplum ad imitandū. est illud quidem exemplum tibi pro-



positum domi : sed tamen naturæ similitudo illius ad te magis , qui ab illo ortus es , quàm ad unumquemque nostrum peruenire potuit : ad imitandum uero tam mihi propositum exemplar illud est , quàm tibi . sed si illius comitatem , & facilitatem tuæ grauitati seueritatiq; asperseris , non ista quidem erunt meliora , quæ nunc sunt optima , sed certe condita iucundius . quare ut ad id , quod institui reuertar , tolle mihi è causa nomen Catonis : remoue , ac prætermitte auctoritatem , quæ in iudicijs aut nihil ualere , aut ad salutem debet ualere : congregere mecum criminibus ipsis : quid accusas Cato ? quid affers in iudicium ? quid arguis ? ambitum accusas : non defendo . me reprehendis , quòd idem defendam , quod lege punierim : puniui ambitum , non innocentiam : ambitum uero ipsum uel tecum accusabo , si uoles . dixisti S. C. me referente esse factum ; si mercede corrupti obuiam candidatis issent , si conducti sectarentur , si gladiatoribus uulgo locus tributus , & item prandia si uulgo essent data , contra legem Calpurniam factum uideri . ergo ita senatus iudicat , contra legem facta hæc uideri , si facta sint . decernit quod nihil opus est , dum candidatis morem gerit . nam , factum sit necne , uehementer queritur : si factum sit , quin contra legem sit , dubitare nemo potest . est igitur ridiculum , quod est dubium , id relinquere incertum ; quod nemini dubium potest esse , id iudicare . atque id decernitur omnibus postulanti-  
bus candidatis : ut ex S. C. neque cuius intersit , neque contra quem sit , intelligi possit . quare doce , à L. Muræna illa esse commissæ : tum egomet tibi contra legem com-

missa esse concedam . multi obuam prodierunt de provincia decedenti , consulatum petenti : solet fieri . eccui autem non proditur reuertenti ? quæ fuit ista multitudo ? primum , si tibi istam rationem non possim reddere ; quid habet admirationis , tali uiro , aduenienti , candidato consulari obuam prodisse multos ? quod nisi esset factum , magis mirandum uideretur . quid , si etiam illud addam , quod à consuetudine non abhorret , rogatos esse multos ? num aut criminofum sit , aut mirandum , qua in ciuitate rogati infimorum hominum filios prope de nocte ex ultima sæpe urbe deductum uenire soleamus , in ea non esse grauatos homines prodire hora tertia in campum Martium , præsertim talis uiri nomine rogatos ? quid , si omnes societates uenerunt ? quarum ex numero multi hic sedent iudices . quid , si multi homines nostri ordinis , honestissimi ? quid , si illa officiosissima , quæ neminem patitur non honeste in urbem introire , tota natio candidatorum ? si denique ipse accusator noster Postumius obuam cum bene magna cæterua sua uenit ? quid habet ista multitudo admirationis ? omitto clientes , uicinos , tribules , exercitum totum Luculli , qui ad triumphum per eos dies uenerat : hoc dico , frequentiam in isto officio gratuitam non modo dignitati ullius unquam , sed ne uoluntati quidem de fuisse . at sectabantur multi : doce , mercede ; concedam esse crimen : hoc quidem remoto , quid reprehendis ? quid opus est , inquit , sectatoribus ? à me tu id quæris ? quid opus sit eo , quo semper usi sumus ? homines tenues unum habent in nostrum ordinem aut promerendi , aut referendi beneficij locum , hanc in nostris

petitionibus operam, atque affectationem: neque enim  
 fieri potest, neque postulandum est à nobis, aut ab e=  
 quitibus R. ut suos necessarios candidatos sectentur totos  
 dies: à quibus si domus nostra celebratur, si interdum  
 ad forum deducimur, si uno basilicæ spatio honestamur,  
 diligenter observari uidemur, & coli tenuiorum et non  
 occupatorum amicorum est ista assiduitas, quorum co=  
 pia bonis, & beneficis deesse non solet. noli igitur eripe=  
 re hunc inferiori generi hominum fructum officij Cato:  
 sine eos, qui omnia à nobis sperant, habere ipsos quo=  
 que aliquid, quod nobis tribuere possint. si nihil erit  
 præter ipsorum suffragium, tenue est, si, ut suffra=  
 gentur, nihil ualent gratia: ipsi denique ut solent lo=  
 qui, non dicere pro nobis, non spondere, non uocare do=  
 mum suam possunt: atque hæc à nobis petunt omnia;  
 neque ulla re alia, quæ à nobis consequuntur, nisi ope=  
 ra sua compensari putant posse. itaque & legi Fabiæ,  
 quæ est de numero sectatorum, & S.C. quod est L. Cæ=  
 sare consule factum, resisterunt: nulla est enim pœna,  
 quæ possit obseruantiam tenuiorum ab hoc uetere insti=  
 tuto officiorum excludere. at spectacula sunt tributim  
 data, & ad prandium uulgo uocati. eisi hoc factum à  
 Muræna omnino iudices non est, ab eius amicis autem  
 more & modo factum est: tamen admonitus re ipsa,  
 recordor quantum hæc quæstiones in senatu habitæ pun=  
 ctorum nobis serui detraxerint: quod enim tempus fuit,  
 aut nostra, aut patrum nostrorum memoria, quo hæc  
 siue ambitio est, siue liberalitas, non fuerit, ut locus &  
 in circo, & in foro daretur amicis, & tribulibus?  
 hæc homines tenuiores primum ne dum qui ea suis tri-

Fabia  
 numer  
 c. m. m.

*bulibus uetere instituto assequebantur \**

*Desunt non nulla.*

præfectum fabrum semel locum tribulibus suis dedisse :  
 quid statuent in uiros primarios , qui in Circo totas ta-  
 bernas tribulium causa comparabunt ? hæc omnia se-  
 ctatorum , spectaculorum , prandiorum item crimina à  
 multitudine in tuam nimiam diligentiam serui conie-  
 cta sunt : in quibus tamen Muræna ab senatus aucto-  
 ritate defenditur . quid enim ? senatus num obuiam  
 prodire crimen putat ? non , sed mercede : conuince-  
 num sectari multos ? non , sed , conductos : doce . num  
 locum ad spectandum dare , aut ad prandium inuitare  
 minime , sed uulgo , passim . quid est uulgo ? uniuersos  
 non igitur , si L. Natta , summo loco adolescens , qui , et  
 quo animo iam sit , & qualis uir futurus sit , uidemus ,  
 in equitum centurijs uoluit esse & ad hoc officium ne-  
 cessitudinis , & ad reliquum tempus gratiosus , id erit  
 eius uirico fraudi , aut crimini : nec , si uirgo Vestalis  
 huius propinqua , & necessaria locum suum gladiator-  
 rium concessit huic , non & illa pie fecit , & hic à culpa  
 est remotus . omnia hæc sunt officia necessariorum , como-  
 da tenuiorum , munia candidatorum . at enim agit me-  
 cum austere , & Stoice Cato : negat uerum esse , allici



beneuolentiam cibo : negat iudicium hominum in ma-  
 gistratibus mandandis corrumpi uoluptatibus oportere . ergo , ad coenam petitionis causa si quis uocat , con-  
 demnetur . quippe , inquit : tu mihi summum impe-  
 rium , summam auctoritatem , tu gubernacula reip. pe-  
 tas fouendis hominum sensibus , & deliniendis animis ,  
 & adhibendis uoluptatibus ? utrum lenocinium , in-  
 quit , à grege delicatæ iuuentutis , an orbis terrarum im-  
 perium à populo R. petebas ? horribilis oratio : sed eam  
 usus , uita , mores , ciuitas ipsa respuit : neque tamen La-  
 cedæmonij auctores istius uitæ , atque orationis , qui quo-  
 tidianis epulis in robore accumbunt ; neque uero Cretes ,  
 quorum nemo gustauit unquam cubans , melius , quàm  
 Romani homines , qui tempora uoluptatis , laborisq; di-  
 spertiunt , resp. suas retinuerunt : quorum alteri uno  
 aduentu nostri exercitus deleti sunt , alteri nostri impe-  
 rij præsidio disciplinam suam , legesq; conseruant . qua-  
 re noli Cato maiorum instituta , quæ res ipsa publica ,  
 quæ diuturnitas imperij comprobant , nimium seuera o-  
 ratione reprehendere . fuit eodem ex studio uir eruditus  
 apud patres nostros , & honestus homo , & nobilis , Q.  
 Tubero . is , cum epulum Q. Maximus Africani patrui  
 sui nomine populo R. daret , rogatus est à Maximo , ut  
 triclinium sterneret , cum esset Tubero eiusdem Africani  
 sororis filius . atque ille , homo eruditissimus , ac Stoicus ,  
 strauit pelliculis hoedinis lectulos Punicanos , et exposuit  
 uasa Samia : quasi uero esset Diogenes Cynicus mor-  
 tuus , & non diuini hominis Africani mors honestare-  
 tur : quem cum supremo eius die Maximus laudaret ,  
 gratias egit dijs immortalibus , quod ille uir in hac rep.

potissimum natus esset: necesse enim fuisse, ibi esse terrarum imperium, ubi ille esset. huius in morte celebranda grauiter tulit populus R. hanc peruersam sapientiam Tiberonis: itaque homo integerrimus, ciuis optimus, cum esset L. Pauli nepos, P. Africani, ut dixi, sororis filius, his hœdinis pelliculis prætura deiectus est. odit populus R. priuatam luxuriam, publicam magnificentiam diligit: non amat profusas epulas, sordes & inhumanitatem multo minus: distinguit rationem officiorum ac temporum, uicissitudinem laboris ac uoluptatis. Nam quod ais nulla re allici hominum mentes oportere ad magistratum mandandum, nisi dignitate: hoc tu ipse, in quo summa est dignitas, non seruas. cur enim quenquam, ut studeat tibi, ut te adiuuet, rogas? rogas tu me, ut mihi præsis, ut committam ego me tibi? quid tandem? istuc me rogari oportet abste, an te potius à me, ut pro mea salute laborem, periculumq; suscipias? quid, quòd habes nomenclatorem? in eo quidem fallis, & decipis. nam si nomine appellari abs te ciueis tuos honestum est; turpe est eos notiores esse seruo tuo, quàm tibi: sin etiam noris; tamen per monitorem appellandi sunt? cur nò ante petis, quàm insusurravit? aut quid, cum admoneris, tamen, quasi tute noris, ita salutas? quid, posteaquam es designatus, multos salutas negligentius? hæc omnia ad rationem ciuitatis si dirigas, recta sunt; sin perpendere ad disciplinæ præcepta uelis, reperiantur prauissima. quare nec plebi R. eripiendi fructus isti sunt ludorum, gladiatorum, conuiuiorum, quæ omnia maiores nostri comparauerunt: nec candidatis ista benignitas adimenda est, quæ

liberalitatem magis significat, quàm largitionem. at enim te ad accusandum resp. adduxit. credo Cato te isto animo, atque ex opinione uenisse: sed tu imprudentia laberis: ego, quod facio iudices, cum amicitiae dignitatisq; L. Muræne gratia facio, tum me pacis, otij, concordiae, libertatis, salutis, uitæ denique omnium uestrum causa facere clamo, atque obtestor. audite, audite consulem iudices, nihil dicam arrogantius, tantum dicam, totos dies, atque noctes de rep. cogitantem. usque eò L. Catilina remp. despexit atque contempsit, ut ea copia, quam secum eduxit, se hac ciuitatem oppressurum arbitraretur? latius patet illius sceleris contagio, quàm quisquam putat: ad plures pertinet: intus, intus, inquam, est equus Troianus, à quo nunquam me consule dormientes opprimemini. quæris à me, quid ego Catilinam metuam? nihil; & curauì, ne quis metueret: sed copias illius, quas hic uideo, dico esse metuendas: nec tam timendus est nunc exercitus L. Catilinæ, quàm isti, qui illum exercitum deseruisse dicuntur: non enim deseruerunt, sed ab illo in speculis, atque insidijs relictì, in capite, atque in cervicibus nostris restiterunt. hi & integrum consulem, & bonum imperatorem, & naturam, & fortuna cum reip. salute coniunctum deijci de urbis præsidio, & de custodia ciuitatis uestris sententijs deturbari uolunt. quorum ego ferrum, & audaciam reieci in campo, debilitauì in foro, compressi etiam domi meæ saepe iudices; his uos si alterum consulem tradideritis, plus multo erunt uestris sententijs, quàm suis gladijs consecuti. magni interest iudices, id quod ego multis repugnantibus egi, atque perfecti, esse calendis Ian. in

rep. duos consules. nolite arbitrari, mediocribus consilijs, aut usitatis uitijs, aut lege improba, aut pernicio-  
sa largitione, auditum aliquando aliquod malum reip.  
quæri. inita sunt in hac ciuitate consilia iudices urbis  
delendæ, ciuium trucidandorum, nominis R. extin-  
guendi. atque hæc ciues, ciues, inquam, ( si eos hoc no-  
mine appellari fas est ) de patria sua & cogitant, & co-  
gitauerunt. horum ego quotidie consilijs occurro, auda-  
ciam debilito, sceleri resisto. sed uos moneo iudices: in  
exitu est iam meus consulatus: nolite mihi subtrahere  
uicarium meæ diligentiae: nolite adimere eum, cui  
remp. cupio tradere incolumem ab his tantis periculis  
defendendam. atque ad hæc mala iudices quid accedat  
aliud, non uidetis? te, te appello Cato, non ne prospicis  
tempestatem anni tui? iam enim hesternæ concione into-  
nuit uox perniciofa designati tribuni collegæ tui: con-  
tra quem multum tua mens, multum omnes boni pro-  
uiderunt, qui te ad tribunatus petitionem uocauerunt.  
omnia, quæ per hoc triennium agitata sunt iam ab eo  
tempore, quo à L. Catilina, & Cn. Pisone initum consi-  
lium senatus interficiendi scitis esse, in hos dies, in hos  
menses, in hoc tempus erumpunt. qui locus est iudi-  
ces, quod tempus, qui dies, quæ nox, cum ego non ex i-  
storum insidijs ac mucronibus non solum meo, sed mul-  
to etiam magis diuino consilio eripiar, atque euolem?  
neque isti me meo nomine interfici, sed uigilantem con-  
sulem de reip. præsidio dimouere uolunt: nec minus  
uellent Cato te quoque aliqua ratione, si possent, tolle-  
re: id, quod, mihi crede, & agunt, & moliun-  
tur. uident, quantum in te sit animi, quantum ingenij,



quantum auctoritatis, quantum reip. præsidij. sed cum consulari auctoritate, & auxilio spoliata uim tribuniciam uiderint, tum se facilius inermem, & debilitatum te oppressuros arbitrantur. nam, ne sufficiatur consul, non timent: uident in tuorum potestate collegarum fore: sperant sibi Silanum, clarum uirum, sine collega, te sine consule, remp. sine præsidio obijci posse. his tantis in rebus, tantisq; in periculis, est tuum M. Cato, qui non mihi, non tibi, sed patriæ natus es, uidere quid agatur, retinere adiutorem, defensorem, socium in rep. consulem non cupidum, consulem, quod maxime tempus hoc postulat, fortuna constitutum ad amplexandum otium, scientia ad bellum gerendum, animo, et usu ad quod uelis negotium. quanquam huiusce rei potestas omnis in uobis sita est iudices: totam remp. uos in hac causa tenetis, uos gubernatis. si L. Catilina cum suo consilio nefariorum hominum, quos secum eduxit, hac de re posset iudicare, condemnaret L. Murænam: si interficere posset, occideret. petunt enim rationes illius, ut orbetur auxilio resp. ut minuatur contra suum furorem imperatorum copia, ut maior facultas tribunis pl. detur, depulso aduersario, seditionis ac discordiæ concitandæ. idem ne igitur delecti amplissimis ex ordinibus honestissimi atque sapientissimi uiri iudicabunt, quod ille importunissimus gladiator, hostis reip. iudicaret? mihi credite iudices, in hac causa non solum de L. Muræna, uerum etiam de uestra salute sententiam feretis. in discrimen extremum uenimus: nihil est iam, unde nos reficiamus, aut ubi lapsi resistamus. non solum minuenda non sunt auxilia, quæ habemus; sed  
etiam

etiam noua, si fieri possit, comparanda. hostis est enim non apud Anienem, quod bello Punico grauissimum uisum est, sed in urbe, in foro, (dij immortales, sine gemitu hoc dici non potest) non nemo etiam in illo sacrario reip. in ipsa, inquam, curia non nemo hostis est. dij faciant, ut meus collega uir fortissimus hoc Catilinæ nefarium latrocinium armatus opprimat: ego togatus, uobis bonisq; omnibus adiutoribus, hoc, quod conceptum resp. periculum parturit, consilio discutiam, & comprimam. sed quid tandem fiet, si hæc elapsa de manibus nostris in eum annum, qui consequitur, redundauerint? unus erit consul, & is non in administrando bello, sed in sufficiendo collega occupatus. hunc iam qui impedaturi sint,

Desunt non nulla.

illa pestis immanis, importuna Catilinæ prorumpet: quæ minatur, in agros suburbanos repente aduolabit: uersabitur in castris furor, in cūria timor, in foro coniuratio, in campo exercitus, in agris uastitas: omni autem in sede, ac loco ferrum, flammamq; metuemus: quæ iandiu comparantur: eadem ista omnia, si ornata suis præsidij erit resp. facile & magistratum consilijs, & priuatorum diligentia opprimentur. Quæ cum ita sint iudices, primum reip. causa, qua nulla res cuiquam potior debet esse, uos pro mea summa & uobis cognita in remp. diligentia mo-

neo, pro auctoritate consulari hortor, pro magnitudine periculi obtestor, ut otio, ut paci, ut saluti, ut uitæ uestræ, et cæterorum ciuium consularis: deinde ego fidem uestram uel defensoris, et amici officio adductus oro, atque obsecro iudices, ut ne hominis miseri, et cum corporis morbo, tum animi dolore confecti, L. Muræna recentem gratulationem noua lamentatione obruatis: modo maximo beneficio populi R. ornatus, fortunatus uidebatur, quod primus in familiam ueterem, primus in municipium antiquissimum consulatum attulisset: nunc idem squalore sordidus, confectus morbo, lacrymis, ac mœrore perditus, uester est supplex iudices, uestram fidem obtestatur, misericordiam implorat, uestram potestatem, ac uestras opes intuetur. nolite per deos immortales iudices hac eum re, qua se honestiorem fore putauit, etiam cæteris ante partis honestatibus, atque omni dignitate, fortunâque priuare. atque ita uos Muræna iudices orat, atque obsecrat: si iniuste nemi- nem læsit, si nullius aures uoluntatem ue uiolauit, si ne- mini, ut leuissime dicam, odio nec domi, nec militiæ fuit; sit apud uos modestiæ locus, sit demissis homini- bus perfugium, sit auxilium pudori. misericordiam spo- liatio consulatus magnam habere debet iudices: una enim eripiuntur cum consulatu omnia. inuidiam ue- ro his temporibus habere consulatus ipse nullam potest: obijcitur enim concionibus seditiosorum, insidijs coniura- torum, telis Catilinæ: ad omne denique periculum, at- que ad omnem inuidiam solus opponitur. quare, quid inuidendum Muræna, aut cuiquam nostrum sit in hoc præclaro consulatu, non uideo iudices: quæ uero

miseranda sunt, ea & mihi ante oculos uersantur, & uos uidere, & perspicere potestis. si, quod Iupiter omen auertat, hunc uestris sententijs afflixeritis, quò se miser uertet? domum'ne? ut eam imaginem clarissimi uiri parentis sui, quam paucis ante diebus laureatam in sua gratulatione conspexit, eandem deformatam ignominia, lugentemq; uideat? an ad matrem? quæ misera modo consulem osculata filium suum, nunc cruciatur, & sollicita est, ne eundem paulo post spoliatum omni dignitate conspiciat. sed quid ego matrem, aut domum appello? quem noua pœna legis & domo, & parente, & omnium suorum consuetudine, conspectuq; priuat. ibit igitur in exilium miser? quò? ad orientis'ne partes, in quibus annos multos legatus fuit, & exercitus duxit, & res maximas gessit? at habet magnum dolorem, unde cum honore decesseris, eodem cum ignominia reuerti. an se in contrariam partem terrarum abdet? ut Gallia transalpina, quem nuper summo cum imperio libentissime uiderit, eundem lugentem, moerentem, exulem uideat? in ea porro provincia quo animo C. Murænam fratrem suum aspiciet? qui huius dolor? qui illius moeror erit? quæ utriusque lamentatio? quanta autem perturbatio fortunæ, atque sermonis? quòd, quibus in locis paucis ante diebus factum esse consulem Murænam nuncij literæq; celebrassent, & unde hospites atque amici gratulatum Romam concurrerint, repente eò accedat ipse nuncius suæ calamitatis. Quæ si acerba, si misera, si luætuosa sunt, si alienissima mansuetudine, & misericordia uestra iudices, cōseruate populi R. beneficium, reddite reip.



consulem, date hoc ipsum pudori, date patri mortuo,  
date generi, & familie, date etiam Lanuuium, municipia  
pio honestissimo, quod in hac causa frequens, moestumq;  
uidistis: nolite à sacris patrijs lunonis hospitæ, cui om-  
nes consules facere necesse est, domesticum, & suum  
consulem potissimum auellere. quem ego uobis, si quid  
habet aut momenti commendatio, aut auctoritatis con-  
firmatio mea, consul consulem iudices ita commendo,  
ut cupidissimum otij, studiosissimum bonorum, acerrim-  
um contra seditionem, fortissimum in bello, inimicis-  
simum huic coniurationi, quæ nunc temp. labefactat,  
futurum esse promittam, & spondeam.

P R O . L . F L A C C O ,

O R A T I O   X X I I I I .

VM in maximis periculis huius urbis  
atque imperij, grauissimo atque acerbis-  
simo reip. casu, socio atque adiuto-  
re consiliorum periculorumq; meorum  
L. Flacco cædem à uobis, coniugibus,  
liberis uestris, uastitatem à templis, delubris, urbe, Ita-  
lia depellebam; sperabam iudices honoris potius L. Flac-  
ci me adiutorem futurum, quàm miseriarum deprecato-  
rem. quod enim esset præmium dignitatis, quod popu-  
lus R. cum huius maioribus semper detulisset, huic de-  
negaret? cum L. Flaccus ueterem Valeriæ gentis in libe-  
randa patria laudem prope quingentesimo anno reip.  
retulisset sed si forte aliquando aut beneficij huius ob-  
trektator, aut uirtutis hostis, aut laudis inuidus extitisset,  
existimabam L. Flacco multitudinis potius imperi-  
tæ, nullo tamen cum periculo, quàm sapientissimorum  
& lectissimorum uirorum iudiciū esse subeundum.  
etenim quibus auctoribus, & defensoribus omnium  
tum salus esset non ciuium solum, uerum etiam gen-  
tium defensa, ac retenta, neminem unquam putauī per  
eos ipsos periculum huius fortunis atque insidias crea-  
turum. quòd si esset aliquando futurum, ut aliquis de  
L. Flacci perniciē cogitaret: nunquam tamen existima-  
ui iudices D. Lælium, optimi uiri filium, optima ip-  
sum spe præditum, summæ dignitatis, eam susceptu-  
rum accusationem, quæ sceleratorum ciuium potius  
odio & furori, quàm ipsius uirtuti atque institutæ

adoleſcentiæ conueniret : etenim cum à clariffimis uiris iuſtiſſimas inimicitias ſæpe cum bene meritis ciuibus depositas eſſe uidiſſem , non ſum arbitratus quenquam amicum reip. poſteaquam L. Flacci amor in patriam perſpectus eſſet , nouas huic inimicitias , nulla accepta iniuria , denunciaturum . ſed quoniã iudices multa nos & in noſtris rebus , & in rep. ſeſcellerunt : ſerimus ea , quæ ſunt ferenda : tantum à uobis petimus , ut omnia reip. ſubſidia , totum ſtatum ciuitatis , omnem memoriam temporum præteritorum , ſalutem præſentium , ſpem reliquorum in ueſtra poteſtate , in ueſtris ſententijs , in hoc uno iudicio poſitam eſſe , & deſixam putes . ſi unquam reſp. conſilium , grauitatem , ſapientiam , prouidentiam iudicum implorauit , hoc tempore , hoc , inquam , tempore implorat . non eſtis de Lydorum , aut Myſorum , aut Phrygum , qui huc compulſi concitatiq; uenerunt , ſed de ueſtra rep. iudicaturi , de ciuitatis ſtatu , de communi ſalute , de ſpe bonorum omnium , ſi qua reliqua eſt etiam nunc , quæ fortium ciuium mentes , cogitationesq; ſuſtentet . omnia alia perſugia bonorum , præſidia innocentum , ſubſidia reip. conſilia , auxilia , iura ceciderunt . quem enim alium appellem ? quem obteſter ? quem implorem ? ſenatum ne ? at iſe ſe auxilium petit à uobis , & confirmationem aucto-  
 tatis ſuæ ueſtræ poteſtati permiſſam eſſe ſentit . an equites R. ? iudicabitis principes eius ordinis quinquaginta , quid cum omnibus ſenſeritis . an populũ R. ? at iſ quidem omnem ſuam de bonis poteſtatem tradit uobis . quamobrem niſi hoc loco , niſi apud uos , niſi per uos iudices non aucto-  
 ritatem , quæ amiſſa eſt , ſed ſalutem no-

stram, quæ spe exigua extremaq; pendet, tenuerimus : nihil est præterea , quò confugere possimus . nisi forte , quæ res hoc iudicio tentetur , quid agatur , cui causæ fundamenta iaciantur , iudices non uidetis . damnatus est is , qui Catilinam signa patriæ inferentem interemit . quid est causæ , cur non is , qui Catilinam ex urbe repulit , pertimescat ? rapitur ad poenam , qui indicia communis exitij cepit : cur sibi confidat is , qui ea proferenda , et patefacienda curauit ? socij consiliorum , ministri , comitesq; uexantur : quid auctores , quid duces , quid principes sibi expectent ? atque utinam inimici nostri , ac bonorum omnium mecum potius contentant , utrum tandem omnes boni , duces nostri , an comites fuerint ad communem conseruandam salutem \*

Desit fortasse quippiam .

Hunc igitur uirum Læli quibus tandem rebus oppugnas ? fuit P. Seruilio imperatore in Cilicia tribunus mil. ea res filetur . fuit M. Pisoni quæstor in Hispania : uox de quæstura nulla missa est . bellum Cretense ex magna parte gessit , atque una cum summo imperatore sustinuit : multa est huius temporis accusatio . præturæ iurisdictio , res uaria , et multiplex ad suspiciones , et simultates , nō attingitur : ea uero in summo et periculosissimo reip. tempore etiam ab inimicis laudatur . at à retribus læditur . antequam dico , à quibus , qua spe , qua ui , qua re concitatis , qua leuitate , qua egestate , qua perfidia , qua audacia prædiis , dicam de ge-



nere uniuerso, & de conditione omnium nostrum . per  
 deos immortales, iudices, uos, quo modo is, qui anno ante  
 Romæ ius dixerat, anno post in Asia ius dixerit, à testi-  
 bus quæretis ignotis, ipsi coniectura nihil iudicabitis?  
 in tam uaria iurisdictione tam multa decreta, tot ho-  
 minum gratiosorum læsæ uoluntates: quæ est unquam  
 iacta non suspicio, quæ tamen solet esse falsa, sed ira-  
 cundie uox aut doloris? & is est reus auaritiæ, qui in  
 uberrima re turpe compendium, in maledicentissima ci-  
 uitate, in suspiciosissimo negotio maledictum omne,  
 non modo crimen effugit. prætereo illa, quæ præte-  
 reunda non sunt; nullum huius in priuatis rebus fa-  
 ctum auarum, nullam in re pecuniaria contentionem,  
 nullam in re familiari sordem posse proferri. quibus igi-  
 tur testibus ego hosce possum refutare, nisi uobis? Ti-  
 molites ille uicanus, homo non modo nobis, sed ne in-  
 ter suos quidem notus, uos docebit qualis sit L. Flaccus?  
 quem uos modestissimum adolescentem, prouinciæ ma-  
 ximæ sanctissimum uirum, nostri exercitus fortissi-  
 mum militem, diligentissimum ducem, temperatissi-  
 mum legatum, quæstoremque cognouerunt: quem uos  
 præsentem constâtissimum senatorem, iustissimum præ-  
 torem, ac amantissimum reip. ciuem iudicastis. de qui-  
 bus uos alijs testes esse debetis, de ijs ipsi alios testes au-  
 dietis? at quos testes? primum dicam, id quod est com-  
 mune, Græcos: non quo nationi huic ego unus maxime  
 fidem derogem: nam si quis unquam de nostris homi-  
 nibus à genere isto, studio ac uoluntate non abhorrens  
 fuit, me et esse arbitror, & magis etiam tum, cum plus  
 erat otij, fuisse: sed sunt in illo numero multi boni,

docti, prudentes, qui ad hoc iudicium deducti non sunt; multi imprudentes, illiterati, leues, quos uarijs de causis uideo concitatos. ueruntamen hoc dico de toto genere Græcorum. tribuo illis literas, do multarum artium disciplinam: non adimo sermonis leporem, ingeniorum acumen, dicendi copiam: denique etiam, si qua sibi alia sumunt, non repugno: testimoniorum religionem & fidem nunquam ista natio coluit; totiusq; huiusce rei quæ sit uis, quæ auctoritas, quod pondus, ignorant. unde illud est, Da mihi testimoniū mutuum? num Gallorum, num Hispanorū putatur? totum istud Græcorum est: ut, etiam qui Græce nesciunt, hoc quibus uerbis à Græcis dici soleat, sciant. itaque uidete, quo uultu, qua confidentia dicant: tum intelligetis, qua religione dicant. nunquam nobis ad rogatum respondent, semper accusatori plus quàm ad rogatum: nunquam laborant, quemadmodum probent, quod dicunt, sed quemadmodum se explicent dicendo. iratus Flacco dixit M. Lurco, quòd, ut ipse aiebat, libertus erat eius turpi iudicio condemnatus: nihil dixit, quod læderet eum, cum cuperet: impediēbat enim religio: tamen id, quod dixit, quanto cum pudore, quo tremore & pallore dixit? quàm promptus homo P. Septimius? quàm iratus de iudicio et de uillico? tamen hæsitabat, tamen eius iracundiæ religio non nunquam repugnabat. inimicus M. Celijs, quòd, cum in re manifesta putasset nefas esse publicanum iudicare contra publicanum, sublatuſ erat: è numero recuperatorum: tamen tenuit se, neque attulit in iudicium quidquam ad lædendum, nisi uoluntatem. hi si Græci fuissent,

ac nisi nostri mores ac disciplina plus ualerent, quàm dolor ac simultas, omnes se spoliatos, uexatos, fortunis euerfos esse dixissent. Græcus testis cum ea uoluntate processit, ut lædat, non iurisiurandi, sed lædendi uerba meditatur. uinci, refelli, coargui, putat esse turpissimum: ad id se parat, nihil aliud curat: itaque non optimus quisque, nec grauissimus, sed impudicissimus, loquacissimusq; deligitur. uos autem in priuatis minimarum rerum iudijs testem diligenter expenditis: etiam si formam hominis, si nomen, si tribum nostis, mores tamen exquirendos putatis. qui autem dicit testimonium ex nostris hominibus, ut se ipse sustentat, ut omnia uerba moderatur, ut timet, ne quid cupide, ne quid iracunde, ne quid plus minus ue, quàm sit necesse, dicat. num illos idem putatis? quibus iurandum iocus est; testimonium, ludus; estimatio uestra, tenebræ; laus, merces, gratia, gratulatio proposita est omnis in impudenti mendacio. sed non dilatabo orationem meam: etenim posset esse infinita, si mihi libeat totius gentis in testimonijs dicendis explicare uanitatem. sed propius accedam: de his uestris testibus dicam. Vehementem accusatorem nacti sumus iudices, & inimicum in omni genere odiosum, ac molestum; quem spero his rebus fore magno usui & amicis, & reip. sed certe inflammatus incredibili cupiditate hanc causam accusationemq; suscepit. qui comitatus in inquirendo? comitatum dico? immo uero quantus exercitus? quæ iactura? qui sumptus? quanta largitio? quæ quanquam utilia sunt causæ, timide tamen dico, quòd uereor, ne Lælius ex his rebus, quas si

bi suscepit gloriæ causa, putet aliquid oratione mea sermonis in sese, aut inuidiæ esse quæsitum. itaque hanc partem totam relinquam: tantum à vobis petam iudices, ut, si quid ipsi audistis communi fama atque sermone de vi, de manu, de armis, de copiis, meminertis, quarum rerum inuidia, lege hac recenti ac noua, certus est inquisitioni comitum numerus constitutus. Sed ut hanc vim omittam, quanta illa sunt? quæ quoniam accusatorio iure et more sunt facta, reprehendere non possumus; queri tamen cogimur: primum, quod distributis partibus sermo est tota Asia dissipatus, Cn. Pompeium, quod L. Flacco est uehementer inimicus, contendisse à Lelio, paterno amico ac perneccessario, ut hunc hoc iudicio arcesceret, omnemque ei suam auctoritatem, gratiam, copias, opes ad hoc negotium conferendum detulisse. id hoc uerisimilius Græcis hominibus uidebatur, quod paulo ante familiarem Lelium in eadem prouincia Flacco uiderant. Pompeij autem auctoritas cum apud omnes tanta est, quanta esse debet, tum excellit in ista prouincia, quam nuper et prædonum, et regum bello liberauit. adiunxit illa, ut eos, qui domo exire nolebant, testimonij denunciatione tereretur; qui domi stare non poterant, largo et liberali uiatico commoueret. sic adolescens ingenij plenus locupletes metu, tenues præmio, stultos errore permouit: sic sunt expressa ista præclara, quæ recitantur, psephismata, non sententijs neque auctoritatibus declarata, nec iureiurando constricta, sed porrigenda manu, profundendoque clamore multitudinis concitata. O morem præclarum disciplinamque, quam à maioribus ac-



## O R A T I O

cepimus; si quidē teneremus, sed nescio quo pacto iam de manibus elabatur. nullam illi nostri sapientissimi, & sanctissimi uiri uim concionis esse uoluerunt. quæ scisceret plebs, aut quæ populus iuberet summoti concione, distributis partibus tributim, & centuriatim, descriptis ordinibus, classibus, ætatibus, auditis auctoribus, re multos dies promulgata, & cognita, iuberi, uetariq; uoluerunt. Græcorum autem tota resp. sedentis concionis temeritate administrantur. itaque ut hanc Græciam, quæ iandiu suis consilijs perculsa et afflicta est, omittam: illa uetus, quæ quondam opibus, império, gloria floruit, hoc uno malo concidit, libertate immoderata, ac licentia concionum. cum in theatro imperiti homines, rerum omnium rudes ignariq; consederant, tum bella inutilia suscipiebant, tum seditiosos homines reip. præficiebant, tum optime meritos ciues e ciuitate eiiciebant. quod si hæc Athenis tum, cum illæ non solum in Græcia, sed prope cunctis gentibus eminebant, accidere sunt solita: quam moderationem putatis in Phrygia aut in Mysia concionum fuisse? nostras conciones illarum nationum homines plerunque perturbant: quid, cum soli sunt ipsi, tandem fieri putatis? cæsus est uirgis Cynicus ille Athenagoras, qui in fame frumētum exportare erat ausus: data concio Lælio est: processit ille, & Græcus apud Græcos non de culpa sua dixit, sed de pœna questus est. porrexerunt manus: psephisma natum est. hoc testimonium est? nuper epulati, paulo ante omni largitione saturati Pergameni, quod Mithridates, qui multitudinem illam non auctoritate, sed sagina tenebat, se uelle dixit, id sutores et

Zonarij conclamarunt . hoc testimonium est ciuitatis ?  
ego testes à Cilicia publice duxi : uerum erant ea testi-  
monia non concitatae concionis, sed iurati senatus. qua-  
re iam non est mihi contentio cum teste : uobis uiden-  
dum est, sint'ne hæc testimonia putanda. adolescens bo-  
nus, honesto loco natus, disertus, cum maximo orna-  
tissimoq; comitatu uenit in oppidum Græcorum : postu-  
lat concionem : locupletes homines & graues, ne sibi  
aduersentur, testimonij denunciatione deterret : egen-  
tes & leues spe legationis & uiatico publico, priuata  
etiam benignitate proleſtat : opifices et tabernarios at-  
que illam omnem faciem ciuitatum quid est negotij con-  
citare ? in eum præsertim, qui nuper summo cum im-  
perio fuerit, summo autem in amore esse propter no-  
men ipsum imperij non potuerit . mirandum uero est,  
homines eos, quibus odio sunt nostræ secures, nomen  
acerbitati, scriptura, decumæ, portoirum morti, liben-  
ter arripere facultatem ledendi, quæcunque detur. me-  
mentote igitur, cum audietis psephismata, non audire  
uos testimonia, audire temeritatem uulgi, audire  
uocem leuissimi cuiusque, audire strepitum imperito-  
rum, audire concionem concitatam leuissimæ nationis .  
itaque perscrutamini penitus naturam rationemq; cri-  
minum : iam nihil præter speciem, nihil præter terro-  
rem ac minas reperietis .

Deesse uidentur nonnulla .

In aerario nihil habent ciuitates, nihil in uectigalibus, duæ rationes consciendæ pecuniæ: aut uersura, aut tributo. nec tabulæ creditoris proferuntur, nec tributi confectio ulla recitatur. quàm uero facile falsas rationes inferre, & in tabulas, quodcunque commodum est, referre soleant, ex Cn. Pompeij literis ad Hypsæum, et Hypsæi ad Pompeium missis quæso cognoscite. L I T E R A E P O M P E I I : E T H Y P S A E I . Satis ne uobis coarguere his auctoribus dissolutam Græcorum consuetudinem licentiamq; impudentem uidemur? nisi forte, qui Cn. Pompeium, qui præsentem, qui nullo impellente fallabant, eos urgente Lælio in absentem, & in L. Flaccum aut timidos fuisse, aut religiosos putamus. sed fuerint incorruptæ literæ domi: nunc uero quam habere auctoritatem, aut quam fidem possunt? triduo lex ad prætorem deferri, iudicium signis obsignari iubet: trigesimo die uix deferuntur. ne corrumpi tabulæ facile possint, iccirco lex obsignatas in publico poni uoluit: at obsignantur corruptæ. quid refert igitur, tanto post ad iudices deferantur, an omnino non deferantur? quid, si testium studium cum accusatore sociatum est? tamen ne isti testes habebuntur? ubi est igitur illa expectatio, quæ uersari in iudicijs solet? nam antea, cum dixerat accusator acriter & uehementer, cumq; defensor suppliciter demisseq; responderat; tertius ille erat expectatus locus testium; qui aut sine ullo studio dicebāt, aut cum dissimulatione aliqua cupiditatis. hoc uero quid est? una sedent, ex accusatorum subsellijs surgunt, non dissimulant, non uerentur. de subsellijs

queror? una ex domo prodeunt: si uerbo titubarint, quò reuertantur, non habebunt. an quisquam esse testis potest, quem accusator sine cura interroget, nec metuat, ne sibi aliquid, quod ipse nolit, respondeat? ubi est igitur illa laus oratoris, quæ uel in accusatore antea, uel in patrono spectari solebat? bene testem interrogauit: callide accessit: reprehendit: quò noluit, adduxit: conuicit, & elinguem reddidit. quid tu istum roges Læli, qui, priusquam hoc, Te rogo, dixeris, plura etiam effundet, quàm tu ei domi ante præscripseris? quid ego autem defensor rogem? nã aut oratio testium refelli solet, aut uita lædi. qua disputatione orationem refellam eius, qui dicit, Dedimus, nihil amplius? in hominem dicendum est igitur, cum oratio argumentationem non habet. quid dicam in ignotum? querendum est ergo, et deplorandum, id quod iandudum facio, de omni accusationis iniquitate, primum de communi genere testium: dicit enim natio minime in testimonijs dicendis religiosa. propius accedo: nego esse ista testimonia, quæ tu ipse psephismata appellas; sed et fremitu egentiu, et motum quendam temerarium Græcula conuersionis. intrabo etiam magis: qui gessit, non adest: qui numerasse dicitur, non est deductus: priuatæ literæ nullæ proferuntur, publicæ retentæ sunt in accusatorum potestate: summa est in testibus: hi uiuunt cum inimicis, adsunt cum aduersarijs, habitant cum accusatoribus. utrum hic tandem, disceptationem, & cognitionem ueritatis, an innocentie labem aliquam, aut ruinam fore putatis? multa enim sunt eiusmodi iudices, ut, etiam si in homine ipso, de quo agitur neglig



genda sint, tamen in imitatione atque in exemplo per-  
 timescenda uideatur. si quem infimo loco natum, nul-  
 lo splendore uitæ, nulla commendatione famæ defende-  
 rem, tamen ciuis ciuem à ciuibus communis humani-  
 tatis iure, ac misericordia deprecarer, ne ignotis testis-  
 bus, ne incitatis, ne accusatoris confessoribus, conui-  
 uis, contubernalibus, ne hominibus leuitate Græcis,  
 crudelitate barbaris ciuem ac supplicem uestrum dede-  
 retis, ne periculosam imitationem exempli reliquis in-  
 posterum proderetis. sed cum L. Flacci res agatur, cui-  
 ius ex familia qui primus consul factus est, primus in  
 hac ciuitate consul fuit; cuius uirtute regibus extermi-  
 natis, libertas in rep. constituta est; quæ usque ad hoc  
 tempus honoribus, imperio, rerum gestarum gloria  
 continuata permansit; cumq; ab hac perenni, conte-  
 stataq; uirtute maiorum non modo non degenerarit L.  
 Flaccus, sed, id quod maxime florere in generis sui glo-  
 ria uiderat, laudem patriæ in libertatem uindicandæ  
 prætor adamauerit: in hoc ego reo ne quod perniciosum  
 exemplum prodatur, pertimescam? in quo, etiam si  
 quid errasset, omnes boni conuiuendum esse arbitraren-  
 tur: quod quidem ego non modo non postulo, sed con-  
 tra iudices uos oro et obtestor, ut totam causam quam  
 maxime intentis oculis, ut aiunt, acerrime contemple-  
 mini. nihil religione testatum, nihil ueritate funda-  
 tum, nihil dolore expressum; contraq; omnia corru-  
 pta libidine, iracundia, studio, pretio, periurio repe-  
 riantur. etenim, iam uniuersa istorum cognita cupidi-  
 tate, accedam ad singulas querelas criminationesq;  
 Græcorum. Classis nomine pecuniam ciuitatibus im-  
 peratam

peratam queruntur. quod nos factum iudices confitemur: sed si hoc crimen est; aut in eo est, quod non licuerit imperare; aut in eo, quod non opus fuerit nauibus; aut in eo, quod nulla hoc prætoris classis nauigauerit. licuisse ut intelligas, cognosce quid me consule senatus decreuerit, cum quidem nihil à superioribus continuorum annorum decretis decesserit. SENATUS CONSULTVM. proximum est ergo, ut, opus fuerit classe, nec ne, queramus. utrum igitur, hoc Græci statuent, aut ullæ exteræ nationes, an uestri prætores, uestri duces, uestri imperatores? equidem existimo, in eiusmodi regione, atque prouincia, quæ mari cinctæ, portibus distinctæ, insulis circumdata esset, non solum præsidij, sed etiam ornandi imperij causa nauigandum fuisse. hæc enim ratio, ac magnitudo animorum maioribus nostris fuit, ut, cum in priuatis rebus, suisque sumptibus minimo contenti, tenuissimo cultu uiuerent, in imperio atque in publica dignitate omnia ad gloriam splendoremque reuocarent. queritur enim in re domestica continentie laus, in publica dignitatis. quid, si etiam præsidij causa classem habuit? quis erit tam iniquus, qui reprehendat? nulli erant prædones: quid? nullos fore, quis præstare poterat? minuis, inquit, gloriam Pompeij: immo tu auges molestiam: ille enim classes prædonum, urbes, portus, receptacula sustulit; pacem maritimam summa uirtute, atque incredibili celeritate confecit: illud uero neque suscepit, neque suscipere debuit, ut, si qua uspiam nauicula prædonum apparuisset, accusandus uideretur. itaque ipse in Asia, cum omnia iam bella terra marique

confecisset, classem tamen iisdem istis ciuitatibus imperauit. quod si tum statuit opus esse, cum ipsius praesentis nomine tota omnia & pacata esse poterant: quid, cum ille decessisset, Flacco exislimalis statuendum & faciendum fuisse? quid nos hic? non ne ipso Pompeio auctore, Silano, & Marana consulibus, decreuimus, ut classis in Italia nauigaret? non ne eo ipso tempore, eum L. Flaccus in Asia remiges imperabat, nos hic in mare superum & inferum sestertium ter & quadragies erogabamus? quid postremo anno? non ne M. Curius et P. Sestilio quaestoribus pecunia in classem est erogata? quid? hoc omni tempore equites in ora maritima non fuerunt? illa est enim gloria diuina Pompeij; primum, praedones eos, qui tum, cum illi bellum maritimum gerendum datum est, toto mari dispersi uagabantur, redactos esse omnes in potestatem; deinde, Syriam esse nostram, Ciliciam teneri, Cyprum per Ptolemaeum regem nihil audere; praeterea, Cretam Metelli uirtute esse nostram; nihil esse, unde profisciscantur, nihil quod reuertantur; omnes sinus, promontoria, litora, insulas, urbes maritimas claustris imperij nostri contineri. quod si Flacco praetore nemo in mari praedo fuisset, tamen huius diligentia reprehendenda non esset. iccirco enim, quod hic classem habuisset, existimare non fuisset. quid, si L. Oppij, L. Agrij, C. Cestij, equitum R. huius etiam clarissimi uiri Cn. Domitij, qui in Asiam legatus fuit, testimonio doceo, eo ipso tempore, quo tu ipse negas classem habendam fuisse, complures a praedonibus esse captos? tamen Flacci consilium in remigibus imperandis reprehendetur? quid, si etiam oc-

catus est à piratis Adramitenus, homo nobilis, cuius est  
 fere nobis omnibus nomen auditum; Acinas pugil O=  
 lympionices? hoc est apud Græcos ( quoniam de eorum  
 gravitate dicimus ) prope maius & gloriosus, quàm  
 Romæ triumphasse. at neminem cepisti. quàm multi  
 oræ maritimæ clarissimi uiri præfuerunt, qui, cum  
 prædonem nullum cepissent, mare tamen tutum præ=  
 stiterunt? casus est enim in capiendo, locus, euentus,  
 occasio: defendendi facilis est cautio, non solum lati=  
 bulis occultorum locorum, sed etiam tempestatum mo=  
 deratione, & conuersione. Reliquum est, ut quæra=  
 tur, utrum nostra ista classis cursu & remis, an sum=  
 ptu tantum, & literis nauigarit. num igitur negari  
 potest, cuius rei cuncta testis est Asia, bipartito classem  
 distributam fuisse, ut una pars supra Ephesum, alte=  
 ra infra Ephesum nauigaret? hac classe M. Crassus,  
 uir amplissimus, ab Hemo in Asiam, his nauibus Flac=  
 cus ex Asia in Macedoniam nauigauit. in quo igitur  
 prætoris est diligentia requirenda? in numero nauium,  
 & in descriptione æquabili sumptus? dimidium eius,  
 quo Pompeius erat usus, imperauit: num potuit par=  
 cius? descripsit autem pecuniam ad Pompeij rationem,  
 quæ fuit accommodata L. Syllæ descriptioni: qui cum  
 omnes Asiæ ciuitates pro portione in prouincias descri=  
 psisset, illam rationem in imperando sumptu & Pom=  
 peius, & Flaccus secutus est: neque est adhuc tamen  
 ea summa completa. non refert. uero. quid lucretur?  
 cum enim genus imperatæ pecuniæ suscipit, id, quod  
 tu crimen esse uis, cōfitetur. qui igitur probari potest, in  
 ea pecunia non referenda crimen sibi ipsum facere, in



qua crimen esset nullum, si referret? at enim negas fratrem meum; qui L. Flacco successerit, pecuniam uelam in remiges imperasse. equidem Q. fratris mei laudem delector: sed alijs magis grauioribus, atque maioribus. aliud quiddam statuit, aliud uidit. existimauit, quocunque tempore auditum quid esset de praedonibus, quam uellet subito, se classem comparaturum. denique hoc primus frater meus in Asia fecit, ut hoc sumptu remigum ciuitates leuaret: crimen autem tum uideri solet, cum aliquis sumptus instituit eos, qui antea non erant instituti, non cum successor aliquid immutat de institutis priorum. Flaccus, quid alij postea facturi essent, scire non poterat; quid fecissent, uidebat. sed quoniam de communi totius Asiae crimine dictum est, aggrediar iam ad singulas ciuitates: ex quibus sit sane nobis prima ciuitas Aemonensis. Citat praeco uoce maxima legatos Aemonenses: procedit unus Aesclepiades. prodeant. etiam, ne praconem mentiri coegisti? est enim; credo, is uir iste, ut ciuitatis nomen sua auctoritate sustineat, damnatus turpissimis iudicijs domi, notatus literis publicis: cuius de probris, adulterijs, ac stupris extant Aemonensium literae: quas ego non solum propter longitudinem, sed etiam propter turpissimam obscenitatem uerborum praetereundas puto. dixit publice datum drachmarum CC & VI millia. dixit tantum: nihil ostendit, nihil protulit. sed adiunxit id, quod certe, quoniam erat domesticum, docere debuit; se priuatim drachmas CC VI dedisse: quantum sibi ablatum homo impudentissimus dicit, tantum nunquam est ausus, ut haberet, optare. ab A. Sestilio di-

cit se dedisse, & a suis fratribus potuit dare Sestilius: nam fratres quidem consortes sunt mendicitatis. audiamus igitur Sestiliū: fratres denique ipsi prodeant: quā uolent impudenter, mentiantur, et; quod nunquam habuerint, dedisse se dicant: tamen aliquid fortasse coram producti dicent, in quo reprehendantur. non deduxi, inquit, Sestilium. cedo tabulas: non dea portauī. fratres saltem exhibe: non denunciaui. quod ergo unus Aesclepiades, fortuna egens, uita turpis, existimatione damnatus, impudentia, atque audacia fretus, sine tabulis, sine auctore legerit, id nos quasi \* crimen aut testimonium pertimescamus? idem laudationem, quam nos ab Aemonensibus Flacco datam proferebamus, falsam esse dicebat. cuius quidem laudationis iactura exoptanda nobis fuit. nam ut signum publicum inspexit praeclarus iste auctor suae ciuitatis, solere suos ciues, ceterosq; Gracos ex tempore, quod opus sit, obsignare dixit. tu uero tibi habeto istam laudationem: nec enim Aemonensium testimonio Flacci uita, & dignitas nititur. das enim mihi, quod haec causa maxime postulat, nullam grauitatem, nullam constantiam, nullum firmum in Graecis hominibus consilium, nullam denique esse testimonij fidem. nisi uero haecenus ista formula testimonij, atque orationis tuae describi, ac distingui potest, ut Flacco absenti aliquid ciuitates tribuisse dicantur, Laelio praesenti, per se agenti, ui legis, iure accusationis, opibus praeterea suis terrenti, ac minanti, nihil temporis causa scripsisse, aut obsignasse uideantur. equidem in minimis rebus saepe res magnas uidi iudices deprehendi, ac teneri, ut in hoc

Asclepiade. hæc, quæ est à nobis prolata, laudatio ob-  
signata erat creta illa Asiatica, quæ fere est omnibus  
nota nobis: quæ utuntur omnes non modo in publicis,  
sed etiam in priuatis literis, quas quotidie uidemus mit-  
ti à publicanis sæpe unicuique nostrum. neque enim  
testis ipse signo inspecto falsum nos proferre dixit, sed  
lenitatem totius Asiæ protulit, de qua nos & libenter,  
& facile concedimus. nostra igitur laudatio, quam ille  
temporis causa nobis datam dicit, datam quidem confi-  
tetur, consignata creta est: in illo autem testimonio,  
\* quod accusatori dicitur datum, ceram esse uidemus. hic  
ego iudices, si uos Aemonensium decretis, si cæterorum  
Pbrygum literis permoueri putarem, uociferarer, &  
quantum maxime possem, contenderem, testarer publi-  
canos, excitarem negotiatores, uestram etiam conscien-  
tiam implorarem: cera deprehensa, considerem totius  
testimoniij fictam audaciam manifesto comprehensam,  
atque oppressam teneri. nunc uero non insultabo uehe-  
mentius, nec uolito in hoc insolentius, neque in istum  
nugatorem, tanquàm in aliquem testem inuehar, neque  
in toto Aemonensium testimonio, siue hic confictum est,  
ut apparet, siue missum domo est, ut dicitur, com-  
mouebor. etenim quibus ego istam laudationem remit-  
tam, quoniam sunt, ut Asclepiades dicit, leues; hor-  
um testimonium non pertimescam. Venio nunc  
ad Dorylensium testimonium; qui producti tabulas se  
publicas ad speluncas perdidisse dixerunt. ò pastores  
nescio quos cupidos literarum, si quidem nihil istis præ-  
ter literas abstulerunt. sed aliud esse causæ suspica-  
mur, ne forte isti parum uersuti esse uideantur. poena

est, ut opinor, Dorylensium grauior, quam apud alios, falsarum, et corruptarum literarum: si ueras protulissent, criminis nihil erat: si falsas, erat poena: bellissimum putarunt, dicere amissas. quiescant igitur, et me hoc in lucro ponere, atque aliud agere patiantur. non sinunt; supplet enim ille nescio quis, & priuatim dicit se dedisse: hoc uero ferri nullo modo potest. qui de tabulis publicis recitat, ijs, quæ in accusatoris potestate fuerunt, non debet habere auctoritatem: sed tamen iudicium fieri uidetur, cum tabula illa ipsæ, cuiusque modi sunt, proferuntur. cum uero is, quem nemo uestrum uidit unquam, nemo, qui mortalis esset, audiuit, tantum dicit, Dedi: dubitabitis iudices, quin ab hoc ignotissimo Phryge nobilissimum ciuem uindicetis? atque huic eidem nuper tres equites R. honesti, & graues, cum in causa liberali eum, qui asserebatur, cognatum suum esse diceret, non crediderunt: qui hoc euenit, ut, qui locuples testis doloris, & sanguinis sui non fuerit, idem sit grauis auctor iniuriæ publicæ? atque hic Dorylensis nuper cum efferretur magna frequentia, confessuq; uestro, mortis illius inuidiam in L. Flaccum Lælius conferebat. facis iniuste Læli, si putas periculo nostro uiuere tuos contubernales; præsertim quod tua negligentia factum arbitremur. homini enim Phrygi, qui arborem fici nunquam uidisset, fiscinam ficorum obiecisti: cuius mors te ex aliqua parte releuauit: edacem enim hospitem amisisti: Flacco uero quid profuit? qui ualuit tandiu, dum huc prodiret: mortuus est aculeo iam dimisso, ac dicto testimonio. at istud columen actionis tuæ Mithridates, posteaquam biduum reten-



tus testis à nobis, effudit, quæ uoluit, omnia, reprehensus, conuictus, fractusq; discessit: ambulat cum lorica: metuit homo doctus et sapiens, ne L. Flaccus nunc se scelere alliget, cum iam testem illum effugere non possit: ut, qui ante dictum testimonium sibi temperaret, cum tamen aliquid assequi posset; is nunc id agat, ut ad falsum auaritiæ testimonium uerum etiam maleficij crimen adiungat. sed de hoc teste, totoq; Mithridatico differuit & subtiliter, & copiose Q. Hortensius. nos, ut instituiamus, ad reliqua pergamus. Caput est omnium Græcorum concitandorum, qui cum accusatoribus sedet, Heraclides ille Tennites, homo ineptus, & loquax, sed, ut sibi uidetur, ita doctus, ut etiam magistrum aliorum se esse dicat: et qui ita sit ambitiosus, ut omnes uos, nosq; quotidie persalutet, Tenni usque ad illam ætatem in senatum uenire non potuit: & qui se artem dicendi traditurum etiam cæteris profiteatur, ipse omnibus turpissimis iudicijs conuictus est. pari felicitate una legatus uenit Nicomedes: qui neque in senatum ulla conditione peruenire potuit, & furti, & pro socio damnatus est. nam princeps legationis Lysanias adeptus est ordinem senatorium; sed cum remp. nimium amplecteretur, peculatus damnatus, & bona, & senatorium nomen amisit. hi tres etiam ærarij nostri tabulas falsas esse uoluerunt: nam seruos nouem se professi sunt habere, cum omnino sine comite uenissent. decreto scribendo primum uideo affuisse Lysaniam: cuius fratris bona, quod is populo non soluebat, prætor Flacco publice uenierunt. præterea Philippus est Lysania gener, & Hermobius:

cuius frater Poles item pecuniæ publicæ est condemnatus. dicunt se Flacco, & ijs, qui simul essent, drachmarum XV millia dedisse. cum ciuitate mihi res est acer-  
rima, & conscientissima literarum: in qua nummus moueri nullus potest sine quinque prætoribus, tribus quæstoribus, quatuor mensarijs, qui apud illos à popu-  
lo creantur. ex hoc tanto numero deductus est nemo: & cum illam pecuniam nominatim Flacco datam re-  
ferant, maiorem etiam aliquam, cum huic ijdem da-  
rent, in eadem sacram reficiendam se perscripisse di-  
cunt. quod minime conuenit: nam aut omnia occulte referenda fuerunt, aut aperte omnia. cum perscribunt nominatim Flacco, nihil timent, nihil uerentur: cum operi publico referunt, ijdem homines subito eundem, quem contempserant, pertimescunt. si prætor dedit, ut est scriptum, à quæstore numerauit; quæstor à mensa publica; mensa aut ex uectigali, aut ex tributo. nunquam erit istud simile criminis, nisi mihi totam ratio-  
nem omni & personarum genere, & literarum expli-  
caris. uel quod est in eodem decreto scriptum, homines clarissimos ciuitatis, amplissimis usos honoribus, hoc prætore circumuentos, cur hi neque in iudicio adsunt, neque in decreto nominantur? non enim credo signifi-  
cari isto loco illum, qui se erigit, Heraclidem. utrum enim in clarissimis est ciuibus is, quem iudicatum hic du-  
xit Hermippus? qui hanc ipsam legationem, quam ha-  
bet, non accepit à suis ciuibus, sed usque Tymolo peti-  
uit: cui nullus honos in sua ciuitate habitus est un-  
quam. res autem ea, quæ tenuissimis committebatur, huic uni in uita commissa sola est. custos T. Aufidio

prætoris frumento publico est positus : pro quo cum à P. Varino prætoris pecuniam accepisset, celauit suos ciues, ultroq; ijs sumptum intulit. quod posteaquam Tenni literis à P. Varino missis cognitum, atque patefactum est; cumq; eadem de re Cn. Lentulus, qui censor fuit, Tennitarum patronus literas misisset : Heraclidem istum Tenni nemo postea uidit. atque ut eius impudentiam perspicere possitis, causam ipsam, quæ leuissimi hominis animum in Flaccum incitauit, quæ so cognoscite. Fundum Cymæum Romæ mercatus est de pupillo Meculonio, cum uerbis se locupletem faceret, haberet nihil, præter illam impudentiam, quam uidetis: pecuniam sumpsit mutuam à Sex. Schola, iudice hoc nostro, primario uiro, qui et rem agnoscit, neque hominem ignorat : qui tamen credidit P. Fuluij Veratij leuissimi hominis fidei. is, cum solueret, sumpsit à C. M. Fusijs, equitibus R. primarijs uiris. hic hercule cornici oculum, ut dicitur. nam hunc Hermippum, hominem eruditum, ciuem suum, cui debebat esse notissimus, percussit : eius enim fide sumpsit à Fusijs. securus Hermippus Tennen proficiscitur, cum iste sese pecuniam, quam huius fide sumpserat, à discipulis suis diceret Fusijs persoluturum : habebat enim rhetor iste adolentes quosdam locupletes, quos dimidio redderet stultiore, quam acceperat, ubi nihil possent discere nisi ignorantiam literarum : neminem quidem adeo infatuare potuit, ut ei nummum ullum crederet : itaque cum Roma clam esset profectus, multosq; minutis mutationibus fraudauisset, in Asiam uenit, Hermippoq; percontanti de nomine Fusiano, respondet se omnem pe

cuniam Fusijs persoluisse. interim, neque ita longo intervallo, libertus à Fusijs cum literis ad Hermippum venit: pecunia petitur ab Hermippo: Hermippus ab Heraclide petit, ipse tamen Fusijs satisfacit absentibus, & fidem suam liberat: hunc astuantem & terguersantem iudicio ille persequitur: à recuperatoribus causa cognoscitur. nolite existimare iudices non unam & eandem omnibus in locis esse fraudatorum & inficiatorum impudentiam: fecit eadem omnia, quæ nostri debitores solent: negavit sese omnino uersuram ullam fecisse Romæ: Fusiorum se affirmavit nunquam omnino nomen audisse: Hermippum uero ipsum, prudentissimum, atque optimum uirum, ueterem amicum, atque hospitem meum, splendidissimum, atque ornatissimum ciuitatis suæ, probris omnibus maledictisq; uexauit. sed cum se homo uolubilis quadam præcipiti celeritate dicendi in illa oratione iactaret, repente, testimonijs Fusiorum nominibusq; recitatis, homo audacissimus pertimuit, loquacissimus obmutuit: itaque recuperatores contra istum rem minime dubiam prima actione iudicauerunt. cum iudicatum nõ facerèt, addictus Hermippo, & ab hoc ductus est. Habetis & honestatem hominis, et auctoritatem testimoniij, & causam omnem simulatis. Atque is ab Hermippo missus, cum ei pauca mancipia uendidisset, Romam se contulit: deinde in Asiam redijt, cum iam frater meus Flacco successisset: ad quem adiit, causamq; ita detulit, recuperatores uel Flacci coactos & metu falsum inuitos iudicauisse: frater meus pro sua equitate prudentiaq; decreuit, ut, si iudicatum negaret, in duplum iret; si metu coactos diceret,



haberet eosdem recuperatores. recusauit, & quasi nihileffet actum, nihil iudicatum, ab Hermippo ibidem mancipia, quæ ipse ei uendiderat, petere coepit. M. Gracilius legatus, ad quem est aditum, actionem se daturum negauit: re iudicata stare ostendit placere. iterum iste, cui nullus esset usquam consistendi locus, Romam se retulit: persequitur Hermippus, qui nunquam istius impudentiæ cessit: petit Heraclides à C. Plotio senatore, uiro primario, qui legatus in Asia fuerat, mancipia quædam, quæ se, cum iudicatum esset, per uim uendidisse dicebat. Q. Naso, uir ornatissimus, qui prætor fuerat, iudex sumitur. quicum sententiam secundum Plotium se dicturum ostenderet, & ab eo iudice abiret, quod iudicium lege non erat, causam totam reliquit. satis ne uobis iudices uideor ad singulos testes accedere, neque, ut primo constitueram, tantummodo cum uniuerso genere conflagere? Venio ad Lysaniam eiusdem ciuitatis, peculiarem tuum Deciane testem. quem tu cum ephēbum Tenni cognosces; quoniam te nudus delectarat, semper nudum esse uoluisti. abduxisti Tenno Apollonidem: pecuniam adolescentulo grandi fœnore, fiducia tamen accepta, occupauisti: hanc fiduciam commissam tibi tenes hodie ac possides. eum tu testem spe recuperandi fundi paterni uenire ad testimonium dicendum coegisti: qui quoniam testimonium dixit, quidnam sit dicturus, expecto. noui genus hominum, noui consuetudinem. noui libidinem: itaque etsi teneo, quid sit dicere paratus, nihil tamen contra disputabo prius, quàm dixerit: totum enim conuertet, atque alia finget. quamobrem & ille ser-

uet, quod parauit : & ego me ad id, quod attulerit, integrum conseruabo. Venio nunc ad eam ciuitatem, in quam ego multa & magna officia contuli, & quam meus frater in primis colit atque diligit. quæ si ciuitas per uiros bonos grauesq; homines querelas ad uos detulisset, paulo commouerer magis : nunc uero quid putem ? Trallianos Meandrio causam commisisse, homini egenti, sordido, sine honore, sine existimatione, sine censu ? ubi erant illi Pythodorus & Lepison ? cateri homines apud nos noti, inter suos nobiles ? ubi illa magnifica & gloriosa ostentatio ciuitatis ? non ne esset puditum, si hanc causam agerent seuerè, non modo legatum, sed Trallianum omnino dici Meandrium ? huic illi legato, huic publico testi patronum suum iam inde à patre atque maioribus L. Flaccum mactandum ciuitatis testimonio tradidissent ? non est ita iudices, non est profecto. uidi ego in quodam iudicio nuper Philodorum testem Trallianum, uidi Parrhasium, uidi Archidemum, cum quidem idem hic mihi Meandrius quasi ministrator aderat, subiiciens, quid in suos ciues, ciuitatemq; si uellem, dicerem : nihil enim illo homine leuius, nihil egentius, nihil inquinatius. quare si hunc habent auctorem Tralliani doloris sui, si hunc custodem literarum, si hunc testem iniuriæ, si hunc auctorem querelarum, remittant spiritus, comprimant animos suos, sedent arrogantiam, fateantur in Meandrii persona esse expressam faciem ciuitatis : sin istum semper illi ipsi domi proterendum esse & conculcandum putauerunt, desinant putare auctoritatem esse in eo testimonio, cuius auctor inuentus est nemo. sed

exponam, quid in re sit, ut, quamobrem ista ciuitas neque seuerè Flaccum oppugnarit, neque benigne defenderit, scire possitis. Erat ei Castriciano nomine irata, de quo toto respondit Hortensius: inuita soluerat Castricio pecuniam iandiu debitam: hinc totum odium, hinc omnis offensio: quò cum uenisset Lælius ad iratos, et illud Castricianum uulnus dicendo refricuisset, siluerunt, neque in illa concione adfuerunt, neque ipsius decreti ac testimonij auctores esse uoluerunt. usque eò orba fuit ab optimatibus illa concio, ut princeps principum esset Meandrius: cuius lingua, quasi flabello seditionis, illa tum est egentium concio uentilata. itaque ciuitatis prudentis, ut ego semper existimaui, & grauis, ut ipsi existimari uolunt, iustum dolorem querelasq; cognoscite. Quæ pecunia fuerit apud se Flacci patris nomine collata à ciuitatibus, hanc à se esse ablatam queruntur. alio loco quæram, quid licuerit Flacco: nunc tantum à Trallianis requiro, quam pecuniam à se ablatam queruntur, suam ne dicant, sibi à ciuitatibus collatam in usum suum. cupio audire. non, inquit, dicimus. quid igitur? delatam ad nos, creditam nobis L. Flacci patris nomine ad eius dies festos atque ludos. quid tum? hanc te, inquit, capere non licuit. iam id uidero: sed primum illud tenebo. queritur grauis, locuples, ornata ciuitas, quòd non retinet alienum: spoliata se dicit, quòd id non habet, quod eius non fuit. quid hoc impudentius dici aut fingi potest? delectum est oppidum, quo in oppido uno pecunia à tota Asia ad honores L. Flacci poneretur. hæc pecunia ab honoribus translata in quæstum & fœnerationem, recuperata est multis

post annis: quæ ciuitati facta est iniuria? at moleste fert ciuitas. credo: amissum est enim præter spem, quod erat spe deuoratum lucrum. at queritur. impudenter facit: non enim omnia, quæ dolemus, eadem in re queri possumus. at accusat uerbis grauissimis. non ciuitas, sed imperiti homines à Meandrio concitati. quo loco etiam atque etiam facite ut recordemini, quæ sit temeritas multitudinis, quæ leuitas propria Græcorum, quid in concione seditiosa ualeat oratio. hic in hac grauissima & moderatissima ciuitate, cum est forum plenum iudiciorum, plenum magistratum, plenum optimorum uirorum & ciuium, cum speculatur atque obsidet Rostra uindex temeritatis & moderatrix officij curia; tamen quantos fluctus excitari concionum uidetis? quid uos fieri censetis Trallibus? an id, quod Pergami? nisi forte hæ ciuitates existimari uolunt, facilius una se epistola Mithridatis moueri impelliq; potuisse, ut amicitiam populi R. fidem suam, iura omnia officij humanitatisq; uiolarent, quam ut filium testimonio laderent, cuius patrem armis pellendum à suis moenibus censuissent. quare nolite mihi ista nomina ciuitatum nobilium opponere: quos enim hostes hæ familia contempsit, nunquam eosdem testes pertimescet. uobis autem est confitendum, si consilijs principum uestræ ciuitates reguntur, non multitudinis temeritate, sed optimatum consilio bellum ab istis ciuitatibus cum populo R. esse susceptum. sin ille tum motus est temeritate imperitorum excitatus, patiamini me delicta uulgi à publica causa separare. at enim istam pecuniam huic capere non licuit. utrum uultis, patri Flacci



licuisse, nec ne? si licuit, sicuti certe licuit; ad eius ho-  
 nores collatam, ex quibus ipse nihil capiebat, patris pe-  
 cuniam recte abstulit filius. si non licuit, tamen, illo  
 mortuo, non modo filius, sed quivis hæres rectissime po-  
 tuit auferre. ac tum quidem Tralliani, cum ipsi graui  
 fœnore istam pecuniam multos annos occupauissent, à  
 Flacco tamen omnia, quæ uoluerunt, impetrauerunt:  
 neque tam fuerunt impudentes, ut id, quod Lælius di-  
 xit, dicere auderent, hanc eis pecuniam abstulisse Mi-  
 thridatem. quis enim erat, qui non sciret in ornandis  
 studiosiorem Mithridatem, quàm in spoliandis Tral-  
 lianis fuisse? quæ quidem à me si, ut dicenda sunt, di-  
 cerentur, grauius agerem iudices, quàm adhuc egi,  
 quantam Asiaticis testibus fidem habere uos conueni-  
 ret: reuocarem animos uestros ad Mithridatici belli me-  
 moriam, ad illam uniuersorum ciuium R. per tot ur-  
 bes uno puncto temporis miseram crudelemq; cædem;  
 prætores nostros deditos, legatos in uincula coniectos,  
 nominis prope Romani memoriam cum uestigio imperij  
 non modo ex ædibus Græcorum, uerum etiam ex lite-  
 ris esse deletam. Mithridatem deum, illum patrem, il-  
 lum conseruatorem Asiæ, illum Dionysium, Bacchum,  
 Liberum nominabant. unum atque idem erat tempus,  
 cum L. Flacco consuli portas tota Asia claudebat, Cap-  
 padocem autem illum non modo recipiebat suis urbibus,  
 uerum etiam ultro uocabat. liceat hæc nobis, si obliui-  
 sci non possumus, at tacere. liceat mihi potius de leui-  
 tate Græcorum queri, quàm de crudelitate. auctorita-  
 tem isti habeant apud eos, quos esse omnino noluerunt;  
 nam, quoscunque potuerunt togatos, interemerunt;

nomen ciuium R. quantum in ipsis fuit, susstulerunt. in hac igitur urbe se iactent, quam oderunt; apud eos, quos inuiti uident; in ea rep. ad quam opprimendam non animus eis, sed uires defuerunt: aspiciant hunc florem legatorum laudatorumq; Flacci ex uera, atque integra Græcia: tum se ipsi expendant, tum cum his comparent; tum, si audebunt, dignitati horum opponant suam. adsunt Athenienses, unde humanitas, doctrina, religio, fruges, iura, leges ortæ, atque in omnes terras distributæ putantur: de quorum urbis possessione, propter pulchritudinem, etiam inter deos certamen fuisse proditum est: quæ uetustate ea est, ut ipsa ex sese suos ciues genuisse dicatur, & eorum eadem terra parens, altrix, patria dicatur; auctoritate autem tanta est, ut iam fractum prope ac debilitatum Græciæ nomen huius urbis laude nitatur. adsunt Lacedæmonij: cuius ciuitatis spectata ac nobilitata uirtus non solum natura corroborata, uerum etiam disciplina putatur: qui soli toto orbe terrarum septingentos iam annos amplius unis moribus, & nunquam mutatis legibus uiuunt. adsunt ex Achaia cuncta multi legati, Boëtia, Thessalia: quibus locis nuper legatus L. Flaccus imperatore Metello præfuit. neque uero te Masilia prætereo, quæ L. Flaccum militem quæstoremq; cognosti: cuius ego ciuitatis disciplinam, atque grauitatem non solum Græciæ, sed haud scio an cunctis gentibus anteponendam iure dicam. quæ, tam procul à Græcorum omnium regionibus, disciplinis, linguaq; diuisa, cum in ultimis terris, cincta Gallorum gentibus, barbariæ fluctibus alluatur, sic optimatum consilio gubernatur

tur, ut omnes eius instituta laudare facilius possint, quam æmulari. hisce utitur laudatoribus Flaccus, his innocentiae testibus; ut Græcorum cupiditati Græcorum auxilio resistamus. quanquam quis ignorat, qui modo unquam mediocriter res istas scire curauit, quin tria Græcorum genera sint uere? quorum uni sunt Athenienses, quæ gens Ionum habebatur: Aeoles alteri, Diores tertij nominabantur. atque hæc cuncta Græcia, quæ fama, quæ gloria, quæ doctrina, quæ plurimis artibus, quæ etiam imperio & bellica laude floruit, paruum quendam locum, ut scitis, Europæ tenet, semperq; tenuit: Asiæ maritimam oram bello superatam cinxit urbibus, non ut munitam coloniis illam augetet gentem, sed ut obsessam teneret. quamobrem quæso à uobis Asiatici testes, ut, cum uere recordari uoletis, quantum auctoritatis in iudicium afferatis, uosmet ipsi describatis Asiam, nec, quid alienigenæ de uobis loqui soleant, sed quid uosmet ipsi de genere uestro statuatis, memineritis. nanque, ut opinor, Asia uestra constat ex Phrygia, Mysia, Caria, Lydia. utrum igitur nostrum est, an uestrum hoc uetus prouerbum, Phrygem plangis fieri solere meliorem? quid de tota Caria? non ne hoc uestra uoce uulgatum est, si quid cum periculo experiri uelis, in Caria id potissimum esse faciundum? quid porro in Græco sermone tam tritum, atque celebratum est, quam, si quis despiciatui ducitur, ut Mysorum ultimus esse dicatur? nam quid ego dicam de Lydia? quis unquam Græcus comœdiam scripsit, in qua seruus primarum partium non Lydus esset? quamobrem quæ uobis fit iniuria, si statuimus uestro

nobis iudicio standum esse de uobis ? equidem mihi iam satis superq; dixisse uideor de Asiatico genere testium : sed tamen uestrum est iudices, omnia, quæ dici possunt in hominum leuitatem, inconstantiam, cupiditatem, etiam si à me minus dicuntur, uestris animis & cogitatione comprehendere. Sequitur auri illa inuidia Iudaici. hoc nimirum est illud, quòd non longe à gradibus Aurelijs hæc causa dicitur. ob hoc crimen hic locus abste Læli atque illa turba quæ sita est. scis, quanta sit manus, quanta concordia, quantum ualeat in concionibus. summissa uoce agam, tantum ut iudices audiant : neque enim defunt, qui istos in me atque optimum quenque incitent : quos ego, quo id facilius faciant, non adiuuabo. cum aurum Iudæorum nomine quotannis ex Italia & ex omnibus uestris prouincijs Hierosolymam exportari solet, Flaccus sanxit edicto, ne ex Asia exportari liceret. quis est iudices, qui hoc non uere laudare possit ? exportari aurum non oportere, cum sæpe antea senatus, tum me consule grauissime iudicauit. huic autem barbaræ superstitioni resistere, seueritatis ; multitudinem Iudæorum flagrantem nonnunquam in concionibus pro rep. contemnere, grauissimæ summæ fuit. at Cn. Pompeius, captis Hierosolymis, uictor ex illo fano nihil attigit. in primis hoc, ut multa alia, sapienter. in tam suspiciosa, ac maledica ciuitate locum sermoni obtrectatorum non reliquit : non enim credo religionem & Iudæorum, & hostium impedimento præstantissimo imperatori, sed pudorem fuisse. ubi ergo crimen est ? quoniam quidem furtum nusquã reprehendis, edictum probas, indicatum fateris, quæsi-



eum & probatum palam non negas, actum esse per ui-  
 ros primarios res ipsa declarat. Apamea manifeste com-  
 prehensum, ante pedes pratoris in foro expensum est au-  
 ri pondo centum paulo minus per Sex. Casium, equitem  
 R. castissimum hominem, atque integerrimum: Laodi-  
 cea uiginti pondo paulo amplius per hunc ipsum L. Pe-  
 duceum, iudicem nostrum: Adrymeti per Cn. Domitium  
 legatum. \* Pergami non multum auri ratio constat :  
 aurum in æratio est: furtum non reprehenditur: inui-  
 dia quæritur, à ludicibus oratio auertitur, uox in co-  
 ronam turbamq; effunditur. sua cuique ciuitati reli-  
 gio Læli est, nostra nobis. stantibus Hierosolymis, paca-  
 tisq; Iudæis, tamen istorum religio sacrorum à splen-  
 dore huius imperij, grauitate nominis nostri, maiorum  
 institutis, abhorrebat: nunc uero hoc magis, quòd illa  
 gens, quid de imperio nostro sentiret, ostendit armis;  
 quàm cara dijs immortalibus esset, docuit, quòd est ui-  
 \* Eta, quòd elocata, quòd seruata. quamobrem, quo-  
 niam, quod crimen esse uoluisti, id totum uides in lau-  
 dem esse conuersum, ueniamus iam ad ciuium R. que-  
 relas. ex quibus sit sane prima Deciani. Quid tibi tan-  
 dem Deciane iniuriæ factum est? negotiaris in libera ci-  
 uitate. primum patere me esse curiosum: quousque ne-  
 gotiabere? præsertim cum sis isto loco natus. annos iam  
 triginta in foro uersaris, sed tamen Pergameno. longo  
 interuallo, si quando tibi peregrinari commodum est,  
 Romam aduenis: affers faciem nouam, nomen uetus,  
 purpuram Tyriam. in qua tibi inuideo, quòd unis ue-  
 stimentis tandiu lautus es. uerum esto; negotiari li-  
 et: cur Pergami, non Smyrnæ; Trallibus? ubi &

multi ciues R. sunt, & ius à nostro magistratu dictatur. otium te delectat: lites, turba, prætor odiosi: Græcorum libertate gaudes. cur ergo unus tu Apollonidenæses, amantissimos populi R. fidelissimos socios, miseriores habes, quàm aut Mithridates, aut etiam pater tuus habuerit unquam? cur his per te frui libertate sua, cur denique esse liberis non licet? homines sunt tota ex Asia frugalissimi, sanctissimi, à Græcorum luxuria & leuitate remotissimi, patres familias suo contenti, aratores, rusticani: agros habent & natura per bonos, & diligentia culturaq; meliores. in hisce agris tu prædià habere uoluisti. omnino malletem, & magis erat tuum, si iam te crassi agri delectabant, hic alicubi in Crustumino, aut in Capenati paruisses: uerum esto: Cato nis est dictum, pedibus compensari pecuniam. longe omnino à Tiberi ad Caicum: quo in loco etiam Agamemnon cum exercitu errasset, nisi ducem Telephum inuenisset. sed concedo id quoque: placuit oppidum: regio delectauit: emissæ. Amyntas est genere, honore, existimatione, pecunia princeps illius ciuitatis: huius socrum, mulierem imbecilli consilij, satis locupletem, pellexit Decianus ad sese: et, cum illa, quid ageretur, nesciret, in possessione prædiorum eius familiam suam collocauit: uxorem abduxit ab Amynta prænantem, quæ peperit apud Decianum filiam, hodieq; apud Decianum est & uxor Amyntæ, & filia. num quid harum rerum à me fingitur Declane? sciunt hæc omnes nobiles, sciunt boni utri, sciunt denique nostri homines, sciunt mediocres negotiatores. exurge Amynta, repete à Deciano non pecuniam, non prædià, socrum deni-

que sibi habeat, restituat uxorem, reddat misero patri  
 filiam: nam membra, quæ debilitauit lapidibus, fusti-  
 bus, ferro; manus, quas contudit; digitos, quos con-  
 fregit; neruos, quos concidit, restituere non potest: fi-  
 liam, filiam, inquam, ærumnoso patri Deciane redde-  
 hæc Flacco te non probasse miraris? cui quæso tandem  
 probasti? emptiones falsas, prædiorum proscriptiones  
 cum mulierculis aperta circumscriptione fecisti. tutor  
 his rebus Græcorum legibus ascribendus fuit: Ptolema-  
 cratem scripsisti, mercenarium, & administrum con-  
 siliorum tuorum. adductus est in iudicium Ptolema-  
 crates de dolo malo, & de fraude à Dione huius ipsius  
 tutelæ nomine. qui concursus ex oppidis finitimis una-  
 dique? qui dolor animorum? quæ querela? condemna-  
 tus est Ptolemocrates sententijs omnibus: irritæ uendi-  
 tiones, irritæ proscriptiones. non restituis: defers ad  
 Pergamenos, ut illi reciperent in suas literas publicas  
 præclaras proscriptiones, & emptiones tuas. repu-  
 diant, reijciunt: at qui homines? Pergameni laudato-  
 res tui. ita enim mihi gloriari uisus es laudatione Per-  
 gamenorum, quasi honorem maiorum tuorum assécu-  
 tus esses: & hoc te superiorem putabas esse, quàm Læ-  
 lium, quod te ciuitas Pergamena laudaret. num ho-  
 nestior est ciuitas Pergamena, quàm Smyrnæ? at ne ipsi  
 quidem dicunt. uellem tantum haberem otij, ut possem  
 recitare psephismata Smyrnæorum, quæ fecerunt in  
 Castritium mortuum: primum ut in oppidum intro-  
 ferretur; quod alijs non conceditur: deinde ut ferrent  
 ephebi: postremo ut imponeretur aurea corona mor-  
 tuo. hæc P. Scipioni, clarissimo uiro, cum esset Per-

gami mortuus, facta non sunt. at Castritium, quibus uerbis dii immortales, decus patriæ, ornamentum populi Romani, florem iuuentutis appellant. quare Deciane, si cupidus es gloriæ, alia ornamenta censeo queras. Pergameni te deriserunt. quid? tu ludi te non intelligebas? cum tibi hæc uerba recitabant, clarissimum uirum, præstantissima sapientia, singulari ingenio; mihi crede, ludebant: cum uero coronam auream literis imponebant, re uera non plus aurum tibi, quam monedula, committebant; ne tum quidem hominum uenustatem, & facetias perspicere potuisti? isti igitur, isti Pergameni perscriptiones, quas tu afferebas, repudiauerunt. P. Orbis, homo & prudens, & innocens, contra te omnia decreuit. in P. Globulum, meum necessarium, fulstisti gratiosior. utinam neque ipsum, neque me poenitetet. Flaccum in curia decreuissent ueridicas. adiungis causas inimicitarum, quod patri L. Flacci ædili curuli pater tuus tribunus pl. diem dixerit. at istud nec ipsi quidem patri Flacci ualde molestum esse debuit; præsertim cum ille, cui dies dicta est, prætor postea factus sit, & consul; ille, qui diem dixit, non potuerit priuatus in ciuitate consistere. sed si iustas inimicitias putabas, cur, cum tribunus militum Flaccus esset, in eius legione miles fuisti, cum tibi per leges militares effugere liceret iniquitatem tribuni? cur autem prætor te inimicum paternum in consilium uocauit? quæ quidem quàm sancte solita sint obseruari, scitis omnes. nunc accusamur ab ijs, qui in consilio nobis fuerunt. decreuit Flaccus: num aliud, atque



oportuit? in liberos: num aliter, ac censuit senatus?  
 in absentem decreuit: cum ibidem esses, cum pro-  
 dire nolles. non est hoc in absentem reum. SENAT-  
 VSCONSVLTVM, ET DECRETVM  
 FLACCI. quid, si non decreuisset, sed edixisset,  
 quis posset uere reprehendere? num etiam fratris mei  
 literas, plenissimas humanitatis, & æquitatis, repre-  
 \* hensurus? quas easdem mulieres à me datas apud Pa-  
 taranos requisiiuit. Recita literas Q. Ciceronis. quid?  
 hæc Apollonidenfes, occasione facta, ad Flaccum non  
 detulerunt? apud Orbium acta non sunt? ad Glo-  
 bulum delata non sunt? ad senatum nostrum me con-  
 sule non ne legati Apollonidenfes omnia postulata de  
 iniurijs unius Deciani detulerunt? ad hæc, prædia e-  
 tiam in censu dedicauiſti: mitto, quòd aliena; mit-  
 to, quòd possessa per uim; mitto, quòd conuicta ab  
 Apollonidenſibus; mitto, quòd à Pergamenis repu-  
 diata; mitto etiam, quòd à nostris magistratibus in  
 integrum restituta; mitto, quòd nullo in iure, ne-  
 que in re, neque possessione tua: illud quero, sint ne  
 ista prædia censui censendo? habeant ius ciuile? sint,  
 nec ne sint, mancipi? subſignari apud ærarium, a-  
 pud censorem possint? in qua tribu denique ista præ-  
 dia censuiſti? commiſiſti, si tempus aliquod grauius  
 accidisset, ut ex ijsdem prædijs, & Apolloniae, & Ro-  
 mæ imperatum, esset tributum. uerum esto: glo-  
 riosus fuiſti: uoluisti magnum agri modum cenſeri,  
 & eius agri, qui diuidi plebi Romanæ non po-  
 teſt. census es præterea numeratæ pecuniæ centum tri-  
 ginta millia. eam opinor tibi numeratâ non eſſe abs te.

sed hæc omitto. census es mancipia Amyntæ: neque huic ullam in eo fecisti iniuriam: possidet enim ea mancipia Amyntas. ac primo quidem pertimuit, cum te audisset servos suos esse censum: retulit ad iurisconsultos. constabat inter omnes, si aliena censendo Decianus sua facere posset, cum maxima habiturum esse.

Desunt nonnulla.

Habetis causam inimicitiarum, qua causa inflammatus Decianus ad Lælium detulerit hanc opimam accusationem. nam ita questus est Lælius, cum de perfidia Deciani diceret. Qui mihi auctor fuit, qui causam ad me detulit, quem ego sum secutus; is a Flacco corruptus est, is me deseruit, ac prodidit. siccine tu auctor tandem eum, cui tu in consilio fuisses, apud quem omnes gradus dignitatis tuæ retinuisses, prudentissimum hominem, nobilissima familia natum, optime de republica meritum, in discrimen omnium fortunarum uocavisti? scilicet defendam Decianum, qui tibi in suspicionem nullo suo delicto uenit. non est, mihi crede, corruptus. quid enim fuit, quo ab eo redimeretur? ut duceret iudiciū? cui sex horas omnino lex dedit. quantum tandem ex his horis detraheret, si tibi morem gerere uoluisset? nimirum illud est, quod ipse suspicatur. inuidisti ingenio subscriptoris tui. quod ornabat facile

locum, quem prehenderat, et acute testes interrogabat,  
 \* aut circumueniebat, (fortasse fecisti, & tu & populi  
 sermo ne exciperes) iccirco Decianum usque ad coronam  
 applicuisti. sed ut hoc uerissimile est, ita haud uerissimi-  
 le Decianum à Flacco esse corruptum. ita scitote iudices  
 esse cetera: uel quod ait Luceius, L. Flaccum sibi da-  
 re cupisse, ut à fide se abduceret, sestertium uicies. &  
 eum tu accusas auaritiæ, quem dicis sestertium uicies  
 uoluisse perdere? nam quid emebat, cum te emebat?  
 ut ad se transires? quam partem causæ tibi daremus?  
 an ut enunciare consilia Lælij? qui testes ab eo prodire-  
 rent? quid? nos non uidebamus habitare una? quis  
 hoc nescit? tabulas in Lælij potestate fuisse, non du-  
 bium est. an, ne uehementer, ne copiose accusares?  
 nunc facis suspicionem: ita enim dixisti, ut nescio quid  
 abs te impetratum esse uideatur. at enim Androni Se-  
 silio grauis iniuria facta est, & non ferenda, quod,  
 cum esset uxor Valeria intestata mortua, sic egit eam  
 rem Flaccus, quasi ad ipsum hæreditas pertineret. in-  
 quo quid reprehendas, scire cupio: quod falsum in-  
 tenderit? qui doces? ingenua, inquit, fuit. o peritum  
 iuris hominem. quid? ab ingenuis mulieribus hæredita-  
 tes lege non ueniunt? in manum, inquit, conuenerat.  
 nunc audio: sed quæro, utrum usu, an coemptione.  
 usu non potuit: nihil enim potest de tutela legitima si-  
 ne omnium tutorum auctoritate diminui. coemptione  
 ne? omnibus ergo auctoribus: in quibus certe Flac-  
 cum fuisse non dicis. Relinquitur illud, quod uoci-  
 ferari non desistit, non debuisse, cum prætor esset,  
 suum negotium agere, aut mentionem facere hære-



ditatis . maximas audio tibi L. Luculle , qui de L. Flacco sententiam laturus es , pro tua eximia liberalitate , maximisq; beneficij in tuos uenisse hereditates , cum Asiam prouinciam consulari imperio obtineres . si quis eas suas esse dixisset , concessisses ? tu T. Veeti , si qua tibi in Africa uenerit hereditas , usu amittes ? an tuum , nulla auaritia , salua dignitate retinebis ? at istius hereditatis iam Globulo praetore Flacci nomine petita possessio est . non igitur impressio , non occasio , non uis , non tempus , non imperium , non secures ad iniuriam faciendam Flacci animum impulerunt . itaque eodem etiam M. Lurco , uir optimus , meus familiaris , conuertit aculeum testimonij sui : negauit , a priuato pecuniam in prouincia praetorem petere oportere . cur tandem M. Lurco non oportet ? eripere , extorquere , accipere contra leges non oportet : petere non oportere , nunquam ostendes , nisi docueris non licere . an legationes sumere liberas exigendi causa , sicut & tu ipse nuper , & multi uiri boni saepe fecerunt , rectum est ; quod ego non reprehendo , socios uideo queri : praetorem , si hereditatem in prouincia non reliquerit , non solum reprehendendum , uerum etiam condemnandum putas ? doti , inquit , Valeria pecuniam omnem suam dixerat . nihil istorum explicari potest , nisi ostenderis , illam in tutela Flacci non fuisse . si fuit : quaecunque sine hoc auctore est dicta dos , nulla est . sed tamen Lurconem , quanquam pro sua dignitate moderatus est in testimonio dicendo religioni suae , tamen iratum Flacco esse uidistis . neque enim occultauit causam iracundiae suae , neque reticendam pu-



tauit : questus est libertum suum à Flacco prætore esse  
 damnatum . ò conditiones miseras administrandarum  
 prouinciarum : in quibus diligentia plena simultatum  
 est , negligentia uituperationum ; ubi seueritas pericu-  
 losa est , liberalitas ingrata ; sermo insidiosus , assenta-  
 tio perniciofa ; frons omnium familiaris , multorum a-  
 nimus iratus ; iracundiæ occultæ , blanditiæ apertæ : ue-  
 nientes prætores expectant , præsentibus inseruiunt ,  
 abeuntes deserunt . sed omittamus querelas ; ne no-  
 strum cõsiliu in omittendis prouincijs laudare uidea-  
 mur . Literas misit de uillico P. Septimij , hominis or-  
 nati ; qui uillicus cædem fecerat . Septimium arden-  
 tem iracundia uidere potuistis . In Lurconis libertum  
 iudicium ex edicto dedit . hostis est Lurco . quid igitur ?  
 hominum gratiosorum , splendorumq ; libertis . fuit  
 Asia tradenda ? an similtates nescio quas cum libertis  
 uestris Flaccus exercuit ? an uobis in uestris uestroruq ;  
 causis seueritas odio est , eandem laudatis cum de nobis  
 iudicatis ? At iste Andro , spoliatus bonis , ut dicitis ,  
 ad dicendum testimoniu non uenit . quid , si ueniat ?  
 decisionis arbiter C. Cæcilius fuit , quo splendore uir ,  
 qua fide , qua religione ? obsignator C. Sestilius , Lur-  
 conis sororis filius , homo & pudens , & constans ,  
 & grauis . si uis erat , si fraus , si metus , si cir-  
 cumscriptione ; quis pactionem fieri , quis adesse istos  
 coegit ? quid , si ista omnis pecunia huic adolescentulo  
 L. Flacco reddita est ? si petita ? si redacta ? si per hunc  
 Antiochum , paternum huius adolescentis libertum , se-  
 ni illi Flacco probatissimum ? uidemur ne non solum  
 auaritiæ crimen effugere , sed etiam liberalitatis lau-

dem assequi singularem? cōmunem enim hæreditatem, quæ æqualiter ad utrumque lege uenisset, concessit adolescenti propinquo suo, nihil ipse attigit de Valerianis bonis: quod statuerat facere; adductus huius pudore, & non amplissimis patrimonij copijs, id non solum fecit, sed etiam prolixè cumulateq; fecit. ex quo intelligi debet, eum contra leges pecunias non cepisse, qui tam fuerit in hæreditate concedenda liberalis. At Falcidianum crimen ingens. talenta quinquaginta sese Flacco dicit dedisse. audiamus hominem: non adest. quo modo igitur dicet? epistolam mater eius profert, & alteram soror. scriptum ad se dicunt esse ab illo, tantam pecuniam Flacco datam. ergo is, qui si aram tenens iuraret, crederet nemo; per epistolam, quod uolet, iniuratus probabit? at qui uir? quàm non amicus suis ciuibus? qui patrimonium satis lautum, quod hic nobiscum conficere potuit, Græcorum conuiujs maluit dissipare. quid attinuit relinquere hanc urbem? libertate tam præclara carere? adire periculum nauigandi? quasi bona comesse Romæ non liceret. nunc denique materculæ suæ festiuus filius, aniculæ minime suspiciosa, purgat se per epistolam, ut eam pecuniam, quam consecerat, non consumpsisse, sed Flacco dedisse uideatur. at fructus isti Trallianorum Globulo prætoris uenerant: Falcidius emerat HS nongentis millibus. si dat tantam pecuniam Flacco, nempe iccirco dat, ut rata sit emptio: emit igitur aliquid, quod certe multo pluris esset: dat de lucro, nihil detrahit de uiuo: minus igitur lucrifacit. cur Albanum uentre iubet? cur matri præterea blanditur? cur epistolis & sororis, &

matris imbecillitatem aucupatur? postremo cur non au-  
dimus ipsum? retinetur, credo, in prouincia. mater ne-  
gat. uenisset, inquit, si esset denunciatum. tu certe  
coegisses, si ullum firmamentum in illo teste posuisses.  
sed hominē ab negotio abducere noluisti: magnum erat  
ei certamen propositum, magna cum Græcis contentio:  
qui tamen, ut opinor, iacent uicti: nam iste unus to-  
tam Asiam magnitudine poculorum, bibendoq; supe-  
rauit. sed tamen quis tibi Læli de epistolis istis indica-  
uit? mulieres negant se scire. quis? is ipse? igitur ille  
tibi, se ad matrem, & sororem scripsisse, narrauit?  
an etiam scripsit rogatu tuo? at uero M. Ebutium, con-  
stantissimum, & prudentissimum hominem, Falcidij  
affinem, nihil interrogas? nihil eius generum, pari fide  
præditum, C. Manlium? qui profecto de tanta pecu-  
nia, si esset data, nihil audisse non posset. his tu igitur  
epistolis Deciane recitatis, his mulierculis productis, il-  
lo absente auctore laudato, tantum te crimen probatu-  
rum putasti? præsertim cum ipse, non deducendo Fal-  
cidium, iudicium feceris, plus falsam epistolam habi-  
turam ponderis, quam ipsius præsentis fictam uocem,  
& simulatum dolorem. Sed quid ego de epistolis Falci-  
dij, aut de Androne Sestilio, aut de Deciani censu tã-  
diu disputo, postremo de salute omnium nostrum, de  
fortunis ciuitatis, de summa reip. taceo? quam uos  
uniuersam in hoc iudicio uestris humeris, uestris, in-  
quam, humeris iudices sustinetis. uidetis, in quo mo-  
tu temporum, quanta in conuersione rerum ac pertur-  
batione uersemur. cum alia multa certi homines, tum  
hoc uel maxime moliuntur, ut uestre quoque mentes,



uestra iudicia, uestrae sententiae optimo cuique infestissimae, atque inimicissimae reperiantur. grauius iudicia pro reip. dignitate, multa de coniuratorum scelere fecistis. non putant satis conuersam esse remp. nisi in eandem impiorum poenam optime meritos ciues detruserint. oppressus est C. Antonius. esto: habuit quandam ille infamiam suam: neque tamen ille ipse, pro meo iure dico, uobis iudicibus damnatus esset; cuius damnatione sepulcrum L. Catilinae floribus ornatum, hominum audacissimorum, ac domesticorum hostium conuentu epulisq; celebratum est. iusta Catilinae facta sunt. nunc à Flacco Lentuli poena per uos expetuntur. quam potestis P. Lentulo, qui uos in complexu liberorum coniugumq; uestrarum trucidatos incendio patriae sepelire conatus est, maetare uictimam gratiorem, quam si L. Flacci sanguine illius nefarium in uos omnes odium saturaueritis? litemus igitur Lentulo, parentem Cethego, reuocemus electos, nimiae pietatis, & summi amoris in patriam uicissim nos poenas, si ita diis placet, sufferamus. nos iam ab iudicibus nominamur, in nos crimina finguntur, nobis pericula comparantur. quae si per alios agerent; si denique per populi nomen ciuium imperitorum multitudinem concitassent: aequiore animo ferre possemus. illud uero ferri non potest, quod per senatores, & per equites R. qui haec omnia pro salute omnium communi consilio, una mente, atque uirtute gesserunt, harum rerum auctores, duces, principes spoliari omnibus fortunis, ac de ciuitate expelli posse arbitrantur. etenim populi R. perspiciunt eam mentem, & uoluntatem: omnibus



rebus, quibus potest, populus R. significat, quid sen-  
 tiat: nulla uarietas est inter homines opinionis, nulla  
 uoluntatis, nulla sermonis. quare, si quis illuc me uo-  
 cat, uenio: populum R. disceptatorem non modo non  
 recusato, sed etiam depono: uis absit, ferrum ac lapides  
 remoueantur, operæ faceffant, seruitia sileant: nemo  
 erit tam iniustus, qui me audierit, sit modo liber &  
 ciuis, quin potius de præmijs meis, quàm de pœna, co-  
 gitandum putet. ò dij immortales. quid hoc miserius est  
 nos, qui P. Lentulo ferrum & flammam de manibus  
 extorsimus, imperitæ multitudinis iudicio confidimus,  
 lectissimorum ciuium, & amplissimorum senten-  
 tias pertimescimus. Ne Aquillium patres nostri, mul-  
 tis auaritiæ criminibus, testimonijsq; conuictum, quia  
 cum fugitiuis fortiter bellum gesserat, iudicio liberaue-  
 runt. consul ego nuper defendi C. Pisonem: qui quia  
 consul fortis constansq; fuerat, incolumis est reip. con-  
 seruatus. defendi item consul L. Murænam consulem  
 designatum: nemo illorum iudicum, clarissimis uiris ac-  
 cusantibus, audiendum sibi de ambitu putauit; cum,  
 bellum iam gerente Catilina, omnes me auctore duos con-  
 sules calendis Ian. scirent esse oportere. innocens & bo-  
 nus uir, & omnibus rebus ornatus, bis hoc anno me  
 defendente absolutus est A. Thermus. quanta reip. cau-  
 sa lætitia populi R. quanta gratulatio consecuta est?  
 semper graues & sapientes iudices in rebus iudicandis,  
 quid utilitas ciuitatis, quid communis salus, quid reip.  
 tempora poscerent, cogitauerunt. cum tabella uobis  
 dabitur iudices, non de Flacco dabitur solum, dabitur  
 de ducibus auctioribusq; conseruandæ ciuitatis, dabitur  
 de

de ducibus auctoribusq; conseruandæ ciuitatis, dabitur de omnibus bonis ciuibus, dabitur de uobismet ipsis, dabitur de liberis uestris, de uita, de patria, de salute communi. non iudicatis in hac causa de exteris nationibus, non de socijs. de uobis ac uestra rep. iudicatis. quòd si prouinciarum uos ratio magis mouet, quàm uestra: ego uero non modo non recuso, sed etiam postulo, ut prouinciarum auctoritate moueamini: etenim oppo-  
nemus Asiæ prouinciæ primum magnam partem eiusdem prouinciæ, quæ pro huius periculis legatos laudatoresq; misit; deinde prouinciam Galliam, prouinciam Ciliciam, prouinciam Hispaniam, prouinciam Cretam. Græcis autem, Lydis, & Phrygiis, & Mysis obis-  
stent Massilienses, Rhodij, Lacedæmonij, Athenien-  
ses, cuncta Achæia, Thessalia, Bœotia. Septimio & Celio testibus P. Seruilius & Q. Metellus, huius pu-  
doris, integritatisq; testes, repugnabunt. Asiaticæ iurisdictioni urbana iurisdictione respondebit. annui tem-  
poris criminationem omnis ætas L. Flacci, & perpetua uita defendet. & si prodesse L. Flacco iudices debet, quòd se tribunum militum, quòd quæstorem, quòd legatum imperatoribus clarissimis, exercitibus ornatissimis, prouincijs grauissimis dignū suis maioribus præstitit: prosit, quòd hic uobis uidentibus, in periculis communibus omnium uestrum sua pericula cum meis coniunxit: pro sint honestissimorum municipiorum, coloniarumq; laudationes: pro sit etiam senatus, populiq; R. præclara et uera laudatio. ò nox illa, quæ pene æternas huic urbi tenebras attulisti, cum Galli ad bellum, Catilina ad urbem, coniurati ad ferrum, & flammam

uocabantur; cum ego te Flacce, cœlum, noctemq; con-  
 testans, flens flentem obtestabar; cum tuæ fidei optimæ  
 et spectatissimæ salutem urbis et ciuium cōmendabam.  
 tu, tu Flacce, prætor, communis exitij nuncios cepisti:  
 tu inclusam in literis reip. pestem deprehendisti: tu pe-  
 riculorum indicia, tu salutis auxilia ad me, & ad se-  
 natum attulisti. quæ tibi tum gratiæ sunt à me actæ?  
 quæ ab senatu? quæ à bonis omnibus? quis tibi, quis  
 C. Pontinio, fortissimo uiro, quenquam bonum puta-  
 ret unquam non salutem, uerum honorem ullum dene-  
 gaturum? ò non illæ Decembres, quæ me consule fui-  
 stis, quem ego diem uere natalem huius urbis, aut cer-  
 te salutarem appellare possum. ò nox illa, quam iste  
 est dies consecutus, fausta huic urbi; miserum me, me-  
 tuo ne funesta nobis. qui tum animus L. Flacci? (ni-  
 hil dicam enim de me) qui amor in patriam? quæ uir-  
 tus? quæ græuitas extitit? sed quid ea commemoro,  
 quæ tum, cum agebantur, uno consensu omnium, una  
 uoce populi R. uno orbis terræ testimonio in cœlum lau-  
 dibus efferebantur? nunc uereor, ne non modo non pro-  
 sint, uerum etiam aliquid obsint. etenim multo acrio-  
 rem improborum interdum memoriâ esse sentio, quàm  
 bonorum. ego te, si quid grauius acciderit, ego te, in-  
 quam, Flacce perdidero. mea dextra illa, mea fides,  
 mea promissa, cum te, si remp. conseruaremus, om-  
 nium bonorum præsidio, quoad uiueres, non modo  
 munitum, sed etiam ornatum fore pollicebar. putauî,  
 sperauî, etiam si honos noster uobis uilior fuisset, sa-  
 lutem certe caram futuram. at L. Flaccum. quidem  
 iudices, si, quod dii immortales omen auertant, gra-



uis iniuria afflixerit, nunquam tamen prospexisse uestræ saluti, consuluisse uobis, liberts, coniugibus, fortunis uestris poenitebit: semper ita sentiet, talem se animum & generis dignitati, & pietati suæ, & patriæ debuisse: nos ne poeniteat tali ciui non perpercisse, per deos immortales iudices provideate. quotus enim quisque est, qui hanc in rep. sectam sequatur? qui uobis, qui uestri similibus placere cupiat? qui optimi atque amplissimi cuiusque hominis, atque ordinis auctoritatem magni putet? illam uiam sibi uident expeditiorem ad honores, & ad omnia, quæ concupiuerunt. sed cetera sint eorum: sibi habeant potentiam, sibi honores, sibi cæterorum commodorum summas facultates: liceat ijs, qui hæc salua esse uoluerunt, ipsis esse saluis. nolite iudices existimare eos, quibus integrum est, qui nondum ad honores accefferunt, non expectare huius exitum iudicii. si L. Flacco tantus amor in bonos omnes, tantum in rep. studium calamitati fuerit, quem post hæc tam amentem fore putatis, qui non illam uiam uitæ, quam ante præcipitem & lubricam esse ducebat, huic planæ & stabili præponendam esse arbitretur? quod si talium ciuium uos iudices tædet, ostendite: mutant sententiam, qui potuerint: constituent, quid agant, quibus integrum est: nos, qui iam progressi sumus, hunc exitum nostræ temeritatis feremus. sin hoc animo quamplurimos esse uultis, declarabitis hoc iudicio, quid sentiat. huic, huic misero puero, uestro ac liberorum uestrorum supplici iudices, hoc iudicio uiuendi præcepta dabit. cui si patrem conseruatis, qualis ipse debeat esse ciuis, præscribetis: sin eripitis, ostende-



## O R A T I O

tis bonæ rationi, & constanti, & graui nullum à uo-  
 bis fructum esse propositum: qui uos, quoniam est id  
 ætatis, ut sensum iam percipere possit ex mœrore pa-  
 trio, auxilium nondum patri ferre possit, orat, ne suum  
 luctum patris lacrymis, patris mœrorem suo fletu au-  
 geatis: qui etiam me intuetur, me uultu appellat,  
 meam quodammodo flens fidem implorat, ac repetit  
 eam, quam ego patri suo quondam pro salute patriæ  
 sponderim dignitatem. miseremini familiæ iudices;  
 miseremini fortissimi patris, miseremini filij: nomen-  
 clarissimum, & fortissimum, uel generis, uel uetu-  
 statis, uel hominis causa, reip. reseruate.

## PRO P. SYLLA.

## ORATIO XXV.

Axime uellem iudices, ut P. Sylla et  
 antea dignitatis suæ splendorem obti-  
 nere, & post calamitatem acceptam  
 modestiæ fructum aliquem potuisset  
 percipere. sed quoniam ita tulit casus  
 infestus, ut amplissimo in honore cum communi ambi-  
 tionis inuidia, tum singulari Antronij odio euerteretur;  
 & in his pristinae fortunæ reliquijs miseris, et af-  
 flictis, tamen haberet quosdam, quorum animos ne  
 supplicio quidem suo satiare posset: quanquam ex hu-  
 ius incōmodis magnam animo molestiam capio, tamen,  
 in cæteris malis, facile patior oblatum mihi tempus, in  
 quo boni uiri lenitatem meam, misericordiamq; notam  
 omnibus quondam, nunc quasi intermissam agnosce-  
 rent; improbi, ac perditī ciues edomiti, atque uicti, præ-  
 cipitante rep. uehementem me fuisse, atque fortem,  
 conseruata mitem, ac misericordem faterentur. et quo-  
 niam L. Torquatus meus familiaris ac necessarius iu-  
 dices existimauit, si nostram in accusatione sua necessi-  
 tatem familiaritatemq; uiolasset, aliquid se de aucto-  
 ritate meæ defensionis posse detrachere, cum huius peri-  
 culi propulsatione coniungam defensionem officij mei.  
 quo quidem genere non uterer orationis iudices hoc tem-  
 pore, si mea solum interesset: multis enim mihi locis  
 & data facultas est, & sæpe dabitur de mea laude di-  
 cendi. sed ut ille iudices, quantum de mea auctoritate  
 diripuisset, tantum se de huius præsidij diminuturum

## O R A T I O

sperauit : sic hoc ego sentio , si mei factirationem uo-  
 bis , constantiamq; huius officij ac defensionis probaue-  
 ro , causam quoque me P. Syllæ probaturum . ac pri-  
 mum abste illud L. Torquate quæro , cur me a cæteris  
 clarissimis uiris , ac principibus cultatis in hoc officio ,  
 atque in hoc defensionis iure secernas ? quid enim est ,  
 quamobrem abste Q. Hortensij factum , clarissimi ui-  
 ri , atque ornatissimi ciuis , non reprehendatur , repre-  
 hendatur meum ? nam si initum est consilium à P. Syl-  
 la inflammandæ ciuitatis , huius extinguendi imperij ,  
 delendæ urbis , mihi maiorem hæc res dolorem , quàm  
 Q. Hortensio , mihi maius odium afferre debet ? meū  
 denique grauius esse iudicium , qui adiuuandus in his  
 causis , qui oppugnandus , qui defendendus , qui dese-  
 rendus esse uideatur ? ita , inquit : tu enim inuestiga-  
 sti , tu patefecisti coniurationem : quod cum dicit , non  
 attendit , eum , qui patefecerit , hoc curasse , ut id om-  
 nes uiderent , quod antea fuisset occultum . quare ista  
 coniuratio si patefacta per me est , tam patet Horten-  
 sio , quàm mihi . quem cum uideas honore hoc , auctori-  
 tate , uirtute , consilio præditum non dubitasse , quin  
 innocentem P. Syllam defenderet : quæro , cur , qui adi-  
 tus ad causam Hortensio patuerit , mihi interclusus esse  
 debuerit ? quæro illud etiam , si me , qui defendo , re-  
 prehendendum putas esse , quid tandem existimes de his  
 summis uiris & clarissimis ciuibus , quorum studio &  
 dignitate celebrari hoc iudicium et ornari , causam de-  
 fendi huius innocentis uides . non enim una est ratio de-  
 fensionis ea , quæ posita est in oratione : omnes , qui ad-  
 sunt , qui laborant , qui saluum uolunt , pro sua par-

te, atque auctoritate defendunt. an uero in quibus  
subsellijs hæc ornamenta ac lumina reip. uiderem, in  
his me apparere nollem, quorum ego opera illum in lo-  
cum, atque in hanc celsissimam sedem dignitatis atque  
honoris, multis meis ac magnis laboribus et periculis, a-  
scendissem? atque ut intelligas Tarquate, quem accuses;  
si te id offendit, quod ego, qui hoc genere quæstionis de-  
fenderim neminem, non desim P. Syllæ; recordare de  
cæteris, quos adesse huic uides: intelliges, & de hoc,  
& de cæteris iudicium meum et horum par atque unum  
fuisse. quis nostrum adfuit Vargunteio? nemo: ne  
hic quidem Q. Hortensius, præsertim qui illum so-  
lus antea de ambitu defendisset: non enim iam se ullo  
officio cum illo coniunctum arbitrabatur, cum ille, tan-  
to scelere commissso, omnium officiorum societatem dire-  
misset. quis nostrum Ser. Syllam, quis P. Lentulum,  
quis M. Leccam, quis C. Cornelium defendendum pu-  
tauit? quis his horum adfuit? nemo. quid ita? quia  
cæteris in causis etiam nocentes, uiri boni, si necessarij  
sunt, non defendendos esse non putant; in hoc crimine  
non solum leuitatis est culpa, uerum etiam quadam con-  
tagio sceleris, si defendas eum, quem obstrictum esse  
patriæ suspicere. quid Antronio? non ne sodales, non  
collegæ sui, non ueteres amici, quorum ille copia quon-  
dam abundarat, non hi omnes, qui sunt in rep. prin-  
cipes, defuerunt? immo etiam testimonio plerique læse-  
runt? statuerant tantum illud esse maleficio, quod  
non modo non occultari per se, sed etiam aperiri, illu-  
strariq; deberet. quamobrem quid est quod mirere, si  
cum iisdem me in hac causa uides adesse, cum qui-



## O R A T I O

bus in cæteris intelligis abfuisse? nisi uero me unum  
 uis ferum præter cæteros, me asperum, me inhumanum  
 existimari, me, singulari immanitate, & crudelitate  
 præditum. hanc mihi tu si propter res meas gestas im-  
 ponis in omni uita mea personam Torquate, uehemen-  
 ter erras. me natura misericordem, patria seuerum,  
 crudelem nec patria, nec natura esse uoluit. denique  
 istam ipsam personam uehementem & acrem, quam  
 mihi tum tempus, & resp. imposuit, iam uoluntas,  
 & natura ipsa detraxit. illa enim ad breue tempus  
 seueritatem postulauit, hæc in omni uita misericordiam  
 lenitatemq; desiderat. quare nihil est, quod ex tanto  
 comitatu uirorum amplissimorum me unum abstra-  
 has. simplex officium, atque una est omnium bonorum  
 causa. nihil erit, quod admirare posthac, si in ea par-  
 te, in qua hos animaduuerteris, me uidebis: nulla est  
 enim in rep. causa mea propria: tempus agendi fuit  
 magis mihi proprium, quam cæteris; doloris uero, &  
 timoris, & periculi fuit illa causa communis. neque  
 enim princeps tunc ad salutem esse potuissem, si esse  
 alij comites noluissem. quare necesse est, quod mihi  
 consuli præcipuum fuit præter alios, id iam priuato  
 cum cæteris esse commune. neque ego hoc partiendæ in-  
 uidiæ, sed communicandæ laudis causa loquor. oneris  
 mei partem nemini impertio, gloriæ bonis omnibus. in  
 Antronium testimonium dixisti, inquit: Syllam defen-  
 dis. hoc totum eiusmodi est iudices, ut, si ego sim in-  
 constans ac leuis, nec testimonio fidem tribui conuene-  
 rit, nec defensioni auctoritatem: sin est in me ratio reip.  
 religio priuati officij, studium retinendæ uolunta-

tis bonorum, nihil minus accusator debet dicere, quàm à me defendi Syllam, testimonio laesum esse Antonium. uideor enim non solum studium ad defendendas causas, uerum opinionis aliquid & auctoritatis asferre: quæ & moderate ego utar iudices, & omnino non uter, si ille me non coegisset. Duæ coniurationes abs te Torquate constituuntur: una, quæ Lepido, & Tullo consulibus, patre tuo consule designato facta esse dicitur: altera, quæ me consule. harum in utraque Syllam dicis fuisse. patris tui, fortissimi uiri, atque optimi consulis, scis me consilijs non interfuisse: scis me, cum mihi summus tecum usus esset, tamen illorum expertem temporum, & sermonum fuisse: credo, quòd nondum penitus in rep. uersabar, quòd nondum ad propositum mihi finem honoris perueneram, quòd mea me ambitio, & forensis labor ab omni illa cogitatione abstraheret. quis ergo intererat uestris consilijs? omnes hi, quos uides huic adesse, et in primis Q. Hortensius: qui cum propter honorem, ac dignitatem, atque animum eximium in rep. tum propter summam familiaritatem, summumq; amorem in patrem tuum, tum communibus, tum præcipuis patris tui periculis commouebatur. ergo istius coniurationis crimen defensum ab eo est, qui interfuit, qui cognouit, qui particeps & consilij uestri fuit, & timoris. cuius in hoc crimine propulsando cum esset copiosissima atque ornatissima oratio, tamen non minus inerat auctoritatis in ea, quàm facultatis. illius igitur coniurationis, quæ facta contra uos, delata ad uos, à uobis prolata esse dicitur, ego testis esse non potui: non modo enim nihil comperi,

sed uix ad aures meas istius suspicionis fama peruenit. qui uobiscum in consilio fuerunt, qui uobiscum illa cognorunt, quibus ipsis periculum tum constari putabatur, qui Antronio non adfuerunt, qui in illum testimonia grauiam dixerunt, hunc defendunt, huic adsunt, in huius periculo declarant, se non crimine coniurationis, ne adessent cæteris, sed hominum maleficio deterritos esse. mei consulatus autem tempus, & crimen maxime coniurationis à me defendetur. atque inter nos partitio non est fortuito iudices, nec temere facta: sed cum uideremus eorum criminum nos patronos adhiberi, quorum testes esse possemus, uterque nostrum id sibi suscipiendum putauit, de quo aliquid scire ipse atque existimare potuisset. & quoniam de criminibus superioris coniurationis Hortensium diligenter audistis, de hac coniuratione, quæ me consule facta est, hoc primum attendite. Multa, cum essem consul, de summis reip. periculis audiui, multa quæsiui, multa cognoui: nullus unquam de Sylla nuncius ad me, nullum indicium, nullæ literæ peruenerunt, nulla suspicio. multum hæc uox fortasse deberet ualere eius hominis, qui consul insidias reip. consilio inuestigasset, ueritate aperuisset, magnitudine animi uindicasset, cum ipse nihil audisse de P. Sylla, nihil suspicatum esse diceret: sed ego nondum uitor hac uoce ad hunc defendendum; ad purgandum me potius uitor, ut mirari Torquatus desinat, me, qui Antronio abfuerim, Syllam defendere. quæ enim Antronij fuit causa? quæ Syllæ est? ille ambitus iudicium tollere, ac disturbare primum conflato uoluit gladiatorum ac fugitiuorum tumultu, deinde, id, quod uidi-

mus omnes, lapidatione, atque concursu: Sylla, si sibi suus pudor ac dignitas non prodesset, nullum auxilium requisivit. ille damnatus ita se gerebat non solum consilijs & sermonibus, uerum etiam aspectu atque uultu, ut inimicus esse amplissimis ordinibus, infestus bonis omnibus, hostis patriæ uideretur: hic se ita fractum illa calamitate atque afflictum putauit, ut nihil sibi ex pristina dignitate superesse arbitraretur, nisi quod modestia retinuisset. hac uero in coniuratione quid tam coniunctum, quàm ille cum Catilina, cum Lentulo? quæ tanta societas ullis inter se rerum optimarum, quanta ei cum illis sceleris, libidinis, audaciæ? quod flagitium Lentulus non cum Antronio concepit? quod sine eodem illo Catilina facinus admisit? cum interim Sylla cum eisdem ipsis non modo noctem solitudinemque non quaereret, sed ne mediocri quidem sermone & congressu coniungeretur. illum Allobroges, maximarum rerum uerissimi indices, illum multorum literæ, ac nuncijs coarguerunt: Syllam interea nemo insimulauit, nemo nominauit. postremo, reiecto, siue emissio iam ex urbe Catilina, ille arma misit, cornua, tubas, falces, signa, legiones; ille relictus intus, expectatus foris, Lentuli poena compressus, conuertit se aliquando ad timorem, nunquam ad sanitatem: hic contra ita quieuit, ut eo tempore omni Neapoli fuerit, ubi neque homines fuisse putantur huius affines suspicionis, & locus est ipse non tam ad inflammandos calamitosorum animos, quam ad consolandos accommodatus. propter hanc igitur tantam dissimilitudinem hominum atque causarum, dissimilem me in utroque præbui. ue-



niebat enim ad me , et sæpe ueniebat Antronius multis cum lacrymis supplex, ut se defenderem : & se meum condiscipulum in pueritia, familiarem in adolescentia, collegam in quæstura commemorabat fuisse : multa mea in se, non nulla etiam sua in me proferebat officia. quibus ego rebus iudices ita fleſcebar animo, atque frangebar, ut etiam ex memoria, quas ipse mihi fecerat insidias, deponerem ; ut iam immisſum eſſe ab eo C. Cornelium, qui me in ſedibus meis, in conſpectu uxoris meæ ac liberorum meorum trucidaret, obliuiſcerer. quæ ſi de uno me cogitaſſet, qua mollitia ſum animi ac lenitate, nunquam mehercule illius lacrymis ac precibus reſtitiffem. ſed cum mihi patriæ, cum ueſtrorum periculorum, cum huius urbis, cum illorum delubrorum atque templorum, cum puerorum infantium, cum matronarum ac uirginum ueniebat in mentem, et cum illæ infeſtæ ac funeſtæ faces, uniuerſumq; totius urbis incendium, cum tela, cum cædes, cum ciuium cruor, cum cinis patriæ uerſari ante oculos, atque animum memoria reſfricare cœperat ; tum denique ei reſiſtebam, neque ſolum illi hoſti ac parricidæ, ſed his etiam propinquis illius Marcellis patri & filio, quorum alter apud me parentis grauitatem, alter filij ſuauitatem obtinebat : neque me arbitrabar ſine ſummo ſcelere poſſe, quod maleſcium in alijs uindicaſſem, idem in illorum ſocio, cum ſcirem, defendere. atque idem neque P. Syllam ſupplicem ferræ, neque eoſdem Marcellos, neque huius M. Meſſallæ hominis neceſſarij preces ſuſtinere potui : neque enim eſt cauſa aduerſata natura ; nec homo, nec res miſericordiæ meæ repugnauit : nuſquam

nomen, nusquam uestigium fuerat, nullum crimen, nullum indicium. suscepi causam Torquate, suscepi, & feci libenter, ut me, quem boni constantem semper, ut spero, existimassent, eundem ne improbi quidem crudellem dicerent. Hic ait se ille iudices regnum meum ferre non posse. quod tandem Torquate regnum? consualatus, credo mei, in quo ego imperavi nihil, sed contra patribus conscriptis, & bonis omnibus parui. quo in magistratu non institutum est à me iudices regnum, sed non permissum. quem tum in tanto imperio, tanta potestate non dicis fuisse regem, nunc priuatum regnare dicis? quo tandem nomine? quòd, in quos testimonia dixisti, inquit, damnati sunt; quem defendis, sperat se absolutum iri. hic tibi ego de testimonijs meis hoc respondeo: si falsum dixerim, te in eos dixisse; si uerum, non esse hoc regnare, cum uerum iuratos dicas probare. de huius spe tantum dico, nullas à me opes P. Syllam, nullam potentiam, nihil denique præter fidem defensionis expectare. nisi tu, inquit, causam recepisses, nunquam mihi restitisset, sed indicta causa profugisset. si iam hoc tibi concedam, Q. Hortensium, tanta grauitate hominem, si hos tales uiros non suo stare iudicio, sed meo; si hoc tibi dem, quod credi non potest, nisi ego huic adessem, hos adfuturos non fuisse: uter tandem rex est, is ne, cui innocentes homines non resistunt; an is, qui calamitosos non deserit? at hic etiam, id quod tibi necesse minime fuit, facetus esse uoluisti, cum Tarquinium, & Numam, & me tertium peregrinum regem esse dixisti. mitto iam de rege querere: illud quero, peregrinum cur me esse dixeris: nam si ita

sum, non tam est admirandum regem esse me, quia, ut tu uis, etiam peregrini reges Romæ fuerunt, quam consulem Romæ fuisse peregrinum. hoc dico, inquit, te esse ex municipio. fateor, & addo etiam, ex eo municipio, unde iterum iam salus huic urbi imperioq; missa est. sed scire ex te peruelim, quamobrem, qui ex municipijs ueniant, peregrini tibi esse uideantur: nemo enim istuc M. illi Catoeni seni, cum plurimos haberet inimicos, nemo T. Coruncano, nemo Curioni, nemo huic ipsi nostro C. Mario, cum ei multi inuiderent, obiecit unquam. equidem uehementer lætor, cum esse me, in quem tu, cum cuperes, nullam contumeliam iacere potueris, quæ non ad maximam partem ciuium conueniret. sed tamen te à me pro magnis causis nostræ necessitudinis monendum esse etiam atque etiam puto. non possunt omnes esse patricij; si uerum quæris, ne curant quidem: nec se æquales tui propter istam causam abs te anteiri putant. at si tibi nos peregrini uidemur, quorum iam & nomen, & honos inueterauit & huic urbi, & hominum famæ, ac sermonibus: quàm tibi illos competitores tuos peregrinos uideri necesse erit, qui iam ex tota Italia delecti tecum de honore, & de omni dignitate contendunt? quorum caue tu quenquam peregrinum appelles, ne peregrinorum suffragijs obruare. qui si attulerint neruos & industriam; mihi crede, excutient tibi istam uerborum iactationem, & te ex somno sæpe excitabunt, nec patientur se abs te, nisi uirtute uincantur, honore superari. ac si iudices cæteris patricijs me & uos peregrinos uideri oporteret, à Torquato tamen hoc uitium sileretur: est enim ipse à ma-

terno genere municipalis, honestissimi ac nobilissimi generis, sed tamen Asculani. aut igitur doceat Picentes solos non esse peregrinos, aut gaudeat suo generi meum non anteponere. quare neque me peregrinum posthac dixeris, ne grauius refutere; neque regem, ne derideare. nisi forte regium tibi uidetur, ita uiuere, ut non modo homini nemini, sed ne cupiditati quidem ulli seruias; contemnere omnes libidines; non auri, non argenti, non cæterarum rerum indigere; in senatu sentire libere; populi utilitati magis consulere, quàm uoluntati; nemini cedere; multis obsistere. si hoc putas esse regium, me regem confiteor esse. sin te potentia mea, si dominatio, si denique aliquod dictum arrogans aut superbum mouet: quin tu id potius profers, quàm uerbi inuidiam, contumeliamq; maledicti? ego, tantis à me beneficijs in rep. positis, si nullum aliud mihi præmium à senatu populoq; R. nisi honestum otium postularem, quis non concederet? sibi haberent honores, sibi impèria, sibi prouincias, sibi triumphos, sibi alia præclaræ laudis insignia: mihi liceret eius urbis, quam conseruassẽm, conspectu, tranquillo animo, & quieto frui: quid, si hoc non postulo; si ille labor meus pristinus, si sollicitudo, si operæ, si uigiliæ deserviunt amicis, præsto sunt omnibus; si neque amici in foro requirunt studium meum, neque resp. in curia; si me non modo rerum gestarum uacatio, sed neque honoris, neque ætatis excusatio uendicat à labore; si uoluntas mea, si industria, si domus, si animus, si aures patent omnibus; si mihi ne ad ea quidem, quæ pro salute omnium gessi, recordanda & cogitanda quidquam relinquitur tem=



poris : tamen hoc regnum appellabitur ? cuius uicarius qui uelit esse, inueniri nemo potest ; longe abest regni suspicio . si quæris, qui sint Romæ regnum occupare conati ; ut ne replices annalium memoriam, ex domesticis imaginibus inuenies . res enim gestæ, credo, meæ me nimis extulerunt, ac mihi nescio quos spiritus attulerunt, quibus de rebus tam clavis, tam immortalibus iudices hoc possum dicere, me, qui è summis eripuerim periculis urbem hanc, & uitam omnium ciuium, satis adeptum fore, si ex hoc tanto in omnes mortales beneficio nullum in me periculum redundabit . etenim in qua ciuitate res tantas gesserim, memini ; & in qua urbe, intelligo . plenum forum est eorum hominum, quos ego à uestris ceruicibus depuli iudices, à meis non remouî . nisi uero paucos fuisse arbitramini, qui conari aut sperare possent se tantum imperium posse delere . horum ego faces eripere de manibus, & gladios extorquere potui, sicut feci : uoluntates uero consceleratas ac nefarias nec sanare potui, nec tollere . quare nō sum nescius, quanto periculo uiuam in tanta multitudine improborum, cum mihi uni cum omnibus improbis æternum uideam bellum esse susceptum . quòd si illis meis præsidij forte inuides ; & si ea tibi regia uidentur, quòd omnes boni omnium generum atque ordinum suam salutem cum mea coniungunt : consolare te, quòd omnium mentes improborum mihi uni maxime sunt infensæ, & aduersæ . qui me non solum iccirco oderunt, quòd eorum conatus impios, & furorem conscleratū repressi ; sed eo etiam magis, quòd nihil iam se simile me uiuo conari posse arbitrantur . at uero quid  
ego

ego miror, si quid ab improbis de me improbe dicitur; cum L. Torquatus, primum ipse his fundamentis adolescentiæ iactis, ea spe proposita amplissimæ dignitatis, deinde L. Torquati fortissimi consulis, constantissimi senatoris, semper optimi ciuis filius, interdum efferatur immoderatione uerborum? qui cum suppressa uoce de scelere P. Lentuli, de audacia coniuratorum omnium dixisset, tantum modo ut uos, qui ea probatis, exaudire possetis; de supplicio P. Lentuli, de carcere magna et queribunda uoce dicebat. in quo primum illud erat absurdum, quòd cum ea, quæ leniter dixerat, uobis probare uolebat, eos autem, qui circum iudicium stabant, audire nolebat; non intelligebat, ea, quæ clare diceret, ita illos audituros, quibus se uenditabat, ut uos quoque audiretis, qui id non probabatis. deinde alterum iam oratoris uitium, non uidere quid quæque causa postulet: nihil est enim tam alienum ab eo, qui alterum coniurationis accuset, quam uideri coniuratorum poenam mortemque lugere. quod cum is tribunus pl. facit, qui unus uidetur ex illis ad lugendos coniuratos relictus: nec mirum est. difficile est enim tacere, cum doleas: te, si quid eiusmodi facis, non modo talem adolescentem, sed in ea causa, in qua te uindictæ coniurationis uelis esse, uehementer miror. sed reprehendo tamen illud maxime, quòd isto ingenio, et prudentia præditus causam reip. non tenes, qui arbitrare plebi R. res eas non probari, quas me consule omnes boni pro salute communi gesserunt. ecquem tu horum, qui adsunt, quibus te contra ipsorum uoluntatem uenditabas, aut tam sceleratum statuis fuisse, ut hæc omnia perire uoa

luerit; aut tam miserum, ut & se perire cuperet, & nihil haberet, quod saluum esse uellet? an uero clarissimum uirum generis uestri ac nominis nemo reprehendit, qui filium suum uita priuauit, ut in cæteris firmaret imperium: tu remp. reprehendis, quæ domesticos hostes, ne ab ijs ipsa necaretur, necauit? itaque attende iam Torquate, quàm ego non defugiam auctoritatem consulatus mei. maxima uoce, ut omnes exaudire possint, dico, semperq; dicam. adestote omnes animis, qui adestis corporibus, quorum ego frequentia magno opere lætor: erigite mentes auresq; uestras, & me de inuidiosis rebus, ut ille putat, dicentem attendite. ego consul, cum exercitus perditorum ciuium clandestino scelere constatus crudelissimum, & luctuosissimum exitium patriæ comparasset; cum ad occasum interitumq; reip. Catilina in castris, in his autem templis atque tectis dux Lentulus esset constitutus: meis consilijs, meis laboribus, mei capitis periculis, sine tumultu, sine delectu, sine armis, sine exercitu, quinque hominibus comprehensis, atque confossis, incensione urbem, internicione ciues, uastitate Italiam, interitu remp. liberaui. ego uitam omnium ciuium, statum orbis terræ, urbem hanc denique, sedem omnium nostrum, arcem regum ac nationum exterarum, lumen gentium, domicilium imperij, quinque hominum amentium ac perditorum poëna redemi. an me existimasti hæc iniuratum in iudicio non esse dicturum, quæ iuratus in maxima concione dixissem? atque etiam illud addam, ne qui forte incipiat improbus subito te amare Torquate, & aliquid sperare de te; atque, ut idem omnes exaudiant,

clarissima uoce dicam. harum omnium rerum, quas ego in consulatu pro salute communi suscepi, & gessi, L. ille Torquatus, cum esset meus contubernalis in consulatu, cum signifer esset iuuentutis, atque in prætura fuisset, auctor, adiutor, particeps extitit. cum princeps, cum auctor, cum signifer esset iuuentutis; parens eius, homo amantissimus patriæ, maximi animi, summi consilij, singularis constantiæ, cum esset æger, tamen omnibus rebus illis interfuit; nunquam est à me digressus, studio, consilio, auctoritate unus adiuuit plurimum, cum infirmitatem corporis animi uirtute superare. uides ne, ut eripiam te ex improborum subita gratia, & reconciliem bonis omnibus? qui te & diligunt, & retinent, retinebuntq; semper, nec, si à me forte descieris, iccirco te à se, & à rep. & à tua dignitate deficere patientur. Sed iam redeo ad causam: atque hoc uos iudices testor: mihi de memet ipso tam multa dicendi necessitas quædam imposita est ab illo. nam si Torquatus Syllam solum accusasset, ego quoque hoc tempore nihil aliud agerem, nisi eum, qui accusatus esset, defenderem: sed cum ille tota illa oratione in me esset inuectus, et cum initio, ut dixi, defensionem meam auctoritate spoliare uoluisset, etiam si dolor meus respondere non cogeret, tamen ipsa causa hanc à me orationem flagitasset. Allobrogibus nominatum Syllam esse dicis. quis negat Syllæ indicium? at uide, quemadmodum nominatus sit. L. Cassium dixerunt commemorasse, cum cæteris Antronium secum facere. quæro, num Syllam dixerit Cassius: nunquam. sese aiunt quæsisse de Cassio, quid Sylla sentiret. uidete di-



ligentiam Gallorum, qui uitam hominum naturamq;  
 non nossent, ac tantum audissent, eos, pari calamitate  
 qui fuerant, esse in eadem uoluntate. quid tum? Cassi-  
 sius si respondisset idem sentire, et secum facere Syllam,  
 tamen mihi nō uideretur in hunc id criminofum esse de-  
 bere. quid ita? quia qui barbaros homines ad bellum im-  
 pelleret, non debebat minuere illorum suspicionem, &  
 purgare eos, de quibus illi aliquid suspicarentur. non  
 respondit tamen una facere Syllam: etenim esset absur-  
 dum, cum ceteros sua sponte nominasset, mentionem  
 Syllæ facere nullam, nisi admonitum, & interroga-  
 tum. nisi forte uerisimile est, P. Syllæ nomen in memo-  
 ria Cassio non fuisse. si nobilitas hominis, si afflictæ for-  
 tuna, si reliquæ pristinae dignitatis non tam illustres  
 fuissent, tamen Antronij commemoratio memoriam  
 Syllæ retulisset: etiam, ut arbitror, cum auctoritates  
 principum coniurationis ad incitandos animos Allobro-  
 gum colligeret Cassius, & cum sciret exteras nationes  
 maxime nobilitate moueri, nō prius Antronium, quam  
 Syllam, nominasset. iam uero illud probari minime po-  
 test, Gallos Antronio nominato putasse propter calami-  
 tatis similitudinem sibi aliquid de Sylla esse quæren-  
 dum; Cassio, si hic esset in eodem scelere, ne cum appella-  
 sset quidem Antronium, huius in mentem uenire po-  
 tuisset. sed tamen quid respondit de Sylla Cassius? se ne-  
 scire certum. non purgat, inquit. dixi antea: ne si ar-  
 gueret quidem tum denique, cum esset interrogatus, id  
 mihi criminofum uideretur. sed ego in iudicijs, et quæ-  
 stionibus non hoc quærendum arbitror, num purgetur  
 aliquis, sed num arguatur: etenim cum negat se scire

Cassius, utrum subleuat Syllam, an satis probat se nescire? subleuat apud Gallos: quid ita? ne indicent? quid? si periculum esse putasset, ne ulli unquam indicarent, de seipso confessus esset? nesciuit. credo iudices celatum esse Cassium de Sylla uno: nam de cæteris certe sciebat, & ea domi eius pleraque conflata esse constabat. qui negare noluit esse in eo numero Syllam, quo plus spei Gallis daret, dicere autem falsum non ausus est, nescire dixit. atqui hoc perspicuum est, cum is, qui de omnibus scierit, de Sylla se scire negarit, eandem vim esse negationis huius, quam si extra coniurationem hunc esse se scire dixisset. nam cuius scientiam de omnibus constat fuisse, eius ignoratio de aliquo purgatio debet uideri. sed iam non quæro, purget ne Cassius Syllam: illud mihi tantum satis est, contra Syllam nihil esse in indicio. Exclusus hac criminatione Torquatus, rursus in me irruit, me accusat: ait me aliter, ac dictum est, in tabulas publicas retulisse. ò dii immortales (uobis enim tribuam, quæ uestra sunt: nec uero possum meo tantum ingenio dare, ut tot res, tantas, tam uarias, tam repentinas in illa turbulentissima tempestate reip. mea sponte dispexerim) uos profecto animum meum tum conseruandæ patriæ cupiditate incendistis: uos me ab omnibus cæteris cogitationibus ad unam salutem reip. contulistis: uos denique, in tantis tenebris erroris & inscientiæ, clarissimum lumen prætulistis menti meæ. uidi ego hoc iudices; nisi, recenti memoria senatus, auctoritatem huius indicij monumentis publicis testatus essem, fore ut aliquando non Torquatus, neque Torquati quispiam similis, (nam id me multum fefel-

lit) sed ut aliquis patrimonio naufragus, inimicus otij, bonorum hostis, aliter indicata hæc esse diceret, quò facilius uento aliquo in optimum quenque excitato, posset in malis reip. portum suorum malorum aliquem inuenire. itaque introductis in senatum indicibus, constitui senatores, qui omnia indicum dicta, interrogata, responsa perscriberent: at quos uiros? non solum summa uirtute, & fide, cuius generis in senatu facultas maxima, sed etiam quos sciebam memoria, scientia, consuetudine & celeritate scribendi facillime, quæ dicerentur, perssequi posse; C. Cosconium, qui tunc erat prætor, M. Mesalam, qui tum præturam petebat; P. Nigidium, App. Claudium. credo esse neminem, qui his omnibus aut uere referendis, aut etiam scribendis putet ingenium defuisse. quid deinde? quid feci? cum scirem ita indicium in tabulas publicas relatum, ut illæ tabulæ priuata tamen custodia more maiorum continerentur: non occultari, non continui domi, sed describi ab omnibus statim librarijs, diuidi passim, & peruulgari, atque edi populo R. imperaui: diuisi toti Italiæ, diuisi in omnes prouincias: eius indicij, è quo salus oblata esset omnibus, expertem esse neminem uolui. itaque dico locum in orbe terrarum esse nullum, quo in loco populi R. nomen sit, quin eodem perscriptum hoc indicium peruenerit. in quo ego tam subito, & exiguo, et turbido tempore multa diuinitus, ita ut dixi, non mea sponte prouidi: primum, ne qui posset tantum aut de reip. aut de alicuius periculo meminisse, quantum uellet: deinde, ne cui liceret unquam reprehendere illud indicium, aut temere creditum criminari: postremo, ne quid iam à me, ne quid

ex meis commentarijs quaereretur; ne aut obliuio mea, aut memoria uideretur nimia: ne denique aut negligentia turpis, aut diligentia crudelis putaretur. sed tamen abs te Torquate quaero; cum indicatus tuus inimicus esset, & esset eius rei frequens senatus et recens memoria testis; tibi meo familiari, & contubernali prius etiam edituri fuerint indicium scribae mei, si uoluisses, quam in codicem retulissent: cum uideres aliter fieri, cur tacuisti? passus es? non mecum, aut cum familiari meo questus es? aut, quoniam tam facile inueheris in amicos, iracundius aut uehementius expostulasti? tu, cum tua uox nunquam sit audita; cum, indicio lecto, descripto, diuulgato, quieueris, tacueris: repente tantam rem enunciare audeas, & in eum locum te deducas, ut ante, quam me commutati indicij coargueris, te summae negligentiae tuo iudicio conuictum esse fateares? mihi cuiusquam salus tanti fuisset, ut meam negligenterem? per me ego ueritatem patefactam contaminarem aliquo mendacio? quenquam denique ego iuuarem, a quo & crudeles insidias in remp. factas, & in me potissimum consulem putarem? quod si iam essem oblitus feueritatis, et constantiae meae, tam ne amens eram, ut, cum literae posteritatis causa repertae sint, quae subsidio obliuioni esse possent, ego recentem putarem memoriam cuncti senatus commentario meo posse superari? fero ego te Torquate iandudum, fero, et non nunquam animum incitatum ad ulciscendam orationem tuam reuoco ipse, & reflecto: permitto aliquid iracundiae tuae, do adolescentiae, cedo amicitiae, tribuo parenti: sed nisi aliquem modum uitae constitueris, reges oblitum me non



*stræ amicitie habere rationem meæ dignitatis. nemo unquam me tenuissima suspitione perstrinxit, quem non præuenterim. sed mihi hoc credas uelim: non ijs libentissime soleo respondere, quos mihi uideor facillime posse superare. tu, quoniam minime ignoras consuetudinem dicendi meam, noli hac noua lenitate abuti mea: noli aculeos orationis meæ, qui reconditi sunt, excussos arbitrari: noli id putare omnino à me esse omissum, si quid est tibi remissum, atque concessum. cum illæ ualent apud me excusationes iniuriæ tuæ, iratus animus tuus, ætas, amicitia nostra: tum nondum statuo te uirum satis habere, ut ego tecum luctari, & congredi debeam. quòd si esses usu atque ætate robustior, essem idem, quæ soleo, cum sum laceffitus: nunc tecum sic agam, tulisse ut potius iniuriam, quàm retulisse gratiam uidear. neque uero, quid mihi irascere, intelligere possum. si, quòd eum defendo, quæm tu accusas; cur tibi quodque ipse non succenseo, qui accuses eum, quem ego defendo? inimicum, inquis, accuso meum. & amicum ego defendo meum. non debes tamè quenquam in conuersionis quæstione defendere. immo nemo magis eum, de quo nihil est suspicatus, quàm is, qui de alijs multa cogitauit. cur dixisti testimonium in alios? quia coactus. cur damnati sunt? quia creditum est. regnum est, dicere in quem uelis, ac defendere quem uelis. immo seruitus est, nò dicere in quem uelis, ac defendere quem uelis. ac si considerare cœperis, utrum magis mihi hoc necesse fuerit facere, an tibi; intelliges, honestius te inimicitarum modum statuere potuisse, quàm me humanitatis. an uero, cum honos agebatur amplissimus familiæ*

uestrae, hoc est consulatus parentis tui, sapientissimus uir familiarissimis suis non succensuit pater tuus, cum Syllam & defenderent et laudarent? intelligebat hanc nobis à maioribus esse traditam disciplinam, ut nullius amicitia ad propulsanda pericula impediremur. et erat huic iudicio longe dissimilis illa contentio. tum, afflicto P. Sylla, consulatus uobis pariebatur, sicuti partus est: honoris erat certamen: ereptum repetere uos clamitabatis, ut uicti in campo, in foro uinceretis: tum qui contra uos pro huius salute pugnabant, amicissimi uestri, quibus non irascebamini, consulatum uobis eripiebant, honori uestro repugnabant, & tamen id inuiolata uestra amicitia, integro officio, ueteri exemplo atque instituto optimi cuiusque faciebant. ego uero quibus ornamentis aduersor tuis? aut cui dignitati uestrae repugno? quid est, quod iam ab hoc expetas? honor ad patrem, insignia honoris ad te delata sunt. tu ornatus ærumnis uenis ad eum lacerandum, quem interemisti: ego iacentem & spoliatum defendo, & protego. atque hic tu & reprehendis me, quia defendam; & irascearis: ego autem non modo tibi non irascor, sed ne reprehendo quidem factum tuum: te enim existimo tibi statuisse, quid faciendum putares, & satis idoneum officij iudicem posuisse. At accusat C. Cornelij filius, idem quæ ualere debet, ac si pater indicaret. ò patrem Cornelium sapientem, qui, quod præmij solet esse in iudicio, reliquerit; quod turpitudinis in confessione, id per accusationem filij susceperit: sed quid est tandem, quod indicat per istum puerum Cornelius? si est causa mihi ignota, cum Hortensio communicata, respondeat Hortensius.

finis. Sin, ut ais, illum comitatum Antronij et Catilinæ,  
 \* cum in campo consularibus comitijs, quæ à me habitæ  
 sunt, cædem facere uoluerunt: Antronium tum in  
 campo uidimus: ecquid dixi uidisse nos? ego uidi: uos  
 enim tum iudices nihil laborabatis, neque suspicabami-  
 ni: ego tectus præsidio firmo amicorum, Catilinæ tum  
 & Antronij copias & conatum repressi. num quis est  
 igitur, qui tum dicat in campum aspirasse Syllam? at-  
 qui si tum se cum Catilina societate sceleris coniunxe-  
 rat, cur ab eo discedebat? cur cum Antronio non erat?  
 cur in pari causa non paria signa reperiuntur crimi-  
 nis? sed quoniam Cornelius ipse etiam nunc de indicân-  
 do dubitat, ut dicitis; informat ad hoc adumbratū in-  
 dicium filium: quid tādē de illa nocte dicit, cum inter  
 falcarios, ad M. Leccam, nocte ea, quæ consecuta est po-  
 sterum diem nonarum Nou. me consule, Catilinæ de-  
 nunciatione conuenit? quæ nox omnium temporum con-  
 iurationis acerrima fuit, atque acerbissima. tum Cati-  
 linæ dies excundi, tum cæteris manendi conditio, tum  
 descriptio totam per urbem cædis atque incēdiorum con-  
 stituta est: tunc tuus pater Corneli, id quod tandem ali-  
 quando confitetur, illam sibi officiosam prouinciam  
 depoposcit, ut, cum prima luce consulem salutatum  
 ueniret, intromissus meo more, & iure amicitiae, me  
 in meo lectulo trucidaret. hoc tempore, cum arderet  
 acerrime coniuratio, cum Catilina egrederetur ad exer-  
 citum, Lentulus in urbe relinqueretur, Cassius incen-  
 dijs, Cethegus cædi præponeretur, Antronio, ut occu-  
 paret Hetruriam, præscriberetur, cum omnia ordina-  
 rentur, instituerentur, pararentur, ubi fuit Sylla Car

neli ? num Romæ ? immo longe abfuit . num in ijs legionibus , quò se Catilina referebat ? multo etiam longius . num in agro Camerti , Piceno , Gallico , quas opus maxime quasi morbus quidam illius furoris peruerat ? nihil uero minus : fuit enim , ut iam ante dixi , Neapoli : fuit in ea parte Italia , quæ maxime ea suspitione caruit . quid ergo indicat , aut quid affert aut ipse Cornelius , aut uos , qui ab eo hæc mandata desertis ? gladiatores emptos esse Fausti simulatione ad eadem , ac tumultum . ita prorsus : interpositi sunt gladiatores , quos testamento patris uidemus deberi . Arrepta est familia , quæ si esset prætermiffa , posset alia familia Fausti munus præbere . utinam quidem hæc ipsa non modo iniquorum inuidiæ , sed & æquorum expectationi satisfacere posset . Propteratum uehementer , cum longe tempus muneris abesset . quasi uero tempus dandi muneris non ualde appropinquaret . Nec opinante Fausto , cum is neque sciret , neque uellet , familia est comparata . at literæ sunt Fausti , per quas ille precibus a P. Sylla petit , ut emat gladiatores , & ut hos ipsos emat : neque solum ad Syllam missæ , sed ad L. Cæsarem , Q. Pompeium , C. Memmium , quorum de sententia tota res gesta est . At præfuit familie Cornelius . iam si in comparanda familia suspicio est nulla ; quòd præfuit , nihil ad rem pertinet . sed tamen munere serui obtulit se ad ferramenta prospicienda , præfuit uero nunquam : eaq; res per bellum Fausti libertum omni tempore administrata est . At enim Cincius est ab hoc in ulteriorem Hispaniā missus , ut eam provinciam perturbaret . primum , Cincius iudices L. Iulio C. Figulo



consularibus profectus est aliquanto ante furorem Ca-  
tilinae, & ante suspicionem huius coniurationis : dein-  
de, est profectus non tum primum, sed cum in iisdem  
locis aliquanto ante eadem de causa aliquot annos fuis-  
set: ac profectus est non modo ob causam, sed etiam ne-  
cessariam causam, magna ratione cum Mauritanie  
rege contracta. tum autem, illo profecto, Sylla procu-  
rante eius rem, & gerente, plurimis & pulcherrimis  
P. Cincij prædijs. uenditis, æs alienum eiusdem dissolu-  
tum est: ut quæ causa cæteros ad facinus impulit, cu-  
piditas retinendæ possessionis, ea Cincio non fuerit, præ-  
dijs diminutis. iam uero illud quàm incredibile, quàm  
absurdum; qui Romæ cædem facere, qui hanc urbem  
inflammare uellet, eum familiarissimum suum dimit-  
tere ab se & mandare in ultimas terras? utrum, quo  
facilius Romæ ea, quæ conabatur, efficeret, si in Hi-  
spania turbatū esset? at hæc ipsa per se sine ulla coniun-  
ctione agebantur. an in tantis rebus, tam nouis consi-  
lijs, tam periculosis, tam turbulentis hominem amanti-  
mum sui, familiarissimum, coniunctissimum officijs,  
usu, consuetudine, dimittendum esse arbitraretur? ue-  
risimile non est, ut, quem in secundis rebus, quem in  
otio secum semper habuisset, hunc in aduersis, & in  
eo tumultu, quem ipse comparabat, ab se dimitteret.  
ipse autem Cincius (non enim mihi deferenda est cau-  
sa amici ueteris atque hospitis) is homo est, aut ea fa-  
milias ac disciplina, ut hoc credi possit, eum bellū reip.  
facere uoluisse? ut cuius pater, cum cæteri deficerent  
finitimi, ac uicini, singulari extiterit in remp. nostram  
officio, & fide, is sibi nefarium bellum contra patriam

suscipiendum putaret . cuius æs alienum uidemus iudices non libidine, sed negotij gerendi studio esse contrarium : qui ita Romæ debuit , ut in prouincijs , & in regnis maximæ ei pecuniæ deberentur : quas cum peteret , non commisit , ut sui procuratores quidquam oneris absente se sustinerent : uenire omnes suas possessiones, et patrimonio se ornatissimo spoliari maluit, quàm ullam moram cuiquā fieri creditorum suorum . à quo quidem genere iudices ego nunquam timui, cum in illa reip. tempestate uersarer . illud erat genus hominum horribile , & pertimescendum , qui tanto amore suas possessiones amplexi tenebant , ut ab ijs membra diuellitius , ac distrahi posse diceres . Cincius nunquam sibi cognationem cum prædijs esse existimauit suis : itaque se non modo ex suspitione tanti sceleris , uerum etiam ex omni hominum sermone non armis, sed patrimonio suo uindicauit .

Iam uero , quod subiicit , Pompeianos esse à Sylla impulsos , ut ad istam coniurationem , & ad hoc nefarium facinus accederent , id cuiusmodi sit , intelligere non possum . an tibi Pompeiani conuasse uidentur ? quis hoc unquam dixit ? aut quæ fuit istius rei uel minima suspicio ? disiunxit , inquit , eos à colonis , ut hoc dissidio , ac dissensione facta , oppidum in sua potestate posset , & Pompeianos habere . primum , omnis Pompeianorum colonorumq; dissensio delata ad patronos est , cum iam inueterasset , ac multos annos esset exagitata : deinde , ita à patronis res cognita est , ut nulla in re à cæterorum sententijs Sylla dissenserit : postremo , coloni ipsi sic intelligunt , non Pompeianos à Sylla magis , quàm sese esse defensos . atque hoc iudices

ex hac frequentia colonorum, honestissimorum hominum, intelligere potestis: qui adsunt, laborant, hunc patronum, defensorem, custodem illius coloniae, si in omni fortuna, atque omni honore incolumem habere non potuerunt, in hoc tamen casu, quo afflicti iacet, per uos tutari conseruareque cupiunt. adsunt pari studio Pompeiani, qui ab illis etiam in crimen uocantur: qui ita de ambitione, et de suffragiis suis cum colonis dissenserunt, ut idem de communi salute sentirent. ac ne hæc quidem P. Syllæ mihi uidetur silentio prætereunda esse uirtus, quod, cum ab hoc illa colonia deducta sit, et cum commoda colonorum à fortunis Pompeianorum populi R. fortuna diuiserit, ita carus utrisque est, atque iucundus, ut non alteros dimouisse, sed utrosque constituisse uideatur. at enim et gladiatores, et omnis ista uis, rogationis Cæcilie causa, comparabantur. atque hoc loco in L. Cæciliū, prudentissimum, atque ornatissimum uirum, uehementer inuectus est: cuius ego de uirtute et constantia iudices tantum dico, talem hunc in ista rogatione, quam promulgauit non de tollenda, sed de leuanda calamitate fratris sui, fuisse, ut consultum esse uoluerit fratri; tamen cum rep. pugnare noluerit: promulgarit impulsus amore fraterno; destiterit fratris auctoritate deductus. atque in ea re per L. Cæciliū Syllā accusatur, in qua re est uterque laudandus. Primum Cæcilius, qui id promulgarit, in quo res iudicatas uidebatur uoluisse rescindere, ut statuere-

\* tur: Syllā recte reprehendit: status enim reip. maxime iudicatis rebus continetur: neque ego tantum fraterno amori dandum arbitror, ut quisquam de salute

suorum consulat, communem relinquat. nihil de iudicio ferebat: sed poenam ambitus eam ferebat, quæ fuerat nuper superioribus legibus constituta: itaque hac rogatione non iudicium sententiam, sed legis uictum corrigebat. nemo iudicium reprehendit, cum de poena quaeritur: sed legem. damnatio enim est iudicium, quæ manebat; poena legis, quæ leuabatur. noli igitur animos eorum ordinum, qui præsunt iudicijs summa cum grauitate, & dignitate, alienare à causa. nemo labefactare iudiciū est conatus: nihil est eiusmodi promulgatum: semper Cæcilius in calamitate fratris sui iudicium potestatem perpetuandam, legis acerbiter mitigandam putauit. sed quid ego de hoc plura disputem? dicerem fortasse, & facile, & libenter dicerem: si paulo etiam longius, quàm finis quotidiani officij postulat, pietas & fraternus amor L. Cæcilium protulisset, implorarem sensus uestros, uniuscuiusque indulgentiam in suos testarer, peterem errato ueniam L. Cæcilij ex intimis uestris cogitationibus, atque ex humanitate communi. lex dies fuit proposita paucos, ferri coepta nunquam. posita est in senatu: populum R. lauit: cum in Capitolium nos senatum conuocassemus, nihil est actum prius: et id mandato Syllæ Q. Metellus pretor se loqui dixit, Syllam illam rogationem de se nolle ferri. ex illo tempore L. Cæcilius multa de re. egit: agrariæ legi, quæ tota à me reprehensa & abiecta est, intercessorem fore professus est: improbis largitionibus restituit, senatus auctoritatem nunquam impediuit: ita se gessit in tribunatu, ut onere deposito domestici officij, nihil postea nisi de reip. commo-



dis cogitavit . atque in ipsa rogatione , ne per vim quid ageretur , quis tamen uestrum Syllā , aut Cæciliū verebatur ? non ne omnis terror ille , omnis seditionis timor , atque opinio ex Antronij improbitate pēdebat ? eius voces , eius minæ ferebātur : eius aspectus , concursatio , stipatio , greges hominum perditorum metum nobis seditionesq; afferebant . itaque P. Sylla , hoc importunissimo tum honoris , tum etiam calamitatis socio , atque comite , & secundas fortunas amittere coactus est , & in aduersis sine ullo remedio , atque alleuamento permanere . Hic tu epistolam meā sæpe recitas , quam ego ad Cn. Pompeium de meis rebus gestis , & de summa reip. misi : & ex ea crimen aliquod in P. Syllam quæris : & , si fauorem incredibilem biennio ante conceptum erupisse in meo consulatu scripsi , me hoc demonstrasse dicis , Syllam in illa fuisse superiore coniuratione . scilicet is sum , qui existimem Cn. Pisonem , & Catilinam , & Vargunteium , & Antronium nihil scelerate , nihil audaciter ipsos per sese sine P. Sylla facere potuisse . de quo etiam si quis dubitasset antea , num id , quod tu arguis , cogitasset , interfecto patre tuo , consule , descendere calendis Ian. cum liētoribus ? sustulisti hanc suspicionem , cum dixisti hunc , ut Catilinam consulem efficeret , contra patrem tuum operas , et manum comparasse . quod si tibi ego confiteor , tu mihi concedas necesse est , hunc , cum Catilinæ suffragaretur , nihil de suo consulatu , quem iudicio amiserat , per vim recuperando cogitauisse . neque enim istorum facinorum tantorum , tam atrocium crimen iudices P. Syllæ persona suscipit . iam enim faciam , criminibus omnibus fere

fere dissolutis, contra atque in ceteris causis fieri solet, ut nunc denique de uita hominis, ac de moribus dicam. etenim de principio studuit animus occurrere magnitudini criminis, satisfacere expectationi hominum, de me aliquid, & de ipso, qui accusatus est, dicere: nunc iam reuocandi estis eò, quò uos ipsa causa etiam tacente me cogit, animis. Omnibus in rebus iudices, quæ grauiores maioresq; sunt, quid quisque uoluerit, cogitarit, admisierit, non ex crimine, sed ex moribus eius, qui arguitur, est ponderandũ: neque enim potest quisquam nostrum subito fingi, neque cuiusquam repente uita mutari, aut natura conuerti. circumspecte paulisper mentibus uestris, ut alia omittamus, hosce ipsos homines, qui huic affines sceleri fuerunt. Catilina contra remp. coniurauit. cuius aures unquam hoc respuerunt, conatum esse hominem usque à pueritia non solum intemperantia, et scelere, sed etiam consuetudine, & studio, in omni flagitio, stupro, cæde uersatum? quis eum contra patriam pugnantem perisse miratur, quem semper omnes ad ciuile latrocinium natum putauerunt? quis Lentuli societates cum indicibus, quis insaniam libidinum, quis peruersam, atque impiam religionem recordatur, qui illum aut nefarie, aut stulte cogitasse miretur? quis de C. Cethego, atque eius in Hispaniam profectiõne, ac de uulnere Q. Metelli Pij cogitat, cui non ad illius pœnã carcer ædificatus esse uideatur? omitto ceteros, ne sit infinitum: tantum à uobis peto, ut taciti de omnibus, quos coniurasse cognitum est, cogitetis: intelligetis unūquenque illorum prius à sua uita, quàm nostra suspiciõne esse damnatum. ipsum illum Antroa

nium ( quoniã eius nomen finitimum maxime est huius periculo & crimini ) non sua consuetudo , ac uita conuincit ? semper audax , petulans , libidinosus . quem in stuprorum defensionibus non solum uerbis uti improbissimis solitum esse scimus , uerum etiam pugnis , & calcibus ; quem exturbare homines è possessionibus , cædem facere uicinorum , spoliare fana sociorum , uiconatum & armis disturbare iudicia , in bonis rebus omnes contennere , in malis pugnare contra bonos , non reip. cedere , non fortunæ ipsi succumbere : huius si causa non manifestissimis rebus teneretur , tamen eum mores ipsius , ac uita conuincerent . agendum conferte nunc cum illius uita uitam P. Syllæ , uobis populoq. R. notissimam iudices , & eam ante oculos uestros proponite . ecquod huius factum , aut commissum , non dicam audacius , sed quod cuiquam paulo minus consideratum uideretur factum , quæro ? uerbum ecquod unquã ex ore huius excidit , unde quisquam posset offendi ? at uero , in illa graui L. Syllæ uictoria turbulentaq. ; quis P. Sylla mitior ? quàm multorum hic uitam est à L. Sylla deprecatus ? quàm multi sunt summi homines & ornatiissimi , & nostri & equestris ordinis , quorum pro salute se hic Syllæ obligauit ? quos ego nominarem : neque enim ipsi nolunt , et huic animo gratissimo adsunt : sed quia maius est beneficium , quàm posse debet ciuis ciuidare , ideo à uobis peto , ut , quod potuit , tempori tribuatis ; quod fecit , ipsi . quid reliquã constantiam uitæ commorem ? dignitatem , liberalitatem , moderationem in priuatis rebus , splendorem in publicis ? quæ ita à fortuna deformata sunt , ut tamen à natura incohata com

pareant. / quæ domus? quæ celebratio quotidiana? quæ familiaris dignitas? quæ studia amicorū? quæ ex quoniamque ordine multitudo? hæc diu multum, & multo labore quæsitæ, una eripuit hora. accepit P. Sylla iudices uehemens uulnus, & mortiferum, ueruntamen eiusmodi, quod uideretur eius uita, & natura accipere potuisse: honestatis, & dignitatis habuisse nimis magnam iudicatus est cupiditatē. quam si nemo alius habuit in consulatu petēdo, cupidior iudicatus est hic fuisse, quàm ceteri. sin etiam in alijs non nullis fuit iste consulatus amor, fortuna in hoc fuit fortasse grauior, quàm in cæteris. postea uero quis P. Syllam, nisi morientem, demissum, afflictumq̃; uidit? quis unquam est suspicatus hūc magis odio, quàm pudore, hominum aspectum lucemq̃; uitare? qui dum multa haberet inuitamenta urbis, et fori, propter summa studia amicorum, quæ tamen ei sola in malis restiterunt, absuit ab oculis uestris, & cum lege retineretur, ipse se exilio pene mulctauit. in hoc uos pudore iudicij, et in hac uita tanto sceleri locum fuisse creditis? aspiciate ipsum, con-  
tuemini os, conferte crimen cum uita usque ad hoc tempus explicata: tum crimen recognoscite. mitto remp. quæ fuit semper Syllæ carissima. hos ne amicos, tales uiros, tam cupidos sui, per quos res eius secundæ quondam erant ornata, nunc subleuantur aduersæ, crudelissime perire uoluit, ut cum Lentulo, & Catilina, & Cethego sædissimam uitam ac miserrimam turpissima morte proposita degeret? non, inquam, cadit in hos mores, non in hunc pudorem, non in hanc uitam, non in hunc hominem ista suspicio. noua quædam illa imma-



nit as exorta est : incredibilis fuit , ac singularis furor : ex multis ab adoleſcētia collectis perditorum hominum uitijſ repente tanta iſta importunitas inauditi ſcleris exarſit . nolite iudices arbitrari hominum illum impetum , et conatum fuiſſe : neque enim ulla gens tam barbara , aut tam immanis unquam fuit , in qua non modo tot , ſed unuſtam crudelis hoſtis patriæ ſit inuentus . belluæ quædam illæ ex portentis immanes , ac feræ , forma hominum indutæ extiterunt . perſpiciſte etiam atque etiam iudices : nihil enim eſt , quod in hac cauſa dici poſſit uehementius . penitus introſpiciſte Catilinæ , Antro-  
nij , Cethegi , Lentuli cæterorumq; mentes : quas uos in his libidines , quæ ſlagitia , quas turpitudines , quant as audacias , quàm incredibiles furores , quas notas ſcelorum , quæ indicia parricidiorum , quantos acervos facinorum reperiſtis ? ex magnis , & diuturnis , & iam deſperatis reip. morbis iſta repente uis erupit , ut , ea conſecta & eiecta , conualeſcere aliquando & ſanari ciuitas poſſit . neque enim eſt quiſquam , qui arbitretur , illis incluſis in rep. peſtibus , diutius hoc imperium ſtare potuiſſe . itaque eos non ad perficiendum ſcelus , ſed ad luendas reip. poenas furie quædam incitauerunt . in hunc igitur gregem uos nunc P. Syllam iudices ex his , qui cum hoc uiuunt , atque uixerunt , honeſtiſſimorum hominū gregibus reiicietis ? ex hoc hominum numero , ex hac familiari dignitate in impiorum partem , atque in parricidarum cœtum ac numerum transferetis ? ubi erit igitur illud fortiffimum præſidium pudoris ? quo in loco nobis uita ante acta proderit ? quod ad tempus exiſtimationis partæ fructus reſeruabitur , ſi in extremo

discrimine, ac dimicatione fortunæ deseruerit? si non  
aderit? si nihil adiuuabit? quæstiones nobis seruorum  
ac tormenta accusator minitatur. in quibus quanquam  
nil periculi suspicamur, tamen illa tormenta gubernat  
dolor, moderatur natura cuiusque tum animi, tum cor  
poris, regit quæsitio, flectit libido, corrumpit spes, in=  
firmat metus: ut in tot rerum angustiis nihil ueritatæ  
loci relinquatur. uita P. Syllæ torqueatur: ex ea quæ=  
ratur, num quæ occultetur libido, num quod lateat  
facinus, num quæ crudelitas, num quæ audacia: ni=  
hil erroris erit in causa, nec obscuritatis indices, si à  
uobis uitæ perpetuæ uox ea, quæ grauissima debet es=  
se, audietur. nullum in hac causa testem timemus: ni=  
hil quenquam scire, nihil uidisse, nihil audisse arbitra=  
mur. sed tamen si nihil uos P. Syllæ fortuna mouet  
iudices, uestra moueat: uestra enim, qui cum summa  
elegantia, atque integritate uixistis, hoc maxime in=  
terest, non ex libidine, aut similitate, aut leuitate tes=  
tium, causas honestorum hominum ponderari, sed in  
magnis disquisitionibus, repentinisq; periculis uitam  
uniuscuiusque esse testem. quam uos iudices nolite ar=  
mis suis spoliata atque nudata obicere inuidiæ, de=  
dere suspicioni: munite communem arcem bonorum:  
obstruite perfugia improborum: ualeat ad pœnam et  
ad salutem plurimum, quam solam uidetis ipsam ex  
ui sua naturaq; facillime perspicui, subito flecti fingiq;  
non posse. quid uero hæc auctoritas, (semper enim de  
ea dicendum est, quanquam à me timide modiceq; di=  
cetur) quid, inquam, hæc auctoritas nostra, qui à  
cæteris coniurationis causis abstinuimus, P. Syllam

defendimus, nihil hunc tandem iuuabit? graue, si appetimus aliquid: si, cum ceteri de nobis silent, non etiam nosmet ipsi tacemus; graue: sed si laedimur, si accusamur, si in inuidiam uocamur; profecto conceditis iudices, ut nobis libertatem retinere liceat, si minus liceat dignitatem. Accusati sunt uno nomine consulares: ut iam uideatur honoris amplissimi nomen plus inuidie, quam dignitatis asferre. affuerunt; inquit, Catilinæ, illumque laudarunt. nulla tum patebat, nulla erat cognita coniuratio: defendebant amicum, aderant supplici, uitæ eius turpitudinem in summis eius periculis non insequabantur. quin etiam parens tuus Torquate consul reo de pecunijs repetundis Catilinæ fuit aduocatus, improbo hominī, at supplici; fortasse audaci, at aliquando amico. cui cum adfuit post delatam ad eum primam illam coniurationem, indicauit se audisse aliquid, non credidisse. at idem non adfuit alio in iudicio, cum adessent ceteri. si postea cognorat ipse aliquid, quod in consulatu ignorasset: ignoscendum est ijs, qui postea nihil audierunt. sin illa res de pecunijs repetundis prima ualuit: non inueterata, quam recens debuit esse grauior. sed si tuus parens etiam in illa suspicione periculi sui, tamen, humanitate adductus, aduocationem hominis improbissimi sella curuli, atque ornamentis & suis & consulatus honestauit: quid est, quamobrem consulares, qui Catilinæ adfuerunt, reprehendantur? at iidem ijs, qui ante hunc causam de coniuratione dixerunt, non adfuerunt. tanto scelere astrictis hominibus statuerunt nihil à se adiumenti, nihil opis, nihil auxiliij ferri oportere. atque ut de eorum cora-

stantia atque animo in remp. dicam, quorum tacita  
 grauitas, & fides de unoquoque loquitur, neque cuius  
 iusquam ornamenta orationis desiderat: potest quis=  
 quam dicere, unquam meliores, fortiores, constantio=  
 res consulares fuisse, quàm ijs temporibus & periculis  
 quibus pene oppressa est resp.? quis non de cōmuni salu=  
 te apertissime, quis non fortissime, quis non constantissi=  
 me sensit? neque ego præcipue de consularibus disputo:  
 nam hæc hominum ornatissimorum, qui prætores fuer=  
 unt, & uniuersi senatus communis est laus: ut con=  
 stet, post hominum memoriam nunquam in illo ordine  
 plus uirtutis, plus amoris in remp. plus grauitatis fuisse.  
 sed quia sunt descripti consulares, de his tantum  
 mihi dicendum putari, quod satis esset, attestante me=  
 moria omnium, neminem esse ex illo honoris gradu, qui  
 non omni studio, uirtute, auctoritate incubuerit ad  
 remp. conseruandam. sed quid? ego, qui Catilinam non  
 laudaui, qui reo Catilinæ consul non adfui, qui testimo=  
 nium de coniuratione dixi in alios, adeo ne nobis alie=  
 nus à sanitate, adeo oblitus constantiæ meæ, adeo im=  
 memor rerum à me gestarum esse uideor, ut, cum con=  
 sul bellum gesserim. cum coniuratis, nunc eorum du=  
 cem conseruare cupiam? & in animum inducam, cuius  
 ius nuper ferrum retulerim, flammamq; restinxerim,  
 eiusdem nunc causam uitamq; defendere? si mediū fia=  
 dius iudices non me ipsa resp. meis laboribus & pericu=  
 lis conseruata, ad grauitatem animi & constantiam  
 sua dignitate reuocaret, tamen hoc natura est insitum,  
 ut, quem timueris, qui cum de uita fortunisque contem=  
 deris, cuius ex insidijs euaseris, hunc semper. oderis.



sed cum agatur honos meus amplissimus, gloria rerum gestarum singularis; cum, quoties quisquam est in hoc scelere conuictus, toties renouetur memoria per me inuenta salutis: ego sim tam demens, ego committam, ut ea, quæ pro salute omnium gessi, casu magis, et felicitate à me, quàm uirtute et consilio gesta esse uideantur? quid ergo? hoc tibi sumis, dicet fortasse quispiam, ut, quia tu defenderis, innocens iudicetur? ego uero in dices non modo nihil mihi assumo, in quo quispiam repugnet; sed etiam, si quid ab omnibus conceditur, id reddo ac remitto. non in ea re: uersor, non ijs temporibus caput meum obtuli pro patria periculis omnibus, non aut ita sunt extincti quos uici, aut ita grati quos seruauit, ut eo mihi plus appetere coner, quàm quantum omnes inimici inuidiq; patientur. graue esse cum uideretur, qui inuestigari conturactionem, qui patefecerit, qui oppresserit, cui senatus singularibus uerbis gratias egerit, cui uni togato supplicationem decreuerit, dicere in iudicio: non defenderem, si coniurasset. non dico id, quod graue est: dico illud, quod in his causis coniurationis non auctoritati assumam, sed pudori meo: ego ille conturactionis inuestigator, atque ultor, certe non defenderem Syllam, si coniurasse arbitrarer: ego iudices de tantis omnium periculis cum quæreret omnia, multa audirem, non crederem omnia, cauere omnia, dico hoc, quod initio dixi, nullius indicio, nullius suspitione, nullis literis de re P. Syllæ rem ullam ad me esse delatam. quamobrem uos dii patrij ac penates, qui huic urbi atque huic imperio præsidetis, qui hoc imperiū, qui hanc libertatē, populumq; R. qui hæc tecta atque tem-

pla me consule, uestro numine auxilioq; seruastis, testor, integro me animo ac libero P. Syllæ causam defendere, nullum à me sciente facinus occultari, nullum scelus susceptum contra salutem omnium defendi ac tegi. nihil de hoc consul comperi, nihil suspicatus sum, nihil audiri. itaque idem ego ille, qui uehemens in alios, qui inexorabilis in cæteros esse uisus sum, persolui patriæ, quod debui: reliqua idem à me meæ perpetuæ consuetudini naturæq; debentur. tam sum misericors iudices, quàm uos; tam mitis, quàm qui lenissimus: in quo uehemens fui uobiscum, nihil feci nisi coactus: reip. præcipitanti subueni: patriam demersam extuli: misericordia ciuium adducti tunc fuimus tam uehementes, quàm necesse fuit. salus esset omnium amissa una nocte, nisi esset seueritas illa suscepta. sed ut ad sceleratorum poenam amore reip. sum adductus, sic ad salutem innocentium uoluntate deducor. nihil uideo esse in hoc P. Sylla iudices odio dignum, misericordia digna multa: neque enim nunc propulsandæ calamitatis suæ causa supplex ad uos iudices confugit, sed ne qua generi ac nomini suo nota nefariæ turpitudinis inuratur. nam ipse quidem, si erit uestro iudicio liberatus, quæ habet ornamenta, quæ solatia reliquæ uitæ, quibus letari et perfrui possit? domus erit, credo, exornata: aperiuntur maiorum imagines: ipse ornatum ac uestitum recuperabit. omnia iudices hæc amissa sunt: omnia generis, nominis, honoris insignia atque ornamenta unius iudicij calamitate occiderunt. sed ne extincor patriæ, ne proditor, ne hostis appelletur, ne hanc labem tanti generis in familia relinquat, id laborat, id metuit; cui ho

oris integros fructus non sit traditurus, ne aeternam memoriam dedecoris relinquat. hic uos orat iudices paruus, ut se aliquando, si non integra fortuna, at afflicta, patri suo gratulari sinatis. huic misero notiora sunt iudiciorum itinera & fori, quàm disciplinarum. non iam de uita P. Syllæ iudices, sed de sepultura contenditur. uita erepta est superiore iudicio: nunc, ne corpus eijciatur, laboramus: quid enim est huic reliqui, quod eum in uita hacteneat? aut quid est, quamobrem hæc cuiquam uita uideatur? nuper is homo fuit in ciuitate P. Syllæ, ut nemo ei se neque honore, neque gratia, nec fortunis anteferret. nunc spoliatus omni dignitate, quæ erepta sunt, non repetit: quod fortuna in malis reliqui fecit, ut cum parente, cum liberis, cum fratre, cum his necessarijs lugere suam calamitatem liceat, id sibi ne eripiat, iudices uos obtestatur. Te ipsum iam Torquæ te expletum huius miserijs, pateat. etsi nihil aliud Syllæ nisi consulatum abstulissetis, tamen eo uos contentos esse oportebat: honoris enim contentiq; uos ad causam, non inimicitie deduxerunt. sed cum huic omnia cum honore detracta sint; cum in hac fortuna misera ac luctuosissima destitutus sit: quid est, quod expetas amplius? lucis ne hanc usuram eripere uis plenam lacrymarum atque mœroris, in qua cum maximo cruciatu atque dolore retinetur? libenter reddiderit, adempta ignominia fœdissimi criminis. an uero inimicum ut expellas? cuius ex miserijs, si esses crudelissimus, uidendo fructum caperes maiorem, quàm audiendo. ò miserum, & infelicem illum diem, quo consul omnibus centurijs P. Syllæ renunciatus est: ò falsam spem: ò uolua-



crem fortunam : ò cæcam cupiditatem : ò præposteram gratulationem . quàm cito illa omnia ex lætitia & uoluptate ad luctum & lacrymas reciderunt : ut , qui paulo ante consul designatus fuisset , retineret repente nullum uestigium pristinæ dignitatis . quid enim erat mali , quod huic spoliato honore , fama , fortunis deesse uideretur ? aut cui nouæ calamitati locus ullus relictus esset ? urget eadem fortuna , quæ cœpit : reperit nouum moerorem : non patitur hominem calamitosum , uno modo afflictum , uno in luctu perire . sed iam impeditor egomet iudices dolore animi , ne de huius miseria plura dicam . uestræ iam sunt partes iudices : in uestra mansuetudine atque humanitate causam totam pono . uos , et reiectione interposita , nihil suspicantibus nobis , repentinè in nos iudices consedistis , ab accusatoribus delecti ad spem acerbitalis , à fortuna , nobis ad præsidium innocentie constituti . ut ego , quid de me populus R. existimaret , quia seuerus in improbos fueram , laboraui , & , quæ prima innocentis mihi . defensio est oblata , suscepi : sic uos seueritatem iudiciorum , quæ per hos menses in homines audacissimos facta est , lenitate ac misericordia mitigate . hoc cum impetrare à uobis ipsa causa debet : tum est uestri animi atque uirtutis , declarare , non esse eos uos , ad quos potissimum , interposita reiectione , deuenire conuenerit : in quo ego iudices uos , quantum meus amor in uos postulat , tantum hortor , ut communi studio , quoniam in rep. coniuncti sumus , mansuetudine , & misericordia uestra falsam à nobis crudelitatis famam repellamus .



PRO A. LICINIO  
ARCHIA POETA.  
ORATIO XXVI.

I quid est in me ingenij ludices, quod  
sentio quàm sit exiguum; aut si qua  
exercitatio dicendi, in qua me non in-  
ficio mediocriter esse uersatum; aut si  
huiusce rei ratio aliqua, ab optimarum  
artium studijs, & disciplina profecta, à qua ego nul-  
lum confiteor ætatis meæ tempus abhoruisse: earum re-  
rum omnium uel in primis hic A. Licinius fructum à  
me repetere prope suo iure debet. nam quoad longissi-  
me potest mens mea respicere spatium præteriti tempo-  
ris, & pueritiæ memoriæ recordari ultimam, inde  
usque repetens, hunc uideo mihi principem & ad su-  
scipiendam, & ad ingrediendam rationem horum stu-  
diorum extitisse. quod si hæc uox huius hortatu, præ-  
ceptisq; conformata, nonnullis aliquando salutis fuit:  
à quo id accepimus, quo cæteris opitulari, & alios ser-  
uare possemus, huic profecto ipsi, quantum est situm  
in nobis, & opem, & salutem ferre debemus. ac ne  
quis à nobis hoc ita dici forte miretur, quod alia quæ-  
dam in hoc facultas sit ingenij, neque hæc dicendi ra-  
tio aut disciplina: nec nos quidem huic cuncti studio pe-  
nitens unquam dediti fuimus. etenim omnes artes, quæ  
ad humanitatem pertinent, habent quoddam commu-  
ne uinculum, & quasi cognatione quadam inter se  
continentur. sed ne cui uestrum mirum esse uideatur,  
me in quæstione legitima, & in iudicio publico, cum

res agatur apud prætorem populi R. lectissimum ul-  
rum, & apud severissimos indices, tanto conuentu ho-  
minum ac frequentia, hoc uti genere dicendi, quod non  
modo à consuetudine iudiciorum, uerum etiam à fo-  
rensi sermone abhorreat: quaeso à uobis, ut in hac cau-  
sa mihi detis hanc ueniam, ac commodatam huic reo, uo-  
bis, quemadmodum spero, non molestam, ut me pro  
summo poeta atque eruditissimo homine dicentem, hoc  
concurſu hominum literatissimorum, hac uestra hu-  
manitate, hoc denique prætore exercente iudicium, pa-  
tiamini de studijs humanitatis ac literarum paulo lo-  
qui liberius, et in eiusmodi persona, quæ propter otium  
ac studium minime in iudijs periculisq; tractata est,  
uti prope nouo quodam, & inusitato genere dicendi.  
quod si mihi à uobis tribui concediq; sentiam, perficiam  
profecto, ut hunc A. Licinium non modo non segre-  
gandum, cum sit ciuis, à numero ciuium, uerum es-  
tiam, si non esset, putetis asciscendum fuisse. Nam ut  
primum ex pueris excessit Archias, atque ab ijs arti-  
bus, quibus ætas puerilis ad humanitatem informari so-  
let, se ad scribendi studium contulit: primum Antio-  
chie (nam ibi natus est, loco nobili, & celebri quon-  
dam urbe, & copiosa, atque eruditissimis hominibus,  
liberalissimisq; studijs affluenti) celeriter antecellere o-  
mnibus ingenij gloria contigit: post, in cæteris Asiæ par-  
tibus, cuncteq; Græciæ, sic eius aduentus celebrabatur,  
ut famam ingenij expectatio hominis, expectationem  
ipsius aduentus admiratioq; superaret. erat Italia tunc  
plena Græcarum artium ac disciplinarum; studiaq;  
hæc & in Latio uehementius tum colebantur, quam

nunc ijsdem in oppidis ; & hic Romæ propter tranquillitatem reip. non negligebantur : itaque hunc & Tarrentini, & Rhegyni, & Neapolitani ciuitate cæterisq; præmijs donarunt ; & omnes , qui aliquid de ingenijs poterant iudicare , cognitione atque hospitio dignum existimarunt . hac tanta celebritate famæ , cum esset iam absentibus notus , Romam uenit Mario consule , & Catulo : nactus est primum consules eos , quorum alter res ad scribendum maximas , alter cum res gestas , tum etiam studium atque aures adhibere posset . statim Luculli , cum prætextatus etiam tum Archias esset , eum domum suam receperunt . sed enim hoc non solum ingenij ac literarum , uerum etiam naturæ atque uirtutis fuit , ut domus , quæ huius adolescentiæ prima fuerit , eadem esset familiarissima senectuti . erat temporibus illis iucundus Q . Metello illi Numidico , & eius Pio filio : audiebatur à M. Aemilio : uiuebat cum Q . Catulo , & patre , & filio : à L. Crasso colebatur : Lucullus uero , & Drusum , & Octauios , & Catonem , & totam Hortensiorum domum deuinctam consuetudine cum teneret , afficiebatur summo honore , quod eum non solum colebant , qui aliquid percipere aut audire studebant , uerum etiam si qui forte simulabant . interim , satis longo interuallo , cum esset cum L. Lucullo in Ciliciam profectus , & cum ex ea prouincia cum eodem Lucullo decederet , uenit Heracleam : quæ cum esset ciuitas æquissimo iure ac foedere , ascribi se in eam ciuitatem uoluit , idq; , cum ipse per se dignus putaretur , tum auctoritate , & gratia Luculli ab Heracliensibus impetrauit . data est ciuitas Silani lege & Carbonis , si



qui foederatis ciuitatibus ascripti fuissent, si tum, cum lex ferebatur, in Italia domicilium habuissent, & si sexaginta diebus apud prætorem essent professi. cum hic domicilium Romæ multos iam annos haberet, professus est apud prætorem Q. Metellum familiarissimum suum. si nihil aliud, nisi de ciuitate ac lege, dicimus, nihil dico amplius; causa dicta est: quid enim horum infirmari Gracche potest? Heracleæ ne esse eum ascriptum negabis? adest uir summa auctoritate, & religione, & fide L. Lucullus, qui se non opinari, sed scire; non audiuisse, sed uidisse; non interfuisse, sed egisse dicit. adsunt Heraclienses legati, nobilissimi homines: qui huius iudicii causa cum mandatis, & cum publico testimonio uenerunt, qui hunc ascriptum Heracliensem dicunt. Hic tu tabulas desideras Heracliensium publicas, quas Italico bello, incenso tabulario, interisse scimus omnes. est ridiculum ad ea, quæ habemus, nihil dicere, quærere, quæ habere non possumus; & de hominum memoria tacere, literarum memoriam flagitare; & cum habeas amplissimi uiri religionem, integerrimi municipij iusiurandum, fidemq; ea, quæ de prauari nullo modo possunt, repudiare; tabulas, quas idem dicis solere corrumpi, desiderare. At domicilium Romæ non habuit, is, qui, tot annis ante ciuitatem datam, sedem omnium rerum ac fortunarum suarum Romæ collocauit. At non est professus. immo uero ijs tabulis professus, quæ solæ ex illa professione collegioq; prætorum obtinent publicarum tabularum auctoritatem. nam cum Appij tabulæ negligentius asseruatæ dicerentur, Gabinij, quandiu incolumis fuit



leuitas, post damnationem, calamitas omnem tabula-  
 rum fidem resignasset; Metellus, homo sanctissimus,  
 modestissimisque omnium, tanta diligentia fuit, ut ad  
 L. Lentulum prætorem, et ad iudices uenerit, & unius  
 nominis litura se commotum esse dixerit. his igitur ta-  
 bulis nullam lituram in nomen A. Licinij uidetis. quæ  
 cum ita sint, quid est, quod de eius ciuitate dubitetis?  
 præsertim cum alijs quoque in ciuitatibus fuerit ascri-  
 ptus. etenim cum mediocribus multis, & aut nulla,  
 aut humili aliqua arte præditis gratuito ciuitatem in  
 Græcia homines impertiebantur, Rhegynos credo, aut  
 Locrenses, aut Neapolitanos, aut Tarentinos, quod sce-  
 nicis artificibus largiri solebant, id huic summa ingenij  
 prædito gloria noluisse. quid? cum cæteri non modo  
 post ciuitatem datam, sed etiam post legem Papiam ali-  
 quo modo in eorum municipiorum tabulas irrepserint:  
 hic, qui nec utitur quidem illis, in quibus est scriptus,  
 quod semper se Heracliensem esse uoluit, reijciatur? Cen-  
 sus nostros requiris. scilicet: est enim obscurum, proxi-  
 mis censoribus, hunc cum clarissimo imperatore L. Lu-  
 cullo apud exercitum fuisse, superioribus cum eodem  
 quæstore fuisse in Asia, primis Iulio & Crasso nullam  
 populi partem esse censam. sed quoniam census non  
 ius ciuitatis confirmat, ac tantummodo indicat, eum,  
 qui sit census, ita se tam tum gessisse pro ciue: ijs tem-  
 poribus, quæ tu criminaris, ne ipsius quidem iudicio in-  
 ciuium R. iure esse uersatum, & testamentum sæpe  
 fecit nostris legibus, & adiit hæreditates ciuium R. &  
 in beneficijs ad ærarium delatus est à L. Lucullo præto-  
 re, & consule. quære argumenta, si qua potes: nun-  
 quam

quam enim hic neque suo, neque amicorum iudicio reuincetur. Queres à nobis Gracche, cur tantopere hoc homine delectemur? quia suppeditat nobis, ubi & animus ex hoc forensi strepitu reficiatur, & aures conuicio defessæ conquiescant. an tu existimas aut suppetere nobis posse, quod quotidie dicamus, in tanta uarietate rerum, nisi animos nostros doctrina excolamus; aut ferre animos tantam posse contentionem, nisi eos doctrina eadem relaxemus? ego uero fateor me his studiis esse deditum. ceteros pudeat, si qui ita se literis abdiderunt, ut nihil possint ex his neque ad communem afferre fructum, neque in aspectum lucemq; proferre: me autem quid pudeat? qui tot annos ita uiuo iudices, ut ab illis nullo me unquam tempore aut commodum, aut otium meum abstraxerit, aut uoluptas auocarit, aut denique somnus retardarit. quare quis tandem me reprehendat, aut quis mihi iure succenseat, si, quantum cæteris ad suas res obeundas, quantum ad festos dies ludorum celebrandos, quantum ad alias uoluptates, & ad ipsam requiem animi & corporis conceditur temporis, quantum alij tribuunt tempestiuis conuiujs, quantum denique aleæ, quantum pilæ, tantum mihi ego met ad hæc studia recolenda sumpsero? atque adeo mihi concedendum est magis, quòd ex his studiis hæc quoque crescit oratio, & facultas: quæ quantacunque in me est, nunquam amicorum periculis defuit: quæ si cui leuior uidetur, illa quidem certe, quæ summa sunt, ex quo fonte hauriam, sentio. nam nisi multorum præceptis, multisq; literis mihi ab adolescentia suasissem, nihil esse in uita magnopere expetendum, nisi laudem

atque honestatem ; in ea autem persequenda omnes cruciatus corporis , omnia pericula mortis atque exilij parui esse ducenda : nunquam me pro salute uestra in tot ac tantas dimicationes , atque in hos profligatorum hominum quotidianos impetus obiecissem . sed pleni omnes sunt libri , plenæ sapientum uoces , plena exemplorum uetustas : quæ iacerent in tenebris omnia , nisi literarum lumen accenderet . quàm multas nobis imagines , non solum ad intuendum , uerum etiam ad imitandum , fortissimorum uirorum expressas scriptores & Græci & Latini reliquerunt ? quas ego mihi semper in administranda rep. proponens , animum , & mentem meam ipsa cogitatione hominum excellentium conformabam . quæret quispiam , quid ? illi ipsi summi uiri , quorum uirtutes literis prodita sunt , ista ne doctrina , quam tu laudibus effers , eruditi fuerunt ? difficile est hoc de omnibus confirmare : sed tamen est certum , quid respondeam . ego multos homines excellenti animo ac uirtute fuisse , & sine doctrina , naturæ ipsius habitu prope diuino , per se ipsos & moderatos , & graues extitisse fateor : etiam illud adiungo , sæpius ad laudem atque uirtutem naturam sine doctrina , quàm sine natura ualuisse doctrinam . atque idem ego contendo , cum ad naturam eximiam atque illustrem accesserit ratio quædam , conformatioq; doctrinæ , tum illud nescio quid præclarum ac singulare solere existere . ex hoc esse hunc numero , quem patres nostri uiderunt , diuinum hominem , Africanum ; ex hoc C. Lælium , L. Furium , modestissimos homines , & continentissimos ; ex hoc fortissimum uirum , & illis temporibus doctissimum , M.



Catonem illum senem : qui profecto si nihil ad percipiendam colendamq; uirtutem literis adiuuarentur, nunquam se ad earum studium contulissent. quod si non hic tantus fructus ostenderetur, et si ex his studiis delectatio sola peteretur : tamen, ut opinor, hanc animi remissionem humanissimam ac liberalissimam iudicaretis. nam ceteræ neque temporum sunt, neque ætatum omnium, neque locorum : hæc studia adolescentiam alunt, senectutem oblectant, secundas res ornant, aduersis perfrugium ac solatium præbent, delectant domi, non impediunt foris, pernoctant nobiscum, peregrinantur, rusticantur. quod si ipsi hæc neque attingere, neque sensu nostro gustare possemus, tamen ea mirari deberemus, etiam cum in alijs uideremus. quis nostrum tam animo agresti ac duro fuit, ut Roscij morte nuper non commoueretur ? qui cum esset senex mortuus, tamen propter excellentem artem ac uenustatem uidebatur omnino mori non debuisse. ergo ille corporis motu tantum amorem sibi conciliarat à nobis omnibus : nos animorum incredibiles motus, celeritatemq; ingeniorum negligemus ? quoties ego hunc Archiam uidi iudices, (utar enim uestra benignitate, quoniam me in hoc nouo genere dicendi tam diligenter attenditis) quoties ego hunc uidi, cum literam scripsisset nullam, magnum numerum optimorum uersum de ijs ipsis rebus, quæ tum agerentur, dicere ex tempore ? quoties reuocatum eandem rem dicere, commutatis uerbis atque sententijs ? quæ uero accurate cogitateq; scripsisset, ea sic uidi probari, ut ad ueterum scriptorum laudem peruenirent. hunc ego non diligam ? non admirer ? non omni ratio-



ne defendendum putem? atqui sic à summis hominibus, eruditissimisq; accepimus, cæterarum rerum studia & doctrina, & præceptis, & arte constare; poetam natura ipsa ualere, & mentis uiribus excitari, & quasi diuino quodam spiritu afflari. quare suo iure noster ille Ennius sanctos appellat poetas: quòd quasi deorum aliquo dono atque munere commendati nobis esse uideantur. sit igitur iudices sanctum apud uos humanissimos homines hoc poetæ nomen, quod nulla unquam barbaria uiolauit. saxa & solitudines uoci respondent; bestię sæpe immanes cantu flectuntur, atque consistunt: nos instituti rebus optimis non poetarum uoce moueamur? Homerum Colophonij ciuem esse dicunt suum, Chij suum uendicant, Salaminij reputant, Smyrnæi uero suum esse confirmant; itaque etiam delubrum eius in oppido dedicauerunt: permulsi alij præterea pugnant inter se, atque contendunt. ergo illi. alienum, quia poeta fuit, post mortem etiam expetunt: nos hunc uiuum, qui & uoluntate & legibus noster est, repudiabimus? præsertim cum omne olim studium atque omne ingenium contulerit Archias ad populi R. gloriam laudemq; celebrandam. nam & Cimbricas res adolescens attigit; & ipsi illi C. Mario, qui durior ad hæc studia uidebatur, iucundus fuit. neque enim quisquam est tam auersus à musis, qui non mandari uersibus æternum suorum laborum facile præconium patiatur. Themistoclem illum, summum Athenis uirum, dixisse aiunt, cum ex eo quæreretur, quod acroama, aut cuius uocem libentissime audiret; eius, à quo sua uirtus optime prædicaretur. itaque ille

Marius item eximie L. Plotium dilexit, cuius ingenio putabat ea, quae gesserat, posse celebrari. Mithridaticum uero bellum magnum atque difficile, et in multa uarietate terra marique uersatum, totum ab hoc expressum est: qui libri non modo L. Lucullum, fortissimum, et clarissimum uirum, uerum etiam populi R. nomen illustrent. populus enim R. aperuit Lucullo imperante Pontum, et regijs quondam opibus, et ipsa natura regionis uallatum: populi R. exercitus, eodem duce, non maxima manu, innumerabiles Armeniorum copias fudit: populi R. laus est, urbem amicissimam Cyzicenorum, eiusdem consilio, ex omni impetu regio, ac totius belli ore ac faucibus ereptam esse, atque seruata. nostra semper feretur, et pradicabitur, L. Lucullo dimicante, cum interfectis ducibus depressa hostium classis, et incredibilis apud Tenedum pugna illa naualis: nostra sunt trophaea, nostra monumenta, nostri triumphi. quare, quorum ingenijs haec feruntur, ab ijs populi R. fama celebratur. carus fuit Africano superiori noster Ennius: itaque etiam in sepulcro Scipionum putatur is esse constitutus e marmore: at ijs laudibus certe non solum ipsi, qui laudantur, sed etiam populi R. nomen ornatur: in caelum huius proauus Cato tollitur: magnus honos populi R. rebus adiungitur: omnes denique illi Maximi, Marcelli, Fuluij non sine communi omnium nostrum laude decorantur. ergo illum, qui haec fecerat, Rudium hominem maiores nostri in ciuitatem receperunt: nos hunc Heracliensem, multis ciuitatibus expetitur, in hac autem legibus constitutum, de nostra ciuitate eiciemus? nam si quis mino-

rem glorie fructum putat ex Græcis uersibus percipi, quàm ex Latinis, uehementer errat: propterea quòd Græca leguntur in omnibus fere gentibus, Latina suis finibus, exiguis sane, continentur. quare si res eæ, quas gessimus, orbis terræ regionibus definiuntur; cupere debemus, quò manuum nostrarum tela peruenierint, eodem gloriam famamq; penetrare: quòd cum ipsis populis, de quorum rebus scribitur, hæc ampla sunt; tum ijs certe, qui de uita, glorie causa, dimittant, hoc maximum & periculorum incitamentum est, & laborum: quàm multos scriptores rerum suarum magnus ille Alexander secum habuisse dicitur? atque is tamen, cum in Sigæo ad Achillis tumulum astitisset, O fortunate, inquit, adolescens, qui tuæ uirtutis Homerum præconem inueneris. & uere: nam nisi Ilias extitisset illa, idem tumulus, qui corpus eius contexerat, nomen etiam obruisset. quid noster hic Magnus, qui cum uirtute fortunam adæquauit? non ne Theophrastum Mitylenæum, scriptorem rerum suarum, in concione militum, ciuitate donauit; & nostri illi fortes uiri, sed rustici ac milites, dulcedine quadam gloriæ commoti, quasi participes eiusdem laudis, magno illud clamore approbauerunt? itaque, credo, si ciuis R. Archias legibus non esset, ut ab aliquo imperatore ciuitate donaretur, perficere non potuit. Sylla, cum Hispanos, & Gallos donaret, credo, hūc petentem repudiasset. quem nos in concione uidimus, cum ei libellum malus poeta de populo subiecisset, quòd epigramma in eum fecisset tantummodo alternis uersibus longiusculis, statim ex ijs rebus, quas tunc uendebat, inbere ei præmium tri-

bui, sub ea conditione, ne quid postea scriberet. qui sedu-  
 litatem mali poeta duxerit aliquo tamen premio di-  
 gnam, huius ingenium, & uirtutem in scribendo, &  
 copiam non expetisset? quid? à Q. Metello Pio, fa-  
 miliariissimo suo, qui ciuitate multos donauit, neque  
 per se, neque per Lucullos impetrauisset? qui praefer-  
 tim usque eò de suis rebus scribi cuperet, ut etiam Cor-  
 dubæ natis poetis, pingue quiddam sonantibus atque  
 peregrinum, tamen aures suas dederet. neque enim est  
 hoc dissimulandum: quod obscurari non potest, sed prae-  
 nobis ferendum: trahimur omnes laudis studio, & o-  
 ptimus quisque maxime gloria ducitur. ipsi illi philo-  
 sophi, etiam in illis libellis, quos de contemnenda gloria  
 scribunt, nomen suum inscribunt: in eo ipso, in quo  
 predicationem nobilitatemq; despiciunt, predicari de se,  
 ac nominari uolunt. Decimus quidem Brutus, summus  
 ille uir & imperator, Accij amicissimi sui carminibus  
 templorum ac monumentorum aditus exornauit suo-  
 rum. iam uero ille, qui cum Aetolis Ennio comite bel-  
 lauit, Fuluius non dubitauit Martis manubias Musis  
 consecrare. quare in qua urbe imperatores prope arma-  
 ti poetarum nomen, & Musarum delubra coluerunt,  
 in ea non debent togati iudices à Musarum honore, &  
 à poetarum salute abhorri. atque ut id libentius fa-  
 ciatis, iam me uobis iudices indicabo, & de meo quod-  
 dam amore gloriae, nimis acri fortasse, ueruntamen ho-  
 nesto, uobis confitebor. nam quas res nos in consulatu  
 nostro, uobiscum simul, pro salute huius urbis, atque im-  
 perij, & pro uita ciuium, proq; uniuerfa rep. gessimus,  
 attigit hic uersibus, atque incohauit: quibus auditis,



quod mihi magna res, & incunda uisa est, hunc ad perficiendum hortatus sum. nullam enim uirtus aliam mercedem laborum periculorumq; desiderat, præter hanc laudis, & gloriæ: qua quidem detracta iudices, quid est quod in hoc tam exiguo uitæ curriculo; et tam breui, tantis nos in laboribus exerceamus? certe, si nihil animus præsentiret in posterum, & si quibus regionibus uitæ spatium circumscriptum est, eisdem omnes cogitationes terminaret suas; nec tantis se laboribus frangeret, neque tot curis, uigilijsq; angeretur, nec toties de uita ipsa dimicaret. nunc insidet quædam in optimo quoque uirtus, quæ noctes & dies animum gloriæ stimulis concitat, atque admonet, non cum uitæ tempore esse dimittendam commemorationem nominis nostri, sed cum omni posteritate adæquandam. an uero tam parui animi uideamur esse omnes, qui in rep. atque in his uitæ periculis laboribusq; uersamur, ut, cum usque ad extremum spatium nullum tranquillum atque otiosum spiritum duxerimus, nobiscum simul moritura omnia arbitremur? an, cum statuas & imagines, non animorum simulacra, sed corporum, studiose multi summi homines reliquerint, consiliorum relinquere ac uirtutum nostrarum effigiem non multo malle debemus, summis ingenijs expressam, & politam? ego uero omnia, quæ gerebam, iam tum in gerendo, spargere me ac disseminare arbitrabar in orbis terræ memoriam sempiternam. hæc uero siue à meo sensu post mortem abfutura sunt, siue, ut sapientissimi homines putauerunt, ad aliquam animi mei partem pertinebunt, nunc quidem certe cogita-

etone quadam, speq; delector. quare conseruate iudices hominem pudore eo, quem amicorum studiis uideatis comprobari, tum dignitate, tum etiam uenustate; ingenio autem tanto, quantum id conuenit existimari, quod summorum hominum ingenijs expetitur esse uideatis; causa uero eiusmodi, quæ beneficio legis, auctoritate municipij, testimonio Luculli, tabulis Metelli comprobetur. Quæ cum ita sint, petimus à uobis iudices, si qua non modo humana, uerum etiam diuina in tantis negotijs commendatio debet esse, ut eum, qui uos, qui uestros imperatores, qui populi R. res gestas semper ornauit, qui etiam his recentibus nostris uestrisq; domesticis periculis æternum se testimonium laudum daturum esse profitetur, quiq; est eo numero, qui semper apud omnes sancti sunt habiti, atque dicti, sic in uestram accipiatis fidem, ut humanitate uestra lenatus potius, quam acerbitate uiolatus esse uideatur. quæ de causa pro mea consuetudine breuiter simpliciterq; dixi iudices, ea confido probata esse omnibus: quæ non fori, neque iudiciali consuetudine & de hominis ingenio, & communiter de ipsius studio locutus sum, ea iudices à uobis spero esse in bonam partem accepta, ab eo, qui iudicium exercet, certe scio.

INCERTIAVCTORIS INEPTA ORATIO;  
QVAM MIRVM EST, TAM  
DIVCREDITAM ESSE CICERONIS.

**S**i quando inimicorum impetum propul-  
sare ac propellere cupistis, defendite  
nunc uniuersi unum, qui, ne omnes  
conclideretis, ardoreq; flamma consti-  
graretis, mei capitis periculo non du-  
bitauit providere. nam quem uirtutis gloria cum sum-  
ma laude ad cœlum extulit, eundem inimicorum inui-  
dia indignissime oppressum deprimit ad supplicium. si  
liberum cōceptam dulcedinem animo inclusam contine-  
tis, nolite eo uelle carere, qui carissimam uestram pro-  
creationem sibi esse duxit. est enim liberale officium,  
serere beneficium, ut metere possis fructum. fidei con-  
ducit, in loco debitum retribuere: illic enim animi uo-  
luntas propensa comprobatur, hic memoria collauda-  
tur. itaque si omnibus graue seruitutis iugum esse de-  
bet in libertate educatis, sit is uestris animis acceptissi-  
mus, qui à uestro corpore iugum acerbissimum repu-  
lit seruitutis. Et si maiores uestri eos imperatores, qui  
militum uirtute hostium fregerunt furorem, iucundissi-  
mo fructu libertatis reconciliato, non solam statuis di-  
gnos putarunt, sed etiam aeterna triumphi laude deco-  
rarunt: tum uos cum consulem, qui non militum præ-  
senti fortitudine, sed sua eximia animi uirtute hosti-  
lem ciuium mentem senatus auctoritate uindicauit,  
existimate uobis retinendum in ciuitate esse. si quæ be-  
neficia singulis ciuibus, priuatimq; dantur, ea solent



ijs esse fructuosa, à quibus sunt profecta; iure et merito possum ego uos ad defensionem meæ salutis adhortari, quos conseruaui uniuersos. nam neque maius est defendere unum, quàm populum; neque uerius à singulis, quàm ab omnibus repetere officij præmium, & fructum: propterea, quòd in unius periculo saepe contentio parua est, ut leuis sit labor defensori sustinendus; in reip. insidijs, quo firmitus est quod oppugnatur, eo paratiores sunt inimici; ut ijs sine magna sollicitudine, industria, uirtute non queat resisti. & singulorum opes saepe sunt tenues, & infirmæ ad gratiam referendam, ut opitulari bene merentibus non queant, si maxime cupiant; uniuersorum auxilium eo plurimum prodest, quòd firmioribus opibus est nitum. iure igitur, quoniam & maior impensa in patriam officij facta est, quàm in priuata sit defensione; & plus à uobis præsidij, quàm à cæteris opis, ad salutem potest afferri: uos obtestor, quos mihi & debere, et posse intelligo opitulari. non conuenit enim, cum ego ad promerendum officium tam fuerim expeditus, uos ad referendam gratiam esse tardiores; ne cuius amplitudinem, ac gloriam laude, atque honoribus amplificare debeatis, eius incolumitatem & salutem deserendam existimetis. etenim errat, si quis arbitratur M. Tullium itcirco in capitis periculum uocari, quòd deliquerit aliquid, quòd patriam læserit, quòd improbe uixerit. non citatur reus audaciæ: uirtutis reus citatur. non accusatur, quòd remp. ui oppugnarit, sed quòd homo nouus perniciosum nobilium restinxerit furorem. non obest mihi turpis, & nocens, sed honestis



sime laudatissimeq; acta uita non odio bonorum, sed inuidia premior malorum. intelligunt homines, tot, & tam præclaris testimonijs, monumentisq; uirtutis comparatis, M. Tullio, dum sit incolumis, fore uoluptati. iccirco uitam eripere cupiunt, ut cum spiritu sensum quoque adimant iucunditatis. non ne igitur indignum est, eos præmijs meis inuidere, qui uirtute certare noluerunt? eos in contentionem honoris uenire, qui officijs se superari æquissimo animo tulerunt? si dulcis est gloria, consequere uirtutem. noli abijcere labores, petere honorem: honorem dico? immo uero famam, fortunas, familiam, liberos, caput, corpus, ipsum denique sanguinem, & animam. cedo inuitus de rep. cedo oppressus de fortuna, de dignitate: discedo a rep. uictus audacia malorum. liceat manere si non illum M. Tullium custodem urbis, defensorem omnium, patrem patriæ, at certe reliquias Tullij: liceat in conspectu ciuium, in hac urbe, quam ex parricidarum faucibus eripuit, remanere tecta omnium, fana deorum, uniuersam uidere periculo liberatam suo ciuitatem: liceat ex hac flâma euolare, præsertim quod illud impium incendium perditorum hominum, lacrymis potius meis, quàm sanguine uestro restingui malui. neque enim peto, ut mihi detis uitam; sed datam repeto, ut reddatis. si meministis quod dedi, uos non debetis obliuisci, sed retribuere quod debetis. uos, uos obtestor dij immortales, qui meæ menti lumina prætulistis, cum consensum extinxistis coniurationis, arcemq; urbis ab incendio, ac flamma liberaui; liberosq; uestros è gremio, et complexu matrum ad cadem, & cruorem non sum passus

sus abstrahi. num igitur potest fieri, à clientibus ut recipiar, cum, à quibus debeam retineri, reiicere instituant? socij quò fugiant, cum aditus custodi patriæ prælusus sit? quomodo spes salutis reliquis residebit, cum ciuibus prælusa sit expectatio incolumitatis? pax & concordia extraneis gignetur, cum iam domesticis non infideat, sed publice providenti eripiat? nam quid ego improborum facta renouem oratione, ut redintegratione illius cõiurationis animos uulnerem uestros? auxilium ab alienis efflagitabo, cum cines uestros deseratis? sociorum inuocem subsidium, cum à ciuibus interclusum sit præsidium? quam colere gentem nunc instituiam? utrum, ut custos accipiar, an ut proditor excludar? si ut conseruator, uestra erit ignominia: si ut oppugnator, præcisa erunt omnia: itaque, quod putauis fore gaudium, id extitit exitium. si Quirites eundem in cæterorũ periculis haberemus animum, quem in nostris difficultatibus, & pro innocentissimo quoque propugnare, & nocentissimum quenque oppugnare nobis utilissimum esse arbitralemur; & si cum optimi cuiusq; rebus aduersis nostrã salutem, cum deterrimorum hominum secundis nostra pericula putaremus coniuncta: frequentes profecto talibus conatibus obuiam ire niteremur; neque partim innocentia freti, partim nobilitate nixi, partim potentia ac multitudine amicorum fulti, cum perfacile existimaremus aduersariorum uim, ac factionem à nobis repelli posse, subito ipsi simili periculo circumnenti, in nostro euentu aliorum reminiscentes casus, iure id nobis accidere nequicquam quereremur. quis enim est Quirites, qui, nunc cum

inimicorum nostrorū uim atque uolentiam perspiciat ,  
 quiq; nostrum ipsum periculosissimum casum recognoscat ,  
 qui non sibi ac suis diffidat fortunis ? quo enim  
 se satis tutum arbitrabitur præsidio ? uirtutis & gloriae ?  
 at ea nos ipsa hoc tempore oppugnant . multitudine  
 amicorum ? aperuerunt non fortes esse se amicos ,  
 si in eorum potestate nostra sita salus non est . paucitate  
 inimicorum ? at id non in ipsius , sed in aliorum uoluntate  
 positum est . nam non satis est , ne cui iniuriam facias ,  
 providere : si tamen sunt uolūtarij inimici , qui tuis  
 præmijs te oppugnēt . atque cum hæc omnia omnibus  
 sint grauiā , atque acerba , tum uero nobis misera  
 atque intoleranda , quorum & officia in remp. recentissima ,  
 & incommoda ob remp. frequentissima in familia uersantur .  
 nunc si eadem conditio disceptationis proponeretur , æqui  
 auditores adhibebuntur , aures non obtusæ criminatione ,  
 sed uacuae præbebūtur : qui sunt affecuti summum  
 gradum honoris , non dispoliābuntur honore : qui sperant ,  
 facilius & procliuus ad laudem nobilitatis peruenient .  
 quamobrem nolo me duce supplicij uos ad fraudem deduci ,  
 ut ego ad pristinum statum recidam casus . nunc igitur si  
 lingua est concertandum , innocentiae uirtute fretus supero :  
 si facta compensanda sunt , conferamus æquitatem : si uolentiae  
 impetu opprimimur , cedam pro omnibus unus tribunicio  
 furori , quoniam laborem pro cunctis ferre consueui .  
 si igitur aliquo tempore ijs hominibus consulistis ,  
 quorū animus est religionis pietate defunctus , debetis  
 mihi quoque prospicere , qui numini deorū consecratum  
 sartum tectum ab omni piaculo conseruari , & uos ut



tutam tranquillamq; fortunam traheretis, mea perfecti uigilantia. nam me, quem paulo ante fortuna ere-xerat ad gloriam, uirtus extulit ad laudem, populus tribuit honorem, eundem tribuni furor exagitatus depulit ad calamitatem. & quoniam animaduertistis illam con-spirationem conflatam ita esse restinctam, ut nulla scintilla compareat incendij, uos quoque tribuni-ciam sedate temeritatem. qui nunc se mihi inimicum ostendit, se prius esse uestrum professus est inimicum. ne rei crudelitas experta in me, in uos conuale-scat, & calamitas remorata longius serpat atque progrediatur, præcauete. nunc uel solus delectus ad calamitatem, uel primus uocatus ad tale periculum, omnium ani-mos iure debeo commouere. omnia sunt immutata. ma-nus ad demonstrandam religatur iniuriam: lingua in-ciditur ad deplorandam calamitatem: animus præclu-ditur ad exponendam rei indignitatem. humilitatem generis obijciunt nobis, qui nouam rationem suscitant, ueteres maiorum obterunt laudes. sed quid ego plura de illorum, aut in me maledictis, aut in uos scelerate loquar factis? quorum cognita improbitas me tacente coarguitur turpitudine uitæ: ut de ijs non sit necesse inimicos prædicare, de quorum scelere ne amici qui-dem, aut ipsi possunt negare. uos ego appello, quorum de me maxima est potestas: apud uos loquor de mea ca-lamitate, quos habui semper innocentiae, et uirtutis meæ testes. igitur ex ciuitate bene meritis de rep. ciuis extur-batur? innocens expellitur cōsularis homo? non faculta-tibus usus quondā minimis, amicorum multorū præsi-dio munitus, nunc partim ab inuidis, partim ab inimicis



circūuentus eget indigne? huic si opem non tuleritis in periculo capitis, non, credo, retinebitis uestram libertatem: qui neque tanta ualeatis auctoritate, neque tantorum officiorum impensam egistis in patriam. mihi credite: hoc in uno incommodum confirmatum, multorum infirmabit incolumitatem: & si initio non erit refutatum, impune ad omnium perniciem conualescet. proinde aut in meo periculo salutem integram praestate communem, aut in uestris hoc idem incommodum expectate fortunis. nemo tam perdit auctoritate tam facinorosus inuentus est uita, qui cū de scelere fateretur, non tamen sententijs prius iudicium conuinceretur, quàm supplicio addiceretur. ego repente ui tribunicia correptus, non modo loquendi libere in iudicio, sed ne consistendi quidem in ciuitate habeo potestatem. eiycior non solum sine teste, sine indice, sine crimine, sed sine etiā scelere, sine accusatore. hostibus in bello qui dissident uoluntate, dimicant armis, uitam quotidie oppugnant, in ipsa acie cum praeliantur, licet loqui, licet disputare: mihi in pace ciui, qui perditorum hominum fregi furorem, pro fortunis meis apud uos loqui non licebit? serui, qui ad supplicium cāsi uerberibus trahuntur, apud eos sēpe disputant, quos necare uoluerunt: ego consularis apud uos non loquar, quos conseruari? tacebo, si necesse est: tacebo, inquam, animo æquo, quoniam uirtus mea me tacente agit causam meam. itaque ut ego in concione mea nihil ponam de rebus meis gestis, tamen in animis & memoria uestra largiter relinquam. isti modo uideant, qua ratione hanc inultam meam fugam ferre possint. etenim si à  
me

me, ut isti existimant, Lentuli mortui sordes, si Catilina notissimus furor, si amentia Cethegi, si luxuries, ac supra Cassij poenas repetunt, profecto istis hora nulla, eiecto Tullio, uacua periculo; aut periculi expectatione relinquetur. itaque illi in dies non meis insidijs, quæ nulla à me parantur; sed suorum scelerum conscientia cruciati, mihi absenti & populo R. poenas dabunt. quas ob res ego inimicorum amentie, cupiditatiq; paucorum, omnium salutis causa decedam: neque eo deducam, aut progredi patiar, ut opera mea manus inter uos conseratis, cadesq; ciuium inter se fiat: multoq; potius ipse patria, liberisq; meis carebo, quàm propter unum me, uos de fortunis uestris, rei q; publicæ dimicetis: sic enim ab initio fui animatus, ut non magis me mea causa putarem esse natū, quàm reip. procreatum. sed illud queror, quod non iam ad unius perniciem, sed ad uniuersorum instruitur calamitatem: conqueri, commiserari, dicere, expurgare, suspicionem dimouere, crimen diluere non licere: ore oppressa ceruices esse præbendas. quæ tamen omnia iam non sunt tam calamitosa, quod mihi sunt subeūda; quàm perniciofa, quod in remp. sunt introducta. quamobrem statutum est, atque decretum, in his temporibus ciuitatis omnia perpeti, quæ uolet furor libidinosus. uim uolunt afferre: præsto sum. eicere uolunt: ex eo indicta causa. nolunt audire: causam non dico. aliud quippiam conantur: agant: nihil duri, nihil acerbi mihi erit, quod remp. tutabitur: non enim illis uictus cedo, sed incolumibus uobis me condono: neque enim mors miseranda est, quæ ob remp. capitur; neque exilium tur-

pe, quod uirtute suscipitur: cum præsertim non nullam hæ poenæ habeant in se consolationem: nam uitam si eripiunt, non adiment gloriam immortalem: si exilio multabunt corpus, non animum à rep. remouebunt: nam, ubicunque ero, hoc cogitabo, hæc semper cura mea erit: meq; uobis ereptum, non à uobis repudiatum, existimabo. illud ab uniuersis postulo petoq;, si; dum in ciuitate manere licitum est, nemini iniuste periculum creauim, nemini innocenti fui calamitati, si omnibus auxilio præsidioq; esse consueui, plurimosq; in hac ciuitate sum tutatus, uti uos liberos meos in uestram fidem recipiatis, eosq; defendatis, ne ue inimicos meos in familiam nostram longius progredi patiamini; utiq;, siue hinc abiero, siue ero hic oppressus, ea maneat opinio, et existimatio, quæ uirtute parta, non quæ infelicitate illata est. Nunc ego te Iupiter optime maxime, cuius nutu ac ditione sola terrarum gubernantur, teq; particeps connubij, socia regni, Regina Iuno, teq; Tritonia, armipotens, Gorgona, Pallas, Minerva, ceteriq; dii, deæq; immortales, qui excellenti tumulo ciuitatis sedem Capitolij in saxo incolitis constitutam, ut non solum cunctam intueri, sed etiam tueri possitis ciuitatem; à quorum ego quondam altaribus impiam manū ciuium remoui; à quorum templis meo periculo funestam facem repuli, ne illustrissimum orbis terrarum monumentum cum principe omnium terrarū occideret ciuitate; teq; Iupiter Stator, quem uere huius imperij Statorem maiores nostri nominauerunt, cuius in templo hostilem impetum Catilinæ repuli à muris, cuius templum à Romulo uictis Sabinis in palatij radi-

ce cum victoria est collocatum: oro atque obsecro, ferite opem pariter reip. cunctaq; ciuitati, meisq; fortunis, resistite tribunicio furori, fauete innocentiae, subuenite solitudini, miseremini senectutis, nolite cum supplicem à uobis absterrere & excludere, qui in suo magistratu funestam faciem à uestris repulit templis. si C. Mario auxilio fuistis, quod in cliuo Capitolino improborum ciuium caedem fecerat; si P. Scipioni, quod Annibalis furibundam mentem à uestris repulit templis; si denique Cn. Pompeio, quod terra mariq; hostes reddidit pacatos: sic nunc in meis calamitatibus aliquam ferre opem diuinam: ut saepe multorum in periculis fecistis, sic nunc in meis miseris diuinum aliquod auxilium & numen ostendite. deinde uos, quorum potestas proxime ad deorum immortalium numen accedit, oro atque obsecro, quibus sigillatim saepe supplex ad pedes iacui; ut eum, quem singuli stratum atque abiectum subleuastis, nunc uniuerſi conseruatum uelitis. si neminem unquam uestrum laesi; si nemini innocenti obfui; si etiam è contrario, ut quisque auxilium meum desiderauit, opem ferre non dubitauit; si denique, quaecunque administraui, ex uestra auctoritate et patrum conscriptorum uoluntate feci; si malui inimicorum cupiditati, quam reip. et legitima auctoritati poenas sufferre: ut existimetis, ex illo crudelissimo inimicorum impetu ereptum, in antiquum statum dignitatis restitui conuenire. sed quoniam neque mihi libere loquendi, neque uobis clementer audiendi, neque omnino iudicandi paucorum furore & audacia facta est potestas, sed oppressa est resp. armis, metu debilitata seruili, uti



liberum spiritum ducendi nullam habeat potestatem :  
cedam inermis armatis , innocens nocentibus , priuatus  
furibundo magistratui. neque enim Q. Metellus quic-  
quam de uirtute sua detraxit , quod cessit L. Saturni-  
no furenti ; neque C. Cotta , quod Q. Varroni tribu-  
no pl. inferiore genere orto cedendum putauit ; neque  
C. Marius , qui quantas res gesserit , uestra uobis liber-  
tas indicio esse poterit : neque uero M. Tullius suum ani-  
mum uestra abalienauit potestate , cum præcipuum uo-  
bis obsidem sui animi , uestram reliquerit libertatem .  
quamobrem testor deos , deasq. omnes immortales , ue-  
strasq. maxime mentes , me non uitæ turpitudine , non  
pro magnitudine scelerum , non propter reliquæ etæ-  
tis infamiam , pœnas iure et lege persolvere ; sed propter  
uirtutis inuidiam , propter iucundissimam ingenij lau-  
dem , propter magnitudinem rerum gestarum crude-  
lissime ciuitate priuari. quod si idem accidit Q. Cepio-  
ni , si Mancino , si Rutilio , mihi quoque hoc accidisse ,  
non magnopere erit mirandum , cum præsertim non ge-  
neris antiquitate , sed uirtutis ornamento summam lau-  
dem sim consecutus. Nunc ego uos equites R. obtestor ,  
quorum uirtute nomen Romanum uictoriam cum lau-  
de possidet coniunctam , quorum factis gloriantur ci-  
ues , latantur socij , gemunt hostes ; ut , si erga uos o-  
mni tempore optime fui animatus , si mea pericula ne-  
glexi , dum timorem à patria propulsarem ; si æque li-  
beris uestris prospexi , ac uos parentibus consuestis ; ut  
nunc me uelit is uestis opibus defensum incolumem in hac  
ciuitate retinere , quæ cum à scelerata coniuratione es-  
set incensa , meo ductu ac labore restincta est ; nec pa-

tiimini me à liberis meis abstractum, à coniuge abreptum, ab aris focusq; innocentem proiectum uitam degere in exilio, miserrimi mortalis casum subire. proijcitur Tullius in exilium. itaque nimium innocens ab inimico, religiosus à scelerato, beneuolus huic ciuitati ab hoste. o misera uitæ ratio, quæ tandiu resides in uoluptate, quandiu fortunæ poscit libido. ego ne inimicus huic ciuitati? quamobrem? quia inimicos necaui. ego ne hostis? quid ita? quia hostes interfeci. en conditionem huius temporis. antea gloria et laude dignissimi ducebantur, qui hæc perfecerunt: nunc scelerati, & parricidæ esse dicuntur, qui hæc administrarunt. sint sane scelerati: superet istorum uictoria, si modo uictoria appellanda est, in qua ciuitatis inest luctus: habeant hanc palmam ex innocentis cruore. tantum à uobis illud equites R. peto & rogo, ut, quem sapenumero uestra laude cohonestastis, eundem in dubijs uitæ periculis uestra uirtute conseruetis.

Quid precatus à Ioue optimo maximo,  
 cæterisq; dijs immortalibus sum. Qui-  
 rites, eo tempore, cum me, fortunasq;  
 meas pro uestra incolumitate, otio,  
 concordiaq; deuoui, ut, si meas ratio-  
 nes unquam uestre saluti anteposuissem, sempiternam  
 poenam sustinerem mea uoluntate susceptam; sin-  
 ea, quæ ante gesseram, conseruandæ ciuitatis causa  
 gessissem, & illam miseram profectionem uestre salu-  
 tis gratia suscepissem, ut quod odium scelerati homines,  
 & audaces in remp. & in omnes bonos conceptum iam-  
 diu continerent, id in me unum potius, quàm in opti-  
 mum quenque, & in uniuersam remp. deflecerent;  
 hoc si animo in uos, liberosq; uestros fuisset, ut ali-  
 quando uos, patres conscriptos, Italiamq; uniuersam  
 memoria mei, misericordia, desideriumq; teneret: eius  
 deuotionis me esse conuictum iudicio deorum immorta-  
 lium, testimonio senatus, consensu Italiæ, confessione  
 inimicorum, beneficio diuino immortalisq; uestro, maxi-  
 me lætor Quirites. & si homini nihil est magis optan-  
 dum, quàm prospera, æquabilis, perpetuaq; fortuna,  
 secundo uitæ, sine ulla offensione, cursu: tamen si mihi  
 tranquilla & placata omnia fuissent, incredibili quadã  
 & pene diuina, qua nunc uestro beneficio fruor, læti-  
 tie uoluptate caruissem. quid dulcius hominum gene-  
 ri à natura datum est, quàm sui cuique liberi? mihi  
 uero & propter indulgentiam meam, & propter ex-

cellens eorum ingenium uita sunt mea cariores : tamen non tanta uoluptate erant suscepti, quanta nunc sunt restituti . nihil cuiquam fuit unquā iucundius , quā mihi meus frater : non tam id sentiebam, cum fruebar, quā tunc, cum carebam , & posteaquam uos me illi , et mihi eum reddidistis . res familiaris sua quenque delectat : reliquæ meæ fortunæ recuperatæ plus mihi nūc uoluptatis afferunt , quā tunc incolumi afferebant . amicitia , consuetudines , uicinitates , clientelæ , ludi denique, & dies festi quid haberent uoluptatis, carendo magis intellexi, quā fruendo . iam uero honos, dignitas , locus, ordo, beneficia uestra , quanquam mihi semper clarissima uisa sunt , tamen ea nunc renouata illustriora uidentur, quā si obscurata non essent . ipsa autem patria , dii immortales , dici uix potest, quid caritatis , quid uoluptatis habet ? quæ species Italiæ ? quæ celebritas oppidorum ? quæ forma regionum ? qui agri ? quæ fruges ? quæ pulchritudo urbis ? quæ humanitas ciuitum ? quæ reip. dignitas ? quæ uestra maiestas ? quibus ego omnibus antea rebus sic fruebar , ut nemo magis . sed tanquam bona ualetudo iucundior est eis , qui e graui morbo recreati sunt, quā qui nunquam agro corpore fuerunt : sic ea omnia desiderata magis , quā assidue percepta , delectant . quorsum igitur hæc disputo ? quorsum ? ut intelligere possitis, neminem unquam tanta eloquentia fuisse, neque tam diuino atque incredibili genere dicendi, qui uestrorū magnitudinem multitudinemq; beneficiorum, quæ in me, fratremq; meum, liberosq; nostros contulistis , non modo augere , aut ornare oratione , sed enumerare , aut consequi possit . à



parentibus, id quod necesse erat, paruus sum procreatus, à uobis natus sum consularis. illi mihi fratrem incognitum, qualis futurus esset, dederunt: uos spectatum & incredibili pietate cognitum reddidistis. remp. illis accepi temporibus eam, quæ pene amissa est: à uobis eam recuperavi, quam aliquando omnes unius opera seruata iudicauerunt. dii immortales mihi liberos dederunt, uos reddidistis. multa præterea à dijs immortalibus optata consecuti sumus: nisi uestra uoluntas fuisset, omnibus diuinis muneribus caruissemus. uestros denique honores, quos eramus gradatim singulos assecuti, nunc à uobis uniuersos habemus: ut, quantum antea parentibus, quantum dijs immortalibus, quantum uobismet ipsis, tantum hoc tempore, uniuerso cuncta, populo R. debeamus. nam cum in ipso beneficio uestro tanta magnitudo est, ut eam complecti oratione non possim: tum in studijs uestris tanta animorum declarata est uoluntas, ut non solum calamitatem mihi detraxisse, sed etiam dignitatem auxisse uideamini. non enim pro meo reditu, ut pro P. Popilij, nobilissimi hominis, adolescentes filij, & multi præterea cognati atque affines deprecati sunt; non, ut pro Q. Metello, clarissimo uiro, iam spectata ætate filius; non L. Dalmaticus consularis, summa auctoritate uir; non Q. Metellus censorius, non eorum liberi; non Q. Metellus Nepos, qui tum consulatum petebat; non sororum filij Luculli, Seruiliij, Scipiones: permulti enim tum Metelli, aut Metellarum liberi pro Q. Metelli reditu uobis; ac patribus uestris supplicauerunt. quod si ipsius summa dignitas, maximeq; res gestæ

non satis ualerent, tamen filij pietas, propinquorum preces, adolescentium squalor, maiorum natu lacrymæ populum R. mouere potuerunt. nam C. Marij, qui post illos ueteres clarissimos consulares, uestra patrumq; memoria, tertius ante me consularijs subiit indignissimam fortunam præstantissima. sua gloria, dissimilis fuit ratio: non enim ille deprecatione redijt, sed in dissensu ciuium, exercitu se armisq; reuocauit. me autem, nudum à propinquis, nulla cognatione munitum, nullo armorum ac tumultus metu, C. Pisoni generi mei diuina quædam & inaudita auctoritas, atque uirtus, fratrisq; mei miserrimi, atque optimi quotidiana lacrymæ, sordesq; lugubres à uobis deprecata sunt. frater erat unus, qui suo squalore uestros oculos inflecteret; qui suo fletu desiderium mei memoriamq; renouaret; qui statuerat Quirites, si uos me sibi non reddidissetis, eandem subire fortunam; & tanto in me amore extitit, ut negaret fas esse non modo domicilio, sed ne sepulcro quidem se à me esse seiunctum. pro me præsentem senatus, hominumq; præterea uiginti millia uestem mutauerunt: pro eodem me absente unius squalorem sordesq; uidistis. unus hic, qui domi, qui in foro posset esse, mihi pietate filius inuentus est, beneficio parens, amore, idem qui semper fuit, frater. nam coniugis miseræ squalor & luctus, atque optimæ filiæ mæror assiduus, filijq; parui desiderium mei, lacrymæq; pueriles aut itineribus necessarijs, aut magna parte tectis, ac tenebris continebantur. quare hoc maius est uestrum in nos promeritum, quòd non multitudini propinquorum, sed nobismet ipsis nos reddidistis. sed quemadmodum

propinqui, quos ego parare non potui, mihi ad deprecandam calamitatem meam non affuerunt: sic, illud quod mea uirtus præstare debuit, adiutores, auctores, hortatoresq; ad me restituendum ita multi fuerunt, ut longe superiores omnes hac dignitate copiaq; superarem. nunquam de P. Popilio, clarissimo, atque fortissimo uiro; nunquam de Q. Metello, nobilissimo & constantissimo ciue; nunquam de C. Mario, custode ciuitatis, atque imperij uestri, in senatu mentio facta est. tribunicijs superiores illi rogationibus, nulla auctoritate senatus sunt restituti; Marius uero non modo non à senatu, sed etiam oppresso senatu est restitutus: nec rerum gestarum memoria in reditu C. Marij, sed exercitus, atque arma ualuerunt: at de me, ut ualeret, semper senatus flagitauit; ut aliquando perficeretur, cum primum licuit, frequentia atque auctoritate perfecit. nullus in eorum reditu motus municipiorum, & coloniarum factus est: at me in patriam ter suis decretis Italia cuncta reuocauit. illi, inimicis interfectis, magna ciuium cæde facta, reducti sunt: ego ijs, à quibus eiectus sum, prouincias obtinentibus, inimico autem optimo uiro, & mitissimo, altero consule referente, reductus sum, cum is inimicus, qui ad meam perniciem uocem suam communibus hostibus præbuisset, spiritu duntaxat uiueret, re quidem infra omnes mortuos amandatus esset. nūquam de Popilio L. Opimius, fortissimus consul, nunquam de Q. Metello, non modo C. Marius, qui erat inimicus, sed ne is quidem, qui secutus est, M. Antonius, homo eloquentissimus, cum A. Albino collega senatum aut populum est cohortatus. at pro me supe-

riores consules semper, ut referrent, efflagitati sunt: sed ueriti sunt, ne gratiæ causa facere uiderentur, quod alter mihi affinis erat, alterius causam capitis receperam: qui prouinciarum fœdere irretiti, totum illum annum, querelas senatus, luctum bonorum, Italiæ gemitum pertulerunt. calendis uero Ian. posteaquam orba resp. consulis fidem, tanquam legitimi tutoris implorauit, P. Lentulus, consul, parens, deus, salus nostræ uitæ, fortunæ, memoriæ, nominis, simul ac de solenni religione retulit, nihil humanarum rerum sibi prius, quam de me, agendum iudicauit. atque eo die confecta res esset, nisi is tribunus pl. quem ego maximis beneficijs quæstorem consul ornaueram, cum & cunctus ordo, & multi eum summi uiri orarent, & Cn. Oppius focer, optimus uir, ad pedes eius flens iaceret, noctem sibi ad deliberandum postulasset: quæ deliberatio non in reddenda, quemadmodum non nulli arbitrabantur, sed, ut patefactum est, in augenda mercede consumpta est. postea res acta est in senatu alia nulla: & cum uarijs rationibus impediretur, uoluntate tamen perspecta senatus, causa ad uos mense Ian. deferrebatur. hic tantum interfuit inter me, & inimicos meos. ego, cum homines in tribunali Aurelio palam conscribi, centuriariq; uidissem; cum intelligerem ueteres ad spem cædis Catilinæ copias esse reuocatas; cum uiderem ex ea parte homines, cuius partis nos uel principes numerabamur, partim quod mihi inuiderent, partim quod sibi timerent, aut proditores esse, aut desertores salutis meæ; cum duo consules empti pactione prouinciarum, auctores se inimicis reip. tradidissent; cum egestatem,



auaritiā, libidines suas uiderent expleri non posse, nisi me constrictum domesticis hostibus dedidissent; cum senatus equitesq; R. flere pro me, ac mutata ueste uobis supplicare, edictis atque imperijs uetarentur; cum omnium prouinciarum pacificationes, cum omnia cum omnibus foedera, reconciliationes gratiarum sanguine meo sancirentur; cum omnes boni non recusarent, quin uel pro me, uel mecum perirent: armis decertare pro mea salute nolui; quod & uincere et uinci luctuosum reip. fore putauī. at inimici mei, mense Ian. cum de me ageretur, corporibus ciuū trucidatis, flumine sanguinis meum reditum intercludendum putauerunt. itaque cum ego abfui, eam remp. habuistis, ut aequae me, atque illam restituendam putaretis. ego autem, in qua ciuitate nihil ualeret senatus, omnis esset impunitas, nulla iudicia, uis & ferrum in foro uersarentur, cum priuati se parietum praesidio, non legum tuerentur, tribuni pl. uobis inspectantibus uulnerarentur, ad magistratum domos cum ferro & facibus iretur, consulis fasces frangerentur, deorum immortalium templa incenderentur, remp. nullam esse putauī: itaque neque rep. exterminata, mihi locum in hac urbe esse duxi; nec, si illa restitueretur, dubitauī, quin me secum ipsa reduceret. an ego, cum mihi esset exploratissimum, P. Lentulum proximo anno consulem futurum, qui, illis ipsis reip. periculosissimis temporibus, edilis curulis, me consule, omnium meorum consiliorum particeps, periculorumq; socius fuisset; dubitarem, quin is me confectum consularibus uulneribus, consulari medicina ad salutem reduceret? hoc duce, collega autem eius, clemen-

tissimo atque optimo uiro, primo non aduersante, post etiam adiuuante, reliqui magistratus pene omnes fuerunt defensores salutis meæ: ex quibus excellenti animo, uirtute, auctoritate, præsidio T. Annius et P. Sextius, præstanti in me beneuolentia, & diuino studio extiterunt. eodemq; P. Lentulo auctore, & pariter referente collega, frequentissimus senatus, uno dissentiente, nullo intercedente, dignitatem meam, quibus potuit uerbis amplissimis, ornauit, salutem uobis, municipijs, colonijsq; omnibus commendauit. ita me nudum à propinquis, nulla cognatione munitum consules, prætores, tribuni plebis, senatus, Italia cuncta semper à uobis deprecata est: denique omnes, qui uestris maximis beneficijs honoribusq; sunt ornati, producti ad uos ab eodem, non solum ad me conseruandum uos cohortati sunt, sed etiam rerum mearum gestarum auctores, testes, laudatoresq; fuerunt. quorum princeps ad cohortandum uos, & ad rogandos fuit Cn. Pompeius, uir omnium, qui sunt, fuerunt, erunt, uirtute, sapientia, ac gloria princeps. qui mihi unus uni priuato amico eadem omnia dedit, quæ uniuersæ reip. salutem, otium, dignitatem. cuius oratio fuit, quemadmodum accepi, tripartita. primum uos docuit, meis consilijs remp. esse seruata; causamq; meam cum communi salute coniunxit; hortatusq; est, ut auctoritatem senatus, statum ciuitatis, fortunas ciuis bene meriti defenderetis: tum in perorando posuit, uos rogari à senatu, rogari ab equitibus R. rogari ab Italia cuncta: denique ipse ad extremum pro mea uos salute non rogauit solum, uerum etiam obsecrauit. huic ego homini Quirites tantum debeo,

quantum hominem homini debere uix fas est. huius consilia, P. Lentuli sententiam, senatus auctoritatem uos secuti, in eo me loco, in quo uestris beneficijs fueram, iisdem centurijs, quibus collocaratis, reposuistis. eodem tempore audistis eodem ex loco summos uiros, ornatissimos atque amplissimos homines, principes ciuitatis, omnes consulares, omnes pratorios eadem dicere, ut omnium testimonio, per me unum remp. conseruatam esse, constaret. itaque cum P. Seruilius, grauissimus uir, & ornatissimus ciuis, dixisset, opera mea remp. incolumem magistratibus deinceps traditam, dixerunt in eandem sententiam ceteri. sed audistis eo tempore clarissimi uiri non solum auctoritatem, sed etiam testimonium, L. Gellij: qui, quia suam classem attentatam magno cum suo periculo pene sensit, dixit in concione uestra, si ego consul, cum fui, non fuisset, remp. funditus interituram fuisse. En ego tot testimonijs Quirites, hac auctoritate senatus, tanta consensione Italiae, tanto studio bonorum omnium, agente P. Lentulo, consentientibus ceteris magistratibus, deprecante Cn. Pompeio, omnibus hominibus fauentibus, dijs denique immortalibus frugum ubertate, copia, uilitate redditum meum comprobantibus, mihi, meis, reip. restitutus, tantum uobis, quantum facere possum, Quirites pollicebor: primum, qua sanctissimi homines pietate erga deos immortales esse solent, eadem me erga populum R. semper fore, numenq; uestrum aequae mihi graue, & sanctum, ac decorum immortalium, in omni uita futurum: deinde, quoniam me in ciuitatem respub. ipsa reduxit, nullo me loco reip. defuturum. quod si quis

existimat, me aut uoluntate esse mutata, aut debilitata uirtute, aut animo fracto, uehementer errat. mihi quod potuit uis, & iniuria, & sceleratorum hominum furor detrahere, eripuit, abstulit, dissipauit: quod uiro forti adimi non potest, id manet & permanebit. uidi ego fortissimum uirum, municipem meum, C. Marium, quoniam nobis quasi aliqua fatali necessitate non solum cum ijs, qui hac delere uoluissent, sed etiam cum fortuna belligerandum fuit: cum tamen uidi, cum esset summa senectute, non modo non infracto animo propter magnitudinem calamitatis, sed confirmato atque renouato. quem egomet dicere audiui, tum se fuisse miserum, cum careret patria, quam obsidione liberauisset; cum sua bona possideri ab inimicis, ac diripi audiret; cum adolescentem filium uideret eiusdem socium calamitatis; cum in paludibus demersus, concursu ac misericordia Minturnensium corpus ac uitam suam conseruasset; cum parua nauicula traiectus in Africam, quibus regna ipse dederat, ad eos inops, supplexque uenisset. recuperata uero sua dignitate, se non commissurum, ut, cum ea, quae amiserat, sibi restituta essent, uirtutem animi non haberet, quam nunquam perdidisset. sed hoc inter me, atque illum interest; quod ille, quae re plurimum potuit, ea ipsa re inimicos suos ultus est; armis; ego, quae consueui, utar pietate; quoniam illi arti in bello, ac seditione locus est; huic in pace, atque otio: quodque ille animo irato nihil, nisi de inimicis ulciscendis, agebat; ego de ipsis inimicis tantum, quantum mihi resp. permittet, cogitabo. denique Quirites, quoniam me quatuor omnino gentes



ra hominum uiolarunt; unum eorum, qui odio reip.  
quòd eam ipsis inuitis conseruaram, mihi inimicissimū  
fuerunt; alterum, qui per simulationem amicitiae ne-  
farie prodiderunt; tertium, qui, cum, propter inertiam  
suam eadem assequi non possent, inuiderent laudi, &  
dignitati meae; quartum, qui, cum custodes reip. esse  
debuerunt, salutem meam, statum ciuitatis, dignita-  
tem eius imperij, quod erat penes ipsos, uendiderunt:  
sic ulciscar genera singula, quemadmodum à quibus-  
que sum prouocatus; malos ciues, reip. bene gerendo;  
perfidios amicos, nihil credendo, atque omnia cauendo;  
inuidos, uirtuti & gloriae seruiendo; mercatores pro-  
uinciarum, reuocando domum, atque ab ijs provincia-  
rum rationem repetendo. quanquam mihi maiori cu-  
ra est, quemadmodum quidem uobis, qui de me estis o-  
ptime meriti, gratiam referam, quàm quemadmodum  
inimicorum iniurias, crudelitatemq; persequar. ete-  
nim ulciscendae iniuriae facilius ratio est, quàm beneficij  
remunerandi; propterea quòd superiorem esse contra  
improbos, minus est negotij, quàm bonis exaeuari:  
tum etiam nec tam necessarium quidem est, male meri-  
tis, quàm optime meritis, referre quod debeas. odium  
uel precibus mitigari potest, uel temporibus reip. com-  
muniq; utilitate deponi, uel difficultate ulciscendi ten-  
neri, uel uetustate sedari: bene meritos quin colas, nec  
exorari fas est, neque id reip. repetere utcunque necesse  
est, neque est excusatio difficultatis, neque æquum est  
tempore & die memoriam beneficij definire. postremo,  
qui in ulciscendo remissior fuit, mox aperte laudatur:  
at grauissime uituperatur, qui in tantis beneficijs,  
quanta

quanta uos in me contulistis, remunerandis est tar-  
 dior; neque solum ingratus, quod ipsum graue est,  
 uerum etiam impius appelletur necesse est. atque in  
 officio persoluendo dissimilis est ratio, & pecunia de-  
 bita: propterea quod pecuniam, qui retinet, non dis-  
 soluit; qui reddidit, non habet: gratiam &, qui re-  
 tulit, habet; et, qui habet, dissoluit. quapropter me-  
 moriam uestri beneficii colam beneuolentia sempiterna,  
 non solum dum anima superabo mea, sed etiam cum  
 mortuo monimenta uestri in me beneficii permanebunt.  
 in referenda autem gratia hoc uobis repromitto, sem-  
 perq; præstabo, mihi neque in consilijs de rep. capiun-  
 dis diligentiam, neque in periculis a rep. propulsan-  
 dis animum, neque in sententia simpliciter referenda  
 fidem, neque in hominum uoluntatibus pro rep. læ-  
 dendis libertatem, nec in perferendo labore industriam,  
 nec in uestris commodis augendis gratam animi bene-  
 uolentiam defuturam. atque hæc cura Quirites erit  
 infixæ animo meo sempiterna, ut cum uobis, qui  
 apud me deorum immortalium uim & numen tene-  
 tis, tum posteris uestris, cunctisq; gentibus dignissimus  
 ea ciuitate uidear, quæ suam dignitatem non posse te-  
 nere se, nisi me recuperasset, cunctis suffragijs iudi-  
 cavit.

POST REDITVM IN SENATV,  
ORATIO XXVIII.

I patres conscripti pro uestris immortali-  
bus in me, fratremq; meum, liberosq;  
S nostros meritis parum uobis cumulate  
gratias egero, quaeso, obtestorq;, ne meae  
naturae potius, quam magnitudini ue-  
strorum beneficiorum id tribuendum putetis. quae e-  
nim tanta potest existere ubertas ingenij, quae tanta di-  
cendi copia, quod tam diuinum atque incredibile genus  
orationis, quo quisquam possit uestra in nos uniuersa  
promerita, non dicam complecti orando, sed per censere  
numerando? qui mihi fratrem optatissimum, me fra-  
tri amantissimo, liberis nostris parentes, nobis liberos,  
qui dignitatem, qui ordinem, qui fortunas, qui am-  
plissimam remp. qui patriam, qua nihil potest esse iu-  
cundius, qui denique nosmet ipsos nobis reddidistis.  
quod si parentes carissimos habere debemus, quod ab  
ijs nobis uita, patrimonium, libertas, ciuitas tradi-  
ta est; si deos immortales, quorum beneficio & haec  
tenuimus, & caeteris rebus aucti sumus; si populum  
R. cuius honoribus in amplissimo consilio, & in al-  
tissimo gradu dignitatis, atque in hac omnium ter-  
rarum arce collocati sumus; si hunc ipsum ordi-  
nem, à quo saepe magnificentissimis decretis sumus ho-  
nestati: immensum quiddam & infinitum est, quod  
uobis debeamus; qui uestro singulari studio atque  
consensu parentum beneficia, deorum immortalium  
munera, populi Romani honores, uestra de me mul-



ta iudicia, nobis omnia uno tempore reddidistis; ut, cum multa uobis, magna populo R. innumerabilia parentibus, omnia dijs immortalibus debeamus, quod hæc antea singula per illos habuerimus, nunc uniuersa per nos recuperauerimus. itaque P. C. quod ne optandum quidem est homini, immortalitatem quandam per uos adepti uidemur: quod enim tempus erit unquam, quo uestrorum in nos beneficiorum memoria, ac fama moriatur, qui illo ipso tempore, cum ui, ferro, metu, minis obfessi teneremini, non multo post discessum meum uniuersi me reuocauistis, referente L. Mummio, fortissimo, atque optimo uiro? quem habuit ille pestifer annus & maxime fidelem, & minime timidum, si dimicare placuisset, defensorem salutis meæ. posteaquam uobis potestas decernendi non est permissa per eum tribunum pl. qui cum per se remp. lacerare non posset, sub alieno scelere deleuit: nunquam de me siluistis, nunquam meam salutem non ab ijs consulibus, qui uendiderant, flagitauistis, itaque uestro studio, atque auctoritate perfectum est, ut ille ipse annus, quem ego mihi, quàm patriæ, malueram esse fatalem, octo tribunos haberet, qui promulgarent de salute mea, & ad uos sæpenumero referrent. nam consules modesti, legumq; metuētes, impediēbātur lege, non ea quæ de me, sed ea quæ de ipsis lata erat, cum meus inimicus promulgauit, ut, si reuixissent ij, qui hæc pene delerunt, tum ego redirem. quo facto utrumque confessus est, & se illorum uitam desiderare, & magno in periculo remp. futuram, si aut hostes atque interfectores reip. reuixissent, aut ego non reuertissem. itaque illo ipso



anno, cum ego cessissem; princeps autem ciuitatis, non legum praesidio, sed parietum, uitam suam iueretur; resp. sine consulibus esset; neque solum parentibus perpetuis, uerum etiam tutoribus annuis esset orbata; sententias dicere prohiberemini; caput mea proscriptionis recitaretur: nunquam dubitastis meam salutem cum communi salute coniungere. postea uero quam singulari & praestantissima uirtute P. Lentuli consulis ex superioris anni caligine & tenebris lucem in rep. calendis Ian. respicere coepistis; cum Q. Metelli, nobilissimi hominis, atque optimi uiri, summa dignitas, cum praetorum, tribunorum pl. pene omnium uirtus, & fides reip. subuenisset; cum uirtute, gloria, rebus gestis, Cn. Pompeius, omnium gentium, omnium seculorum, omnis memoriae facile princeps, tuto se in senatum uentre arbitraretur: tantus uester consensus de salute mea fuit, ut, licet corpus abesset meum, dignitas iam in patriam reuertisset. quo quidem mense, quid inter me et meos inimicos interesset, existimare potuistis. ego meam salutem deferui, ne propter me ciuium uulneribus resp. cruentaretur: illi meum reditum non populi R. suffragijs, sed flumine sanguinis intercludendum putauerunt. itaque postea nihil uos ciuibz, nihil socijs, nihil regibus respondistis: nihil iudices sententijs, nihil populus suffragijs, nihil hic ordo auctoritate declarauit: mutum forum, elinguem curiam, tacitam & fractam ciuitatem uidebatis. quo quidem tempore, cum is excessisset, qui cedi & flammæ uobis auctoribus restiterat, cum ferro & facibus homines tota urbe uolitantes, magistratum tecta oppugnata, deorum

templa inflammata, summi uiri & clarissimi consulis  
 fascēs fractos, fortissimi atque optimi uiri tribuni pl.  
 sanctissimum corpus non solum tactum, ac uolatum  
 manu, sed uulneratum ferro, confectumq; uidistis.  
 qua strage non nulli permoti magistratus, partim metu  
 mortis, partim desperatione reip. paululum à mea cau-  
 sa recesserunt: reliqui fuerunt, quos neque terror, nec  
 uis, nec spes, nec metus, nec promissa, nec minæ, nec te-  
 la, nec faces à uestra auctoritate, à populi R. dignitate,  
 à mea salute depellerent. princeps P. Lentulus, parens  
 ac deus nostræ uitæ, fortunæ, memoriæ, nominis, hoc  
 specimen uirtutis, hoc indicium animi, hoc lumen con-  
 sulatus sui fore putauit; si me. mihi, si meis, si uobis,  
 si reip. reddidisset. qui, ut est designatus, nunquam du-  
 bitauit sententiam de salute mea se et rep. dignam dice-  
 re. cum à tribuno pl. uetaretur; cum præclarum caput  
 recitaretur, ne quis ad uos referret, ne quis decerneret,  
 ne disputaret, ne loqueretur, ne pedibus iret, ne scri-  
 bendo adesset: totam illam clausulam, ut ante dixi,  
 proscriptionem, non legem, putauit, qua ciuis optime de  
 rep. meritis, nominatim, sine iudicio, una cum se-  
 natu reip. esset ereptus. ut uero iniit magistratum, non  
 dicam quid egerit prius, sed quid omnino egit aliud, nisi  
 ut, me conseruato, uestram in posterum dignitatem au-  
 thoritatemq; sanciret? dii immortales, quantum mihi  
 beneficium dedisse uidemini, quod hoc anno P. Lentu-  
 lus consul fuit: quanto maius dedissetis, si superiore an-  
 no fuisset. nec enim eguissē medicina consulari, nisi  
 consulari uulnere concidissē. audieram ex sapientissi-  
 mo homine, atque optimo ciue, & uiro, Q. Catulo,

non sape unum consulem improbum, duos uero nunquam, excepto illo Cinnano tempore, fuisse. quare meam causam semper fore firmissimam dicere solebat, dum uel unus in rep. esset consul. quod uere dixerat, si illud de duobus consulibus, quod ante in rep. non fuerat, perenne ac proprium manere potuisset. quod si Q. Metellus illo tempore consul fuisset unicus, dubitatis, quo animo fuerit in me conseruando futurus, cum in restituendo auctorem fuisse adscriptoremq; uideatis? sed fuerunt duo consules, quorum mentes angustæ, humiles, prauæ, oppletæ tenebris, ac sordibus, nomen ipsum consulatus, splendorem illius honoris, magnitudinem tanti imperij nec intueri, nec sustinere, nec capere potuerunt; non consules, sed mercatores provinciarum, ac uenditores uestre dignitatis. quorum alter à me Catilinam amatorem suum, multis audientibus, alter Cethegum consobrinum suum reposcebat: qui me, duo sceleratissimi post hominum memoriam non consules, sed latrones, non modo deseruerunt, in causa præsertim publica, et consulari, sed prodiderunt, oppugnarunt, omni auxilio non solum suo, sed etiam uestro, cæterorumq; ordinum spoliatum esse uoluerunt. quorum alter tamen neque me, neque quenquam fefellit. quis enim ullam ullius boni spem haberet in eo, cuius primum tempus ætatis palam fuisset ad omnes libidines diuulgatum? qui ne à sanctissima quidem parte corporis potuisset hominum impuram intemperantiam propulsare? qui, cum suam rem non minus strenue, quam postea publicam, confecisset, egestatem, et luxuriam domestico lenocinio sustentauit? qui nisi

in aram tribunatus confugisset, neque uim prætoris, nec multitudinem creditorum, nec bonorum proscriptionem effugere potuisset? quo in magistratu nisi rogationem de piratico bello tulisset, profecto & egestate, & improbitate coactus piraticam ipse fecisset, ac minore quidem cum reip. detrimento, quàm quòd intra moenia nefarius hostis, prædoq; uersatus est. quo inspettante, ac sedente, legem tribunus pl. tulit, ne auspicijs obtemperaretur, ne obnunciare concilio, aut comitijs, ne legi intercedere liceret, ut lex Aelia, & Fusia ne ualerent, quæ nostri maiores certissima subsidia reip. contra tribunicios furores esse uoluerunt. idemq; postea, cum innumerabilis multitudo bonorum de Capitolio supplex ad eum sordidata uenisset; cumq; adolescentes nobilissimi, cunctiq; equites R. se ad lenonis impurissimæ pedes abieciissent: quo uultu cincinnatus ganeo non solum ciuium lacrymas, uerum etiam patriæ preces repudiavit? neque eo contentus fuit, sed etiam in concionem ascendit, eaq; dixit, quæ, si eius uir Catilina reuixisset, dicere non esset ausus: se Nonarum Dec. quæ me consul fuissent, cunctiq; Capitolini pœnas ab equitibus R. esse repetiturum: neque solum id dixit, sed, quos ei commodum fuit, compellauit: L. uero Lamiam, equitem R. præstanti dignitate hominem, & saluti meæ pro familiaritate, reip. pro fortunis suis amicissimum, consul imperiosus exire urbe iussit: et, cum uos uestem mutandam censuissetis, cunctiq; mutassetis, atque idem omnes boni iam ante fecissent, ille unguentis oblitus, cum toga prætexta, quam omnes prætores, ædilesq; cum abiecerant, irrisit squalorem uestrum, & luctum grauifera



simæ ciuitatis; fecitq; quod nemo unquam tyrannus; ut, quo minus occulte uestrum malum gerneretis, nihil diceret; ne aperte incommoda patriæ lugeretur, ediceret. cum uero in circo Flaminio non à tribuno pl. consul in concionem, sed à latrone archipirata productus esset: primum processit, quæ auctoritate uir? uini, somni, stupri plenus, madenti coma, composito capillo, grauib; oculis, fluentibus buccis, pressa uoce, & temulentia: quòd in ciues indemnatos esset animaduersum, id sibi dixit, grauis auctor, uehementissime displicere. ubi nobis hæc auctoritas tandiu tanta latuit? cur in lustris, & helluationibus huius calamistrati saltatoris tam eximia uirtus tandiu cessauit? nam ille alter Cæsonius Caluentius ab adolescentia uersatus est in foro, cum eum, præter simulatam uersutamq; tristitiam, nulla res commendaret, non consulis studium, non discendi initia rei militaris, non cognoscendorum hominum, non liberalitas, quem præteriens cum incultum, horridum, mæstumq; uidisses, etiam si agrestem, & inhumanum existimares, tamen libidinosum, & perditum non dubitares. cum hoc homine, aut cum stipite Aethiope, si in foro constitisses, nihil crederes interesse: sine sensu, sine sapore, elinguem, tardum, inhumanum, neglectum, Cappadocem modo abreptum de grege uenalium diceres. idem domi quàm libidinosus, quàm impurus, quàm intemperans, non ianua receptis, sed pseudothyro intromissis uoluptatibus? cum uero etiam literas studere incipit, et helluo immanis cum Græculis philosophari; tum est Epicureus, nō penitus illi disciplinæ, quæcunque est, deditus, sed captus uno uerbo uoluptatis. habet

autem magistros non ex istis ineptis, qui dies totos de officio ac de uirtute differunt, qui ad laborem, ad industriam, ad pericula pro patria subeunda adhortantur; sed eos, qui disputent horam nullam uacua uoluptate esse debere, in omni parte corporis semper oportere ali quod gaudiū delectationemq; uersari. his utitur quasi praefectis libidinum suarum: hi uoluptates omnes ue stigant, atque odorantur: hi sunt conditores, instru ctioresq; conuiuij: ijdem expendunt, atque aestimant uoluptates, sententiamq; dicunt, & iudicant, quan tum cuique libidini tribuendum esse uideatur: horum ille artibus eruditus, ita contempsit hanc prudentissi mam ciuitatem, ut omnes suas libidines, omnia flagi tia latere posse arbitraretur, si modo uultum importu num in forum detulisset. is non me, quanquam equi dem non cognoram eum propter Pisonum affinitatem, quem longe hinc ab hoc genere cognatio materna tran salpini sanguinis abstulisset, sed uos populumq; R. non consilio, neque eloquentia, quod in multis saepe accidit, sed rugis, supercilioq; decepit. L. Piso tu'ne ausus es isto oculo, non dicam isto animo; ista fronte, non uita; tanto supercilio, non enim possum dicere tantis rebus gestis, cum Gabinio consociare consilia pestis meae? non te illius unguentorum odor, non uini anhelitus, non frons ca lamistri notata uestigijs in eam cognitionem adducebat, ut, cum illius re similis fuisses, frontis tibi integumen to ad occultanda tanta flagitia diutius uti non liceret? cum hoc coire ausus es, ut consularem dignitatem, ut reip. statum, ut senatus auctoritatem, ut ciuis optime meriti fortunas prouinciarum foedere addiceres? te con

fule, tuis edictis, & imperijs senatui populoq; R. non  
 est licitum non modo sententijs atque auctoritate sua,  
 sed ne luctu quidem, ac uestitu reip. subuenire. Ca-  
 pua'ne te putabas, in qua urbe domicilium quondam  
 superbiae fuit, consulem esse, sicut eras eo tempore, an  
 Romae, in qua ciuitate omnes ante uos consules senatui  
 paruerunt? tu es ausus in circo Flaminio productus  
 cum tuo illo pari dicere, te semper misericordem fuisse?  
 quo uerbo senatum atque omnes bonos tum, cum à pa-  
 tria pestem expellerent, crudeles demonstrabas fuisse.  
 tu misericors me affinem tuum, quem comitijs prae-  
 rogatiuae primum custodem praefeceras, quem Calendis  
 Ian. tertio loco sententiam rogaras, constrictum inimi-  
 cis reip. tradidisti: tu meum generum, propinquum  
 tuum, tu affinem tuam, meam filiam, superbissimis,  
 & crudelissimis uerbis à genibus tuis repulisti: idemq;  
 tu clementia ac misericordia singulari, cum ego una  
 cum rep. non tribunicio sed consulari ictu concidissem,  
 tanto scelere, tantaq; intemperantia fuisti, ut ne unam  
 quidem horam interesse paterere inter meam pestem,  
 & tuam praedam, saltem dum conticesceret illa lamen-  
 tatio, & gemitus urbis. non dum palam factum erat  
 concidisse remp. cum tibi arbitria funeris soluebantur:  
 uno eodemq; tempore domus mea diripiebatur, arde-  
 bat; bona ad uicinum consulem de Palatio, de Tuscu-  
 lano ad item uicinum alterum consulem deferiebantur:  
 cum, ijsdem operis suffragium ferentibus, eodem gla-  
 diatore latore, uacuo non modo à bonis, sed etiam à  
 liberis, atque inani foro, ignaro populo R. quid agere  
 tur; senatu uero oppresso, & afflicto, duobus impijs

nefarijsq; consulibus ararium prouinciæ, legiones, im-  
 peria donabantur. horum consulum ruinas uos consu-  
 les uestra uirtute fulsistis, summa tribunorum pl. præ-  
 torumq; fide, & diligentia subleuati. quid ego de  
 præstantissimo uiro T. Annio dicam? aut quis de tali  
 ciue satis digne unquam loquetur? qui cum uideret,  
 sceleratū ciuem, aut domesticum, potius hostem, si le-  
 gibus uti liceret, iudicio esse frangendum; sin ipsa iu-  
 dicia nis impediret, ac tolleret, audaciam uirtute, fu-  
 rorem fortitudine, temeritatem consilio, manum ma-  
 nu, uim ui esse superandam: primo de ui postulauit:  
 posteaquam ab eodem iudicia sublata esse uidit, ne il-  
 le omnia ui posset efficere, curauit: qui docuit neque  
 tecta, neque templa, neque forum, neque curiam sine  
 summa uirtute, ac maximis opibus, & copijs ab inte-  
 stino latrocinio posse defendi: qui primus post meum dis-  
 ccessum metum bonis, timorem huic ordini, seruitutem  
 depulit ciuitati. quam rationem pari uirtute, animo,  
 fide P. Sextius secutus, pro mea salute, pro uestra au-  
 ctoritate, pro statu ciuitatis nullas sibi inimicitias, nul-  
 lam uim, nullos impetus, nullum uitæ discrimen uitā-  
 dum unquam putauit: qui causam senatus exagita-  
 tam concionibus improborum, sic sua diligentia mul-  
 titudini commendauit, ut nihil tam popolare, quā  
 uestrum nomen, nihil tam omnibus carum aliquando,  
 quā uestra auctoritas uideretur: qui me cum omnia-  
 bus rebus, quibus tribunus pl. potuit, defendit, tum  
 reliquis officijs iuxta, ac si meus frater esset, sustenta-  
 uit: cuius ego clientibus, libertis, familia, copijs, lite-  
 ris ita sum sustentatus, ut mea calamitatis nō adiutor



solum, uerum etiā socius uideretur. iam ceterorum officia studiaq; uidistis: quā cupidus mei C. Sestilius, quā studiosus uestri, quā non uariis fuerit in causa. quid M. Cuspius? cui ego ipsi, parenti, fratriq; eius sentio quantum debeam: qui, cum à me uoluntas eorum in priuato iudicio esset offensa, publici mei beneficii memoria priuatam offensionem oblitterauerunt. iam T. Fadius, qui mihi quaestor fuit; M. Curtius, cuius ego patri quaestor fui, studio, amore, animo huic necessitudini non defuerunt. multa de me C. Messinius et amicitiae, & reip. causa dixit: legem separatim initio de salute mea promulgauit. Q. Fabricius, si, quae de me agere conatus est, ea contra uim, & ferrum perficere potuisset, mense Ianuario nostrum statum recuperassemus: quem ad salutem meam uoluntas impulit, uis retardauit, auctoritas uestra reuocauit. iam uero praetores quo animo in me fuerint, uos existimare potuistis, cum L. Cecilius priuatim me suis omnibus copiis studuerit sustentare, publice promulgarit de salute mea cum collegis pene omnibus, direptoribus autem meorum bonorum in ius adeundi potestatem non fecerit. M. autem Calidius, statim designatus, sententia sua, quā esset cara sibi mea salus, declarauit. omnia officia C. Septimij, Q. Valerij, P. Crassi, Sex. Quintilij, C. Cornuti summa & in me, & in remp. constiterunt. quae cum libenter commemoro, tum non inuitus non nullorū in me nefarie commissae praetereo. non est mei temporis, iniurias meminisse: quas ego, etiam si ulcisci possem, tamen obliuisci malletm. aliò transferenda mea tota uita est, ut bene de me me

ritis referam gratiam, cum apertis hostibus bellum geram, timidis amicis ignoscam, proditores meos non indicem: dolorem profectionis meae reditus dignitate consoler. quod si mihi nullum aliud esset officium in omni uita reliquum, nisi ut erga duces ipsos, & principes, atque ductores salutis meae satis gratus iudicarer: tamen exiguum reliquae uitae tempus non modo ad referendam, uerum etiam ad commemorandam gratiam mihi relictum putarem. quando enim ego huic homini ac liberis eius, quando omnes mei gratiam referent? quae memoria, quae uis ingenij, quae magnitudo obseruantiae tot tantisque beneficijs respondere poterit? qui mihi primus afflicto & iacenti consularem fidem, dexteramque porrexit: qui me à morte ad uitam, à desperatione ad spem, ab exitio ad salutem reuocauit: qui tanto amore in me, studio in rep. fuit, ut excoGITaret, quemadmodum calamitatem meam non modo leuaret, sed etiam honestaret. quid enim magnificenti-  
 tius, quid praeclarius mihi accidere potuit, quam, quod illo petente uos decreuistis, ut cuncti ex omni Italia, qui rep. saluam uellent, ad me unum, hominem fractum & prope dissipatum, restituendum, & defendendum uenirent? ut, qua uoce à te Romule post Romam conditam consul usus esset pro uniuerſa rep. apud eos solum, qui eius uocem exaudire possent, eadem uoce senatus omnibus agris, uicis, atque oppidis ciues, totamque Italiam ad unius salutem defendendam excitaret. quid ego gloriosius meis posteris potui relinquere, quam hoc, senatum iudicasse, qui ciuis me non defendisset, eum rep. saluam noluisse? itaque tantum uestra auctorita-

tas, tantum eximia consulis dignitas ualuit, ut omne  
 is flagitium se committere putaret, si quis non ueniret.  
 idemq; consul, cum illa incredibilis multitudo Romam,  
 & pene Italia ipsa uenisset, uos frequentissimos in Ca-  
 pitolium conuocauit. quo tempore quantam uim uera  
 bonitas haberet, aut uera nobilitas, intelligere potui-  
 stis: nam Q. Metellus, & inimicus; & frater inimi-  
 ci, perspecta uestra uoluntate, omnia priuata odia de-  
 posuit: quem P. Seruilius, uir cum clarissimus, tum  
 uero optimus, mihiq; amicissimus, & auctoritatis, et  
 orationis suæ diuina quadam grauitate ad sui generis,  
 communisq; sanguinis facta uirtutesq; reuocauit; ut  
 haberet in consilio et fratrem ab inferis socium rerum mea-  
 rum, & omnes Metellos, præstantissimos ciues, pene ex  
 Acheronte excitatos; in quibus Numidicum illum, cu-  
 ius quondam de patria discessus honestus ipsi, bonis o-  
 mnibus tamen luctuosus uisus est. itaque fuit is non  
 modo salutis defensor, qui ante hoc unum beneficium  
 fuerat inimicus, uerum etiã adscriptor dignitatis meæ.  
 quo quidem die cum CCCCX senatores essetis, magis-  
 tratusq; omnes adessent, dissensit unus, is qui sua  
 lege coniuratos etiam ab inferis excitandos putarat. at-  
 que illo die, quo temp. meis consilijs conseruatam gra-  
 uissimis uerbis & plurimis iudicassetis, idem consul cu-  
 rauit, ut eadem à principibus ciuitatis in concione po-  
 stero die dicerentur: cum quidem ipse egit ornatissime  
 causam meam, perfecitq; astante, atque audiente Ita-  
 lia tota, ut nemo cuiusquam conducti, aut perditu uo-  
 cem acerbam, atque inimicam bonis posset audire. ad  
 hæc non modo adiumenta salutis, sed etiam ornamen-

ea dignitatis meæ reliqua uos iſdem addidiſtis: decreuiſtis, ne quis ulla ratione rem impediret; qui impediret, grauiter moleſteq; laturos; illum contra remp. ſalutemq; bonorum, concordiamq; ciuium faſturum; & ut ad uos ea ſtatim referrentur: meq; etiam, ſi diutius calumniarentur, redire iuſſiſtis. quid? ut agerentur gratiæ, qui è municipijs ueniſſent. quid? ut ad illam diem, res cum rediſſent rogarentur, ut pari ſtudio conuenirent. quid denique illo die, quem P. Lentulus mihi, fratriq; meo, liberisq; noſtris natalem conſtituit, non modo ad noſtram, uerum etiam ad ſempiternam memoriã temporis? quo die nos comitijs centuriatis, quæ maxime maiores iuſta dici haberiq; uoluerunt, arceſſiuit in patriam: ut eadem centuriæ, quæ me conſulem fecerant, conſulatum meum comprobarent. quo die quis ciuis fuit, qui fas eſſe putaret, quacunque aut ætate, aut uale tudine eſſet, non ſe de ſalute mea ſententiam ferre? quando tantam frequentiam in campo, tantum ſplendorem Italiæ totius, ordinumq; omnium, quando illa dignitate tot rogatores, diribitores, cuſtodesq; uidiſtis? itaque P. Lentuli beneficio excellenti, atque diuino non ſolum reducti ſumus in patriam, ſicut non nulli clariffimi uiri, ſed equis inſignibus, & curru aurato reportati. Poſſum ego ſatis in Cn. Pompeium unquam gratus uideri? qui non ſolum apud uos, qui omnes idem ſentiebatis, ſed etiam apud uniuerſum populum R. ſalutem reip. & conſeruatam per me, & coniunctam eſſe cum mea dixerit: qui cauſam meam prudentibus commendarit, imperitos edocuerit, eodemq; tempore improbos auctoritate ſua compreſſerit, bonos



excitarit : qui populum R. pro me , tanquam pro fra-  
tre , aut pro parente , non solum hortatus sit , uerum  
etiam obsecrarit : qui , ipse cum propter metum dimica-  
tionis , & sanguinis domo se teneret , etiam à superio-  
ribus tribunis petierit , ut de salute mea & promulga-  
rent , et referrent : qui , in colonia nuper constituta cum  
ipse gereret magistratum , in qua nemo erat emptus  
\* intercessorum , uim & crudelitatem priuilegij , aucto-  
ritate honestissimorum hominum , & publicis literis  
consignauit , princepsq; Italiae totius praesidium ad no-  
stram salutem implorandum putauit : qui , cum ipse  
mihi semper amicissimus fuisset , etiam ut suos necessa-  
rios mihi amicos redderet , elaborauit . quibus autem of-  
ficijs T. Annij beneficia remunerabor ? cuius omnis a-  
ctio , ratio , cogitatio , totus denique tribunatus nihil  
aliud fuit , nisi constans , perpetua , fortis , inuicta  
defensio salutis meae . quid de P. Sextio loquar ? qui  
suam erga me beneuolentiam , & fidem non solum ani-  
mi dolore , sed etiam corporis uulneribus ostendit . uo-  
bis uero P. C. singulis & egi , & agam gratias uniuersis . egi initio , quantum potui : satis ornate agere nullo modo possum . & quanquam sunt in me praecipua  
merita multorum , quae sileo nullo modo possunt : ta-  
men huius temporis , ac timoris mei non est , conari com-  
memorare beneficia in me singulorum . nam difficile  
est non aliquem , nefas quenquam praeterire . ego uos  
uniuersos patres conscripti deorum numero colere de-  
beo . sed ut in ipsis dijs immortalibus non semper cos-  
dem , atque alias alios solemus & uenerari , & prece-  
ri : sic in omnibus de me diuinitus meritis omnis erit  
aetas

ætas mihi ad eorum erga me merita prædicanda, atque  
 recolenda. hodierno autem die nominatim à me magi-  
 stratibus statui gratias esse agendas, & de priuatis  
 uni, qui pro salute mea municipia, coloniasq; adisset,  
 populum R. supplex obsecrasset, sententiam dixisset  
 eam, quam uos secuti, mihi dignitatem meam reddidi-  
 stis. uos me florentem semper ornastis: laborantem mi-  
 tatione uestis & propelluctu uestro, quoad licuit, de-  
 fendistis. nostra memoria senatores ne in suis quidè pe-  
 riculis mutare uestem solebant: in meo periculo senatus  
 ueste mutata fuit, quoad licuit per eorum edicta, quæ  
 mea pericula non modo suo præsidio, sed etiam uestra  
 deprecatione nudarunt. quibus ego rebus obiectis, cum  
 mihi priuato confligendum uiderem cum eodem exerci-  
 tu, quem consul non armis, sed uestra auctoritate su-  
 peraram, multa mecum ipse reputaui. dixerat in con-  
 satione consul, se clui Capitolini pœnas ab equitibus R.  
 repetiturum. nominatim alij compellabantur, alij ci-  
 tabantur, alij relegabantur: aditus templorum erant  
 non solum præsidijs & manu, uerum etiam demolia-  
 tione sublati. alter consul, ut me & rep. non modo  
 defereret, sed etiam hostibus reip. proderet, pæfio-  
 nibus eos suorum præmiorum obligarat. erat alius ad  
 portas cum imperio in multos annos, magnoq; exerci-  
 tu: quem ego inimicum mihi fuisse non dico; tacuisse,  
 cum diceretur esse inimicus, scio. duæ partes esse in rep.  
 cum putarentur; altera me deposcere propter inimici-  
 tias, altera timide defendere propter suspicionem cadis  
 putabatur. qui autem me deposcere uidebantur, in hoc  
 auxerunt dimicationis metum, quod nunquam infu-

ciando suspicionem hominum curamq; minuerunt .  
 quare cum uiderem senatum ducibus orbatum , me à  
 magistratibus partim oppugnatum , partim proditum ,  
 partim derelictum , seruos simulatione collegiorum no=  
 minatim esse conscriptos , copias omnes Catilinæ pene ijs=  
 dem ducibus ad spem cædis & incendiorum esse reuoca=  
 tas , equites R. proscriptionis , municipia uastitatis , o=  
 mnes cædis metu esse permotos ; potui , potui P. C. multis  
 auctoribus fortissimis uiris , me ui , armisq; defendere :  
 nec mihi ipse ille animus idem meus , uobis non incogni=  
 tus , defuit : sed uidebam , si uicissem præsentem aduer=  
 sarium , nimium multos mihi alios esse uincendos ; si  
 uictus essem , multis bonis et pro me , & mecum , etiam  
 post me esse pereundum ; tribunicijq; sanguinis ultores  
 esse præsentis , meæ mortis poenas iudicio , & posteri=  
 tati reservari . nolui , cum consul communem salutem  
 sine ferro defendissem , meam priuatus armis defende=  
 re : bonosq; uiros lugere malui meas fortunas , quàm  
 suis desperare . ac si solus essem interfectus , mihi tur=  
 pe ; si cum multis , reip. funestum fore uidebatur .  
 quòd si mihi æternam esse propositam ærumnam arbi=  
 trarer ; morte me ipse potius , quàm sempiterno dolore  
 multassem . sed cum uiderem me non diutius , quàm  
 ipsam remp. ex hac urbe abfuturum : neque ego illa  
 exterminata mihi remanendum putauì ; & illa , simul  
 atque reuocata est , me secum pariter reportauit . me=  
 cum leges , mecum quæstiones , mecum iura magistra=  
 tuum , mecum senatus auctoritas , mecum libertas ,  
 mecum etiam frugum ubertas , mecum deorum , &  
 hominum sanctitates omnes , & religiones abfuerunt .

quæ si semper abessent, magis uestras fortunas lugerẽ, quàm desiderarem meas: sin aliquando reuocarentur, intelligebam mihi cum illis una esse redeundum. cuius mei sensus certissimus testis est hic idem, qui custos capitis fuit, Cn. Plancius; qui, omnibus prouincialibus ornamentis, commodisq; depositis, totam suam quæsturam in me sustentando, & conseruando collocauit. quĩ si mihi quæstor imperatori fuisset, in filij loco fuisset: nunc certe erit in parentis, cum fuerit quæstor non imperij, sed doloris mei. quapropter patres conscripti, quoniam in remp. sum pariter cū rep. restitutus, non modo in ea defendenda nihil minũ de liberate mea pristina, sed etiam adaugebo. etenim si eam tum defendebam, cū aliquid mihi illa debebat: quid nunc me facere oportet, cum ego illi plurimum debeo? nam quid est, quod animum meum frangere, aut debilitate possit, cuius ipsam calamitatem non modo nullius delicti, sed etiam diuinorum in remp. beneficiorum testem esse uideatis? nam & importata est, quia defenderam ciuitatem; & mea uoluntate suscepta est, ne à me defensa resp. per eundem me extremum in discrimen uocaretur. pro me non, ut pro P. Popillio nobilissimo homine, adolescentes filij, non propinquorũ multitudo populum R. est deprecata, non, ut pro Q. Metello, summo & clarissimo uiro, spectata iam adolescentia filius, non L. et C. Metelli consulares, non eorũ liberi, non Q. Metellus Nepos, qui tum consulatum petebat; non Luculli, Seruiliij, Scipiones, Metellarum filij, flentes, ac sordidati populo R. supplicauerunt, sed unus frater, qui in me pietate filius, consilijs parens, amore, ut erat, frater inuen-



tus est, squalore, & lacrymis, & quotidianis precibus desiderium mei nominis renouari, & rerum gestarum memoriam usurpari coegit. qui cum statuisset, nisi per uos me recuperasset, eandem subire fortunam, atque idem sibi domicilium & uitæ et mortis deposceret: nunquam nec magnitudinem negotij, nec solitudinem suam, nec uim inimicorum, ac tela pertimuit. alter fuit propugnator mearum fortunarum, & defensor assiduus, summa uirtute & pietate C. Piso gener: qui minas inimicorum meorum, qui inimicitias affinis mei, propinqui sui, consulis, qui Pontum, et Bithyniam quæstor pro mea salute neglexit. nihil unquam senatus de P. Popillio decreuit: nunquam in hoc ordine Q. Metelli mentio facta est. tribunicij sunt illi rogationibus, interfectis inimicis, denique nulla auctoritate senatus restituti, cum alter eorum senatum paruisset, alter uim, cædemq; fugisset. nam C. quidem Marius, qui hac hominum memoria tertius ante me consularis tempestate ciuili expulsus est, non modo à senatu non est restitutus, sed reditu suo senatum cunctum pene deleuit. nulla de illis magistratuū consensio, nulla ad remp. defendendam populi R. conuocatio, nullus Italiae motus, nulla decreta municipiorum, & coloniarum extiterunt. quare cum me uestra auctoritas accersierit, populus R. reuocarit, resp. implorarit, Italia cuncta pene suis humeris reportarit, non committam P. C. ut, cum ea mihi sint restituta, quæ in potestate mea non fuerunt, ea non habeam, quæ ipse præstare possim, præsertim cum illa amissa recuperarim, uirtutem, & fidem nunquam amiserim.

PRO DOMO SVA, AD PONTIFICES.  
ORATIO XXIX.

Um multa diuinitus pontifices à maioribus nostris inuenta, atque instituta sunt, tum nihil præclarius, quàm quod uos eosdem & religionibus deorum immortalium, & summæ reip. præesse uoluerunt: ut amplissimi, & clarissimi ciues rep. bene gerendo religiones, religionibus sapienter interpretandis rep. conseruarent. quod si ullo tempore magna causa in sacerdotum populi R. iudicio, ac potestate uersata est, hæc profecto tanta est, ut omnis reip. dignitas, omnium ciuium salus, uita, libertas, aræ, foci, dij penates, bona, fortunæ, domicilia, uestre sapientiæ, fidei, potestatiq; commissa creditaq; esse uideantur. uobis hodierno die constituendum est, utrum posthac amentes, ac perditos magistratus improborum ac sceleratorum ciuium præsidio nudare, an etiam deorum immortalium religione armare malitis. nam si illa labes, ac flamma reip. suum illum pestiferum, & funestum tribunatum, quem æquitate humana tueri non potest, diuina religione defenderit: aliæ cæremoniæ nobis erunt, alij antistites deorum immortalium, alij interpretes religionum requirendi. sin autem uestra auctoritate, sapientiæq; pontifices, ea, quæ furore improborum in rep. ab alijs oppressa, ab alijs deferta, ab alijs prodita, gesta sunt, rescinduntur: erit causa, cur consilium maiorum in amplissimis uiris ad sacerdotia deligendis iure ac merito laudare possimus.

sed quoniam ille demens, si ea, quæ ego per hos dies in senatu de rep. sensi, uituperasset, aliquem se aditum ad aures uestras esse habiturum putauit: omittam ordinem dicendi meum: respondebo hominis furiosi non orationi, quæ ille uti non potest, sed conuicio, cuius exercitationem cum intolerabili petulantiâ, tum etiam diu-  
turna impunitate muniuit. Ac primum illud à te, homine uesano ac furioso, requiro, quæ te tanta poena tuorum scelerum flagitiorumq; uexet, ut hos tales uiros, qui non solum consilijs suis, sed etiam specie ipsa dignitatem reip. sustinent, quod ego in sententia dicenda salutem ciuium cum honore Cn. Pompeij coniunxerim, mihi esse iratos, & aliud de summa hoc tempore religione sensuros, ac me absente senserint, arbitrere? Fuiſti tu, inquit, apud pontifices superior: sed etiam, quoniam te ad populum contulisti, sis inferior, necesse est. Ita ne uero? quod in imperita multitudine est uiti-  
sissimum, uarietas, & inconstantia, & crebra, tan-  
quam tempestatum, sic sententiarum commutatio, hoc tu ad hos transferas? quos ab inconstantia grauitas, à libidinosa sententia certum & definitum ius religio-  
num, uetustas exemplorum, auctoritas literarum, monumentorumq; deterret. Tu ne es ille, inquit, quo senatus carere non potuit? quem boni luxerunt? quem resp. desiderauit? quo restituto, senatus auctoritatem restitutam putabamus, quam primum adueniens pro-  
didisti? Nondum de mea sententia dico: impudentiæ primum respondebo tuæ. Hunc igitur, funesta reip. pe-  
stis, hunc tu ciuem ferro, & armis, & exercitus ter-  
rore, & consulum scelere, & audacissimorum ho-



minum minis, seruorum delectu, obsessione templorum, occupatione fori, oppressione curiæ, domo, & patria, ne cum improbis boni ferro dimicarent, cedere curasti, quem à senatu, quem à bonis omnibus, quem à cuncta Italia desideratum, accersitum, reuocatum conseruandæ reip. causa confiteris? At enim in senatum uenire, in Capitolium intrare turbulento illo die non debuisti. Ego uero neque ueni, & domo me tenui, quandiu turbulentum tempus fuit, cum seruos tuos, à te iampridem ad bonorum cædem paratos, cum illa tua conscleratorum, ac perditorum manu armatos in Capitolium tecum uenisse constabat. quod cum mihi nunciaretur, scio me domi mansisse, & tibi, & gladiatoribus tuis instaurandæ cædis potestatem non fecisse. posteaquam mihi nunciatum est, populum R. in Capitolium propter metum, atque inopiam rei frumentariæ conuenisse, ministros autem scelerum tuorum perterritos, partim amissis gladijs, partim ereptis, diffugisse: ueni, non solum sine ullis, copijs, ac manu, uerum etiam cum paucis amicis. an ego, cum P. Lentulus consul, optime de me, ac de rep. meritis, cum Q. Metellus, qui, cum meus inimicus esset, frater tuus, & dissensionis nostræ, & precibus tuis salutem ac dignitatem meam prætulisset, me arcesserent in senatum; cum tanta multitudo ciuium, tam recenti officio suo, me ad referendam gratiam nominatim uocarent, non uenirem? cum præsertim te iam illinc cum tua fugitiuorum manu discessisse constaret. Hic tu me etiam custodem defensoremq; Capitolij, templorumq;



omnium, hostem Capitolinum appellare ausus es, quod,  
 cum in Capitolio senatum duo consules haberent, eò  
 uenirem. utrum ne est tempus aliquod, quo in sena-  
 tum uenisse turpe sit; an res illa talis erat, de qua age-  
 batur, ut rem ipsam repudiare, & eos, qui agebant,  
 condemnare deberem? primum dico, senatoris esse bo-  
 ni, semper in senatum uenire: nec cum ijs sentio, qui  
 statuunt minus bonis temporibus in senatum ipsi non  
 uenire, non intelligentes hanc suam nimiam perseue-  
 rantiam uehementer ijs, quorum animum offendere  
 uoluerunt, gratam & iucundam fuisse. At enim  
 nonnulli propter timorem, quod se in senatu tuto non  
 esse arbitrabantur, discesserunt. non reprehendo, nec  
 quero, fuerit ne aliquid pertimescendum: puto, ara-  
 bitrio suo quenque timere oportere. cur ego non timue-  
 rim, quæris? quia te illinc abiisse constabat. cur, cum  
 uiri boni non nulli putarint tuto se in senatu esse non  
 posse, ego non idem senserim? cur, cum ego me exi-  
 stimassem tuto omnino in ciuitate esse non posse, illi non  
 item? an alijs licet, & recte licet, in meo metu sibi  
 nihil timere: mihi uni necesse erit & meam & alio-  
 rum uicem pertimescere? an, quia non condemnau-  
 i sententia mea duos consules, sum reprehendendus? eos  
 igitur ego potissimum damnare debui, quorum lege  
 perfectum est, ne ego indemnatus, atque optime de rep-  
 meritis, damnatorum pœnam sustinerem? quorum  
 etiam delicta, propter eorum egregiam in me conser-  
 uando uoluntatem, non modo me, sed omnes bonos  
 ferre oporteret, eorum optimum consilium ego potissi-  
 mum per eos in meam pristinam dignitatem resti-

tutus consilio repudiarem meo ? At quam sententiam dixi ? primum eam, quam populi sermo in animis nostris iam ante defixerat : deinde eam, quæ erat superioribus diebus agitata in senatu : deinde eam, quam senatus frequens tum, cum mihi est assensus, secutus est : ut neque allata sit à me res inopinata ac recens, nec, si quod in sententia uitium est, magis sit eius, qui dixerit, quàm omnium, qui probarint. At enim liberum senatus iudicium propter metum non fuit. si timuisse eos facis, qui discesserunt : concede, non timuisse eos, qui remanserunt. sin autem sine ijs, qui tum abfuerunt, nihil discerni libere potuit : cum omnes adessent, cœptum est referri de inducendo S. C. ab uniuerso senatu reclamatum est. sed quæro, in ipsa sententia, quoniam princeps ego sum eius, atque auctor, quid reprehendatur ? utrum, causa capiendi noui consilij non fuit, an meæ partes in ea causa non præcipuæ fuerunt ? an aliò potius confugiendum fuit ? quæ uis, quæ causa maior esse, quàm fames, potuit ? quàm seditio, quàm consilia tua, tuorumq ; ? qui, facultate oblata ad imperitorum animos incitandos, renouaturum te tua illis funesta latrocinia ob annonæ causam putarunt. frumentum prouinciæ frumentariæ partim non habebant, partim in alias terras, credo propter uarietatem uenditorum, miserant, partim, quo gratius esset tum, cum in ipsa fame subuenissent, custodijs suis clausum continebant, ut subito nouum mitterent. res erat non in opinione dubia, sed in præsentī, atque ante oculos proposito periculo : neque id coniectura prospiciebamus, sed iam experti uidebamus. nam cum ingrauesceret

annona, ut iam plane inopia, ac fames, non caritas, ti-  
 meretur, concursus est ad templum Concordiæ factus,  
 senatum illuc uocante Metello consule. qui si uerus  
 fuit ex dolore hominum, & fame: certe consules cau-  
 sam suscipere, certe senatus aliquid consilij capere po-  
 tuit. sin in causa fuit annona, seditionis quidem stimu-  
 lator & concitator tu fuisti: non'ne id agendum nobis  
 omnibus fuit, ut materiem subtraheremus furori tuo?  
 quid, si utrunque fuit, & ut fames stimularet homi-  
 nes, et ut tu in hoc ulcere tanquam unguis existeres?  
 non'ne fuit eo maior adhibenda medicina, quæ & illud  
 natium, & hoc delatum malum sanare posset? erat  
 igitur & præsens caritas, & futura fames. inde saxis  
 facta lapidatio est: si ex dolore plebeio, nullo incitante,  
 magnum malum: si P. Clodij impulsu, usitatum ho-  
 minis facinorosi scelus: si utrunque, ut res esset ea, quæ  
 sua sponte multitudinis animos incitaret, & parati at-  
 que armati seditionis duces; uidetur'ne ipsa resp. et con-  
 sulis auxilium implorasse, & senatus fidem? atqui u-  
 trunque fuisse perspicuum est. difficultatem annonæ,  
 summamq; inopiam rei frumentariæ, ut homines non  
 iam diuturnam caritatem, sed ut famem plane time-  
 rent, nemo negat. hinc istum, otij et pacis hostem, cau-  
 sam arrepturum fuisse ad incendia, cædes, rapinas, no-  
 lo pontifices suspicemini, nisi uideritis. qui sunt homines  
 à Q. Metello, fratre tuo, cōsule in senatu palam nomi-  
 nati, à quibus ille se lapidibus appetitum & percussum  
 esse dixit? L. Sergium, & M. Lollium nominauit. quis  
 est iste Lollius? qui sine ferro ne nunc quidem tecum  
 est; qui te tribuno pl. nihil de me dicam, sed qui Cn.

*Pompeium interficiendum depoposcit. quis est Sergius? armiger Catilinæ, stipator tui corporis, signifer seditionis, concitator tabernariorum, damnatus iniuriarum, percussor, lapidator, fori depopulator, obsessor curiæ. his atque huiusmodi ducibus, cum tu in annonæ caritate in consules, in senatum, in bona fortunâq; locupletum, per causam inopum, atque imperitorum, res pntinos impetus comparares; cum tibi salus esse in otio nulla posset, cum desperatis ducibus, decurios ac descriptos haberes exercitus perditorum: non ne providendum senatui fuit, ne in hanc tantam materiam seditionis ista funesta fax adhæresceret? fuit igitur causa capiendi noui consilij. uidete nunc, fuerint ne partes meæ pene præcipuæ. Quem tum Sergius ille tuus, quem Lollius, quem ceteræ pestes in lapidatione illa nominabant? quem annonam præstare oportet. dicebant? non ne me? quid puerorum illa concursatio nocturna? num à te ipso instituta? me frumentum flagitabant? quasi uero ego aut rei frumentariæ præfuissem, aut compressum aliquod frumentum tenerem, aut in isto genere omnino quidquam aut curatione, aut potestate ualuissem. sed homo ad cadem imminens meum nomen operis ediderat, imperitis iniecerat. cum de mea dignitate in templo Iouis Optimi Maximi senatus frequentissimus, uno isto dissentiente, decreuisset, subito illo ipso die carissimam annonam nec opinata uilitas consecuta est. erant, qui deos immortales, id quod ego sentio, numine suo reditum meum dicerent comprobasse. non nulli autem illam rem ad illam rationem, coniecturamq; reuocabant, qui, quod in meo reditu spes otij, et concordie sita*



uidebatur, in discessu autem quotidianus seditionis timor, iam pene belli depulso metu, commutatam esse annonam dicebant: quæ quia rursus in meo reditu facta erat durior, à me, cuius aduentu fore uilitatem boni uiri dictitabant, annona flagitabatur. ego denique non solum ab operis tuis, impulsu tuo, nominabar, sed etiã, depulsis ac dissipatis tuis copijs, à populo R. uniuerso, qui tum in Capitolium conuenerat, cum illo die minus ualerem, nominatim in senatum uocabar. ueni expectatus. multis sententijs iam dictis, rogatus sum sententiam: dixi reip. saluberrimam, ac mihi necessariam. petebatur à me frumenti copia, annonæ uilitas, quasi possem aliquid in ea re gerenda: non habebatur. flagitabar bonorum expostulatione: improborum conuicia sustinere non poteram. delegaui amico locupletiori: non quo illi ita de me merito onus illud imponerem: (suecubuissem enim potius ipse) sed quia uidebam, id quod omnes, quod nos de Cn. Pompeio polliceremur, id illum fide, consilio, uirtute, auctoritate, felicitate denique sua facillime perfecturum. itaque siue hunc dñ immortales fructū mei reditus populo R. tribuunt, ut, quem admodum discessu meo frugum inopia, fames, uastitas, cædes, incendia, rapinæ, scelerum impunitas, fuga, formido, discordia fuisset, sic reditu meo ubertas agrorum, frugum copia, spes otij, tranquillitas animorum, iudicia, leges, concordia populi, senatus auctoritas mecum simul reducta uideantur; siue egomet aliquid aduentu meo, consilio, auctoritate, diligentia pro tanto beneficio populo R. præstare debui; præsto, promitto, spondeo; nihil dico amplius; hoc, quod satis est huic

tempori, dico, temp. annonæ nomine in id discrimen, quò uocabatur, non esse uenturam. num igitur in hoc officio, quod fuit præcipue meum, sententia mea reprehenditur? rem maximam eripui à peste summi periculi, non solum eam, sed etiam uos à cæde, incendijs, uastitate. nemo negat: cum ad causam caritatis accederet iste speculator communium miseriarum, qui semper in reip. malis sceleris sui faces inflammavit. Negat oportuisse quicquam uni extra ordinem decerni. non iam tibi sic respondebo, ut cæteris; Cn. Pompeio plurima, periculosissima, maxima terra mariq; bella extra ordinem esse commissa; quarum rerum si quem poeniteat, eum uictoriæ populi R. poenitere. non ita tecum ago. cum ijs hæc à me haberi oratio potest, qui ita disputant, se, si qua res ad unum deferenda sit, ad Cn. Pompeium delaturos potissimum, sed se extra ordinem nihil cuiquam dare; cum Pompeio datum sit, id se pro dignitate hominis ornare, ac tueri solere. horum ego sententiam ne laudem, impediō Cn. Pompeij triumphis: quibus ille, cum esset extra ordinem ad patriam defendendam uocatus, auxit nomen populi R. imperiumq; honestavit. constantiam probo, qua mihi quoque utendum fuit; quo ille auctore extra ordinem bellum cum Mithridate Tigraneq; gessit. sed cum illis tamen possum aliquid disputare: tua uero que tanta impudentia est, ut audeas dicere, extra ordinem dari nihil cuiquam oportere? qui cum lege nefaria Ptolemæum regem Cypri, fratrem regis Alexandrini, eodem iure regnantem, causa incognita, publicasset, populumq; R. scelere obligasset; cum in eius regnum, bona, fortunas latrocin-

nium huius imperij immisisses, cuius cum patre, duo, maioribus societas nobis, & amicitia fuisset: huius pecuniæ deportandæ, & si quis suum ius defenderet, bello gerendo M. Catonem præfecisti: dices, quem uirum? sanctissimum, prudentissimum, fortissimum, amicissimum reip. uirtute, consilio, ratione uitæ mirabili ad laudem, & prope singulari: sed quid ad te, qui negas esse iuris, quenquam ulli rei extra ordinem præfici? atque in hoc solum inconstantiam redarguo tuam, qui in ipso Catone, quem tu non pro illius dignitate produxeras, sed pro tuo scelere subduxeras, quem tuis Sergijs, Lollijs, Titijs, cæterisq; cædis & incendiorum ducibus obieceras, quem carnificem ciuium, quem indemnatorum necis principem, quem crudelitatis auctorem fuisse dixeras, ad hunc honorem & imperium extra ordinem nominatim rogatione tua detulisti: & tantâ fuisti intemperantia, ut illius tui sceleris rationem occultare non posses: literas in concione recitasti, quas tibi à C. Cæsare missas diceres. CAESAR PVLCHRO. cum etiam es argumentatus, amoris esse hoc signum, cum nominibus tantum uteretur, neque adscriberet, pro consule, aut tribuno pl. deinde gratulari, quòd idem in posterum M. Catonem tribunatu tuo remouisses, & quòd idem in posterum de extraordinarijs potestatibus libertatem ademisses. quas aut nunquam tibi ille literas misit; aut, si misit, in concione recitari noluit; aut, siue ille misit, siue tu finxisti, certe consilium tuum de Catonis honore illarum literarum recitatione patefactum est. sed omitto Catonem, cuius eximia uirtus, dignitas, & in eo negotio, quod gessit, fides, & continentia te-



gere uidentur improbitatem & legis, & actionis tuæ. quis provinciam homini post homines natos turpissimo, sceleratissimo, contaminatissimo, quis illam opimam fertilemq; Syriam, quis bellum pacatissimis gentibus, quis pecuniam ad emendos agros constitutam, ereptam ui ex Cæsaris rebus actis, quis imperium infinitum dedit? cui quidem cum Ciliciam dedisses, mutasti pactionem, & Ciliciam ad prætorem item extra ordinem transtulisti: Gabinio, pretio amplificato, Syriam nominatim dedisti. quid? homini teterrimo, crudelissimo, fallacissimo, omnium scelerum libidinumq; maculis notatissimo, L. Pisoni non ne nominatim populos liberos, multis S. C. etiam recenti lege generi ipsius liberatos, uinctos, & constrictos tradidisti? non ne, cum ab eo merces tui beneficii, pretiumq; provinciae meo sanguine tibi esset persolutum, tamen ærarium cum eo partitus es? ita ne uero? tu provincias consulares, quas C. Gracchus, qui unus maxime popularis fuit, non modo non abstulit ab senatu, sed etiam, ut necesse esset quotannis  
 \* constitui per senatum decreta lege sanxit, eas, lege Semproniana per senatum decretas, rescidisti? extra ordinem, sine sorte, nominatim dedisti, non consulibus, sed reip. pestibus: nos, quod nominatim rei maximæ pene iam desperatæ, summum uirum, sæpe ad extrema reip. discrimina delectum, præfecimus, à te reprehendemur? quid tandem, si, quæ tum in illis reip. tenebris, cæcisq; nubibus, & procellis, cum senatum à gubernaculis deiecisses, populum è navi exturbasses, ipse archipirata cum grege prædonum impurissimo plenissimis uelis nauigares, si, quæ tum promulgasti, constituisti,



promisisti, uēdidisti, perficere potuisses: qui locus in orbe terrarum uacuus extraordinarijs fascibus atque impetrio Clodiano fuisset? sed excitatus aliquando Cn. Pompeij, (dicam ipso audiente, quod sensi & sentio, quoquo animo me auditurus est) excitatus, inquā, aliquando Cn. Pompeij nimium diu reconditus, et penitus abstrusus animi dolor subuenit subito reip. ciuitatemq; fractam malis, mutam, debilitatam, abiectam metu, ad aliquam spem libertatis, et pristinae dignitatis erexit. hic uir extra ordinem rei frumentariae praeficiendus nō fuit? scilicet tu helluoni spurcissimo, prae gustatori libidinum tuarum, homini egentissimo, & facinorosissimo, Sex. Clodio, socio tui sanguinis, qui sua lingua etiam sororem tuam à te abalienauit, omne frumentum priuatum, & publicum, omnes prouincias frumentarias, omnes mancipēs, omnes horreorum clauēs lege tua tradidisti. qua ex re primum caritas nata est, dein de inopia: impendebat fames, incendia, caedes, direptio: imminebat tuus furor omnium fortunis & bonis. quaeritur etiam importuna pestis, ex ore impurissimo Sex. Clodij rem frumentariam esse ereptam; summisq; in periculis, eius uiri auxilium implorasse remp. à quo saepe se & seruata, & amplificata esse meminisset. extra ordinem ferri nihil placet Clodio. quid? de me quod tulisse te dicis, parricida, fratricida, sororicida, non ne extra ordinem tulisti? an de peste ciuis, quemadmodum omnes iam dii atque homines iudicarunt, conseruatoris reip. quemadmodum autem tute ipse confiteris, non modo indeninati, sed ne accusati quidem, licuit tibi ferre non legem, sed nefarium priuilegium, lugente ses-

natu,

natu, mærentibus bonis omnibus, totius Italiae precibus repudiatis, oppressa captâq; republica: mihi, populo R. implorante, senatu poscente, temporibus reip. flagitantibus, non licuit de salute populi R. sententiam dicere? qua quidem in sententia si Cn. Pompeij dignitas aucta est coniuncta cum utilitate communi, certe laudandus essem, si eius dignitati suffragatus uiderer, qui mea saluti opem & auxilium tulisset. desinant, desinant homines iisdem machinis sperare me restitutum posse labefactari, quibus antea stantem perculerunt: quod enim par amicitiae consularis fuit unquam in hac ciuitate coniunctius, quam fuimus inter nos ego & Cn. Pompeius? quis apud populum R. de illius dignitate illustrius, quis senatui sapius dixit? qui tantus fuit labor, quæ simultas, quæ contentio, quam ego non pro illius dignitate susceperim? qui ab illo in me honos, quæ prædicatio de mea laude, quæ remuneratio beneuolentiae prætermissa est? hanc nostram coniunctionem, hanc conspirationem in rep. bene gerenda, hanc iucundissimam uitæ atque officiorum omnium societatem certi homines fictis sermonibus, & falsis criminibus diremerunt; cum iisdem illum, ut me metueret, me caueret, monerent; iisdem apud me, mihi illum esse uni inimicissimum, dicerent; ut neque ego ab illo, quæ mihi petenda essent, satis audacter petere possem; neque ille, tot suspicionibus certorum hominum & scelere exulceratus, quæ meum tempus postularet, satis prolixè mihi polliceretur. data merces est erroris mei magna pontifices; ut me non solum pigeat stultitiæ meæ, sed etiam pudeat; qui, cum me non repentinum aliquod meum

tempus, sed ueteres multo ante suscepti, & prouisi labores cum uiro fortissimo & clarissimo coniunxissent, sim passus à tali amicitia distrahi, neque intellexerim, quibus aut ut apertis inimicis obsisterem, aut ut insidiosis amicis non crederem. proinde desinant aliquando me iisdem inflammare uerbis. quid sibi iste uult? nescit, quantum auctoritate ualeat, quas res gesserit, qua dignitate sit restitutus. cur ornat eum, à quo desertus est? ego uero neque me tum desertum puto, sed pene deditum; nec, quæ sint in illa reip. flamma gesta contra me, neque quo modo, neque per quos, patefaciundum mihi esse arbitror. si utile reip. fuit, haurire me unum pro omnibus illam indignissimam calamitatem: etiam hoc utile sit, quorum id scelere conflatum sit, me occultare, & tacere. illud uero est hominis ingrati, tacere, (itaque libentissime prædicabo) Cn. Pompeium studio, & auctoritate æque, ut unumquenque uestrum, opibus, contentione, precibus, periculis denique præcipue pro salute mea laborasse. hic tuis P. Lentule, cum tu nihil aliud dies & noctes nisi de salute mea cogitares, consilijs omnibus interfuit: hic tibi grauissimus auctor ad instituendam, fidelissimus socius ad comparandam, fortissimus adiutor ad rem perficiendam fuit: hic municipia coloniasq; adiit: hic Italiæ totius auxilium cupientis implorauit: hic in senatu princeps sententiæ fuit: idemq; cum dixisset, tum etiam pro salute mea populū R. obsecrauit. quare istam orationem, qua es usus, omitas licet, post illam sententiam, quam dixeram de annona, pontificum animos esse mutatos: proinde quasi isti aut de Cn. Pompeio aliter, atque ego existimo, sentiant;

aut, quid mihi pro expectatione populi R. pro Cn. Pompeij meritis erga me, pro ratione mei temporis faciendū fuerit, ignorent; aut etiam, si cuius forte pontificis animus, quod certo scia aliter esse, mea sententia offendit, alio modo sit constituturus aut de religione pontificum, aut de rep. quā eum aut caeremoniarum ius, aut ciuitatis salus coegerit. Intelligo pontifices me plura extra causam dixisse, quā aut opinio tulerit, aut uoluntas mea: sed cum me purgatum uobis esse cuperem, tum etiam uestra in me attente audiēdo benignitas promouexit orationem meam. sed hoc compensabo breuitate eius orationis, quæ pertinet ad ipsam cognitionem uestram: quæ cum sit in ius religionis, et in ius reip. distributa; religionis partem, quæ multo est uerbosior, prætermittens, de iure reip. dicam. quid est enim aut tam arrogans, quā de religione, de rebus diuinis, caeremonijs, sacris, pontificum collegium docere conari; aut tam stultum, quā, si quis quid in uestris libris inuenierit, id narrare uobis; aut tam curiosum, quā ea scire uelle, de quibus maiores nostri uos solos & consuli, & scire uoluerunt? Nego potuisse iure publico, legibus ijs, quibus hæc ciuitas utitur, quenquam ciuem ulla eiusmodi calamitate affici sine iudicio. hoc iuris in hac ciuitate etiam tum, cum reges essent, dico fuisse, hoc nobis esse à maioribus traditum, hoc esse denique proprium liberæ ciuitatis, ut nihil de capite ciuis, aut de bonis, sine iudicio senatus, aut populi, aut eorum, qui de quaque re constituti iudices sint, detrahi possit. Vides ne me non radicitus euellere omnes actiones tuas? neque illud agere, quod apertum est, te omnino nihil gessisse



iure, non fuisse tribunum pl. ? hoc dico, esse parricidium : dico apud pontifices : augures adsunt : uersor in medio iure publico. quod est pontifices ius adoptionis ? nempe ut is adoptet, qui neque procreare iam liberos possit ; & , cum potuerit, sit expertus. quæ deinde causa cuique sit adoptionis, quæ ratio generum, ac dignitatis, quæ sacrorum, quæri à pontificum collegio solet. quid est horum in ista adoptione quæsitum ? adoptat annos uiginti natus, etiam minor, senatorem : liberorum ne causa ? at procreare potest, habet uxorem, suscepit etiam liberos. exheredabit igitur pater filium. quid sacra Clodiæ gentis, cur intereunt, quod in te est ? quæ omnis notio pontificum, cum adoptaret, esse debuit. nisi forte ex te ita quæsitum est, num perturbare rempublicæ seditionibus uelles ? & ob eam causam adoptari, non ut filius esses, sed ut tribunus pl. fieres, & funditus euertes ciuitatem ? respondisti credo te ita uelle. pontificibus bona causa uisa est : approbauerunt. non ætas eius, qui adoptabat, quæsitæ est, ut in Cn. Aufidio, M. Puppio : quorum uterque nostra memoria, summa senectute, alter Orestem, alter Pisonem adoptauit. quas adoptiones, sicut alias innumerabiles, hereditates nominis, pecuniæ, sacrorum secutæ sunt. tu neque Fonteius es, qui esse debebas ; neque patris hæres ; neque, amissis sacris paternis, in hæc adoptiua uenisti. ita perturbatis sacris, contaminatis gentibus, & quam deseruisti, & quam polluisti, iure Quiritum legitimo tutelarum & hereditatum relicto, factus es eius filius contra fas, cuius per ætatem pater esse potuisti. dico apud pontifices : nego istam adoptionem pontificio iure esse factam.

primum, quòd eæ uestrae sint ætates, ut is, qui te adoptauit, uel tibi loco filij per ætatem esse potuerit: deinde, quòd causa quæri solet adoptandi, ut et is adoptet, qui, quod natura iam assequi non potest, & legitimo & pontificio iure quærat; & ita adoptet, ut ne quid aut de dignitate generum, aut de sacrorum religione minuatur: illud in primis, ne qua calumnia, ne qua fraus, ne quis dolus adhibeatur; ut hæc simulata adoptio filij quammaxime ueritatem illam suscipiendorum liberorum imitata esse uideatur. quæ maior calumnia est, quàm uenire imberbem adolescentulum, bene ualentem, ac maritum; dicere, filium senatorem populi R. sibi uelle adoptare; id autem scire & uidere omnes, non ut ille filius instituatur, sed ut è patricijs exeat, ut tribunus pl. fieri possit, iccirco adoptari? neque id obscure: nam adoptatum emancipari statim, ne sit eius filius, qui adoptarit. cur ergo adoptatur? probate genus adoptionis: iam omnium sacra interierint, quorum custodes uos esse debetis; iam patricius nemo relinquetur. cur enim quisquam uellet tribunum pl. se fieri non licere; angustiores sibi esse petitionem consuetudinis? in sacerdotium cum possit uenire; quia patricio non sit locus, non uenire? ut cuique aliquid acciderit, quare commodius sit esse plebeium, simili ratione adoptabitur. itaque populus R. breui tempore neque regem sacrorum, neque flamines, nec salios habebit, nec ex parte dimidia reliquos sacerdotes, neque auctores centuriatorum, & curiatorum comitiorum: auspiciâq; populi R. si magistratus patricij creati non sint, intereant necesse est, cum interrex nullus sit; quòd & ipsum pa

tricium esse, & à patricio prodi necesse est. dixi apud pontifices, istam adoptionem nullo decreto huius collegij probatam, contra omne pontificium ius factam, pro nihilo esse habendam. quæ sublata, intelligit totum tribunatum tuum concidisse. Venio ad augures. quorum ego libros, si qui sunt reconditi, non scrutor. non sum in exquirendo iure augurum curiosus: hæc, quæ una cum populo didici, quæ sæpe in concionibus responsa sunt, non ui. negant fas esse agi cum populo, cum de cælo seruatum sit. quo die de te lex curiata lata esse dicatur, aus des negare de cælo esse seruatum? adest præsens, uir singulari uirtute, constantia, gravitate præditus, M. Bibulus. hunc consulem illo ipso die contendo seruasse de cælo. infirma sunt igitur acta, tua sententia, C. Cæsaris, uiri fortissimi? minime: neque enim mea iam quidquid interest, exceptis ijs telis, quæ ex illius actionibus in meum corpus immissa sunt. sed hæc de auspicijs, quæ ego nunc perbreuiter attingo, acta sunt à te. tu, tuo præcipitante iam & debilitato tribunatu, auspiciorum patronus subito extitisti: tu M. Bibulum in concionem, tu augures produxisti: te interrogante, augures responderunt, cum de cælo seruatum sit, cum populo agi non posse: tibi M. Bibulus quærenti, se de cælo seruasse, respondit, idemque in concione dixit ab Appio fratre tuo productus, te omnino, quod contra auspicia adoptatus esses, tribunum pl. non fuisse: tua denique omnis actio posterioribus mensibus fuit, omnia, quæ C. Cæsar egisset, quæ contra auspicia essent acta, per senatum rescindi oportere: quod si fieret, dicebas te tuis humeris me custodem urbis in urbem relaturum. uidete hominis amens

illam, ubi per suum tribunatum Caesaris actis alligatus  
 teneretur. si & sacrorum iure pontifices, & auspicio-  
 rum religione augures totum euertunt tribunatum  
 tuum, quid quæris amplius? an etiam apertius aliquod  
 ius populi, atque legum? hora fortasse sexta diei que-  
 stus sum in iudicio, cum C. Antonium, collegam meum,  
 defenderem, quædam de rep. quæ mihi uisa sunt ad il-  
 lius miseri causam pertinere. hæc homines improbi ad  
 quosdam uiros fortes longe aliter, atque à me dicta es-  
 rant, detulerunt. hora nona, illo ipso die, tu es adopta-  
 tus. si, quod in cæteris legibus trinum nundinum esse  
 oportet, id in adoptione satis est trium esse horarum: ni-  
 hil reprehendo. sin eadem obseruanda sunt, decreuit se-  
 natus, M. Drusi legibus, quæ contra legem Cæciliam  
 & Didiam latæ essent, populum non teneri. iam intel-  
 ligis omni genere iuris, quod in sacris, quod in auspi-  
 cii, quod in legibus sit, te tribunum pl. non fuisse? at-  
 que ego hoc totum non sine causa relinquo: uideo enim  
 quosdam clarissimos uiros, principes ciuitatis, aliquot  
 locis iudicasse, te cum plebe iure agere potuisse: qui e-  
 tiam de me ipso, cum tua rogatione funere elatam  
 temp. esse dicerent, tamen id funus, etsi miserum atque  
 acerbum fuisset, iure indictum esse dicebant. quod de  
 me ciue, ac de rep. bene merito tulisses, funestum funus  
 te indixisse reip. quod saluis auspicijs tulisses, iure egis-  
 se dicebant. quare licebit, ut opinor, nobis eas actiones  
 non infirmare, quibus illi actionibus constitutum tri-  
 bunatum tuum comprobauerunt. fueris sane tribu-  
 nus pl. tam iure, tam lege, quàm fuit hic ipse Rul-  
 lus, uir omnibus rebus clarissimus, atque amplissimus.



quo iure, quo more, quo exemplo legem nominatim de capite ciuis indemnati tulisti? uetant leges sacratæ, uetant XII tabulæ, leges priuatis hominibus irrogari: id est enim priuilegium. nemo unquam tulit: nihil est crudelius, nihil perniciosius, nihil, quod minus hæc ciuitas ferre possit. proscriptionis miserrimum nomen illud, & omnis acerbitas Syllani temporis quid habet, quod maxime sit insigne ad memoriam crudelitatis? opinor, pœnam in ciues R. nominatim sine iudicio constitutam, hanc uos igitur pontifices iudicio, atque auctoritate uestra tribuno pl. potestatem dabitis, ut proscribere possit, quos uelit? quæro enim, quid sit aliud, proscribere, uelitis, iubeatis, ut M. Tullius in ciuitate ne sit, bonaq; eius ut mea sint. ita enim fecit: etsi alijs uerbis tulit. hoc plebiscitum est? hæc lex, hæc rogatio est? hoc uos pati potestis, hoc ferre ciuitas, ut singuli ciues singulis uersiculis è ciuitate tollantur? equidem iam perfunctus sum: nullam uim, nullum impetum metuo, expleui animos inuidorum: placavi odia improborum: saturauim etiam perfidiam, & scelus proditorum: denique de mea causa, quæ uidebatur perditis ciuibus ad inuidiâ esse proposita, iam omnes urbes, omnes ordines, omnes dii atque homines iudicauerunt. uobismet ipsis pontifices, & uestris liberis, cæterisq; ciuibus pro uestra auctoritate, & sapientia consulere debetis. nam cum tam moderata iudicia populi sint à maioribus constituta; primum, ut ne pœna capitis cum pecunia coniungatur; deinde, ne nisi prodicta die quis accusetur; tertio, ut ante magistratus accuset intermissa die, quàm multam irroget, aut iudicet; quarto sit accusatio trinum nundinum, prodicta

die, qua die iudicium sit futurum; cum multa etiam ad placandum, atque ad misericordiam reis concessa sint; deinde exorabilis populus, facilis suffragatio pro salute; denique etiam, si qua res illum diem aut auspicijs, aut excusatione sustulit, tota causa iudiciumq; sublata est: hæc cum ita sint in re, ubi crimen est? ubi accusator? ubi testes? quid indignius, quam, qui neque adesse sit iussus, neque citatus, neque accusatus, de eius capite, liberis, fortunis omnibus conductos, & sicarios, egentes, & perditos suffragium ferre, & eam legem putare? ac si hoc de me potuit, quem honos, quem dignitas, quem causa, quem resp. tuebatur, cuius denique pecunia non expetebatur, cui nihil oberat præter conuersionem status, & inclinationem cōmunium temporum: quid tandem futurum est ijs, quorum uita remota ab honore populari, & ab hac illustri gratia est, pecuniæ autem tantæ sunt, ut eas nimium multi egentes, sumptuosi, nobiles concupiscant? date hanc tribuno pl. licentiam, & intuemini paulisper animis iuuentutem, & eos maxime, qui imminere iam cupiditate uidentur in tribuniciam potestatem: collegia mediusfidijs tribunorum pl. tota reperientur, hoc iure firmato, quæ coeant de hominum locupletissimorum bonis, præda præsertim populari, & spe largitionis oblata. at quid tulit legum scriptor peritus, callidus? Velitis, iubeatis, ut M. Tullio aqua, & ignis interdicaretur? crudele, nefarium, ne in sceleratissimo quidē ciue ferundum sine iudicio. non tulit, ut interdicaretur. quid ergo? ut interdictum sit. ò cœnum, ò portentum, ò scelus: hanc tibi legem Clodius scripsit spurciorem lin-

gua sua, ut interdictum sit, cui non sit interdictum.  
 Sexte noster bona uenia dic, quoniam iam dialecticus  
 es, & hoc quoque liguris: quod factum non est, ut  
 sit factum, ferri ad populum, aut uerbis ullis sanciri,  
 aut suffragijs confirmari potest? hoc tu scriptore, hoc  
 consiliario, hoc ministro, omnium non bipedum solum,  
 sed etiam quadrupedum impurissimo, remp. perdidisti.  
 neque tu eras tam excors, tamq; demens, ut nescires  
 hunc Clodium esse, qui contra leges faceret; et alios es-  
 se, qui leges scribere solerent: sed neque eorum, neque  
 ceterorum, in quibus esset aliquid modestiae, cuiusquã  
 tibi potestas fuit: neque tu legum scriptoribus iisdem  
 potuisti uti, quibus ceteri; neque operum architectis;  
 neque pontificem adhibere, quem uelles: postremo ne  
 in praedae quidem societate mancipem, aut praedem so-  
 cium, extra tuorum gladiatorum numerum, aut deni-  
 que suffragij latorem in ista tua proscriptione quen-  
 quam, nisi furem aut sicarium, reperire potuisti. ita-  
 que cum tu florens, ac potens per medium forum popu-  
 laris uolitares, amici illi tui te uno amico tecti, & bea-  
 ti, qui se populo commiserant, ita repellebantur, ut  
 etiam Palatinam tuam perderent. qui in iudicium ue-  
 nerant, siue accusatores erant, siue rei, te deprecante  
 damnabantur. denique etiam ille nouicius Ligor, ue-  
 nalis adscriptor, & subscriptor tuus; cum M. Papirij  
 sui fratris esset testamento & iudicio improbatas, mor-  
 tem eius se uelle persequi dixit: nomen Sex. Propertij  
 detulit; accusare alienae damnationis scelerisq; socius  
 propter calumniae metum non est ausus. de hac igitur  
 ege dicimus, quae iure rogata uideatur: cuius quam

quisque partem tetigit, digito, uoce, præda, suffragio, quocunque uenit, repudiat, conuictusque discessit. quid, si ijs uerbis scripta est ista proscriptio, ut se ipsa dissoluat? est enim: QVOD M. Tullius falsum S. C. retulerit. si igitur retulit falsum S. C. tum est rogatio: si non retulit, nulla est. satis ne tibi uidetur a senatu iudicatum, me non modo non euentum esse auctoritatem eius ordinis, sed etiam unum post urbem conditam diligentissime senatui paruissse? quot modis doceo, legem istam quam uocas, non esse legem? quid, si etiã pluribus de rebus uno sortitu retulisti: tamen ne arbitraris, id quod M. Drusus in legibus suis plerisque, bonus ille uir M. Scaurus, et L. Crassus consularis non obtinuerint, id te posse omnium facinorum et stuprorum omnium Decumis et Clodij auctoribus obtinere? tulisti de me ne reciperer, non ut exirem: quem, tu ipse non poteras dicere, non licere esse Romæ. quid enim diceres? damnatum? certe non: expulsus? qui licuit? sed tamen ne id quidem est scriptum, ut exirem. poena est, qui receperit: quam omnes neglexerunt. etio nusquam est. uerum sit. quid operum publicorum exactio? quid nominis inscriptio tibi? num aliud uidetur esse, ac meorum bonorum direptio? præterquam quod ne id quidem per legem Liciniam, ut ipse tibi curationem ferres, facere potuisti. quid hoc ipsum, quod nunc apud pontifices agis, te meam domum consecrassse, te monumentum fecisse, in meis ædibus te signum dedicasse, eaq; te ex una rogatiuncula fecisse; unum et idem uidetur esse, atque id quod de me ipso nominatim tulisti? tam hercule est unum, quam quod



idem tu lege una tulisti, ut Cyprius rex, cuius maiores huic populo socij atque amici semper fuerunt, cum bonis omnibus sub præcone subijceretur, & exules Byzantium reducerentur. Eidem, inquit, utraque de re negotium dedi. Sed quid, si eidem negotium dedisses, ut in Asia cistophorum flagitaret, inde iret in Hispaniam; cum Romæ decessisset, consulatum ei petere liceret; cum factus esset, provinciam Syriam obtineret; quoniam de uno homine scriberes, una res esset? quod si iam populus R. de ista re consultus esset, & non omnia per servos latronesq; gessisses: non ne fieri poterat, ut populo de Cyprio rege placeret, de exulibus Byzantijs displiceret? quæ est quasi alia vis, quæ sententia Cæciliæ legis & Didie, nisi hæc, ne populo necesse sit in coniunctis rebus compluribus aut id, quod nolit, accipere, aut, id quod velit, repudiare? quid, si per vim tulisti; tamen ne lex est? aut quidquam iure gestum videri potest, quod per vim gestum esse constet? an si in ipsa latione tua, capta iam urbe, lapides iacti, si manus collata non est, ideo tu ad illam labem, atque eluvium civitatis sine summa vi pervenire potuisti? cum in tribunali Aurelio conscribebas palam non modo liberos, sed etiam servos ex omnibus vicis concitatos, vim tum videlicet non parabas: cum edictis tuis tabernas claudi iubebas, non vim imperitæ multitudinis, sed hominum honestorum modestiam, prudentiamq; quærebas: cum arma in ædem Castoris comportabas, nihil aliud, nisi uti nequid per vim agi posset, machinabare: cum vero gradus Castoris conuellisti, ac remouisti, tum, ut modeste tibi agere liceret, homines audaces ab eius templi

aditu ; atque ascensu repulisti : cum eos , qui in conuen-  
 tu uirorum bonorum uerba de salute mea fecerant , ad-  
 esse iussisti , eorumq̃ ; aduocationem manibus , ferro ,  
 lapidibus discussisti , tum profecto ostendisti , uim tibi  
 maxime displicere . uerum hæc furiosa uis uesani tribu-  
 ni pl. facile superari , frangiq̃ ; potuit uirorum bono-  
 rum uel uirtute , uel multitudine . quid , cum Gabinio  
 Syria dabatur , Macedonia Pisoni , utrique infinitum  
 imperium , ingens pecunia , ut tibi omnia permitterent ,  
 te adiuuarent , tibi manum , copias , tibi suos paratos  
 centuriones , tibi pecunias , tibi familias compararent ,  
 te suis sceleratis concionibus subleuarent , senatus au-  
 thoritatem irriderent , equitibus R. mortem , proscrip-  
 tionemq̃ ; minitarentur , me terrent minis , mihi ean-  
 dem , & dimicationem denunciarent , meam domum  
 refertam uiris bonis per amicos suos complerent , pro-  
 scriptionis metu me frequentia nudarent , uirorum bo-  
 norum me præsidio spoliarent , senatum pro me non  
 modo propugnare , amplissimum ordinem , sed etiam  
 plorare , & supplicare mutata ueste prohiberent : ne-  
 tum quidem uis erat ? quid igitur ego cessi ? aut qui ti-  
 mor fuit ? non dicam in me quidem : fac me timidum  
 esse natura . quid illa tot uirorum fortissimorum mil-  
 lia ? quid illi equites R. ? quid senatus ? quid denique o-  
 mnes boni ? si nulla uis erat , cur me flentes potius pro-  
 secuti sunt , quàm aut increpantes retinuerunt , aut  
 irati reliquerunt ? an hoc timebam , si mecum agere-  
 tur more insitutoq̃ ; maiorum , ut possem præsens susti-  
 nere ? utrum , si dies dicta esset , iudicium mihi fuit  
 pertimescendum , an sine iudicio priuilegium ? iudi-

ciū in causa tam turpi? scilicet is homo sum, qui, etiam  
 si causa esset ignota, dicendo non possem explicare. an  
 eam causam probare non poteram, cuius tanta bonitas  
 est, ut ea ipsa non modo se, sed etiam me absentem per  
 se probarit? an senatus, an ordines, an ij, quicuncta  
 ex Italia ad me reuocandum conualuerunt, segniores  
 me præsente ad me retinendum, & conseruandum  
 fuissent in ea causa, quam ipse iam parricida talem di-  
 cat fuisse, ut me ab omnibus ad meam pristinam digni-  
 tatem expectatum, atque reuocatum queratur? an ue-  
 ro in iudicio periculi nihil fuit; priuilegium peritui,  
 ne, mihi præsenti si multa irrogaretur, nemo interce-  
 deret? tam inops aut ego eram ab amicis, aut tam nu-  
 da resp. à magistratibus? quid, si uocata tribus essent;  
 proscriptionem, non dicam in me ita de sua salute meri-  
 to, sed omnino in ullo ciue comprobauissent? an, si ego  
 præsens fuisset, ueteres illæ copiae coniuratorum, tuiq;  
 perditii milites atque egentes, et noua uis sceleratissimo-  
 rum consulum corpori meo pepercissent? qui, cum eos  
 rum omnium crudelitati, sceleriq; cessissem, ne absens  
 quidem luctu meo mentes illorum satiare potui. quid  
 enim uos uxor mea misera uiolarat? quam uexauistis,  
 raptauistis, omni crudelitate lacerauistis: quid mea fi-  
 lia? cuius fletus assiduus, sordesq; lugubres uobis erant  
 iucundæ, cæterorum omniū mentes oculosq; fletebant:  
 quid paruus filius? quem, quandiu absui, nemo nisi la-  
 crymantem confectumq; uidit: quid fecerat, quod eum  
 toties per insidias interficere uoluistis? quid frater  
 meus? qui cum aliquanto post meum discessum ex pro-  
 uincia uenisset, neque sibi uiuendum, nisi me restitu-

to, putaret, cum eius mœror, squalor incredibilis, & inauditus omnibus mortalibus miserabilis uidebatur: quoties ex uestro ferro, ac manibus est elapsus? sed quid ego uestram crudelitatem expromo, quam in ipsum me ac meos adhibuistis, qui parietibus, qui tectis, qui columnis, ac postibus meis horrificum quoddam, & nefarium omni imbutum odio bellum intulistis? non enim te arbitror, cum post meum discessum omnium locupletum fortunas, omnium prouinciarum fructus, & tetrarcharum ac regum bona, spe & auaritia deuorasses, argenti & suppellectilis meae cupiditate esse cecatum: non existimo Campanum illum consulem cum saltatore collega, cum alteri totam Achaïam, Thessaliam, Bœotiam, Græciam, Masedoniã, omnemq; barbariam, bona ciuium R. condonasses, alteri Syriam, Babylonem, Persas, integerrimas pacatissimasq; gentes ad diripiendum tradidisses, illos tam cupidos liminum meorum, & columnarum, & ualarum fuisse. neque porro illa manus, copiaq; Catilinæ cæmentis ac tignis meorum tectorum se famem suam expleturas putauerunt: sed ut hostium urbes, nec omnium hostium, uerum eorum, quibuscum acerbum bellum, intestinumq; suscepimus, non præda adducti, sed odio solemus excindere, quod in quos propter eorum crudelitatem inflàmata mentes nostræ fuerunt, cum horum etiã tectis, ac sedibus residere aliquod bellum semper uideretur. nihil erat latum de me: non adesse eram iussus: non citatus fueram: eram etiam tuo iudicio ciuis incolumis: cum domus in Palatio, uilla in Tusculano, altera ad alterum consulem transferebatur: senatum



consules uetabāt: columnæ marmoreæ ex ædibus meis,  
 inspectante populo R. ad focrum consulis portabantur :  
 in fundum autem uicini consulis non modo instrumen-  
 tum, aut ornamenta uillæ, sed etiam arbores transfere-  
 bantur; cū ipsa uilla non prædæ cupiditate, (quid enim  
 erat prædæ?) sed odio & crudelitate funditus euerter-  
 retur: domus ardebat in palatio, non fortuito, sed obla-  
 to incendio: consules epulabantur, & in coniuratorum  
 gratulatione uersabantur, cum alter se Catilinæ deli-  
 cias, alter Cethegi consobrinum fuisse diceret. hanc ego  
 uim pontifices, hoc scelus, hunc furorem, meo corpore  
 opposito, à bonorum omniū ceruicibus depuli, omnēq;  
 impetum discordiarum, omnem diu collectam uim im-  
 proborum, quæ inueterata compresso odio, atque tacito  
 \* iam erūpebat in actum, tam audaces duces excepi meo  
 corpore: in me uno consulares faces iactæ manibus tri-  
 bunicij: in me omnia, quæ ego quondam retuderam,  
 coniurationis nefaria tela adhæserunt. quòd si, ut mul-  
 tis fortissimis uiris placuit, ui & armis contra uim de-  
 certare uoluissē; aut uicissē cum magna internicio-  
 ne improborum, sed tamen ciuium; aut, interfectis bo-  
 nis omnibus, quod illis optatissimum erat, una cum  
 rep. concidissē. uidebam, uiuo senatu populoq; R.  
 celerem mihi summa cum dignitate reditum: nec intel-  
 ligebam fieri diutius posse, ut mihi non liceret esse in  
 ea rep. quam ipse seruassē: quòd si non liceret, au-  
 dieram, & legeram, clarissimos nostræ ciuitatis uiros  
 se in medios hostes, ad perspicuā mortem, pro salute exer-  
 citus iniecisse: ego pro salute reip. uniuersæ dubitarem?  
 hoc meliore conditione, quàm Decij, quòd illi ne audi-  
 tores

tores quidem suæ gloriæ, ego etiam spectator meæ laudis esse potuissem. itaque infractus furor tuus inanes faciebat impetus: omnem enim uim omnium sceleratorum acerbitas mei casus exceperat. non erat in tam immani iniuria, tantisq; ruinis nouæ crudelitati locus. Cato fuerat proximus (quid ageres, non erat) ut qui mo-  
 \*  
 dus omnibus moribus fuerat, idē esset iniuriæ. quid pos-  
 ses? extrudere ad Cypriā pecuniam. prada perierit: alia non deerit: hunc modo amandandum esse. sic M. Cato inuisus, quasi per beneficium, Cyprum relegatur. eij-  
 ciuntur duo, quos improbi uidere non poterant, alter per honorem turpissimum, alter per honestissimam ca-  
 lamitatem. atque ut sciatis non hominibus istum, sed uirtutibus hostem semper fuisse, me expulso, Catone amandato, in eum ipsum se conuertit, quo auctore, quo adiutore in concionibus, ea, quæ gerebat, omnia, quæq; gesserat, se fecisse, & facere, dicebat. Cn. Pompeium, quem omnium iudicio longe principem esse ci-  
 uitatis uidebat, diutius furori suo ueniam daturum non arbitrabatur. qui ex eius custodia, per insidias, re-  
 gis amici filium hostem captiuum surripuisset, & ea iniuria uirum fortissimum laceffisset, sperauit iisdem se copijs cum illo posse configere, quibuscum ego noluis-  
 sem bonorum periculo dimicare. & primo quidem ad-  
 iutoribus consulibus. postea fregit fœdus Gabinius: Pi-  
 so tamen in fide mansit. quas iste tum cædes, quas la-  
 pidationes, quas fugas fecerit, quàm facile ferro quon-  
 tidianisq; insidijs, cum iam à firmissimo robore copia-  
 rum suarum relictus esset, Cn. Pompeium foro curiaq;  
 priuarit, domumq; coniecero, uidistis. ex quo indica-

re potestis, quanta uis illa fuerit oriens, & congregata, cum hæc Cn. Pompeium terruerit iam distraeta, et extincta. hoc uidit in sententia dicenda calendis Ian. uir prudentissimus, & cum reip. tum mihi, tum etiam ueritati amicissimus, L. Cotta, qui legem de meo reditu ferendam non censuit; qui me consuluisse reip. cessisse tempestati, amicio rem uobis, cæterisq; ciuibus, quàm mihi, ac meis extitisse, ui armis, dissensione hominum ad cædem instituta, nouoq; dominatu pulsum esse dixit, nihil de meo capite potuisse ferri, nihil esse inscriptum, aut posse ualere; omnia contra leges, moremq; maiorum temere, turbulente, per uim, per furorem esse gesta: quod si illa lex esset, nec referre ad senatum consules, nec sententiam dicere sibi licere: quorū utrūque cum fieret, non oportere, ut de me lex ferretur, decerni; ne illa, quæ nulla esset, esse lex iudicaretur. sententia uerior, grauior, utilior, melior reip. nulla esse potuit: hominis enim scelere, & furore notato, similis à rep. labes in posterum dimouebatur. neque hoc Cn. Pompeius, qui ornatissimam de me sententiam dixit, uosq; pontifices, qui me uestris sententijs, auctoritatibusq; defendistis, non uidistis, illam esse nullam, atque esse potius flammam temporis, interdictum sceleris, uocem furoris: sed prospexistis, nequa popularis in uos aliquando inuidia redundaret, si sine populi iudicio restituti uideremur. eodemq; consilio M. Bibuli, fortissimi uiri, senatus sententiam secutus est, ut uos de mea domo statueretis: non quod dubitaret, quin ab isto nihil legibus, nihil religionibus, nihil iure esset ætū, sed ne quis oriretur aliquando in tanta ubertate

te improborum, qui in meis ædibus aliquam religionem  
residere diceret. nam legem quidem istam nullam esse,  
quotiescunque de me senatus sententiam dixit, toties  
iudicauit; quoniam quidem scripto illo istius senten-  
tiam dicere uetabatur. atque hanc rem par illud si-  
mile, Piso, & Gabinus, uidit. homines legum iudicio-  
rumq; metuentes, cum frequentissimus senatus eos,  
ut de me referrent, quotidie flagitaret, non se rem im-  
probare dicebant, sed lege istius impediri. erat hoc ue-  
rum: nam impediiebantur, uerum ea lege, quam idem  
iste de Macedonia Syriaq; tulerat. hanc tu P. Lentule  
neque priuatus, neque consul legem esse unquam puta-  
sti: nam tribunis pl. referentibus, sententiam de me, de-  
signatus consul, sæpe dixisti: ex calendis Ian. quoad  
perfecta res est, de me retulisti: legem promulgasti, tu-  
listi: quorum tibi, si esset illa lex, nihil liceret. at et-  
tiam Q. Metellus, collega tuus, uir clarissimus, quam  
legem esse homines alienissimi à P. Clodio iudicarent,  
Piso, & Gabinus, eam nullam esse, frater P. Clodij,  
cum de me ad senatum tecum una retulit, iudicauit.  
sed isti, qui Clodij leges timuerunt, quemadmodum  
ceteras obseruarunt? senatus quidem, cuius est grauis-  
simum iudicium de iure legum, quotiescunque de me  
consultus est, toties eam nullam esse iudicauit. quod  
idem tu Lentule uidisti in lege, quam de me tulisti:  
nam non est ita latum, ut mihi Romam uenire liceret,  
sed ut uenirem: non enim uoluisti, id, quod licebat, fer-  
re, ut liceret; sed me ita esse in rep. magis ut accersi-  
tus imperio populi R. uiderer, quam ad administran-  
dam ciuitatem restitutus. hūc tu etiam pernicioſa pestis



exulem appellare ausus es, cum tantis sceleribus esses, & factis notatus, ut omnem locum, quò adisses, exilijs simillimū redderes? quid est enim exul? ipsum per se nomen calamitatis, non turpitudinis. quando igitur est turpe? reuera, quando est poena peccati; opinione autem hominum, etiam si est poena damnati. utrum igitur, peccato meo exulis nomen subeo, an re iudicata? peccato? iam neque tu id dicere audes, quem isti satellites tui felicem Catilinam nominant, neque quisquam corū, qui solebant. non modo iam nemo est tam imperitus, qui ea, quæ gessi in consulatu, peccata esse dicat; sed nemo est tam inimicus patriæ, qui non meis consilijs patriam conseruatam esse fateatur. quod enim est in terris commune tantum, tantulum'ue consilium, quod non de meis rebus gestis ea, quæ mihi essent optatissima & pulcherrima, iudicarit? summum est populi R. populorumq; & gentium omnium ac regum consilium senatus: decreuit, ut omnes, qui remp. saluam esse uellent, ad me unū defendendum uenirent: ostenditq; nec stare potuisse remp. si ego non fuisset restitutus; nec futuram esse ullam, si non redisset. proximus est huic dignitati ordo equester: omnes omnium publicanorum societates de meo consulatu, ac de meis rebus gestis amplissima, atque ornatissima decreta fecerunt. scribæ, qui nobiscum in rationibus, monimentisq; publicis uersantur, non obscurum de meis in remp. beneficijs suum iudicium decretumq; esse uoluerunt. nullum est in hac urbe collegium, nulli pagani, aut montani, quoniam plebi quoque urbana maiores nostri conuentacula, & quasi concilia quædam esse uoluerunt,

qui non amplissime non modo de salute mea, sed etiam de dignitate decreuerint. nam quid ego illa diuina, atque immortalia municipiorum & coloniarum, & totius Italiae decreta commemorem? quibus tanquam gradibus mihi uideor in coelum ascendisse, non solum in patriam reuertisse. ille uero dies quis fuit, cum te P. Lentule legem de me ferentem populus R. ipse uidit, sensitq; quantus, & quanta dignitate esses? constat enim, nullis unquam comitijs campum Martium tanta celebritate, tanto splendore omnis generis hominum, ætatum, ordinum floruisse. omitto ciuitatum, nationum, provinciarum, regum, orbis denique terrarum de meis in omnes mortales meritis unum iudicium, unumq; consensum. aduentus meus, atque introitus in urbem qui fuit? utrum, me patria sic accepit, ut lucem salutemq; redditam sibi ac restitutam accipere debuit. an ut crudelem tyrannum? quod uos Catilinæ gregales de me dicere solebatis. itaque ille unus dies, quo die me populus R. à porta in Capitolium, atque inde domum sua celebritate, lætitiâq; comitatum honestauit, tantæ mihi iucunditati fuit, ut tua mihi conscelerata illa uis non modo non propulsanda, sed etiam emenda fuisse uideatur. quare illa calamitas (si ita est appellanda) excussit hoc genus totum maledicti, ne quisquam audeat iam reprehendere consulatum meum, tot, tantis, tam ornatis iudicijs, testimonijs, auctoritatibus cõprobatum. quòd si in isto tuo maledicto proubrum non modo mihi nullum obiectas, sed etiam laudem illustras meam: quid te aut fieri, aut fingi dementiùs potest? uno enim maledicto bis à me patriam ser-

uatam esse concedis : sed cum id feci , quod omnes  
 non negent immortalitati , si fieri potest , mandandum ,  
 tu supplicio puniendum putasti : iterum , cum tuum ,  
 multorumq; propter te , inflammatum in bonos omnes  
 impetum meo corpore excepi , ne eam ciuitatem , quam  
 seruassem inermis , armatus in discrimen adducerem .  
 esto : non fuit in me poena ulla peccati , at fuit iudiciij .  
 cuius ? quis me unquam ulla lege interrogauit ? quis  
 postulauit ? quis diem dixit ? potest igitur damnati poe-  
 nam sustinere indemnatu ? hoc tribunicium est ? hoc  
 populare est ? quanquam ubi tu te popularem , nisi cum  
 pro populo fecisti , potes dicere ? scilicet : cum hoc iuris  
 à maioribus proditum sit , ut nemo ciuis R. aut liberta-  
 tem , aut ciuitatem possit amittere , nisi ipse auctor fa-  
 ctus sit . quod tu ipse potuisti in tua causa discere : credo  
 enim , quanquam in illa adoptione legitime factum est  
 nihil , tamen te esse interrogatum , auctor ne esses , ut in  
 te P. Fonteius uitæ necisq; potestatem haberet , ut in fi-  
 lio . quæro , si aut negasses , aut tacuisses , si tamen id  
 XXX curiæ iussissent , num id iussum esset ratum ?  
 certe non . quid ita ? quia ius à maioribus nostris , qui  
 non ficti & fallaciter populares , sed uere & sapienter  
 fuerunt , ita comparatum est , ut ciuis R. libertatem  
 nemo posset inuitus amittere . quin etiam , si decemuiri  
 sacramentum in libertatem iniustum iudicassent , ta-  
 men , quotiescūque uellet quis , hoc in genere solo rem iu-  
 dicatam referre posse uoluerunt . ciuitatem uero nemo  
 unquam ullo populi iussu amittet inuitus . qui ciues R.  
 in colonias Latinas proficiscebantur , fieri non poterant  
 Latini , qui non erant auctores facti , nomenq; dederāt .

qui erant rerum capitalium condemnati, non prius hanc ciuitatem amittebant, quàm erant in eam recepti, quò uertendi, hoc est mutandi soli causa, uenerant. id autem ut esset faciundum, non ademptione ciuitatis, sed tecti, & aquæ, & ignis interdictione faciebant. populus R. L. Sylla dictatore ferente, comitijs centuriatis, municipijs ciuitatem ademit, ademit ijsdem agros. de agris ratum est; fuit enim populi potestas: de ciuitate ne tandiu quidem ualuit, quâ diu illa Syllani temporis arma ualuerunt. hanc uero Volaterranis, cum etiam tum essent in armis, L. Sylla uictor rep. recuperata, comitijs centuriatis, ciuitatem eripere non potuit; hodieq; Volaterrani non modo ciues, sed etiam optimi ciues, fruuntur nobiscum simul hac ciuitate: consulari homini P. Clodius, euersa rep. ciuitatem adimere potuit, concilio aduocato, conductis operis non solum egentium, sed etiam seruorum, Sedulio principe? qui se illo die confirmauit Romæ non fuisse. quod si non fuit, quid te audacius, qui in eius nomen incideris? quid desperatius, qui ne ementiendo quidè potueris auctorem adumbrare meliorem? sin autem is primus sciuit, quod facile potuit, propter inopiam tecti in foro pernoctans, cur non iuret se Gadibus fuisse, cum tu te fuisse Interamnæ probaueris? hoc tu igitur, homo popularis, iurare munitam ciuitatem, & libertatem nostram putas esse oportere, ut, si tribuno. pl. rogante, Velitis, iubeatis ne; Sedulij centum se uelle & iubere dixerint, possit unusquisque nostrum amittere ciuitatem? tum igitur maiores nostri populares non fuerunt, qui de ciuitate, et libertate ea iura sanxerunt, quæ nec uis tem-



porum, nec potentia magistratuum, nec res tum iudicata, nec denique uniuersi populi R. potestas, quæ ceteris in rebus est maxima, labefactare possit. at tu etiam, ereptor ciuitatis, legem de iniurijs publicis tulisti. Anagnino nescio cui Menulæ per gratiam, qui tibi ob eam legem statuum in meis ædibus posuit, ut locus ipse in tua tanta iniuria legem, & inscriptionem statuæ refelleret. quæ res municipibus Anagninis ornatissimis multo maiori dolori fuit, quàm quæ idē ille gladiator scelera Anagninæ fecerat. quid, si ne scriptum quidem unquā est in ista ipsa rogatione, quam se Sedulius negat sciuisse: tu huius, ut acta tui prælari tribunatus hominis dignitate cohonestes, auctoritatem amplecteris: sed tamen, si nihil de me tulisti, quo minus essem nō modo in ciuium numero, sed etiam in eo loco, in quo me honores populi R. collocauerunt: tamen ne cum tua uoce uiolabis, quem, post nefarium scelus consulum superiorum, tot uides iudicijs senatus, populi R. totius Italiæ honestatum? quem, ne tum quidem, cum aberam, negare poteras esse tua lege senatorem? ubi enim tuleras, ut mihi aqua, & ignis interdiceretur? quod Gracchus de P. Popillio, Saturninus de Metello tulit. homines seditiosissimi, de optimis ac fortissimis ciuibus, non, ut esset interdictum, quod ferri non poterat, tulerunt, sed ut interdiceretur. ubi cauisti, ne meo me loco censor in senatum legeret? quod de omnibus, etiam quibus damnatis interdictum est, scriptum est in legibus. quæ re hoc ex Clodio scriptore legum tuarum: iube adesse: latitat omnino: sed, si requiri iusseris, inueniēt hominē apud sororem tuam, occultantem se capite demisso. sed si

patrem tuum, ciuem medius fidius egregium, dissimilemque; uestri, nemo unquam sanus exulem appellauit, qui, cum de eo tribunus pl. promulgasset, adesse, propter iniquitatem illius Cinnani temporis, noluit, ei que imperium est abrogatum; si in illo poena legitima turpitudinem non habuit, propter uim temporum: in me, cui dies dicta nunquam est, qui reus non fui, qui nunquam sum à tribuno pl. citatus, damnati poena esse potuit, ea praesertim, quae ne in ipsa quidem rogatione perscripta est? at uide, quid intersit inter illum iniquissimum patris tui casum, & hanc fortunam conditionemque nostram. patrem tuum, ciuem optimum, clarissimi uiri filium, qui si uiueret, quae seueritate fuit, tu profecto non uiueres, L. Philippus censor, auunculum suum, praeterijt in recitando senatu: nihil enim poterat dicere, quare rata non essent, quae erant acta in ea rep. in qua se illis ipsis temporibus censorem esse uoluisset. me L. Cotta, homo censorius, in senatu iuratus dixit, se, si censor tum esset, cum ego aberam, meo loco senatorem recitaturum fuisse. quis in meum locum iudicem subdidit? quis meorum amicorum testamentum discessu meo fecit, qui mihi non idem tribuerit, quod & si ad essem? quis me non modo ciuis, sed socius, recipere contra tuam legem, & iuuare dubitauit? denique uniuersus senatus multo ante, quam est lata lex, de me gratias agendas censuit ciuitatibus ijs, quae M. Tullium, tantum ne? immo etiam ciuem optime de rep. meritum recepissent. & tu unus, pestifer ciuis, eum restitutum negas esse ciuem, quem eiectum uniuersus senatus non modo ciuem, sed etiam egregium ciuem semper puta-

uit? at uero, ut annales populi R. & monumenta uerustatis loquuntur, censor ille Quintius, & M. Furius Camillus, & M. Seruilius Ahala, cum essent optime de rep. meriti, tamen populi incitati uim, iracundiamq; subierunt; damnatiq; comitijs centuriatis cum in exilium profugissent, rursus ab eodem populo placato sunt in suam pristinam dignitatem restituti. quod si ijs damnatis non modo non imminuit calamitas clarissimi nominis gloriam, sed etiam honestauit: (nam etsi optabilius est, cursum uitæ conficere sine dolore, & sine iniuria; tamen ad immortalitatem gloriæ plus affert, desideratum esse à suis ciuibus, quàm omnino nunquam esse uiolatum) mihi sine ullo iudicio populi profecto, tum amplissimis omnium iudicijs restituto, maledicti locum, aut criminis obtinebit? fortis & constans in optima ratione ciuis P. Popillius semper fuit: tamen eius in omni uita nihil est ad laudem illustrius, quàm calamitas ipsa: quis enim iam meminisset eum bene de rep. meritum, nisi & ab improbis expulsus esset, & per bonos restitutus? Q. Metelli præclarum imperium in re militari fuit, egregia censura, omnis uita plena grauitatis: tamen huius uiri laudem ad sempiternam memoriam temporis calamitas propagauit. quod si & illis, qui expulsi sunt inique, sed tamen legibus, reducti inimicis interfectis, rogationibus tribunicijs, non auctoritate senatus, non comitijs centuriatis, non decretis Italiæ, non desiderio ciuitatis, inimicorum iniuria probro non fuit: in me, qui profectus sum integer, absui simul cum rep. redij cum maxima dignitate, te uiuo, fratre tuo, altero consule, reducete, altero prætore pa-

tiente, tuum scelus meum probrum putas esse oportere ?  
 at si me populus R. incitatus iracundia , aut inuidia è  
 ciuitate eiecisset, idemq; postea mea in remp. beneficia  
 recordatus, se collegisset, temeritatem atque iniuriam  
 suam restitutione mea reprehendisset: tamen profecto  
 nemo esset tam amens, qui mihi populi tale iudiciũ non  
 dignitati potius, quàm dedecori putaret esse oportere .  
 nunc uero cum me in iudicium populi nemo omnium  
 uocarit ; condemnari non potuerim , qui accusatus non  
 sim ; denique ne expulsus quidem ita sim , ut, si con-  
 tenderem , superare non possem ; contraq; à populo R.  
 semper sim defensus , amplificatus , ornatus : quid est,  
 quare quisquam mihi se ipsa populari ratione antepo-  
 nat? an tu populum R. esse illum putas, qui constat ex  
 ijs, qui mercede conducuntur; qui impelluntur, ut uim  
 afferant magistratibus ? ut obsideant senatum ? optent  
 quotidie cædem, incendia, rapinas? quem tu tamẽ popu-  
 lum, nisi tabernis clausis, frequentare non poteras: cui  
 populo duces Lentidios , Lollios , Sergios præfeceras. ò  
 speciem, dignitatemq; populi R. quam reges, quam na-  
 tiones exteræ, quam gentes ultimæ pertimescunt: mul-  
 titudinem hominũ ex seruis conductis, ex facinorosis, ex  
 egentibus congregatam . illa fuit pulchritudo populi R.  
 illa forma, quam in campo uidisti tum, cum etiam tibi  
 contra senatus, totiusq; Italiæ auctoritatem et studium  
 dicendi potestas fuit. ille, ille populus est dominus regũ,  
 uictor, atque imperator omnium gentium, quem illo cla-  
 rissimo die scelerate uidisti tum, cum omnes principes ci-  
 uitatis, omnes ordinum atque ætatum omnium, suffra-  
 gium se nõ de ciuis, sed de ciuitatis salute ferre censebāt:



cum denique homines in campum non tabernis, sed municipijs clausis uenerunt. hoc ego populo, situm consules aut fuissent in rep. aut omnino non fuissent, nullo labore, tuo præcipiti furori, atque impio sceleris restitissimæ: sed publicam causam contra uim armatam, sine populi præsidio suscipere nolui: non quo mihi P. Scipionis, fortissimi uiri, uis ultima, privati hominis, displiceret: sed Scipionis factum statim P. Mucius cōsul, qui in gerenda rep. putabatur fuisse segnior, gesta, multis S. C. non modo defendit, sed etiam ornauit. mihi aut, te interfecto, cum consulibus; aut, te uiuo, & tecum, & cum illis armis decertandum fuit. erāt eo tempore multa etiam alia metuēda. ad seruos medius fidiū res peruēnisset: tantum homines impios ex uetere illa coniuratione inuistum nefarijs mentibus bonorum odium retinebat. Hic tu me etiam gloriari uetas: negas esse ferenda, quæ soleam de me prædicare: & homo facetus inducis etiam sermonem urbanum, ac uenustum; me dicere solere, esse me Iouem; eundemq; dictitare, Minervam esse sororem meam. non tam insolens sum, qui Iouem esse me dicam; non tam ineruditus, qui Minervam Iouis sororem, meam esse sororem existimem. sed tamen ego mihi sororem uirginem ascisco: tu sororem tuam uirginem esse non sinisti. sed uide, ne tu te debeas Iouem dicere, quod tu iure eandem sororem et uxorem appellare possis. & quoniam hoc reprehendis, quod solere me dicas de me ipso gloriosius prædicare: quis unquam audiuit, cum ego de me, nisi coactus, ac necessario, dicerem? nam si, cum mihi furta, largitiones, libidines obijciuntur, ego respondere soleo, meis con-

*filij, periculis, laboribus patriam esse conseruatam; non tam sum existimandus de gestis rebus gloriari, quàm de obiectis non confiteri. sed si mihi ante hæc durissima reip. tempora nihil unquam aliud obiectum est, nisi crudelitas illius temporis, cum à patria perniciem depuli: quid, me huic maledicto utrum non respondere, an demisse respondere decuit? ego uero etiam reip. semper interesse putauì, me illius pulcherrimi facti; quod ex auctoritate senatus, consensu bonorum omnium, pro salute patriæ gessissem, splendorem uerbis, dignitatemq; retinere: præsertim cum mihi uni in hac rep. audiente populo R. opera mea hanc urbem, et hanc remp. esse saluam iurato dicere fas fuisset. Extinctum est iam illud maledictum crudelitatis, quòd me non ut crudelem tyrannum, sed ut mitissimum parentem, omnium ciuium studijs desideratum, repetitum, accersitum uident. aliud exortum est. obijcitur mihi meus ille discessus: cui ego crimini respondere sine mea maxima laude non possum. quid enim pontifices debeo dicere? peccati me conscientia profugisse? at id, quod mihi crimini dabatur, non modo peccatum non erat, sed erat res post natos homines pulcherrima. iudicium populi pertimuisse? at id nec propositum ullum fuit, & si fuisset, duplicata gloria discessissem. bonorum mihi præsidium defuisset? falsum est: me mortem timuisse? turpe est. dicendum igitur est id, quod non dicerem, nisi coactus: nihil enim unquam de me dixi sublatius, ascendæ laudis causa potius, quàm criminis depellendi. dico igitur, & quàm possum maxima uoce dico, cum omnium perditorum, & coniuratorum incitata uis*

duce tribuno pl. consulibus auctoribus, afflicto senatu, perterritis equitibus R. suspensa ac sollicita tota ciuitate, non tam in me impetum faceret, quàm per me in omnes bonos; me uidisse, si uicissem, tenues reip. reliquias; si uictus essem, nullas futuras. quod cum iudicassem, defleui coniugis miseræ dissidium, liberorum carissimorum solitudinem, fratris absentis amantissimi, atque optimi casum, subitas fundatissimæ familiæ ruinas: sed his omnibus rebus uitam anteposui meorum ciuium; remq; publicam cōcidere unius discessu, quàm omnium interitu occidere malui: speraui id, quod accidit, me iam centem posse à uiuis uiris fortibus excitari; si unà cum bonis interissem, nullo modo posse recreari. accepi pontifices magnum, atque incredibilem dolorem: non nego, neque istam mihi ascisco sapientiam, quam non nulli in me requirebant, qui me animo nimis fracto esse, atque afflicto loquebatur. an ego poteram, cum à tot rerum tanta uarietate diuellerer, quas iccirco prætereo, quòd ne nunc quidem sine fletu commemorare possum, inficiari, me esse hominem, & communem naturæ sensum repudiare? tum uero neque illud meum factum laudabile, nec beneficium ullum à me in remp. profectum dicerem, si quidem ea reip. causa reliquissem, quibus æquo animo carerem; eamq; animi duritiam, sicut corporis, quod cum uritur non sentit, stuporem potius, quàm uirtutem, putarem. suscipere tantos animi dolores, atque ea, quæ capta urbe accidunt uictis, stante urbe unum perpeti, & iam se uidere distrahi à complexu suorum, disturbari tecta, diripi fortunas, patriæ denique causa patriam ipsam amittere, spoliari populi R. be

neficijs amplissimis, præcipitari ex altissimo dignitatis  
 gradu, uidere, prætextatos inimicos, non dum morte  
 complorata, arbitria petentes funeris, hæc omnia subire  
 conseruandorum ciuium causa, atque ita, ut dolenter  
 absis, non tam; sapiens, quàm ij, qui nihil curant, sed  
 tam amanst uorum, ac tui, quàm communis humani-  
 tas postulat; ea laus præclara ac diuina. nam qui ea,  
 quæ nunquam cara atque iucunda duxit, æquo ani-  
 mo reip. causa deserit, nullam beneuolentiam insignem  
 in remp. declarat: qui autem ea relinquit reip. causa, à  
 quibus cum summo dolore diuellitur, ei patria cara  
 est, cuius salutem caritati anteponit suorum. quare  
 disrumpatur licet ista furia, atque audiat hæc ex me,  
 quoniam lacecessiuit. bis seruauit; ut consul, rogatus ar-  
 matus uicerim; priuatus, consulibus armatis cesserim.  
 utriusque temporis fructum tuli maximum; superioris,  
 quòd ex senatus auctoritate et senatum, et omnes  
 bonos, mea salutis causa, mutata ueste uidi; posterioris,  
 quòd et senatus, & populus R. et omnes mortales et pri-  
 uatim, & publice iudicarunt, sine meo reditu remp. sal-  
 uam esse non posse. sed hic meus reditus pōtifices uestro  
 iudicio cōtinetur. nam si uos me in meis ædibus colloca-  
 tis, id quod in omni mea causa semper studijs, consilijs,  
 auctoritatibus, sententijsq; fecistis: uideo me plane ac-  
 sentio restitutum. sin mea domus non modo mihi non  
 redditur, sed etiam monumentum præbet inimico dolo-  
 ris mei, sceleris sui, publicæ calamitatis: quis erit, qui  
 hunc reditum potius, quàm pœnam sempiternā putet?  
 in conspectu præterea totius urbis domus est mea ponti-  
 fices: in qua si manet illud non monumentum urbis, sed



sepulcrum inimico nomine inscriptum, demigrandum  
 potius aliquò est, quàm habitandum in ea urbe, in qua  
 trophæa & de me, et de rep. uideam constituta. an ego  
 tantam aut animi duritiem habere, aut oculorum im-  
 prudentiam possim, ut cuius urbis seruatorem me esse,  
 senatus omnium assensu toties iudicarit, in ea possim  
 intueri domum meam euersam non ab inimico meo, sed  
 ab hoste communi, & ab eodem extructam, & posi-  
 tam in oculis ciuitatis, ne unquam conuiuiscere possit  
 fletus bonorum? Sp. Melij regnum appetentis domus  
 est complanata: ecquid aliud æquum accidisse Melio  
 populus R. iudicauit? nomine ipso Aequimelij stultiti-  
 a pœna comprobata est. Sp. Casij domus ob eandem  
 causam euersa, atque in eodem loco ædes posita Tellu-  
 ris. in Vacca pratis domus fuit M. Vacca, quæ publicata  
 est & euersa, ut illius facinus memoria & nomine lo-  
 ci notaretur. M. Manlius cum ab ascensu Capitolij Gal-  
 lorum impetum repulisset, non fuit contentus beneficij  
 sui gloria; regnum appetisse est iudicatus: ergo eius do-  
 mum euersam, duobus lucis conuestitam uidetis. quam  
 igitur maiores nostri sceleratis ac nefarijs ciuibus maxi-  
 mam pœnam constitui posse arbitrati sunt, eandem ego  
 subibo ac sustinebo, ut apud posteros nostros non extin-  
 ctior coniurationis & sceleris, sed auctor & dux fuisse  
 uidear? hanc uero pontifices labem turpitudinis, &  
 inconstantia poterit populi R. dignitas sustinere, uiuo  
 senatu, uobis principibus publici consilij, ut domus M.  
 Tullij Ciceronis cum domo Fuluij Flacci ad memoriam  
 pœnae publice constitutæ coniuncta esse uideatur? M.  
 Flaccus, quia cum C. Graccho contra salutem reip. fe-  
 cerat,

cerat, & senatus sententia est interfectus, & eius domus eversa, & publicata est: in qua porticum post aliquanto Q. Catulus de manubijs Cimbricis fecit. ista autem fax ac furia patriæ, cum urbem, Pisone & Gabinio ducibus, cepisset, occupasset, teneret, uno eodemque tempore & clarissimi uiri mortui monimenta delebat: & meam domum cum M. Flacci domo coniungebat, ut, qua poena senatus affecerat eversorem ciuitatis, eadem iste oppresso senatu afficeret eum, quem P. C. custodem patriæ indicassent. hanc uero in Palatio, atque in pulcherrimo urbis loco porticum esse patiemini, furoris tribunicij, sceleris consularis, crudelitatis coniuratorum, calamitatis reip. doloris mei defixum indicium ad memoriam omnium gentium sempiternam? quam porticum pro amore, quem habetis in remp. & semper habuistis, non modo sententijs, sed, si opus esset, manibus uestris disturbare cuperetis. nisi quem forte illius castissimi sacerdotis superstitiosa dedicatio deterret. o rem, quam homines soluti ridere non desinant, tristiores autem sine maximo dolore audire non possint. P. ne Clodius, qui ex pontificis maximi domo religionem eripuit, is in meam intulit? hunc, inquam, etiam uos, qui estis antistites caeremoniarum & sacrorum, auctorem habetis, & magistrum publicæ religionis? o dii immortales (uos enim hæc audire cupio) P. Clodius uestra sacra curat? uestrum numen horret? res omnes humanas religione uestra contineri putat? hic non illudit auctoritati horum omnium, qui adsunt, summorum uirorum? non uestra pontifices grauitate abutitur? ex isto ore religionis uerbum excidere, aut

elabi potest? quam tu eodem ore, accusando senatum, quod seuerè de religione decerneret, impurissime te terrimeq; uiolasti. aspiciate, aspiciate pontifices hominem religiosum, et, si uobis uidetur, quod est bonorum pontificum, monete eum, modum quendam esse religionis, nimum esse superstitiosum non oportere. quid tibi necesse fuit anili superstitione homo fanatice sacrificium, quod alienæ domi fieret, inuifere? quæ autem te tanta mentis imbecillitas tenuit, ut non putares deos satis posse placari, nisi etiam muliebribus religionibus te implicuisses? quem unquam audisti maiorum tuorum, qui et sacra priuata coluerunt, et publicis sacerdotijs præfuerunt, cum sacrificium Bonæ deæ fieret, interfuisse? neminem; ne illum quidem, qui cæcus factus est. ex quo intelligitur, multa in uita falso homines opinari, cum ille, qui nihil uiderat sciens, quod nefas esset, lumina amisit; istius, qui non solum aspectu, sed etiam incesto flagitio, et stupro polluit cæremonias, poena omnis oculorum ad cæcitatem mentis est conuersa. hoc auctore tam casto, tam religioso, tam sancto, tam pio potestis pontifices non commoueri, cum suis dicat se manibus domum ciuis optimi euertisse, et eam iisdem manibus consecrasse? quæ tua fuit consecratio? tuleram, inquit, ut mihi liceret. quid? non exceperas, ut, si quod ius non esset rogares, ne esset rogatum? ius igitur statuetis esse, uniuscuiusque uestrum sedes, aras, focos, deos penates subiectos esse libidini tribunicie? in quem quisque per homines concitatos irruerit, quem impetu perculerit, huius domum non solum affligere, quod est præsentis insanie,



quasi tempestatis repentinæ, sed etiam in posterum tem-  
pus religione sempiterna obligare? equidem sic accepi  
pontifices, in religionibus suscipiendis caput esse, inter-  
pretari, quæ uoluntas deorum immortalium esse uidea-  
tur: nec est ulla erga deos pietas, nisi honesta de numine  
eorum ac mente opinio, cum expeti nihil ab ijs, quod sit  
iniustum ac inhonestum, arbitrere. hominem inuenire  
istâ labes tum, cum omnia tenebat, neminem potuit, cui  
ædes meas addiceret, cui traderet, cui donaret: ipse,  
cum loci illius, cum ædium cupiditate flagraret, ob  
eamq; causam unam, una iusta illa rogatione sua, uir  
bonus dominum se in meis bonis esse uoluisset, tamen il-  
lo ipso in furore suo non est ausus meam domum, cuius  
cupiditate inflammatus erat, possidere. deos immortales  
existimatis, cuius labore & consilio sua ipsi templa te-  
nuerunt, in eius domum afflictam, & euersam, per u-  
nius honoris sceleratissimi nefarium latrocinium, immi-  
grare uoluisse? cuius est nemo in tanto populo, extra con-  
taminatam illam & cruentam P. Clodij manum, qui  
rem ullam de meis bonis attigerit, qui non pro suis opi-  
bus in illa tempestate defenderit. at, qui aliqua se con-  
tagione prædæ, societatis, emptionis contaminauerunt,  
nullius neque priuati, neque publici iudicij poenam effu-  
gere potuerunt. ex his igitur bonis, quorum nemo rem  
ullam attigit, qui nō omnium iudicio sceleratissimus ha-  
beretur, dii immortales domum meam concupiuerunt?  
istâ tua pulchra Libertas deos penates, & familiares  
meos lares expulit, ut à te ipsa tanquam in captiuis sedi-  
bus collocaretur? quid est sanctius, quid omni religione  
munitiûs, quàm domus uniuscuiusque ciuium? hic aræ



sunt, hic foci, hic diipenates, hic sacrae religionis caeremoniae continentur: hoc perfugium est ita sanctum omnibus, ut inde abripi neminem fas sit. quo magis est furor istius ab auribus uestris repellendus: qui, quae maiores nostri religionibus tuta nobis, & sancta esse uoluerunt, ea iste non solum contra religionem labefactauit, sed etiam ipsius religionis nomine euertit. at quae dea est? bonam esse oportet, quando quidem est abs te dedicata. Libertas, inquit, est, eam tu igitur domi meae collocasti, quam ex urbe tota sustulisti? tu, cum collegas tuos summa potestate praeditos negares liberos esse; cum in templum Castoris aditus esset apertus nemini; cum hunc clarissimum uirum, summo genere natum, summis populi beneficijs usum, pontificem, & consularem, & singulari bonitate & modestia praeditum, quem quibus oculis aspicere audeas, satis mirari non queo, audiente populo R. a pedisequis conculcari iuberes; cum indemnatum exturbares, priuilegijs tyrannicis irrogatis; cum principem orbis terrarum uirum inclusum domi contineres; cum forum armatis cateruis perditorum hominum possideres: Libertatis simulacrum in ea domo collocabas, quae domus erat ipsa indicio tui crudelissimi dominatus, & miserrimae populi R. seruitutis? cum ne potissimum Libertas domo sua debuit pellere, qui nisi fuisset, in seruorum potestatem ciuitas tota uenisset? at unde inuenta est ista Libertas? quaesui enim diligenter. Tanagrae quaedam meretrix fuisse dicitur. eius non longe à Tanagris simulacrum è marmore in sepulcro positum fuit. hoc quidam homo nobilis, non alienus ab hoc religioso Liberta-

tis sacerdote, ad ornatum ædilitatis suæ deportauit. etenim cogitarat omnes superiores muneris splendore superare: itaque omnia signa, tabulas, ornamentorum quod superfuit in fanis, & communibus locis, tota è Græcia atque insulis omnibus, honoris populi R. causa, sane frugaliter domum suam deportauit. is postea quam intellexit, posse se, interuersa ædilitate, à L. Pisonē consule prætorem renunciari, si modo eadem prima litera competitorem habuisset aliquem, ædilitatem duobus in locis partim in arca, partim in hortis suis collocauit: signum de busto meretricis ablatum isti dedit, quod esset signum magis istorum, quàm publicæ libertatis. hanc deam quisquam uiolare audeat, imaginem meretricis, ornamentum sepulcri, à fure sublatam, à sacrilego collocatam? hæc me domo mea pellet? hæc ultrix afflictæ ciuitatis, reip. spolijs ornabitur? hæc erit in eo monumento, quod positum est, ut esset indicium oppressi senatus ad memoriam sempiternam turpitudinis? o Q. Catule (patrem ne appellem, an filium? recentior memoria filij est, & cum rebus meis gestis coniunctior) tantum ne te fefellit, cum mihi summa, & quotidie maiora præmia in rep. fore putabas? ne gabas fas esse duos consules esse in hac ciuitate inimicos reip. duo sunt inuenti, qui senatum tribuno furenti constrictum traderent, qui pro me patres conscriptos deprecari, & populo supplices esse edictis atque imperio uetarent, quibus spectantibus domus mea disturbaretur, diriperetur, qui denique ambustas fortunarum mearum reliquias suas in domos comportari iuberent. Venio nunc ad patrem. Tu Q. Catule M. Fuluij do-

mum, cum is fratris tui socer fuisset, monumentum  
 tuarum manubiarum esse uoluisti, ut eius, qui perniti-  
 ciosa reip. consilia cepisset, omnis memoria funditus  
 ex oculis hominum ac mentibus tolleretur. hoc si quis  
 tibi ædificanti illam porticum diceret, fore tempus,  
 cum is tribunus pl. qui auctoritatem senatus, iudici-  
 um bonorum omnium neglexisset, tuum monimen-  
 tum, consulibus non modo inspectantibus, uerum ad-  
 iuuantibus, disturbaret, euerteret, idq; cum eius ciuis,  
 qui temp. ex senatus auctoritate consul defendisset,  
 domo coniungeret: nonne responderes, id, nisi euer-  
 sa ciuitate, accidere non posse? at uidete hominis into-  
 lerabilem audaciam cum proiecta quadam & effre-  
 nata cupiditate. monumentum iste nunquam aut re-  
 ligionem ullam excogitauit: habitare laxè & ma-  
 gnifice uoluit, duasq; & magnas & nobiles domos  
 coniungere. eodem puncto temporis, quo meus disces-  
 sus isti causam cædis eripuit, à Q. Seio contendit, ut  
 sibi domum uenderet. cum ille id negaret, primo se  
 luminibus eius esse obstructurum minabatur. affir-  
 mabat Postumus, se uiuo illam domum istius nun-  
 quam futuram. acutus adolescens ex ipsius sermone  
 intellexit, quid fieri oporteret: hominem ueneno aper-  
 tissime sustulit: emit domum, litigatoribus defatigatis,  
 prope dimidio carius, quàm æstimabat. quorsum igitur  
 hæc oratio pertinet? domus mea illa prope tota  
 uacua est: uix pars ædium mearum decima ad Ca-  
 tuli porticum accessit. causa fuit ambulatio, & mo-  
 nimentum, & ista Tanagræa, oppressa libertate, li-  
 bertas. in Palatio, pulcherrimo prospectu, porticum

cum conclauibus pauimentatam trecentum pedum concupierat, amplissimum peristylum, cetera eiusmodi, facile ut omnium domos & laxitate & dignitate superaret. & homo religiosus, cum aedes meas idem emeret & uenderet, tamen illis tantis tenebris non est ausus suum nomen emptioni illi ascribere: posuit scilicet Statonem illum, hominem sua uirtute egentem, ut is, qui in Marsis, ubi natus est, tectum, quod imbris uitandi causa succederet, nullum haberet, aedes in Palatio nobilissimas emisse se diceret: inferiorem aedium partem assignauit non suæ genti Fonteie, sed Clodie, quam reliquit: quem in numerum ex multis Clodij nemo nomen dedit, nisi aut egestate, aut scelere perditus. hanc uos pontifices tam uariam, tam nouam in omni genere uoluntatem, imprudentiam, audaciam, cupiditatem comprobabitis? pontifex, inquit, affuit. non te pudet, cum apud pontifices res agatur, pontificem, dicere, non collegium pontificum, affuisse? præsertim cum tribunus pl. uel denunciare potueris, uel etiam cogere? esto: collegium non adhibuisti: quid? de collegio quis tandem affuit? posuerat enim auctoritatem in uno, quæ est in his omnibus. sed tamen auget & ætas, & honos dignitatem. opus erat etiam scientia: quam etsi omnes consecuti sunt, tamen certe peritiores uetustas facit. quis ergo affuit? frater, inquit, uxoris meæ. si auctoritatem quærimus, etsi id est ætatis, ut non dum consecutus sit; tamen quanta est in adolescente auctoritas, ea propter tantam coniunctionem affinitatis minor est putanda. sin autem scientia est quæ sita, quis erat minus



peritus, quàm is, qui paucis illis diebus in collegium uenerat? qui etiam tibi erat magis obstrictus beneficio recenti, cum se, fratrem uxoris tuæ, fratri tuo germano antelatum uidebat. etsi in eo prouidisti, ne frater te accusare posset. hanc tu igitur dedicationem appellas, ad quam non collegium, non honoribus populæ R. ornatum pontificem, non denique adolescentem quenquam, cum haberes in collegio familiarissimos, adhibere potuisti? affuit is, si modo affuit, quem tu impulisti, soror rogauit, mater coegit. Videte igitur pontifices, quid statuatis in mea causa de omnium fortunis. uero ne pontifices putatis, si is postem tenuerit, & aliquid dixerit, domum uniuscuiusque consecrare posse: an istæ dedicationes, & templorum, & delubrorum religiones ad honorem deorum immortalium sine ulla ciuium calamitate à maioribus nostris constitutæ sunt? est inuentus tribunus pl. qui consularibus copijs instructus, omni impetu furoris in eum ciuem irruerit, quem perculsum ipsa resp. suis manibus extolleret. quid, si quis similis istius (neque enim iam deerunt, qui imitari uelint) aliquem mei dissimilem, cui resp. non tantum debeat, per uim afflixerit, domum eius per pontificem dedicarit: id uos ista auctoritate constitueris ratum esse oportere? dicitis, quem reperiet pontificem? quid? & tribunus pl. idem esse non potest pontifex? M. Drusus ille, clarissimus uir, tribunus pl. pontifex fuit. ergo, si is Q. Cæpionis inimici sui post ædium tenuisset, et pauca uerba fecisset, ædes Cæpionis essent dedicatæ? nihil loquor de pontificio iure, nihil de ipsis uerbis dedicationis, nihil de religione, cæremonijs: nō

dissimulo me nescire ea, quæ etiam si scirem, dissimula-  
 rem, ne alijs molestus, uobis etiam curiosus uiderer: etsi  
 effluunt multa ex uestra disciplina, quæ etiam ad no-  
 stras aures sæpe permanant: postem teneri in dedica-  
 tione oportere, uideor audisse, templi: ibi enim postis  
 est, ubi templi aditus est, & ualuarum ambulationis pos-  
 tes: nemo unquam tenuit in dedicando. simulacrum  
 autem aut aram si dedicasti, sine religione loco moue-  
 ri potest: sed iam hoc dicere tibi non licebit, quoniam  
 pontificem postem tenuisse dixisti. quanquam quid ego  
 de dedicatione loquar? aut quid de uestro iure, & re-  
 ligione, contra quam proposueram, disputabo? ego  
 uero si omnia solennibus uerbis, ueteribus, et priscis in-  
 stitutis acta esse dicerem, tamen me reip. iure defende-  
 rem: an, cum tu eius ciuis discessu, cuius unius opera  
 senatus, atque omnes boni ciuitatem esse incolumem  
 toties iudicassent, oppressam teterrimo latrocinio cum  
 duobus sceleratissimis consulibus remp. teneres, domum  
 eius, qui patriam à se seruata perire suo nomine no-  
 luisset, per pontificem aliquem dedicasses: posset recrea-  
 ta resp. sustinere? date de hac religione aditum pontifi-  
 ces: iam nullum fortunis communibus exitum reperi-  
 tis. an, si postem tenuerit pontifex, & uerba, ad reli-  
 gionem deorum immortalium composita, ad perniciem  
 ciuium transtulerit, ualebit ad iniuriam nomen sanctis-  
 simum religionis: si tribunus pl. urbis non minus priscis  
 & pene solennibus bona ciuis cuiuspiam consecravit,  
 non ualebit? atqui C. Atinius patrum memoria bona  
 Q. Metelli, qui eum ex senatu censor eiecerat, aut tui  
 Q. Metelle, & tui P. Seruili, & proauui tui P. Sci-

pio consecrauit, foculo posito in rostris, adhibitoq; tibicini. quid tum? num ille furor tribuni pl. ductus ex nonnullis ueterum temporum exemplis fraudi Metello fuit, summo illi & clarissimo uiro? certe non fuit. uidimus hoc idem Cn. Lentulo censori tribunum pl. facere: nunquid igitur is bona Lentuli religione obligauit? sed quid ego ceteros? tu, tu, inquam, capite uelato, concione aduocata, foculo posito, bona tui Gabinij, cui regna omnia Syrorum, Arabum, Persarumq; donaras, consecrasti. quod si tum nihil est actum, quid in meis bonis agi potuit? sin est ratum, cur ille gurgis helluatus tecum simul reip. sanguinem, ad caelum tamen extruxit uillam in Tusculano uisceribus ararij: mihi meas ruinas, quarum ego similem totam urbem esse passus non sum, aspicere non licuit? omitto Gabinium. quid? exemplo tuo bona tua non ne L. Mummius, uir omnium fortissimus atque optimus, consecrauit? quod si, quia ad te pertinet, ratum esse negas oportere: ea iura constituisti in praclaro tribunatu tuo, quibus in te conuersis, recusares; alios euerteres? sin ista consecratio legitima est: quid est, quod profanum in tuis bonis esse possit? an consecratio nullum habet ius, dedicatio est religiosa? quid ergo illa tua tum obtestatio tibicinis? quid foculus? quid preces? quid prisca uerba uoluerunt? e mentiri, fallere, abuti deorum immortalium numine ad hominum timorem uoluisti? nam si est illud ratum, mitto Gabinium, tua domus certe, & quicquid habes aliud, est Cereri consecratum. sin ille ludus fuit, quid te impurius, qui religiones omnes pollueris, aut ementiendo, aut stuprando? iam fateor, inquit, in



Gabinio me nefarium fuisse. quippe uides poenam illam  
à te in alium institutam, in te ipsum esse conuersam.  
sed homo, omnium scelerum flagitiorumq; documen-  
tum, quod in Gabinio fateris, cuius impudicitiam pueri-  
tia, libidines adolescentiæ, dedecus & egestatem reli-  
quæ uitæ, latrocinium consularis uidimus, cuine ista  
quidem ipsa calamitas iniuria potuit accidere, id in me  
infirmas, & grauius esse dicis, quod uno adolescente,  
quàm quod concione tota teste effecisti. dedicatio ma-  
gnam, inquit, habet religionem. non'ne uobis Numa  
Pompilius uidetur loqui? discite orationem pontifices et  
uos flamines: etiam tu rex disce à gentili homine tuo:  
quanquam ille gentem istam reliquit: sed tamen disce  
ab homine religionibus dedito, iusto, tum omnium re-  
ligionum perito. quid? in dedicatione non'ne, & quis  
dicit, & quid, & quomodo, quæritur? an tu hæc  
ita confundis & perturbas, ut, quicumque uelit, quod  
uelit, quo modo uelit, possit dedicare? quis eras tu,  
qui dedicabas? quo iure? qua lege? quo exemplo? qua  
potestate? ubi te isti rei populus R. præfecerat? uideo ea-  
nim esse legem ueterem tribuniciam, quæ uetet iniussu  
plebis ædes, terram, aram consecrare. neque tum hoc  
ille Q. Papirius, qui hanc legem rogauit, sensit: ne-  
que suspicatus est fore periculum, ne domicilia, aut pos-  
sessiones indemnatorum ciuium consecrarentur: neque  
enim id fieri fas erat, neque quisquam fecerat: neque  
erat causa, cur prohibendo non tam detertere uideretur,  
quàm admonere. sed quia consecrabantur ædes,  
non priuatorum domicilia, sed quæ sacræ nominantur;  
consecrabantur agri, non ita ut nostra prædia, si quis



uellet, sed ut imperator agros de hostibus captos conse-  
 craret; statuebantur aræ, quæ religionem afferrent,  
 ipso si loco essent consecratæ: hæc, nisi plebs iussisset, fie-  
 ri uetuit. quæ si tu interpretaris de nostris ædibus at-  
 que agris scripta esse, non repugno: sed quæro, quæ  
 lex lata sit, ut tu meas ædes consecrares; ubi tibi hæc  
 potestas data sit; quo iure feceris. neque ego nunc de  
 religione, sed de bonis omnium nostrum, nec de pontifi-  
 cio, sed de iure publico disputo. Lex Papiria uetat ædes  
 iniussu plebis consecrari. si essane hoc de nostris ædibus,  
 ac non de publicis templis. unum ostende uerbum con-  
 secrationis in ipsa tua lege, si illa lex est, ac non uox  
 sceleris & crudelitatis tuæ. quod si tibi tum in illo reip.  
 naufragio omnia in mentem uenire potuissent, aut si  
 tuus scriptor in illo incendio ciuitatis non syngraphas  
 cum Byzantijs exulibus, & cum legatis regijs face-  
 ret, sed uacuo animo tibi ista non scita, sed portenta  
 conscriberet: esses omnia si minus re, at uerbis legitimis  
 consecutus. sed uno tempore cautiones fiebant pecunias-  
 rum, fœdera feriebantur prouinciarum, regum appel-  
 lationes uenales erant, seruorum omnium uicatim ce-  
 lebrabatur tota urbe descriptio, inimici in gratiam re-  
 conciliabantur, imperia adscribebantur nouæ inuentu-  
 ti, Q. Seio uenenum miserò parabatur, de Cn. Pom-  
 peio, propugnatore et custode imperij, interficiendo con-  
 silia inibantur, senatus ne quid esset, ut lugerent boni  
 semper, ut capta resp. consulum proditione, uel tribu-  
 nicia teneretur, hæc cum tot tantaque agerentur, non  
 mirum est, præsertim in furore animi, & cæcitate,  
 multa illum, & te fefellisse. at uidete, quanta sit uis

huius Papiriæ legis in re tali, non qualem tu affers sceleris plenam, et furoris Q. Martius censor signum Concordiæ fecerat, idq; in publico collocarat. hoc signum C. Cassius censor cum in curiam transtulisset, collegium uestrum consuluit, num quid esse causæ uideretur, quin id signum curiamq; Concordiæ delicaret? quæso pontifices & hominem cum homine, et tempus cum tempore, & rem cum re comparate. ille erat summa modestia, & gravitate censor: hic tribunus pl. scelere, & audacia singulari. tempus illud erat tranquillum, & in libertate populi, & gubernatione positum senatus: tuum porro tempus libertate populi R. oppressa, senatus auctoritate deleta. res illa plena iustitiæ, sapientiæ, dignitatis: censor enim, penes quem maiores nostri (id quod tu sustulisti) iudicium senatus de dignitate esse uoluerunt, Concordiæ signū uolebat in curia, curiamq; ei deæ dedicare. præclara uoluntas, atque omni laude digna: præscribere enim se arbitrabatur, ut sine studiis dissensionis sententiæ dicerentur, si sedem ipsam, ac templum publici consilij religione Cōcordiæ deuinxisset. tu, cū ferro, cum metu, cum edictis, cū priuilegijs, cum præsentibus copijs perditorum, absentis exercitus terrore, & minis, consulum societate, & nefario fœdere, seruitute oppressam ciuitatem teneres, Libertatis signū posuisti magis ad ludibrium impudentiæ, quàm ad simulationem religionis. ille in curia, quæ poterat, sine cuiusquam incommodo dedicabat: tu in ciuis optime de rep. meriti cruore, ac pene ossibus simulacrum non libertatis publicæ, sed licentiæ collocasti. atque ille tamen ad collegium retulit: tu ad quem retulisti? si quid

deliberares, si quid tibi aut piandum, aut instituendū  
fuiſſet religione domestica, tamen instituto cæterorum  
ueterē ad pontificem detulisses: nouum delubrum cum  
in urbis clarissimo loco, nefando quodam atque inaudia-  
to instituto incohares, referendum ad sacerdotes publi-  
cos non putasti? at si collegium pontificum adhiben-  
dum non uidebatur, nemo ne horum tibi idoneus uisus  
est, qui ætate, honore, auctoritate antecellunt, ut cum  
eo dedicationem cōmunicares? quorum quidem tu non  
contempſiſti, sed pertimuiſti dignitatem. an tu auderes  
quærere ex P. Seruilio, aut ex M. Lucullo; quorum  
ego consilio, atque auctoritate remp. consul ex uestris  
manibus, ac faucibus eripui, quibusnam uerbis, aut  
quo ritu, primum hoc dico, ciuis domum consecrares;  
deinde ciuis eius, cui princeps senatus, cui etiam ordi-  
nes omnes, deinde Italia tota, post cunctæ gentes testi-  
monium huius urbis, atque imperij conseruati dedisse-  
sent? quid diceres, ò nefanda et pernicioſa labes ciuita-  
tis? ades, ades Luculle, Seruili, dum dedico domum  
Ciceronis, ut mihi præeatis, postemq; teneatis. es tu qui-  
dem cum audacia, tum impudentia singulari: sed tibi  
tamen oculi, uultus, uerba cecidissent, cum te uiri,  
qui sua dignitate personam populi R. atque auctori-  
tatem imperij sustinerent, uerbis grauissimis perterruiſ-  
sent, neque sibi fas esse dixissent, furori interesse tuo,  
atque in patriæ parricidio & scelere. quæ cum uideres,  
tum te ad tuum affinem non delectum à te, sed reli-  
ctum à cæteris contulisti: quem ego tamen credo, si est  
ortus ab illis, quos memoriæ proditum est ab ipso Her-  
cule perfuncto iam laboribus sacra didiciſſe, in uiri for-

tis ærumnis non ita crudelem fuisse, ut in uiui, & iam spirantis caput bustū suis manibus imponeret : qui aut nihil dixit, aut, si fecit, omnino poenam hanc maternæ temeritatis tulit, ut mutam in delicto personam, nomenq; præberet : aut, si dixit aliquid uerbis hæsitantibus, postemq; tremebunda manu tetigit, certe nihil rite, nihil caste, nihil more institutoq; perfecit. uiderat ille Muranum uitricum suum, consulem designatum, ad me consulem cum Allobrogibus communis exitij indicia afferre : audierat ex illo, se à me bis salutem accepisse, separatim semel, iterum cum uniuersis. quare quis est, qui existimare possit, huic nouo pontifici primam hanc post sacerdotium initum religionem instituenti, uocemq; mittenti non & linguam obmutuisse, & manum obtorpuisse, & mentem debilitatam metu concidisse ? præsertim cum ex collegio tanto non regem, non flaminem, non pontificem uideret, fieriq; particeps alieni sceleris inuitus cogeretur, & grauissimas poenas affinitatis impurissimæ sustineret. sed ut reuertar ad ius publicum uindicandum, quod ipsi pontifices semper non solum ad suas ceremonias, sed etiam ad populi iussa accommodauerunt, habetis in commentarijs uestris, C. Cassium censorem de signo Concordiæ dedicando ad pontificum collegiū retulisse, eiq; M. Aemilium pont. maximum pro collegio respondisse; nisi eum populus R. nominatim præfecisset, atque eius iussu faceret, non uideri ea recte posse dedicari. quid? cum Licinia, uirgo Vestalis, summo loco nata, sanctissimo sacerdotio prædita, T. Flaminino, Q. Metello consulibus aram, & ædiculam, & puluinar sub saxo sa-



cro dedicasset, non eam rem ex auctoritate senatus ad hoc collegium Sex. Iulius prætor retulit? cum P. Scævola pont. max. pro collegio respondit; quod in loco publico Licinia C. F. iniussu populi dedicasset, sacrum non uideri esse. quam quidem rem quanta seueritate, quantaq; diligentia senatus sustulerit, ex ipso S. C. facile cognoscetis. recita. S. C. uidetis ne prætori urbano negotium datum, ut curaret, ne id sacrum esset? et ut, si quæ essent incisæ, aut inscriptæ littæ, tollerentur? o tempora, o mores. tum censorem, hominem sanctissimum, simulacrum Cõcordiæ dedicare pontifices in templo in augurato prohibuerunt; post autem senatus in loco angusto consecratam eam aram tollendam ex auctoritate pontificum censuit, neque ullum est passus ex ea dedicatione literarum extare monumentum: tu, procella patriæ, turbo, ac tempestas pacis, atque otij, quod in naufragio reip. tenebris offusis, demerso populo R. euerso, atque eiecto senatu, dirueris, ædificaris; religione omni uiolata, reip. tantum nomine contaminaris; in ciuis huiusce ædibus, & in urbe, quam suis laboribus ac periculis conseruasset, monumentum deletæ reip. collocaris ad equitum notam, ad dolorem bonorum omnium, sublatoq; Q. Catuli nomine incideris; id sperasti remp. diutius, quàm quoad mecum simul expulsa careret his mœnibus, esse laturam? At si pontifices neque is, cui licuit, neque id, quod fas fuit, dedicauit: quid me attinet iam illud tertium, quod proposueram, docere, non ijs institutis, ac uerbis, quibus cæremoniæ postulant, dedicasse? dixi à principio, nihil me de scientia uestra, nihil de sacris, nihil de abscondito iure pontificum

tificum dicturum . quæ sunt adhuc à me de iure deducendi disputata , non sunt quæ sita ex occulto aliquo genere literarum , sed sumpta de medio ex rebus palam per magistratus actis , ad collegiumq; delatis , ex S. C. ex lege . illa interiora iam uestra sunt , quid dici , quid præcipere , quid tangi , quid teneri ius fuerit . quæ si omnia ex Coruncanij scientia , qui peritissimus pontifex fuisse dicitur , acta esse constarent ; aut si M. Horatius ille Pulvillus , qui , cum eius dedicationem multi propter inuidiam fictis religionibus impedirent , restitit , et constantissima mente Capitolium dedicauit , huiusmodi alicui dedicationi præfuisse , tamen in scelere religio non ualeret : nedum ualeat id , quod imperitus adolescens , nouus sacerdos , sororis precibus , matris minis adductus , ignarus , inuitus , sine collegis , sine libris , sine auctore , sine scriptore , furtim , mente , ac lingua titubante fecisse dicatur : præsertim cum iste , impurus , atque impius hostis omnium religionum , qui contra fas inter uiros sæpe mulier , & inter mulieres uir fuisset , ageret illam rem ita raptim , & turbulente , ut neque mens , neque uox , neque lingua consisteret . delatum est ad uos pontifices , & post omnium sermone celebratum , quemadmodum iste præposteris uerbis , omnibus obscænis , identidem se ipse reuocando , dubitans , timens , hæsitans , omnia aliter , ac uos in monimentis habetis , & pronunciarit , & fecerit . quod quidem minime mirum est , in tanto scelere , tantaq; dementia , ne audaciæ quidem locum ad timorē comprimendum fuisse . etenim si nemo unquam prædo tam barbarus , atque immanis fuit , qui , cum fana spoliasset , deinde aram

aliquam in litore deserto, somnijs stimulatus, aut religione aliqua consecraret, non horreret animo, cum diuinum numen scelere uiolatum placare precibus cogeretur: qua tandem istum perturbatione mentis, omnium templorum, atque tectorum, totiusq; urbis prædonem, fuisse censetis, cum pro detestatione tot scelerum unam aram nefarie consecraret? non poterat ullo modo (quanquam & insolentia dominatus extulerat animos, & erat incredibili armatus audacia) non in agendo ruere, ac sepe peccare, præsertim illo pontifice, & magistro, qui cogeretur docere, antequam ipse didicisset. magna uis est cum in deorum immortalium numine, tum uero in ipsa rep. dii immortales, suorum templorum custodem ac præsidem sceleratissime pulsum cum uiderent, ex suis templis in eius ædes immigrare nolebant: itaque istius uerborum mentem cura, metuq; terrebant. res uero publica, quanquam erat exterminata mecum, tamen obuersabatur ante oculos exterminatoris sui, & ab istius inflammato atque ignito furore iam tum me seq; reputeabat. quare quid est mirum, si iste metu, si furore instinctus, scelere præceps, neque institutas cæremonias persequi, neque uerbum ullum solenne potuit effari? quæ cum ita sint pontifices, reuocate iam animos uestros ab hac subtili nostra disputatione ad uniuersam remp. quam antea cum uiris fortibus multis, in hac uero causa solis uestris ceruicibus sustinetis. uobis uniuersi senatus perpetua auctoritas, cui uosmet ipsi præstantissimi semper in mea causa præfuisstis; uobis Italie magnificentissimus ille motus, municipiorumq; concursus

sus; uobis campus, centuriarumq; una uox omnium,  
 quarum uos principes, atque auctores fuistis; uobis om-  
 nes societates, omnes ordines, omnes, qui aut re, aut  
 spe denique sunt boni, omne uobis erga meam dignita-  
 tem studium, & iudicium non modo commissum, ue-  
 rum etiam commēdatum esse arbitrantur. denique ipse  
 dī immortales, qui hanc urbem, atque hoc imperium  
 tuentur, ut esset omnibus gentibus posteritatiq; perspi-  
 cuum, diuino me numine esse reip. redditum, iccirco  
 mihi uidentur fructum ipsum redditus, & gratulatio-  
 nis meae ad suorum sacerdotum potestatem iudiciumq;  
 reuocasse; hic est enim redditus pontifices, haec restitutio,  
 in domo, in sedibus, in aris, in focis, in dīs penatibus  
 recuperādis. quorum si iste suis sceleratissimis manibus  
 tecta, sedesq; conuellit, ducibusq; consulibus, tanquam  
 urbe capta, hanc unam domum, quasi acerrimi propu-  
 gnatoris, sibi delendam putauit: tamen illi dī penates  
 ac familiares mei per uos in meam domū mecum erunt  
 restituti. quo circa te Capitoline, quem propter bene-  
 ficia populus R. optimum, propter uim maximum no-  
 minauit; teq; Iuno regina, & te custos urbis Minera-  
 ua, quae semper adiutrix consiliorum meorum, testis la-  
 borum extitistis, precor ac quaeso: uosq; qui maxime  
 me repetistis, atque reuocastis, quorum de sedibus haec  
 mihi proposita est contentio, patrī penates, familiaresq;  
 qui huic urbi, & reip. praesides estis, uos obtestor, quo-  
 rum ego à templis ac delubris pestiferam illam, & ne-  
 fariam flammam depuli: teq; Vesta mater, cuius ca-  
 stissimas sacerdotes ab hominum amentia, furore, &  
 scelere defendi, cuiusq; ignem illum sempiternum non



sum passus aut sanguine ciuium restingui, aut cum totius urbis incendio commisceri: ut, si in illo pene fato reip. obieci meum caput pro uestris cæremoniis, atque templis perditissimorum ciuium furori, atque ferro; & si iterum, cum ex mea contentione interitus bonorum omnium quæreretur, uos sum testatus, uobis me ac meos commendauī, meq; ac meum caput ea condicione deuoui, ut, si & eo ipso tempore & ante in consulatu meo commodis meis omnibus, emolumentis, præmijs prætermiſſis, cura, cogitatione, uigilijs omnibus nihil, nisi de salute meorum ciuium, laborassem, tum mihi rep. aliquando restituta liceret frui; sin autem mea consilia patriæ non profuissent, ut perpetuum dolorem auulsus à meis sustinerem: hanc ego deuotionem capitis mei, cum ero in sedes meas restitutus, tum denique conuictam esse, et commissam putabo. nam nunc quidem pontifices non solum domo, de qua cognoscitis, sed tota urbe careo, in quam uideor esse restitutus. urbis enim celeberrimæ et maximæ partes aduersum illud non monumentum, sed uulnus patriæ contuentur: quem cum mihi conspectum morte magis uitandum, fugiendumq; esse uideatis: nolite quæso eum, cuius reditu restitutam rep. fore putastis, non solum dignitatis ornamentis, sed etiam urbis partibus uelle esse priuatum. non me bonorum direptio, non tectorum excisio, non depopulatio prædiorum, non præda consulum ex meis fortunis crudelissime capta permo= uet: caduca semper & mobilia hæc esse duxi, non uirtutis, atque ingenij, sed fortunæ, & temporum munera: quorum ego non tam facultatem unquam

Et copiam expetendam putavi, quàm et in utendo ra-  
 tionem, Et in carendo patientiam. etenim ad nostrum  
 usum propemodum iam est definita moderatio rei fami-  
 liaris; liberis autem nostris satis amplum patrimonium pa-  
 terni nominis, ac nostræ memoriæ relinquemus. domo  
 per scelus erepta, per latrocinium occupata, per religio-  
 nis vim sceleratius etiam ædificata, quàm eversa, care-  
 re sine maxima ignominia reip. meo dedecore, ac dolo-  
 re non possum. quapropter, si dijs immortalibus, si se-  
 natui, si populo R. si cunctæ Italiæ, si provincijs, si  
 exteris nationibus, si uobismet ipsis, qui in mea salute  
 principem semper locum auctoritatemq; tenuistis, gra-  
 tum et iucundum meum reditum intelligitis esse: quæ-  
 so, obtestorq; uos pontifices, ut me, quem auctoritate,  
 studio, sententijs restituis-  
 tis, nunc, quoniam senatus  
 ita uult, manibus quoque uestris in sedibus meis collo-  
 cetis.

kk iij

DE ARVSPICVM RESPONSIS,  
IN SENATV.  
ORATIO XXX.

Esterno die P. C. cum me & uestra  
dignitas, & frequentia equitum R.  
h quibus senatus dabatur, magnopere  
commouisset, putavi mihi reprimen-  
dam esse P. Clodij impudicam impu-  
dentiam, cum is publicanorum causam stultissimis in-  
terrogationibus impediret, & P. Tullioni Syro naua-  
ret operam, atque ei sese, cui totus uenierat, etiam uo-  
bis inspectantibus uenditaret. itaque hominem furen-  
tem exultantemq; continui, simul ac periculum iudici-  
cij intendi: duobus inceptis uerbis omnem impetum gla-  
diatoris ferociamq; compressi. attamen ignarus ille, qui  
consules essent, exanguis atque aestuans, se è curia re-  
pente proripuit, cum quibusdā fractis iam atque inani-  
bus minis, et cum illius Pisoniani temporis Gabinianiq;  
terroribus. quem cū egredientem insequi cœpissem, ce-  
pi equidem fructum maximum & ex consurrectione  
omnium uestrum, & ex comitatu publicanorum. sed  
uecors repente sine suo uultu, sine colore, sine uoce con-  
stitit, deinde respexit; et simul ad Cn. Lentulum con-  
sulem aspexit, concidit in curiæ penelimine, recorda-  
tione credo Gabinij sui, desiderioq; Pisonis. cuius ego  
de effrenato & præcipiti furore quid dicam? haud po-  
test grauioribus à me uerbis uulnerari, quàm est sta-  
tim in factō ipso à grauissimo uiro P. Seruilio confe-  
ctus, ac trucidatus. cuius si etiam nim, & gravitas

tem illam singularem ac pene diuinam assequi possem,  
 tamen non dubito, quin ea tela, quæ coniecero inimi-  
 cus, quàm ea, quæ collega patris emisit, leuiora atque  
 hebetiora esse uideantur. sed tamen mei facti rationem  
 exponere illis uolo; qui hesternò die dolore me elatum,  
 & iracundia longius prope digressum arbitrabantur,  
 quàm sapientis hominis cogitata ratio postularet. nihil  
 feci iratus, nihil impotenti animo, nihil non diu consi-  
 deratum, ac multo ante meditatam. ego enim P. C.  
 inimicum me semper esse professus sum duobus, qui  
 me, qui rem meam, cum defendere deberent, seruare  
 possent, cumq; ad consulare officium ipsis insignibus  
 illius imperij, ad meam salutem non solum auctori-  
 tate, sed etiam precibus uestris uocarentur, primo rea-  
 liquerunt, deinde prodiderunt, postremo oppugna-  
 uerunt, præmijsq; nefariæ pactionis funditus una  
 cum rep. oppressum, extinctumq; uoluerunt; quiq;  
 suo ductu & imperio cruento illo, atque funesto sup-  
 plicia neque à sociorum mœnibus prohibere, neque  
 hostium urbibus inferre potuerunt, excisionem, ina-  
 flammationem, euersionem, depopulationem, uastia-  
 tatem eam sua cum præda meis omnibus tectis, atque  
 agris intulerunt. cum his furijs, & facibus, cum his,  
 inquam, exitiosis prodigijs, ac pene huius imperij pe-  
 sibus bellum mihi inexpiabile dico esse susceptum, ne-  
 que id tamen ipsum tantum, quantum meus, ac  
 meorum, sed tantum, quantum uester atque omnium  
 bonorum dolor postulauit. in Clodium uero non est  
 hodie meum maius odium, quam illo die fuit, cum  
 illum ambustum religiosissimis ignibus, cognoui mu-



liebri ornatu, ex incesto stupro, ex domo pontifi-  
 cis maximi emissum. tum, inquam, tum uidi, ac mul-  
 to ante prospexi, quanta tempestas excitaretur, quan-  
 ta impenderet procella reip. Videbam, illud scelus, tam  
 importunum, audaciam, tam immanem, adolescen-  
 tis furentis, nobilis, uulnerati non posse arceri otij fini-  
 bus; erupturum illud malum aliquando, si impuni-  
 tum fuisset, ad perniciem ciuitatis. non multum mihi  
 sane post ad odium accessit: nihil enim contra me fecit  
 odio mei, sed odio seueritatis, odio dignitatis, odio reip.  
 non me magis uiclauit, quam senatum, quam equi-  
 tes R. quam omnes bonos, quam Italiam cunctam: non  
 denique in me sceleratior fuit, quam in ipsos deos im-  
 mortales. etenim illos eo scelere uiolauit, quo nemo an-  
 tea; in me fuit eodem animo, quo etiam eius familia-  
 ris Catilina, si uicisset, fuisset: itaque cum nunquam  
 a me esse accusandum putauit, non plus quam stipitem  
 illum; qui quorum hominum esset, nesciremus, nisi  
 se Ligurem ipse esse diceret. quid enim hunc persequar,  
 pecudem ac belluam, pabulo inimicorum meorum, &  
 glande corruptum? qui si sensit, quo se scelere deuinxe-  
 rit; non dubito, quin sit miserrimus: sin autem id non  
 uidet; periculum est, ne se stuporis excusatione defen-  
 dat. accedit etiam, quod expectatione omnium, fortissi-  
 mo, & clarissimo uiro, T. Annio deuota, & con-  
 stituta ista hostia esse uidetur: cui me praeipere despon-  
 sam iam, & destinata laudem, cum ipse eius opera  
 & dignitatem & salutem recuperarim, ualde est ini-  
 quum. etenim ut P. ille Scipio natus mihi uidetur ad  
 interitum exitiumq; Carthagini, qui illam a multis

imperatoribus obsessam, oppugnatam, labefactatam,  
 penecaptam, aliquando quasi fatali euentu solus euer-  
 tit: sic T. Annius ad illam pestem comprimendam, ex-  
 tinguendam, funditus delendam natus esse uidetur,  
 & quasi diuino munere donatus reip. solus ille cogno-  
 uit, quemadmodum armatum ciuem, qui lapidibus,  
 qui ferro alios fugaret, alios domi contineret, qui ur-  
 bem totam, qui curiam, qui forum, qui templa om-  
 nia cæde, incendijsq; terreret, non modo uinci, uerum  
 etiam uinciri oporteret. huic ego, & tali, & ita de me  
 ac de patria merito uiro, nunquam mea uoluntate præ-  
 ripiam, eum præsertim reum, cuius ille inimicitias non  
 solum suscepit propter salutem meam, uerum etiam ap-  
 petiuit. sed si etiam nunc, illaqueatus iam omnium le-  
 gum periculis, irretitus odio bonorum omnium, expe-  
 ctatione supplicij iam non diuturna implicatus, feretur  
 tamen hæsitans, & in me impetum impeditus facere  
 conabitur: resistam, &, aut concedente, aut etiam  
 adiuuante Milone, eius conatum refutabo: uelut he-  
 sterno die, cum mihi stanti tacens minaretur, uoce tan-  
 tum attigi legum initium, & iudicij. concidit ille: con-  
 ticiui. diem dixisset, ut fecerat: fecissem, ut ei statim  
 tertius à prætore dies diceretur. atque hoc sic medite-  
 tur: & cogitet, si contentus sit ijs sceleribus, quæ com-  
 misit, iam se esse consecratum Miloni; si quod in me  
 telum intorserit, statim me esse arrepturum arma iu-  
 diciorum, atque legum. atqui paulo ante P. C. con-  
 cionem habuit, quæ est ad me tota delata: cuius con-  
 cionis primum uniuersum argumentum sententiamq;  
 audite. cum riseritis impudentiam hominis, tum à me

de tota concione audietis. De religionibus sacris, & caeremonijs est concionatus patres conscripti Clodius: P. inquam Clodius, sacra & religiones negligi, uiolari, pollui, questus est. non mirum, si hoc uobis ridiculum uidetur. etiam sua concio risit, hominem, quo modo ipse gloriari solet, ducentis confixum S.C. quæ sunt omnia contra illum pro religionibus facta; hominemq; illum, qui puluinaribus Bonæ deæ stuprum intulerit, eaq; sacra, quæ uiri oculis, ne imprudentis quidem, aspicere fas est, non solum aspectu uirili, sed flagitio, stuproq; uiolarit, in concione de religionibus neglectis conqueri. itaque nunc proxima concio eius expectatur de pudicitia: quid enim interest, utrum ab altaribus religiosissimis fugatus, de sacris, & religionibus conqueratur, an ex sororum cubiculo egressus, pudorem pudicitiamq; defendat? responsum aruspicum hoc recens de fremitu in concione recitauit: in quo cum alijs multis scriptum etiam illud est, id quod audistis, loca sacra & religiosa, profana haberi. in ea causa esse dixit domum meam, à religiosissimo sacerdote P. Clodio consecratam. gaudeo mihi de toto hoc ostento, quod haud scio an grauissimum multis his annis huic ordini nunciatum sit, datam non modo iustam, sed etiam necessariam causam esse dicendi: reperietis enim, ex hoc toto prodigio atque responso nos de istius scelere ac furore, ac de impendentibus periculis maximis prope iam uoce Iouis Opt. Maximi præmoneri. sed primum expiabo religionem ædium meorum, si id facere uere ac sine cuiusquam dubitatione potero. sin scrupulus tenuissimus residere aliquis uidebitur, non modo patienti, sed etiam libenti animo por-

tentis deorum immortalium, religioniq; parebo. sed  
 quæ tandem est in hac urbe tanta domus ab ista religio-  
 nis suspitione tam uacua atque pura? quanquam ue-  
 stre domus P. C. cæterorumq; ciuium multo maxima  
 ex parte sunt liberae religione, tamen una mea domus  
 iudicijs omnibus liberata in hac urbe sola est. te enim  
 appello Lentule, et te Philippe. ex hoc aruspicum re-  
 sponso decreuit senatus, ut de locis sacris, religiosis ad  
 hunc ordinem referretis. potestis ne referre de mea do-  
 mo? quæ, ut dixi, sola in hac urbe, omni religione om-  
 nibus iudicijs liberata est: quam primum inimicus ipse  
 in illa tempestate ac nocte reip. cum cætera scelera stylo  
 illo impuro Sex. Clodius conscripisset, ne una quidem  
 attigit litera religionis. deinde eandem domum populus  
 R. cuius est summa potestas omnium rerum, comitijs  
 centuriatis, omnium ætatum ordinumq; suffragijs eo-  
 dem iure esse iussit, quo fuisset. postea uos P. C. non  
 quod dubia res esset, sed ut huic furie, si diutius in hac  
 urbe, quam delere cuperet, maneret, uox interdicere-  
 tur, decreuistis, ut de mearum ædium religione ad pon-  
 tificum collegium referretur. quæ tanta religio est, qua  
 non, in nostris dubitationibus atque in maximis super-  
 stitionibus, unius P. Seruiliij ac M. Luculli responso ac  
 uerbo liberemur? de sacris publicis, de ludis maxi-  
 mis, de deorum penatium, Vestæq; matris cæremonijs,  
 de illo ipso sacrificio, quod fit pro salute populi R. quod  
 post Romam conditam huius unius casti tutoris religio-  
 num scelere uiolatum est, quod tres pontifices statuif-  
 sent, id semper populo R. semper senatui, semper ip-  
 sis dijs immortalibus satis sanctum, satis augustum,



satis religiosum esse uisum est . at uero meam domum  
P. Lentulus consul, & pontifex, P. Seruilius, M. Lucullus, Q. Metellus, M. Glabrio, M. Messalla, L. Lentulus flamen Martialis, P. Galba, Q. Scipio, C. Fannius, M. Lepidus, L. Claudius rex sacrorum, M. Scaurus, M. Crassus, C. Curio, Sex. Cæsar flamen Quirinalis, Q. Cornelius, P. Albinouanus, Q. Terentius, pontifices minores, causa cognita, duobus locis dicta, maxima frequentia amplissimorum ac sapientissimorum ciuium astante, omni religione una mente omnes liberauerunt . nego, unquam post sacra constituta, quorum eadem est antiquitas, quæ ipsius urbis, ulla de re, nec de capite quidem uirginum Vestalium, tam frequens collegium iudicasse. quanquam ad facinoris disquisitionem interest adesse quamplurimos ( ita est enim interpretatio illa pontificum, ut iudem potestatem habeant iudicum : religionis explanatio uel ab uno pontifice perito recte fieri potest : quod idem in iudicio capitis durum, atque iniquum est ) tamen sic reperietis, frequentiores pontifices de mea domo, quam unquam de cæremoniis uirginum, iudicasse. postero die frequentissimus senatus, te consule designato Lentule sententiæ principe, P. Lentulo, & Q. Metello consulibus referentibus, statuit, cum omnes pontifices, qui erant huius ordinis, adessent, cumq; alij, qui honoribus populi R. antecedeabant, multa de collegij iudicio uerba fecissent, omnesq; iudem scribendo adessent, domum meam iudicio pontificum religione liberatam uideri. De hoc igitur loco sacro potissimum uidentur aruspices dicere, qui locus solus ex priuatis locis omnibus hoc præcipue iuris

habet, ut ab ipsis, qui sacris præsent, sacer non esse iudicatus sit? uerum referte, quod ex S. C. facere debetis. aut uobis cognitio dabitur, qui primi de hac domo sententiam dixistis, & eam religione omni liberaſtis: aut ſenatus ipſe iudicabit, qui, uno illo ſolo antiſtite ſacrorum diſſentiente, frequentiffimus antea iudicauit: aut id, quod certe fiet, ad pontifices reijcietur, quorum auctoritati, fidei, prudentiæ maiores noſtri ſacra, religionesq; & priuatas, & publicas commendarunt. quid ergo hi poſſunt aliud iudicare, ac iudicauerunt? multæ ſunt domus in hac urbe P. C. atque haud ſcio an pene cunctæ iure optimo, ſed tamen iure priuato; iure hæreditario, iure auctoritatis, iure mancipij, iure, nexi. nego eſſe ullam domum aliam æque priuato iure atque optima lege, publico uero omni præcipuo & humano & diuino iure munitam. quæ primum ædificatur ex auctoritate ſenatus pecunia publica: deinde contra uim nefariam huius gladiatoris tot S. C. munita; atque ſepta eſt. primum, negotium iſſdem magiſtratus eſt datum anno ſuperiore, ut curarent, ut ſine uè mihi ædificare liceret, quibus in maximis periculis uniuerſa reſp. commendari ſolet: deinde, cum ille ſaxis, & ignibus, & ferro uſtitationem meis ædibus intuliſſet; decreuit ſenatus, eos, qui id feciſſent, lege de ui, quæ eſt in eos, qui uniuerſam reſp. oppugnaiſſent, teneri. uobis uero referentibus, o poſt hominum memoriam fortiſſimi atque optimi conſules, decreuit idem ſenatus frequentiffimus; qui meam domum uiolaſſet, contra reſp. eſſe facturum. nego ullo de opere publico, de monumento, de templo tot ſenatus extare conſulta;

quot de mea domo : quam senatus unam post hanc urbem constitutam ex ærario ædificandam, à pontificibus liberandam, à magistratibus defendendam, à iudicibus puniendam putaret. P. Valerio pro maximis in remp. beneficijs data domus est in uilla publica : at mihi in Palatio restituta : illi locus : at mihi etiam parietes atque tectum. illi, quam ipse priuato iure tueretur : mihi, quam publice magistratus omnes defenderent. quæ quidē ego si aut per me, aut ab alijs haberem, non prædicarem apud uos, ne nimis gloriari uiderer. sed cum sint mihi data à uobis, cum ea attententur eius lingua, cuius antea manu euersa uos mihi et liberis meis manibus uestris redidistis : nō ego de meis, sed de uestris factis loquor ; nec uereor, ne hæc mea uestrorum beneficiorum prædicatio non grata potius, quàm arrogās uideatur. quanquam si me tantis laboribus pro communi salute perfunctum efferret aliquando ad gloriam in refutandis maledictis improborum hominum animi quidam dolor, quis non ignosceret? uidi enim hesterno die quendam murmurantem ; quem diebant negare, ferre me posse, quia, cum ab hoc eodem impurissimo parricida rogarer, cuius essem ciuitatis, respondi me probantibus et uobis, et equitibus R. eius esse, quæ carere me non potuisset. ille, ut opinor, ingemuit. quid igitur responderem? (quæro ex eo ipso, qui ferre me non potest) me ciuem esse Romanum? literate respondi. an tacuisssem? desertum negotium. potest quisquam uir in rebus magnis cum inuidia uersatus, satis grauiter contra inimici contumeliam sine sua laude respondere? at ipse non modo respondet, quidquid potest, cum est laceffitus ; sed etiam gaudet, se ab amicis, quid

respondeat, admoneri. Sed quoniam mea causa expedita est, uideamus nunc quid aruspices dicant: ego enim fateor me et magnitudine ostenti, et grauitate responsi, et una atque constanti aruspicum uoce uehementer esse comotum: neque is sum, qui, si cui forte uideor plus quam ceteri, qui aequae atque ego sunt occupati, uersari in studio literarum, ijs deleeter, aut utar omnino literis, quae nostros animos deterrent atque auocant à religione. ego uero primum habeo auctores ac magistros religionum colendarum maiores nostros: quorum mihi tanta fuisse sapientia uidetur, ut satis superque prudentes sint, qui illorum prudentiam, non dicam assequi, sed, quanta fuerit, perspicere possint: qui statas solennesque caeremonias, pontificatu; rerum bene gerendarum auctoritates, augurio; fatorum ueteres praedictiones Apollinis, uatum libris; portentorum explanationes, Etruscorum disciplina contineri putarunt: quae quidem tanta est, ut nostra memoria, primum Italici belli funesta illa principia, post Syllani, Cinnanique temporis extremum pene discrimen, tum hanc recentem urbis inflammationem, delendi; imperij coniurationem non obscure nobis paulo ante praedixerint. deinde etiam cognoui multa homines doctissimos sapientissimosque; et dixisse, et scripta de deorum immortalium numine reliquisse: quae quanquam diuinitus perscripta uideo, tamen eiusmodi sunt, ut ea maiores nostri docuisse illos, non ab illis didicisse uideantur. etenim quis est tam uecors, qui aut cum suspexerit in coelum, deos esse non sentiat, et ea, quae tanta mente fiunt, ut uix quisquam arte uela ordinem rerum ac uicissitudinem persequi possit,



casu fieri putet; aut, cum deos esse intellexerit, non intelligat eorum numine hoc tantum imperium esse natum, & auctum, & retentum? quàm uolumus, licet, P. C. ipsi nos amemus: tamen nec numero Hispanos, nec robore Gallos, nec calliditate Pœnos, nec artibus Græcos, nec denique hoc ipso huius gentis ac terræ domestico natiuôq; sensu Italos ipsos ac Latinos, sed pietate, ac religione, atque hac una sapientia, quod deorum immortalium numine omnia regi gubernariq; perspeximus, omnes gentes nationesq; superauimus. quare, ne plura de re minime loquar dubia, adhibete animos, & mentes uestras, non solum aures, ad aruspicum uocem admouete. Quod in agro Latinienſi auditus est strepitus cum fremitu. mitto aruspices: mitto illam ueterem, ab ipsis dijs immortalibus, ut hominum fama est, Etruriæ datam disciplinam: nos non ne aruspices esse possumus? ex auditu in agro propinquo, & suburbano est strepitus quidam reconditus, & horribilis fremitus armorum. quis est ex gigantibus illis, quos poetæ ferunt bellum dijs immortalibus intulisse, tam impius, qui hoc tam nouo tantoq; motu non magnum aliquid deos populo R. præmonstrare, & præcinere fateatur? de ea re scriptum est, postulationes decretas esse Ioui, Saturno, Neptuno, Telluri, dijs cœlestibus. audio, quibus dijs uiolatis expiatio debeat; sed, hominum quæ ob delicta, quero. Ludos minus diligenter factos, pollutosq;. quos ludos? te appello Lentule (tui sacerdotij sunt tensæ, curricula, præcentio, ludj, libationes, epulæq; ludcrum publicorum) uosq; pontifices, ad quos epulones Iouis Optimi Max. si quid est præter-

missum

missum aut commissum, afferunt, quorum de sententia illa eadem renouata atque instaurata celebrantur: qui sunt ludi minus diligenter facti? quando, aut quo scelere polluti? respondebis & pro te, & pro collegis tuis, & pro pontificum collegio, nihil cuiusquam aut negligentia contemptum, aut scelere esse pollutum; omnia solennia ac iusta ludorum, omnibus rebus obseruatis, summa cum cæremonia esse seruata. quos igitur aruspices ludos minus diligenter factos, pollutosque esse dicunt? eos, quorum ipsi dii immortales, atque illa mater dea te te Cn. Lentule, cuius ab aui manibus esset accepta, spectatorem esse uoluit. quod ni tu Megalesia illo die spectare uoluisses, haud scio an uiuere nobis, atque his de rebus iam queri liceret. uis enim innumerabilis incitata, ex omnibus uicis collecta, seruorum, ab hoc ædili religioso repente fornicibus, ostijsque omnibus in scenam signo dato immissa irrupit. tua tum, tua Cn. Lentule eadem uirtus fuit, quæ priuato quondam tuo proauo. te, nomen, imperium, uocem, aspectum, impetum tuum stans senatus, equitesque R. et omnes boni sequebantur, cum ille seruorum et ludiorum multitudini senatum populumque R. uinctum ipso confessu, & constrictum spectaculis, atque impeditum turba et angustijs tradidisset. an, si ludius constitit, aut tibicen repente conticuit, aut puer ille patrimus & matrimus si terram non tenuit, aut tensam, aut lorum omisit, aut si ædilis uerbo, aut si nutu aberrauit, ludi sunt non rite facti, eaque errata expiantur, & mentes deorum immortalium ludorum instauracione placantur: si ludi ab latitia ad metum

traducti sunt ; si non intermissi , sed perempti atque  
 sublatisunt ; si ciuitati uniuersæ scelere eius , qui luo-  
 dos adluetum conferre uoluit , extiterunt dies illi festi  
 pene funesti : dubitabimus , quos ludos ille fremitus  
 nunciet esse pollutos ? ac si uolumus ea , quæ de quoque  
 deo nobis tradita sunt , recordari , hanc Matrem ma-  
 gnam , cuius ludi uiolati , polluti , pene ad cædem , &  
 ad funus ciuitatis conuersi sunt , hanc , inquam , acce-  
 pimus agros , & nemora cum quodam strepitu fremi-  
 tuq; peragrarè . hæc igitur uobis , hæc populo R. et sce-  
 lerum indicia ostendit , et periculorum signa patefecit .  
 nam quid ego de illis ludis loquar , quos in Palatio no-  
 stri maiores ante templum , in ipso Matris magnæ con-  
 spectu , Megalensibus fieri celebrariq; uoluerunt ? qui  
 sunt more institutisq; maxime casti , solennes , religio-  
 si : quibus ludis primum ante populi confessum senatui  
 locum P. Africanus iterum consul ille maior dedit : ut  
 eos ludos hæc lues impura pollueret ? quò si quis liber  
 aut spectandi , aut etiam religionis causa accesserat ,  
 manus afferebantur : quò matryona nulla adiit propter  
 uim confessumq; seruorum . ita ludos eos , quorum res  
 ligio tanta est , ut ex ultimis terris accersita in hac ur-  
 be confederit ; qui uni ludi ne uerbo quidem appellan-  
 tur Latino ; ut uocabulo ipso & appetita religio exte-  
 na , et Matris magnæ nomine suscepta declaretur ; hos  
 ludos serui fecerunt , serui spectauerunt , tota denique  
 hoc ædile seruorum Megalesia fuerunt . pro dii im-  
 mortales , qui magis nobiscum loqui possetis , si essetis ,  
 uersareminiq; nobiscum ? ludos esse pollutos significa-  
 tis , ac plane dicitis . quid magis deformatum , inqui-

natum, peruersum, conturbatum dici potest, quàm omne seruitium, permissu magistratus liberatum, in alteram scenam immissum, alteri præpositum; ut alter confessus potestati seruorum obijceretur, alter seruorum totus esset? si examen apum ludis in scenam uenisset, aruspices acciendos ex Etruria putaremus: uidemus uniuersi repente examina tanta seruorum immissa in populum R. septum atque inclusum, & non commouemur? atque in apum fortasse examine nos ex Etruscorum scriptis aruspices, ut à seruitio caueremus, monerent: quod igitur ex aliquo disiuncto diuersoq; monstro significatum caueremus, id cum sibi ipsum monstrum est, et cum in eo ipso periculum est, ex quo periculum portenditur, non pertimescimus? istiusmodi Megalesia fecit pater tuus? istiusmodi patruius? Is mihi etiam generis sui mentionem facit; cum Athenionis aut Spartaci exemplo ludos facere maluerit, quàm Caij, aut Appij Claudiorum? illi cum ludos facerent, seruos de cauea exire iuebant: tu in alteram seruos immisisti, ex altera liberos eiecisti. itaque qui antea uoce præconis à liberis semouebantur, tuis ludis non uoce, sed manu liberos à se segregabant. ne hoc quidem tibi in mentem ueniebat sibyllino sacerdoti, hæc sacra maiores nostros ex uestris libris expetisse? si illi sunt uestri, quos tu impia mente conquiris, uiolatis oculis legis, contaminatis manibus attrectas. hac igitur uate suadente quondam, defessa Italia Punico bello, atque Annibale uexata, sacra ista maiores nostri, ascita ex Phrygia, Romæ collocauerunt: quæ uir is accepit, qui est optimus à populo R. iudicatus, P. Scipio; foemina autem, quæ



matronarum castissima putabatur, quinta Claudia, cuius priscam illam seueritatem sacrificij tua soror mirifice existimatur imitata. nihil te igitur neque maiores tui coniuncti cum his religionibus, neque sacerdotium ipsum, quo est hac tota religio constituta, neque curulis ædilitas, quæ maxime hanc tueri religionem solet, permouit, quo minus castissimos ludos omni flagitio pollueres, dedecore maculares, scelere obligares? sed quid ego id admiror? qui accepta pecunia Pessinuntem ipsum, sedem domiciliumq; matris deorum, uastaris; & Brogitaro Gallogræco, impuro homini, ac nefario, cuius legati te tribuno dividere in æde Castoris tuis operis nummos solebant, totum illum locum fanumq; uendideris; sacerdotem ab ipsis aris puluinaribusq; detraheris; omnia illa, quæ uetustas, quæ Persæ, quæ Syri, quæ reges omnes, qui Europam Asiamq; tenuerunt, semper summa religione coluerunt, peruerteris; quæ denique nostri maiores tam sancta duxerunt, ut, cum refertam urbem atque Italiam fanorum haberemus, tamen nostri imperatores, maximis & periculosissimis bellis, huic deæ uota facerent, eaq; in ipso Pessinunte, ad illam ipsam principem aram, & in illo loco, fanumq; persoluerent. quod cum Deiotarus religione sua castissime tueretur, quem unum habemus in orbe terrarum fidelissimum huic imperio, atque amantissimum nostri nominis: Brogitaro, ut ante dixi, addictum pecunia tradidisti. atque hunc tamen Deiotarum, sæpe à senatu regali nomine dignum existimatum, clarissimorum imperatorum testimonijs ornatum, tu etiam regem appellari cum Brogitaro iubes. sed alter est rex iudicio sena-

tus per nos, pecunia Brogitarus per te appellatus. alterum putabo regem, si habuerit, unde tibi soluat, quod ei per syngrapham credidisti. nam cum multa regia sunt in Deiotaro, tum illa maxime, quod tibi nummum nullum dedit; quod eam partem legistua, quæ congruebat cum iudicio senatus, ut ipse rex esset, non repudiavit; quod Pessinuntem, per scelus à te uiolatum, et sacerdote sacrisq; spoliatum, recuperauit, ut in pristina religione seruaret; quod caeremonias ab omni uetustate acceptas, à Brogitaro pollui non sinuit, mauultq; generum suum munere tuo, quàm illud fanum antiquitate religionis, carere. sed ut ad hæc aruspicum responsa redeam, ex quibus est primum de ludis: quis est, qui id non totum in istius ludos prædictum, & responsum esse fateatur? Sequitur de locis sacris, religiosis. ò impudentiam miram. de mea domo dicere audes? committe uel consulibus, uel senatui, uel collegio pontificum tuam. ac mea quidem his tribus omnibus iudicijs, ut dixi antea, liberata est. at in ijs adibus, quas tu, Q. Seio equite R. uiro optimo, per te apertissime interfecto, tenes, sacellum dico fuisse, aras. tabulis hoc censorum, memoria multorum firmabo, ac docebo. agatur modo hæc res, quod ex eo S. C. quod nuper est factum, referri ad uos necesse est: habeo, quæ de locis religiosis uelim dicere. cum de domo tua dixero, in qua tamen ita est inædificatum sacellum, ut alius fecerit, tibi tantummodo sit demoliendum: tum uidebo, num mihi necesse sit de alijs etiam aliquid dicere. putant enim non nulli ad me pertinere, armamentarium Telluris aperire. nuper id patuisse dicunt, & ego recordor: nunc sanctissi-

mam partem, ac sedem maximæ religionis privato di-  
 cunt uestibulo contineri. multa me mouent; quòd ædes  
 Telluris est curationis meæ; quòd is, qui illud arma-  
 mentarium sustulit, meam domum, pontificum iudicio  
 liberatam, secundum fratrem suum iudicatam esse di-  
 cebat. mouet me etiam in hac caritate annonæ, sterilita-  
 te agrorum, inopia frugum, religio Telluris, & eo ma-  
 gis, quòd eodem ostento Telluri postulatio deberi dici-  
 tur. uetera fortasse loquimur: quanquam hoc si minus  
 civili iure perscriptum est, lege tamen naturæ, commu-  
 ni iure gentium sancitum est, ut nihil mortales à dijs  
 immortalibus usu capere possint. ueruntamen anti-  
 qua negligimus: etiam ne ea negligemus, quæ fiunt  
 maxime, quæ uidemus? L. Pisonem quis nescit his ipsis  
 temporibus maximum & sanctissimum Dianæ sacel-  
 lum in Cœliculo sustulisse? adsunt uicini eius loci: mul-  
 ti sunt etiam in hoc ordine, qui sacrificia gentilia illo  
 ipso in sacello, statuto loco, anniuersaria factitarint. &  
 conquirimus, dij immortales quæ loca desiderent, quid  
 significant, de quo loquantur? à Sex. Serrano sanctis-  
 sima sacella suffossa, incēsa, inædificata, oppressa, sum-  
 ma denique turpitudine esse foedata nescimus? tu meā  
 domum religiosam facere potuisti? ecqua mente? qua  
 inuaseras: qua manu? qua disturbaras: qua uoce?  
 qua incendi iusseras: qua lege? quam ne in illa quidem  
 impunitate tua scripseras: quo puluinari? quod stu-  
 praras: quo simulacro? quod ereptum ex meretricis se-  
 pulcro in imperatoris monumento collocaras. quid habet  
 mea domus religiosi, nisi quòd impuri, & sacrilegi pa-  
 rietem tangit? itaque, ne quis meorum imprudens in-

trospicere possit tuam domum, ac te sacra illa tua fa-  
 cientem uidere, tollam altius tectum, non ut ego te de-  
 spiciam, sed tu ne aspicias urbem eam, quam delere uo-  
 luisti. sed iam aruspicum reliqua responsa uideamus.  
 Oratores contra ius fasq; interfectos. quid est hoc? de  
 Alexandrinis uideo esse sermonem: quem ego non re-  
 futo: sic enim sentio, ius legatorum, cum hominum  
 praesidio munitum sit, tum etiam diuino iure esse ual-  
 latum. sed quero ab illo, qui omnes iudices tribunus è  
 carcere in forum effudit, cuius arbitrio sica omnes nunc,  
 atque omnia uenena tractantur, qui cum Hermacho  
 Chio syngraphas fecit, ecquid sciat unum acerrimum  
 aduersarium Hermachi Theodosium legatum ad sena-  
 tum à ciuitate libera missum sica percussum? quod non  
 minus, quàm de Alexandrinis, indignum dijs immor-  
 talibus esse uisum, certo scio. nec confero nunc in te u-  
 num omnia. spes maior. esset salutis, si praeter te nemo  
 esset impurus. plures sunt. hoc & tu tibi confidis ma-  
 gis, & nos prope iure diffidimus. quis Platorem ex Ore  
 stide, quæ pars Macedoniæ libera est, hominem in illis  
 locis clarum ac nobilem, legatum Thessalonicam ad no-  
 strum, ut se ipse appellauit, imperatorem uenisse nescit?  
 quem ille propter pecuniam, quam ab eo extorquere  
 non poterat, in uincula coniecit, & medicum intromi-  
 sit suum, qui legato, socio, amico, libero foedissimè &  
 crudelissime uenas incideret. secures suas cruentari sce-  
 lere noluit: nomen quidem populi R. tanto scelere con-  
 taminauit, ut id nulla re possit, nisi ipsius supplicio, ex-  
 piari. quales hunc carnifices putamus habere, qui etiam  
 medicis suis non ad salutem, sed ad necem utatur? sed



recitemus, quid sequatur. Fidem et iusiurandum negle-  
ctum. hoc quid sit, per se ipsum non facile interpretor :  
sed ex eo, quod sequitur, suspicor de tuorum iudicium  
manifesto periurio dici : quibus olim erepti essent num-  
mi, nisi à senatu præsidium postulassent. quare autem  
de his dici suspicer, hæc causa est, quòd sic statuo, & illud  
in hac ciuitate esse maxime illustre, atque insigne  
periurium, & te ipsum tamen in periurij poenam ab-  
ijs, quibuscum coniurasti, non uocari. Et uideo in aru-  
spicum responsis hæc esse subiuncta, sacrificia uetusta,  
occultaq; minus diligenter facta, pollutaq;. aruspices  
hæc loquuntur, an patrij, penatesq; dij? multi enim  
sunt, credo, in quos huius maleficij suspicio cadat. quis  
præter hunc unum? obscure dicitur, quæ sacra polluta  
sint? quid planius, quid grauius, quid religiosius dici  
potest? Vetusta occultaq;. nego ulla uerba Lentulum,  
grauem oratorem ac disertum, sæpius, cum te accusa-  
ret, usurpasse, quàm hæc, quæ nunc ex Etruscis li-  
bris in te conuersa atque interpretata dicuntur. ete-  
nim quod sacrificium tam uetuse est, quàm hoc, quod  
à regibus æquale huic urbi accepimus? quod autem  
tam occultum, quàm id, quod non solum curiosos ocu-  
los excludit, sed etiam errantes, quò non modo impro-  
bitas, sed ne imprudentia quidem possit intrare? quod  
quidem sacrificium nemo ante P. Clodium omni memo-  
ria uiolauit, nemo unquam adiit, nemo neglexit, ne-  
mo uir aspicere non horruit : quod fit per uirgines Ve-  
stales, fit pro populo R. fit in ea domo, quæ est in impe-  
rio, fit incredibili cæremonia, fit ei deæ, cuius ne nomen  
quidem uiros scire fas est : quam iste iccirco Bonam

dicit, quòd in tanto sibi scelere ignouerit . non ignouit,  
 mihi crede, non . nisi forte tibi ignotum putas, quòd  
 te iudices dimiserunt excussum & exhaustum, suo iu-  
 dicio absolutum, omnium condemnatum; aut quòd  
 oculos, ut opinio illius religionis est, non perdidisti. quis  
 enim ante te sacra illa uir sciens uiderat, ut quisquam  
 poenam, quæ sequeretur illud scelus, scire posset? an  
 tibi luminis obesset cæcitas plus, quàm libidinis? ne id  
 quidem sentis, conniuentes illos oculos abauì tui magis  
 optandos fuisse, quàm hos flagrantes sororis? tibi ue-  
 ro, si diligenter attenderis, intelliges hominum poenas  
 deesse adhuc, non deorum. homines te in re fœdissima  
 defenderunt: homines turpissimum nocentissimumq;  
 laudarunt: homines propter pecuniam iudicio libera-  
 uerunt: hominibus iniuria tui stupri illata in ipsos do-  
 lori non fuit: homines tibi arma alij in me, alij post in  
 illum inuictum ciuem dederunt: hominũ beneficia pror-  
 sus concedo tibi; ac maiora non esse quærenda. à dijs  
 quidem immortalibus quæ potest homini maior esse pœ-  
 na furore, atque dementia? nisi forte, in tragœdijs quos  
 uulnere ac dolore corporis cruciari, ac consumi uides,  
 grauiorcs deorum immortalium iras subire, quàm illos,  
 qui furentes inducuntur, putas. non sunt illi eiulatus,  
 et gemitus Philoetæ tam miseri, (quanquam sunt æ-  
 cerbi) quàm illa exultatio Athamantis, et quàm som-  
 nium matricidarum. tu, cum furiales in concionibus  
 uoces mittis, cum domos ciuium euertis, cum lapidibus  
 optimos uiros foro pellis, cum ardentes faces in uicino-  
 rum tecta iactas, cum ædes sacras inflammas, cum ser-  
 uos concitas, cum sacra ludosq; conturbas, cum uxo-

rem sororemq; non discernis, cum, quod in eas cubile, non sentis, cum baccharis, cum furis, tum das eas pœnas, quæ sunt solæ hominum sceleri à dijs immortalibus constitutæ. nam corporis quidem nostri infirmitas multos subit casus per se: denique ipsum corpus tenuissima sæpe de causa conficitur: deorum tela in impiorum mentibus figuntur. quare miserior es, cum in omnem fraudem raperis oculis, quàm si omnino oculos non haberes. sed quoniam de ijs omnibus, quæ aruspices commissæ esse dicunt, satis est dictum; uideamus, quid ijdem aruspices à dijs iam immortalibus dicāt moneri. Monent, ne, per optimatum discordiam dissensionemq;, patribus principibusq; cædes periculaq; creentur, auxilioq; diminuti deficiantur: quare ad unum imperium prouinciæ redeant, exercitusq; pulsus, diminutioq; accedat. aruspicum uerba sunt hæc omnia. nihil addo de meo. quis igitur hanc optimatum discordiam molitur? idem iste: nec ulla uir ingenij, aut consilij sui, sed quodam errore nostro: quem quidem ille, quod obscurus non erat, facile perspexit. hoc enim etiam turpius afflictor resp. quod ne ab eo quidem uexatur, ut, tanquam fortis in pugna uir, acceptis à forti aduersario uulneribus aduersis & honestis, cadere uideatur. Ti. Gracchus conuellit statum ciuitatis, qua grauitate uir? qua eloquentia? qua dignitate? nihil ut à patris auiq; Africani præstabili insigniq; uirtute, præterquam quod à senatu descuerat, deflexisset. secutus est C. Gracchus, quo ingenio? quanta uir, quanta grauitate dicendi? ut dolerent boni omnes, non illa tanta ornamenta ad meliorem mentem, uoluntatemq; esse

conuersa . ipse L. Saturninus ita fuit effrænatus, & pene demens, ut auct̃or esset egregius, & ad animos imperitorum excitandos instāmandosq; perfectus. nam quid ego de P. Sulpicio loquar? cuius tanta in dicendo grauitas, iucunditas, tanta ubertas fuit, ut posset, uel, ut prudentes errarent, uel, ut boni minus bene sentirent, perficere dicendo. cum his conflictari, & pro salute patriæ quotidie dimicare, erat omnino illis, qui tum rep. gubernabant, molestum: sed habebat ea molestia quandam tamen dignitatem. hic uero, de quo ego ipse tam multa nunc dico, pro dī immortales, quid est? quid ualet? quid affert, ut tanta ciuitas, si cadet, quod dī omen obruant, à uiro tamen confecta uideatur? qui, post patris mortem, primam illam ætatulam suam ad scurrarum locupletum libidines detulit: quorum intemperantia expleta, in domesticis est germanitatis stupris uolutatus: deinde iam robustus, provinciæ se, ac rei militari dedit, atque ibi piratarum contumelias perpeffus, etiā Cilicum libidines, barbarorumq; satiauit: post, exercitu L. Luculli sollicitato, per nefandum scelus fugit illinc, Romæq; recenti aduentu suo cum propinquis suis decedit, ne reos faceret: à Catilina pecuniam accepit, ut turpissime præuaricaretur. inde cum Muræna se in Galliam contulit: in qua provincia mortuorum testamenta conscripsit, pupillos necauit, nefarias cum multis scelerum pactiones societatesq; conflauit: unde ut redyt, quæstum illum maxime fœcundum uberemq; campestre totum ad se ita redegit, ut homo popularis fraudaret improbissime populum, idemq; uir clemens diuisores omnium tribuum



domi ipse sua crudelissima morte mactaret. exorta est illa reip. sacris, religionibus, auctoritati uestræ, iudicijs publicis funesta quæstura: in qua idem iste deos hominesq; pudorem, pudicitiam, senatus auctoritatem, ius, fas, leges, iudicia uolauit. atque hic ei gradus (ò misera tempora, stultasq; nostras discordias) P. Clodio gradus ad remp. hic primus est aditus ad popularem inflationem, atque ascensus. nam Ti. Graccho inuidia Numantini foederis, cui feriendo, quæstor C. Mancini consulis cum esset, interfuerat, et in eo foedere improbando senatus seueritas dolori, & timori fuit: istaq; res illum, fortem, & clarum uirum, à grauitate patrum desciscere coegit. C. autem Gracchum mors fraterna, pietas, dolor, magnitudo animi ad expetendas domestici sanguinis pœnas excitauit. Saturninum, quod in annonæ caritate quæstorem à sua frumentaria procuratione senatus amouit, eiq; rei M. Scaurum præfecit, scimus dolore factum esse popularem. Sulpicium ab optima causa profectum, Caiog; Iulio consulum contra leges petentii resistentem, longius, quàm uoluit, popularis aura prouexit. fuit in his omnibus causa, etsi non iusta, (nulla enim potest cuiquam male de rep. merendi iusta esse causa) grauis tamen, & cum aliquo animi et uirili dolore coniuncta. P. Clodius à crocata, à mitra, à muliebribus soleis, purpureisq; fasciis, à strophio, à psalteria, à flagitio, à stupro est factus repente popularis. nisi eum mulieres exornatum ita deprehendissent, nisi ex eo loco, quò eum adire fas non erat, ancillarum beneficio emissus esset: populari homine populus R. resp. ciue tali careret. hanc ob amen

tiam in discordijs nostris, de quibus ipsis his prodigijs re-  
centibus à dijs immortalibus admonemur, arreptus est  
unus ex patricijs, cui tribuno pl. fieri non liceret. quod  
anno ante frater Metellus, & concors etiam tum sena-  
tus principi Cn. Pompeio sententiam dicenti excluserat,  
acerrimeq; una uoce, ac mente restiterat, id post dissi-  
dium optimatum, de quo ipso nunc monemur, ita per-  
turbatum, itaq; permutatum est, ut, quod frater con-  
sul, ne fieret, obstiterat, quod affinis & sodalis, clarissi-  
mus uir, qui illum reum non laudarat, excluserat, id  
is consul efficeret in discordijs principum, qui illi unus  
inimicissimus esse debuerat, et eo fecisse auctore se di-  
ceret, cuius auctoritatis neminem posset pœnitere. inie-  
cta est fax fœda, ac luctuosa reip. petita est auctori-  
tas uestra, grauitas amplissimorum ordinum, consen-  
sio bonorum omnium, totus denique ciuitatis status:  
hæc enim certe petebantur, cum in me cognitorem ha-  
rum omnium rerum illa flamma illorum temporũ con-  
ijciebatur. excepi, & pro patria solus exarsi, sic ta-  
men, ut uos iisdem ignibus circumsepti, me primum  
iētum pro uobis & fumantem uideretis. non sedaban-  
tur discordiæ, sed etiam crescebat in eos odium, à qui-  
bus nos defensi putabamur. ecce iisdẽ auctoribus, Pom-  
peio principe, qui cupientem Italiam, populum R. desi-  
derantem, flagitantes uos non auctoritate sua solum,  
sed etiam precibus ad meam salutem excitauit, restitu-  
ti sumus. sit discordiarum finis aliquando: à diutur-  
nis dissensionibus conquiescamus: non finit eadem ista  
labes: ea habet conciones: ea miscet, ac turbat, ut mo-  
do uendat illis, nec tamen ita, ut se quisquam, si ab \*

isto laudatus sit, laudatiorem putet, sed ut eos, quos non amant, ab eodem gaudeant uituperari. atque ego nunc non miror: quid enim faciat aliud? illos, homines sapientissimos grauiissimosq; , miror: primū, quod quenquam clarum hominem, atque optime de rep. saepe meritum, impurissimi uoce hominis uiolari facile patiuntur: deinde, quod existimant perditum hominis profligatiq; maledictis posse, id quod minime conducit ipsi, cuiusquam gloriam dignitatemq; uiolari: postremo, quod non sentiunt id, quod tamen mihi iam suspicari uidentur, illius furentes, ac uiolentos impetus in se ipsos posse conuerti. atque ex hac nimia nonnullorum alienatione, & quibusdam haerentia tela in rep. quæ quandiu hærebant in uno me, grauius equidem, sed aliquanto leuius ferebam. an iste, nisi primo se dedidisset ijs, quorum animos à uestra auctoritate seiunctos esse arbitrabamur; nisi eos in cælum suis laudibus, præclarus auctor, extolleret; nisi exercitum C. Cæsaris, in quo fallebat multos, sed eū nemo redarguebat, nisi eum, inquam, exercitum signis infestis in curiam se immissurum minitaretur; nisi Cn. Pompeio adiutore, M. Crasso auctore, quæ faciebat, facere clamaret; nisi consules causam coniunxisse secum, in quo uno non mentiebatur, confirmaret; tam crudelis mei, tam sceleratus rep. uexator esse potuisset? idem, posteaquæ respirare uos à metu cedis, emergere auctoritatem uestram à fluctibus illis seruitutis, reuiuiscere memoriam ac desiderium mei uidit, uobis se cœpit subito fallacissime uenditare. tum, leges Iulias contra auspicia latas, & hic et in concionibus dicere: in quibus legibus inerat

curiata illa lex, quæ totum eius tribunatum continebat, quàm cæcus amentia non uidebat: producebat fortissimum uirum M. Bibulum; quærebat ex eo; C. Cæsare leges ferente, de cælo semper ne seruasset? semper se ille seruasse dicebat. Augures interrogabat; quæ ita lata essent, rectè nelata essent? illi uitiolata esse dicebant. ferebant in oculis hominem quidam boni uiri, & de me optime meriti, sed illius, ut ego arbitror, furoris ignari. longius processit: in ipsum Cn. Pompeium auctorem, ut prædicare est solitus, consiliorum suorum inuehi coepit. inibat gratiam à nonnullis. tum uero est ratus se posse, quoniam togatum domestici belli extinctorem nefario scelere foedasset, illum etiam, illum externorum bellorum, hostiumq; uictorem affligere. tum est illa in templo Castoris scelerata et pene deletrix huius imperij sica deprehensa. tum ille, cui nulla hostium diutius urbs unquam fuit clausa, qui omnes angustias, omnes altitudines, omnium obiecta tela semper ui & uirtute perfregit, obsessus ipse est domi, meq; nonnulla imperitorum uituperatione timiditatis meæ, consilio & facto suo liberauit. nam si Cn. Pompeio, uiro uni omnium fortissimo, quicumque nati sunt, miserum magis fuit, quàm turpe, quandiu ille tribunus pl. fuit, lucem non aspicere, carere publico, minas eius perferre; cum in concionibus diceret, uelle se in Carinis ædificare alteram porticum, quæ Palatio responderet: certe mihi exire domo mea ad priuatum dolorem fuit luctuosum, ad rationem reip. gloriosum. uidetis igitur, hominem per se ipsum iam pridem afflictum ac iacentem, perniciosi optimatum discordijs excitari. cu=



in initia furoris dissensionibus eorum, qui tunc a uobis seiuncti uidebantur, sustentata sunt. reliqua iam precipitantis tribunatus, etiam post tribunatum obtrectatores eorum, atque aduersarii defenderunt, ne a rep. reip. pestis remoueretur. resisterunt etiam, ne causam diceret; etiam, ne priuatus esset. etiam ne in sinu, atque in delicijs quidam optimi uiri uiperam illam uenenatam, ac pestiferam habere potuerunt? quo tandem decepti munere? uolo, inquiunt, esse, qui in concione detrahat de Pompeio. detrahat ille uituperando? uelim, sic hoc uir summus, atque optime de mea salute meritis accipiat, ut a me dicitur. dicam quidem certe, quod sentio. mihi medijsfidius tum de illius amplissima dignitate detrahere, cum maximis laudibus efferebat, uidebatur. utrum tandem C. Marius splendidior, cum eum C. Glaucia laudabat, an cum eundem iratus postea uituperabat? an ille demens, et iam pridem ad poenam exitiumque; praeceps, foedior atque inquinatior in Cn. Pompeio accusando; quam in uniuerso senatu uituperando fuit? quod quidem miror, cum alterum gratum sit iratis, alterum esse tam bonis ciuibus non acerbum. sed ne id uiros optimos diutius delectet, legant hanc eius concionem, de qua loquor, in qua Pompeium ornat, an potius deformat? certe laudat, et unum esse in hac ciuitate dignum huius imperij gloria dicit, et significat se illi amicissimum esse, et reconciliationem esse gratiae factam. quod, ego quanquam, quid sit, nescio; tamen hoc statuo, hunc, si amicus esset Pompeio, laudaturum illum non fuisse. quid enim, si illi intimissimus esset, amplius ad eius laudem minuendam facere

cere potuisset? uideant ij, qui illum Cn. Pompeio inimicum esse gaudebant, ob eamq; causam in tot, tantisq; sceleribus conuiebant, et non nunquam eius indomitos, atque effrenatos furores plausu etiam suo persequantur, quam se cito inuenerit: nunc enim iam laudat illum; in eos inuehitur, quibus se antea uenditabat. quid existimatis eum, si reditus ei gratiæ patuerit, esse facturum, qui tam libenter in opinionem gratiæ irreat? quas ego alias optimatum discordias à dijs immortalibus definiri putem? nam hoc quidem uerbo neque P. Clodius, neque quisquam de gregalibus eius aut de consiliarijs designatur. habent Etrusci libri certa nomina, quæ in id genus ciuium cadere possunt. deteriores, repulsos (quod iam audietis) hos appellant, quorum & mentes & res sunt perditæ, longeq; à communi salute disiunctæ. quare cum dij immortales monent de optimatum discordijs, de clarissimorum, & optime meritorum ciuium dissensione prædicunt, cum principibus periculum eademq; portendunt; in tuto collocant Clodium, qui tantum abest à principibus, quantum à puris, quantum à religiosis. uobis ò clarissimi, atque optimi ciues & uestræ saluti consulendum, et prospiciendum uident. cædes principum ostenditur: id, quod interitum optimatum sequi necesse est, adiungitur: etiam, ne in unius imperium res decidat, admonemur. ad quem metum si decorum moritis non duceremur, tamen ipsi nostro sensu, coniecturaq; raperemur: neque enim ullus alius discordiarum solet esse exitus inter claros & potentes uiros, nisi aut uniuersus interitus, aut uictoris dominatus, aut regnum. dissensit cum Mario

clarissimo ciue consul nobilissimus, & fortissimus L. Sylla: horum uterque ita cecidit uictus, ut uictor idem regnauerit. cum Octauio collega Cinna dissensit: utrisque horum secunda fortuna regnum est largita, aduersa mortem. idem iterum Sylla superauit: tum sine dubio habuit regalem potestatem, quanquam remp. recuperauit. inest hoc tempore haud obscurum odium, atque id insitum penitus, & iniustum animis hominum amplissimorum: dissident principes: captatur occasio: qui non tantum opibus ualent, nescio quam fortunam tamen, ac tempus expectant: qui sine controuersia plus possunt, hi fortasse non nunquam consilia ac sententias inimicorum suorum extimescunt. tollatur hæc è ciuitate discordia: iam omnes isti, qui portenduntur, metus extinguentur: iam ista serpens, quæ tum hic delitescit, tum se emergit, et fertur illuc, compressa, atque illisa morietur. morient enim iidem, ne occultis consilijs resp. lædatur. quæ sunt occultiora, quàm eius, qui ausus in concione est dicere, iustitium edici oportere, iurisdictionem intermitteri, claudi ærarium, iudicia tolli? nisi forte existimatis hanc tantam collusionem illi, tantamq; euerfionem ciuitatis in mentem subito in rostris, nec cogitanti uenire potuisse. est quidem ille plenus uini, stupri, somni, plenusq; inconsideratissime, ac dementissime temeritatis: ueruntamen nocturnis uigilijs, etiam coitione hominum iustitium illud conceptum ac meditatum est. mementote patres conscripti uerbo illo nefario tentatas aures uestras, & perniciosam uiam audiendi consuetudine esse munitam.

Sequitur illud, ne deterioribus, repulsisq; honos aus

geatur, repulſos uideamus: nam deteriores, qui ſint, poſt docebo. ſed tamen in eum cadere hoc uerbum maxime, qui ſit unus omnium mortalium ſine ulla dubitatione deterrimus, concedendum eſt. qui ſunt igitur repulſi? non, ut opinor, ij, qui aliquando honorem uitio ciuitatis, non ſuo, non ſunt aſſecuti: nam id quidem multis ſæpe optimis ciuibus, atque honeſtiſſimis uiris accidit. repulſi ſunt ij, quos ad omnia progredientes, quos munera contra leges gladiatoria parantes, quos apertiffime largientes non ſolum alieni, ſed etiam ſui, uicini, tribules, urbani, ruſtici repulerunt. hi ne honore augeantur, monemur. debet eſſe gratum, quod prædicunt: ſed tamen huic malo populus R. ipſe nullo aruſpicum admonitu ſua ſponte proſpexit. Deteriores cauete. quorum quidem magna eſt natio, ſed tamen eorum omnium hic dux eſt, atque princeps. etenim ſi unum hominem deterrimum poeta præſtati aliquis ingenio fictis conquiſitisq; uitijs deformatum uellet inducere, nullum proſecto dedecus reperire poſſet, quod in hoc non ineſſet, multaq; in eo penitus defixa, atque hærentia præteriret. parentibus, & dijs immortalibus, et patriæ nos primum natura conciliat. eodem enim tempore & ſuſcipimur in lucem, & hoc cœleſti ſpiritu augemur, & certam in ſedem ciuitatis, ac libertatis aſcribimur. iſte parentum nomen, ſacra, memoriam, gentem Fonteiano nomine obruit: deorum ignes, ſolennes menſas, abditos ac penetrales focos, occulta, & maribus nō inuiſa ſolum, ſed etiam inaudita ſacra in-expiabili ſcelere peruertit: idemq; earum templum inflammauit dearum, quarum ope etiam alijs incendijs



subuenitur . quid de patria loquar ? qui primum eum  
 ciuem ui , ferro , periculis , urbe , omnibus patriæ præsi-  
 dijs depulit , quem uos patriæ conseruatorem esse sæ-  
 pissime iudicaueratis : deinde euerso senatus , ut ego sem-  
 per dixi , comite ; duce , ut ille dicebat ; senatum ipsum ;  
 principem salutis , mentisq ; publicæ , ui , cæde , incen-  
 dijsq ; peruertit : sustulit duas leges , Aeliam , & Fu-  
 sianam , maxime reip . salutare : censuram extinxit : in-  
 tercessionem remouit : auspicia deleuit : consules , scele-  
 ris sui socios , ærario , prouincijs , exercitu armauit : re-  
 ges qui erant , uendidit ; qui non erant , appellauit : Cn.  
 Pompeium ui , ferro , domum compulit : imperatorum  
 monimenta euertit : inimicorum domos disturbauit : ue-  
 stris monimentis nomen suum inscripsit . infinita sunt  
 scelera , quæ ab illo in patriam sunt edita . quid , quæ  
 in singulos ciues , quos necauit ? socios , quos diripuit ?  
 imperatores , quos prodidit ? exercitus , quos tentauit ?  
 quid uero ea , quanta sunt , quæ in se ipsum scelera ,  
 quæ in suos edidit ? quis minus unquam pepercit hosti-  
 um castris , quàm ille omnibus corporis sui partibus ?  
 quæ nauis unquam in flumine publico tam uulgata om-  
 nibus , quàm istius ætas fuit ? quis unquam nepos  
 tam libere est cum scortis , quam hic cum sororibus uolu-  
 tatus ? quã denique tam immanem Charybdin poetæ fin-  
 gendo exprimere potuerunt , quæ tãtos exhaustire gurgi-  
 tes posset , quãtas iste Byzantiorũ Brogitarorumq ; præ-  
 das exorbuit ? aut tam eminētibus canibus Scyllã , tamq ;  
 ieiunis , quàm quibus istum uidetis Gellis , Clodijs , Ti-  
 tijs rostra ipsa mandentem ? quare , id quod extremum  
 est in aruspicum responsis , prouidete ne reip . status com-

mutetur : etenim uix hæc , si undique fulciamus , iam labefaeta , uix , inquam , innixa in omnium nostrum humeris cohærebunt . fuit quondam ita firma hæc ciuitas & ualens , ut negligentiam senatus , uel etiam iniurias ciuium ferre posset : iam non potest : ærarium nullum est : uetigalibus non fruuntur , qui redemerunt : auctoritas principum cecidit : consensus ordinū est diuulsus : iudicia perierunt : suffragia districta tenentur à paucis : bonorum animus ad nutum nostri ordinis expeditus iam non erit : ciuem , qui se pro patriæ salute opponat inuidiæ , frustra posthac requiretis . quare hunc statum , qui nunc est , qualiscunque est , nulla alia re , nisi concordia , retinere possumus . nam ut meliore simus loco , ne optandum quidem est , illo impunito : deteriore autem statu ut simus , unus est inferior gradus , aut interitus , aut seruitutis . quò ne trudemur , dii immortales nos admonent , quoniam iam pridem humana consilia ceciderunt . Atque ego hanc orationē P. C. tam tristem , tam grauem non suscepissem , non , inquit , nisi hanc personam , & has partes honoribus populi R. uestris plurimis ornamentis mihi tributis deberem , & possem sustinere . sed tamen facile tacentibus cæteris reticuissem : sed hæc oratio omnis fuit non auctoritatis meæ , sed publicæ religionis . mea fuerunt uerba fortasse plura , sententiæ quidem omnes aruspicum . ad quos aut referri nunciata ostenta non conuenit , aut eorum responsis commoueri necesse est . quòd si cætera magis peruulgata nos sæpe & leuiora mouerunt : uox ipsa deorum immortalium non mentes omnium permouebit ? nolite enim id putare accidere posse , quod in fabulis sæpe uidetis ,

fieri, ut deus aliquis elapsus de coelo coetus hominum adeat, uersetur in terris, cum hominibus colloquatur. cogitate genus sonitus eius, quem Latinienses nūnciarunt: recordamini illud etiam, quod non dum est relatum, quòd eodem fere tempore factus in agro Piceno Potentiae nūciatur terræ motus horribilis cum quibusdam multis metuendisq; rebus: hæc eadem profecto, quæ futura prospicimus, impendentia pertimescetis. etenim hæc deorum immortalium uox, hæc pene oratio iudicanda est, cum ipse mundus, cum agri terræ motu quodam nouo contremiscunt, & inusitato aliquid sono incredibiliq; prædicunt. in quo constituendæ nobis quidem sunt procurationes, et obsecratio, quemadmodum monemur: sed faciles sunt preces apud eos, qui ultro nobis uiam salutis ostendunt: nostræ nobis sunt inter nos iræ, discordiæq; placandæ.

## PRO CN. PLANCIO.

## ORATIO XXXI.

VM propter egregiam & singula-  
 rem Cn. Plancij iudices in mea salute  
 custodienda fidem tam multos & bo-  
 nos viros eius honori uiderem esse fau-  
 tores; capiebam animo non mediocrem  
 uoluptatem; quòd, cuius officium mihi saluti fuisset,  
 ei meorum temporum memoriam suffragari uidebam.  
 cum autem audirem meos partim inimicos, partim in-  
 uidos huic accusationi esse fautores, eandemq; rem ad-  
 uersariam esse in iudicio Cn. Plancio, quæ in petitione  
 fuisset adiutrix; dolebam iudices, & acerbè ferebam, si  
 huius salus ob eam ipsam causam esset infestior, quòd  
 is meam salutem atque uitam sua beneuolentia, præsi-  
 dio, custodiaq; texisset. nunc autem uester iudices con-  
 spectus, et confessus iste reficit et recreat mentem meã;  
 cum intueor, & contemplor unumquenque uestrum.  
 uideo enim hoc in numero neminem, cui mea salus ca-  
 ra non fuerit, cuius non extet in me suum meritum,  
 cui nō sim obstrictus memoria beneficij sempiterna. ita-  
 que non extimesco, ne Cn. Plancio custodia meæ salutis  
 apud eos obsit, qui me ipsum maxime saluum uidere  
 uoluerunt. sæpiusq; iudices mihi uenit in mentem, ad-  
 mirandum esse, M. Laterensem, hominem studiosissi-  
 mum, & diligentissimum salutis meæ, reum hunc po-  
 tissimum sibi delegisse; quàm metuendum, ne nobis id  
 ille magna ratione fecisse uideatur. quanquam mihi  
 non sumo tantum iudices, neque arrogo, ut Cn. Plancio



cium suis erga me meritis impunitatem consecuturum  
 putem . nisi eius integerrimam uitam , modestissimos  
 mores , summam fidem , continentiam , pietatem , inno-  
 centiam ostendero , nihil de poëna recusabo . sin omnia  
 præstitero , quæ sunt à bonis uiris expetenda , petam iudi-  
 ces à uobis , ut cuius misericordia salus mea custodita sit ,  
 uos ei uestram misericordiam me deprecante tribuatis .  
 equidem ad reliquos labores , quos in hac causa maiores  
 suscipio , quàm in cæteris , etiam hanc molestiam assu-  
 mo , quòd mihi non solū pro Cn. Plancio dicendum est ,  
 cuius ego salutem non secus ac meam tueri debeo ; sed  
 etiam pro me ipso , de quo accusatores plura pene , quàm  
 de re , reoq; dixerunt . quanquam iudices si quid est in  
 me ipso ita reprehensum , ut id ab hoc alienum sit , non  
 me id magnopere conturbet : non enim timeo , ne , quia  
 perraro grati homines reperiantur , iccirco , cum me ni-  
 mium gratum illi esse dicant , id mihi criminofum esse  
 possit . quæ uero ita sunt agitata ab illis , ut aut meri-  
 ta Cn. Plancij erga me minora esse dicerent , quàm à me  
 ipso prædicarentur ; aut , si essent summa , negarent ea  
 tamen ita magni , ut ego putarem , ponderis apud uos  
 esse debere : hæc mihi sunt tractanda iudices et modice ,  
 ne quid ipse offendam ; & tum denique , cum respon-  
 dero criminibus ; ne non tam innocentia reus sua , quàm  
 recordatione meorum temporum defensus esse uideatur .  
 Sed mihi in causa facili atque explicata perdis-  
 ficilis iudices & lubrica defensionis ratio proponitur .  
 nam si tantummodo mihi necesse esset contra La-  
 terensem dicere , tamen id ipsum esset , in tanto usu  
 nostro , tantâq; amicitia . molestum : uetus enim est

lex illa iustæ ueræq; amicitie, quæ mihi cum illo iam diu est, ut idem amici semper uelint: neque est ullum certius amicitie uinculum, quàm consensus, & societas consiliorum & uoluntatum. mihi autem non est in hac re solum molestum, contra illum dicere; sed multo id magis, quòd in ea causa contra dicendum est, in qua quædam hominum ipsorum uidetur facienda esse contentio. quærit enim Laterensis, atque hoc uno maxime urget, quæ se uirtute, quæ laude Plancius, quæ dignitate superarit. ita, si cedo illius ornamentis, quæ multa & magna sunt, non solum huius dignitatis iactura facienda est, sed etiam largitionis recipienda suspicio. sin hunc illi antepono, contumeliosa habenda est oratio; & dicendum est id, quod ille me flagitat, Laterensem à Plancio dignitate esse superatum. ita aut amicissimi hominis existimatio offendenda est, si illam accusationis conditionem sequar: aut optime de me meritum salus deferenda est. sed ego Laterensis cæcum me & præcipitem ferri confitear in causa, si te aut à Plancio, aut ab ullo dignitate potuisse superari dixerò. itaque discedam ab ea contentione, ad quam tu me uocas; & ueniam ad illam, ad quam me causa ipsa deducit. Quid? tu non inanem dignitatis iudicem putas esse populum? fortasse non nunquam est: utinam uero semper esset: sed est perraro, & si quando est, in ijs magistratibus est mandandis, quibus salutem suam committit putat. his leuioribus comitijs, diligentia, & gratia petitorum honos paritur, non ijs ornamentis, quæ esse in te uidemus. nam quod ad populum pertinet, semper dignitatis iniquus index est, qui aut inuidet, aut fauet.

## O R A T I O

quanquam nihil potes in te Laterensis constituere, quod  
 sit proprium laudis tuæ, quin id tibi sit commune cum  
 Plancio. sed hoc totum agetur alio loco. nunc tantum  
 disputo de iure populi: qui & potest, & solet nonnun-  
 quam dignos præterire: nec, si à populo præteritus est,  
 quem non oportuit; à iudicibus condemnandus est, qui  
 præteritus non est. nam si ita esset, quod patres apud  
 maiores nostros tenere non potuerunt, ut reprehensores  
 essent comitiorum, id haberent iudices, vel quod multo  
 etiam minus est ferendum. tum enim magistratum  
 non gerebat is, qui ceperat, si patres auctores non erant  
 facti; nunc postulatur à nobis, ut eius exilio, qui crea-  
 tus sit, iudicium populi R. reprehendatis. itaque quan-  
 quam, qua nolui, ianua sim ingressus in causam, spe-  
 rare uideor, tantum absfuturam esse orationem meam  
 à minima suspitione offensionis tuæ, te ut potius obiur-  
 gem, quòd iniquum in discrimen adducas dignitatem  
 tuam, quàm ut ego eam ulla contumelia coner attin-  
 gere. tu continentiam, tu industriam, tu animum in  
 remp. tu uirtutem, tu innocentiam, tu fidem, tu la-  
 bores tuos, quòd ædilis non sis factus, fractos esse, &  
 abiectos, & repudiatos putas? uide tandem Lateren-  
 sis, quantum à te dissentiam. si medijsfidijs decem so-  
 li essent in ciuitate uiri boni, sapientes, iusti, graues,  
 qui te indignum ædilitate iudicauissent: grauius de te  
 iudicatum putarem, quàm est hoc, quod tu metuis, ne  
 à populo iudicatum esse uideatur. non enim comitijs  
 iudicat semper populus, sed mouetur plerumque gratia,  
 cedit precibus, facit eos, à quibus est maxime ambitus;  
 denique si iudicat, non delectu aliquo aut sapientia du-



citur ad iudicandum, sed impetu non nunquam, & quadam etiam temeritate. non est enim consilium in uulgo, non ratio, non discrimen, non diligentia: semperq; sapientes ea, quæ populus fecisset, ferenda, non semper laudanda duxerunt. quare cum te ædilem fieri oportuisse dicis, populi culpam, non competitoris accusas. at fueris dignior, quàm Plancius: de quo ita tecum contendam paulo post, ut conseruem dignitatem tuam: sed ut fueris dignior; non competitor, à quo es uictus, sed populus, à quo es præteritus, in culpa est. in quo primum illud debes putare, comitijs, præsertim ædilijs, studium esse populi, non iudicium; eblandita illa, non enucleata esse suffragia; eos, qui suffragium ferant, quid denique ipsi debeant, considerare sæpius, quàm quid cuique à rep. uideatur deberi. sin autem mauis esse iudicium, non tibi id rescindendum est, sed ferendum. male indicauit populus: at iudicauit. non debuit: at potuit. non fero: at multi clarissimi, & sapientissimi ciues tulerunt. est enim conditio liberorum populorum, præcipueq; huius principis populi & omnium gentium domini atque uictoris, posse suffragijs uel dare, uel detrabere, quod uelit, cuique: nostrum autem est, qui in hac tempestate populi iactemur ac fluctibus, ferre modice populi uoluntates, allicere alienas, retinere partas, placare turbatas; honores si magni non putemus, non seruire populo; sin eos expetamus, non defatigari supplicando. Venio iam ad ipsius populi partes, ut illius contra te oratione potius, quàm mea disputem. qui si tecum congregiatur, & si una uoce loqui possit, hæc dicat: Ego tibi Laterensis Plancium non



anteponui; sed, cum essetis æque boni viri, meum beneficium potius ad eum detuli, qui à me contenderat, quàm ad eum, qui mihi non nimis submisce supplicabat. respondebis, credo, te, splendore, & uetustate familiaris fretum, non ualde ambiendum putasse. at uero te ille ad sua instituta, suorumq; maiorum exempla reuocabit. semper se dicet rogari uoluisse, semper placuisse; M. Seium, qui ne equestrem quidem splendorem incolumem à calamitate iudicij retinere potuisset, homini nobilissimo, innocentissimo, eloquentissimo, M. Pisoni prætulisse; præposuisse se Q. Catulo in summa familia nato, sapientissimo & sanctissimo uiro, non dico C. Serrenum subtilissimum hominem, (fuit enim & animi satis magni, & consilij) sed Cn. Manlium, non solum ignobilem, uerum sine uirtute, sine ingenio, uita etiam contempta ac sordida. desiderarunt te, inquit, oculi mei, cum tu esses Cyrenis: me enim, quàm socios, tua frui uirtute malebam: & quo plus intererat, eo plus aberas à me: certe non uidebam: deinde sitientem me uirtutis tuæ deseruisti, ac dereliquisti: coeperas enim petere tribunatum pl. temporibus ijs, quæ istam eloquentiam, & uirtutem requirebant. quam petitionem cum reliquisses, si hoc iudicasti, tanta in tempestate te gubernare non posse, de uirtute tua dubitavi: si nolle, de uoluntate: sin, quod magis intelligo, temporibus te alijs reseruasti, ego quoque inquam & resp. ad ea te tempora reuocaui, ad quæ tu te ipse seruaras. pete igitur eum magistratum, in quo mihi magnæ utilitati esse possis.

\* ædiles quicunque erunt. idem mihi, quod ostenderas: aut si, quod mea minus interest, id te magis forte dele-

Estat, reddam tibi istam adilitatem etiam negligenter petenti. sed amplissimos honores ut pro dignitate tua consequare, condiscas, cenſeo, mihi paulo ante diligentius supplicare. hæc populi oratio est: mea uero Laterensis hæc; quare uiſtus sis, non debere iudicem quærere, modo ne largitione sis uiſtus. nam si, quotiescunque præteritus erit is, qui non debuerit præteriri; toties oportebit eum, qui factus erit, condemnari: nihil iam est, quod populo supplicetur, nihil quod direptio, nihil quod supplicatio magistratuum, renunciatio suffragiorum expectetur. simul ut qui sint professi, uideo quid dicam: hic familia consulari est, ille prætoriam: reliquos uideo esse ex equestri loco: sunt omnes sine macula, sunt æque boni uiri, atque integri: sed seruari necesse est gradum. cedat consulari generi prætorium, nec contendat cum prætorio equester locus: sublata sunt studia, extinctæ suffragationes, nullæ contentiones, nulla libertas populi in mandandis magistratibus, nulla expectatio suffragiorum: nihil, ut plerunque euenit, præter opinionem accidet: nulla erit posthac uarietas comitiorum. sin hoc persæpe accidit, ut & factos aliquos, & non factos esse miremur; si campus atque illæ undæ comitiorum, ut mare profundum, et immensum, sic efferuescunt quodam quasi æstu, ut ad alios accedant, ab alijs autem recedant: in tanto nos impetu studiorum, & motu temeritatis, modum aliquem, & consilium, & rationem requiramus? quare noli me ad contentionem uestrum reuocare Laterensis. etenim si populo grata est tabella, quæ frontes aperit hominum, mentes tegit; datq; eam libertatem, ut, quod uelint, faciant, promittant au-

tem, quod rogentur : cur tu in iudicio exprimis , quod  
 nō sit in campo ? hic, quā ille, dignior, perquam graue  
 est dictu. quo modo igitur est æquum ? sic credo, (quod  
 agitur, quod satis est iudici) hic factus est. cur iste po-  
 tius, quā ego ? uel nescio, uel non dico, uel denique,  
 quod mihi grauissimum esset dicere, sed impune tamen  
 deberem dicere, non recte. nam quid assequerere, si illa  
 extrema defensione uterer, populum, quod uoluisset, fe-  
 cisse, non quod debuisset ? quid, si populi quoque factum  
 defendo Laterensis, et doceo Cn. Plancium non obrep-  
 sisse ad honorem, sed eo uenisse cursu, qui semper patuerit  
 omnibus hoc nostro equestri loco; possum ne eripere ora-  
 tioni tuæ contentionem uestram, quæ tractari sine con-  
 tumelia non potest, et te ad causam crimenq; deducere ?  
 si, quod equitis R. filius est, inferior esse debuit : omnes  
 tecum equitum R. filij petiuerunt. nihil dico amplius :  
 hoc tamen miror, cur tu huic potissimum irascare, qui  
 longissime à te absuit. equidem, si quādo, ut fit, iactor  
 in turba, non illum accuso, qui est in summa sacra uia,  
 cum ego ad Fabianum fornicem impellor ; sed eum, qui  
 in me ipsum incurrit, atque incidit. tu neque Q. Pedio,  
 forti uiro, succenses, neque huic A. Plotio, ornatissimo  
 homini, familiari meo : & ab eo, qui hos dimouit, po-  
 tius, quā ab ijs, qui in te ipsum incubuerunt, te de-  
 pulsum putas. sed tamen hæc tibi est primacum Plan-  
 cio generis uestri familiæq; contentio, qua abs te uinci-  
 tur : cur enim non confitear, quod necesse est ? sed non  
 hic magis, quā ego à meis competitoribus & alias,  
 & in consulatus petitione uincebar. sed uide, ne hæc ip-  
 sa, quæ despicias, huic suffragata sint : sic enim confe-

ramus . est tuum nomen utraque familia consulare .  
 num dubitas igitur , quin omnes , qui fauent nobilitati ,  
 qui id putant esse pulcherrimum , qui imaginibus , qui  
 nominibus uestris ducuntur , te ædilem fecerint ? equi-  
 dem non dubito . sed si parum multi sunt , qui nobilita-  
 tem ament : num ista est nostra culpa ? etenim ad ca-  
 put , & ad fontem utriusque generis ueniamus . tu es  
 ex municipio antiquissimo Tusculano , ex quo plurimæ  
 familiæ sunt consulares , in quibus est etiam Iuuentia ,  
 quot è reliquis municipijs omnibus non sunt : hic est è  
 præfectura Atinati , non tam prisca , non tam honora-  
 ta , non tam suburbana . quantum interesse uis ad ra-  
 tionem petendi ? primum , utrum magis fauere putas  
 Atinates , an Tusculanos suis ? alteri ( scire enim hoc  
 propter uiciniam facile possum ) cum huius ornatissi-  
 mi atque optimi uiri Cn. Saturnini patrem ædilem ,  
 cum prætorem uiderunt , quod primus ille non modo in  
 eam familiam , sed etiam in præfecturam illam sellam  
 curulem attulisset , mirādum in modum lætati sunt . al-  
 teros ( credo quia refertum est municipium cōsularibus :  
 nam maleuolos non esse certo scio ) nunquam intellexi  
 uehementius hospitum suorum honore lætari . habemus  
 hoc nos , habent nostra municipia . quid ego de me , de fra-  
 tre meo loquar ? quorum honoribus agri prope dicam ip-  
 si , montesq; fauerunt . num aliquando uides Tuscula-  
 num aliquem de M. Catone illo in omni uirtute princi-  
 pe , num de Ti. Coruncanio munice suo , num de tot  
 Fabijs gloriari ? uerbum nemo facit . at in quemcun-  
 que Arpinatem incideris , etiam si nolis , erit tamen  
 tibi fortasse de nobis aliquid , aliquid & de C. Mario



audiendum. primum igitur hic habuit studia suorum  
ardentia : tu tanta, quanta in hominibus iam satura=  
tis honoribus esse potuerunt. deinde tui municipes sunt  
illi quidem splendidissimi homines, sed tamen pauci, si  
quidem cum Atinatibus conferantur: huius præfectu=  
ra plena uirorum fortissimorum, sic, ut nulla tota Ita=  
lia frequentior dici possit. quam quidem nunc multi=  
tudinem uidetis iudices in squalore, & luctu suppli=  
cem uobis. hi tot equites R. tot tribuni ærarij ( nam ple=  
bem à iudicio dimisimus, quæ cuncta comitijs adfuit )  
quid roboris, quid dignitatis huius petitioni attulerunt?  
non enim tribum Terentinam, de qua dicam alio loco,  
sed dignitatem, sed oculorum coniectum, sed solidam,  
& robustam, & assiduam frequentiam præbuerunt.  
iam municipia coniunctione etiam uicinitatis uehemen=  
ter mouentur. omnia, quæ dico de Plancio, dico exper=  
tus in nobis : sumus enim finitimi Atinatibus. laudan=  
da est, uel etiam amanda uicinitas retinens ueterem il=  
lum officij morem, non infuscata maleuolentia, non as=  
sueta mendacijs, non fucata, non fallax, non erudita  
artificio simulationis uel suburbano, uel etiam urbano.  
nemo Arpinas non Plancio studuit, nemo Soranus, ne=  
mo Casinas, nemo Aquinas : totus ille tractus celeberrim=  
us Venafranus, Alifanus, tota denique nostra illa  
aspera, & montuosa, at fidelis, & simplex, & fau=  
trix suorum regio se huius honore ornari, se augeri di=  
gnitate arbitrabatur : ijsdemq; nunc à municipijs ad=  
sunt equites R. publice cum legationis testimonio; nec  
minore nunc sunt solitudine, quàm tum erant stu=  
dio : etenim est grauius spoliari fortunis, quàm non au=  
geri

geri dignitate . ergo ut alia in te erant illustriora Late-  
rensis, quæ tibi maiores tui reliquerant : sic te Plancius  
hoc non solum municipij , uerum etiam uicinitatis ge-  
nere uincebat . nisi forte te Lauicana , aut Bouillana,  
aut Gabina uicinitas adiuuabat . quibus è municipijs  
uix iam, qui carnem Latinis petant, inueniuntur. Ad-  
iungam, si uis, id quod tu etiam huic obesse putas, pa-  
trem publicanum . qui ordo quanto adiumento sit in  
honore, quis nescit ? flos enim equitum R. ornamentum  
ciuitatis, firmamentum reip. publicanorum ordine con-  
tinetur . quis est ergo , qui neget, ordinis eius studium  
fuisse in honore Plancij singulare ? neque iniuria : uel  
quod erat pater is, qui est princeps iandiu publicano-  
rum : uel quod is ab socijs unice diligebatur : uel quod  
diligentissime rogabat : uel quia pro filio supplicabat :  
uel quia huius ipsius in illum ordinem summa officia  
quæstura, tribunatusq; constabant: uel quod illi in hoc  
ornando, ordinem se ornare, et consulere liberis suis arbi-  
trabantur. aliquid præterea: timide dico, sed tamen di-  
cendum est : non enim opibus, non inuidiosa gratia,  
non potentia uix ferenda, sed commemoratione benefi-  
cij, sed misericordia , sed precibus aliquid attulimus et-  
iam nos. appellauì populum : tribubus submisi me, et  
supplicauì: ultro mehercules se mihi etiam offerentes,  
ultro pollicentes rogauì. ualuit causa rogandi, non gra-  
tia : nec, si uir amplissimus, cui nihil est quod roganti  
concedi non iure possit, de aliquo, ut dicis, non impetra-  
uit, ego sum arrogans, quod me ualuisse dico. nam ut  
omittam illud, quod ego pro eo laborabam, qui ualebat  
ipse per sese : rogatio ipsa semper est gratiosissima, quæ

est officio necessitudinis coniuncta maxime. neque ego sic rogabam, ut petere uiderer, quia familiaris esset meus, quia uicinus, quia huius parente semper plurimum essem usus, sed ut quasi parenti & custodi meo. non potentia mea, sed causa rogationis fuit gratiofa. nemo mea restitutione letatus est, nemo iniuria doluit, cui non huius in me misericordia grata fuerit. etenim si ante reditum meum Cn. Plancio se uulgo uiri boni, cum hic tribunatum peteret, ultro offerebant: cui nomen meum honori fuisset, ei meas presentis preces non putas profuisse? an Minturnenses coloni, quod C. Marium civili errore atque ex impijs manibus eripuerunt, quod tecto receperunt, quod fessum inedia fluctibusque recrearunt, quod uaticum congesserunt, quod nauigium dederunt, quod eum linquentem terram eam, quam seruauerat, lacrymis uotisque omnibus prosecuti sunt, aeterna in laude uersantur: Plancio, quod me uel ui pulsum, uel ratione cedentem tempori receperit, iuuerit, custodierit, his & senatui populoque R. ut haberent quod reducerent, conseruarit, honori hanc fidem, misericordiam, uirtutem fuisse miraris? uitia mehercule res hae Cn. Plancij, de quibus dixi, tegere potuerunt; ne tu in ea uita, de qua iam dicam, tot & tanta adiumenta huic honori fuisse mirere. Hic est enim, qui adolescentulus cum A. Torquato profectus in Africam, sic ab illo grauissimo, & sanctissimo, atque omni laude & honore dignissimo uiro dilectus est, ut & contubernij necessitudo, & adolescentuli modestissimi pudor postulabat. quod si adesset, non minus ille declararet, quam hic illius frater patruelis, & socer, T. Torquatus illi

omni uirtute & laude par : qui est quidem cum illo  
 maximis uinculis & propinquitatis, & affinitatis  
 coniunctus, sed ita magni amoris, ut illæ necessitudi-  
 nis causæ leues esse uideantur. fuit in Creta postea con-  
 tubernalis Saturnini, propinqui sui, miles huius Q.  
 Metelli. quibus cum fuerit probatissimus, hodieq; sit,  
 omnibus esse se probatum debet sperare. in ea prouincia  
 legatus fuit C. Sacerdos, quæ uirtute, quæ constantia  
 uir? L. Flaccus; qui homo? qui ciuis? qualem hunc  
 putent, assiduitate testimonioq; declarant. in Macedo-  
 nia tribunus militum fuit: in eadem prouincia postea  
 quæstor. primum Macedonia sic eum diligit, ut indi-  
 cant hi principes ciuitatum suarum: qui cum missi  
 sint ob aliam causam, tamen huius repentino periculo  
 commoti huic assident, pro hoc laborant; huic si præsto  
 fuerint, gratius se ciuitatibus suis facturos putant,  
 quàm si legationem, & mandata sua confecerint. L.  
 uero Appuleius hunc tanti facit, ut morem illum maio-  
 rum, qui præscribit in parentum loco quæstoribus suis  
 prætores esse oportere, officijs beneuolentiæq; superarit.  
 tribunus pl. fuit, non fortasse tam uehemens, quàm  
 isti, quos tu iure laudas; sed certe talis, quales si om-  
 nes semper fuissent, nunquam desideratus uehemens  
 esset tribunus. omitto illa, quæ si minus necessaria  
 sunt, at certe, cum sunt prolata, laudantur: ut uiuat  
 cum suis, primum cum parente, (nam meo iudicio pie-  
 tas fundamentum est omnium uirtutum) quem uere-  
 tur ut deum, (neque enim multo secus parens liberis)  
 amat uero, ut sodalem, ut fratrem, ut æqualem. quid  
 dicam cum patruo? cum affinibus? cum propinquis?



cum hoc Cn. Saturnino, ornatissimo viro? cuius quam-  
 tam honoris huius cupiditatem, fuisse creditis, cum ui-  
 deatis luctus societatem? quid de me dicam? qui mihi  
 in huius periculo reus esse uideor. quid de his tot uiris  
 talibus, quos uidetis ueste mutata? atqui hæc sunt in-  
 dicia solida iudices, et expressa, hæc signa probitatis,  
 non fucata forensi specie, sed domesticis inusta notis ue-  
 ritatis. facilis est illa occursatio, et blanditia popularis:  
 aspicitur, non attrectatur: procul apparet, non excu-  
 titur, non in manus sumitur. omnibus igitur rebus or-  
 natum hominem, quem externis, quem domesticis non  
 nullis rebus inferiorem quam te, generis et nominis di-  
 co; superiorem alijs, municipum, uicinorum, societa-  
 tum studio, temporum meorum memoria, patris uirtu-  
 te, integritate, modestia, edilem factum esse miraris?  
 hunc tu uitæ splendorem maculis aspergis istis? iacis  
 adulteria, quæ nemo non modo nomine, sed ne suspi-  
 cione quidem possit agnoscere? maritum appellas, ut  
 uerba fingas, non solum crimina. ductum esse ab eo in  
 prouinciā aliquem dicis libidinis causa: quod non cri-  
 men est, sed impudicum in maledicto mendacium. ras-  
 ptam esse mimulam: quod dicitur Atinæ factum à iu-  
 uene, uetere quodam in scenicos iure, maximeq; oppi-  
 dano. ò adolescentiam traductam eleganter, cui qui-  
 dem cum, quod licuerit, obijciatur, tamen id ipsum fal-  
 sum reperiatur. Emissus aliquis è carcere. et quidem  
 emissus, ut cognostis, necessarij hominis, optimiq; ado-  
 lescentis rogatu. idem postea præ mandatis requisitus.  
 atque hæc, nec ulla alia, sunt coniecta maledicta in  
 eius uitam, de cuius uos pudore, religione, integri-

tate dubitetis. Pater uero, inquit, etiam obesse filio debet. ò uocem duram, atque indignam tua probitate La-  
 terensis. pater ut in iudicio capitis, pater ut in dimica-  
 tione fortunarum, pater ut apud tales uiros obesse filio  
 debeat? qui si esset turpissimus, sordidissimus, tamen  
 ipso nomine patrio ualeret apud clementes iudices et mi-  
 sericordes, ualeret, inquam, communi sensu omnium,  
 & dulcissima commendatione naturæ. sed cum sit Cn.  
 Plancius is eques R. ea primum uetustate equestris ordi-  
 nis, ut pater, ut auus, ut maiores eius omnes equites R.  
 fuerint, summum in præfectura florentissima gradum  
 tenuerint & dignitatis, & gratiæ; deinde, ut ipse in  
 legionibus P. Crassi imperatoris inter ornatissimos homi-  
 nes, equites R. summo splendore fuerit; ut postea prin-  
 ceps inter suos, plurimarum rerum sanctissimus & ius-  
 tissimus iudex, maximarum societatum auctor, plu-  
 rimarum magister: si non modo in eo nihil unquam rea-  
 prehensum, sed laudata sunt omnia, tamen is oberit  
 honestissimo filio pater, qui uel minus honestum & a-  
 lienum tueri uel auctoritate sua, uel gratia possit?  
 Asperius, inquit, locutus est aliquid aliquando. immo  
 fortasse liberius. at id ipsum, inquit, non est ferendum.  
 ergo hi ferendi sunt, qui queruntur libertatem equitis  
 R. se ferre non posse? ubinam ille mos? ubi illa æquitas  
 iuris? ubi illa antiqua libertas, quæ malis oppressa ci-  
 uilibus extollere iam caput, & aliquando recreata se  
 erigere debebat? equitum ego R. etiam in homines no-  
 bilissimos maledicta, publicanorum in Q. Scauolam,  
 uirum omnibus ingenio, iustitia, integritate præstan-  
 tem, asperere, & ferociter, & libere dicta commemorem?

consuli P. Nasica præco Granius medio in foro, cum ille  
 edicto iustitio domum descendens rogasset Granium,  
 quid tristis esset, an quòd auctiones essent; immo uero,  
 inquit, quòd legiones. idem tribuno pl. potentissimo  
 homini, M. Druso, sed multa in remp. molienti, cum il-  
 le eum salutasset, ut sit, dixissetq; , quid agis Grani?  
 respondit, immo uero tu Druse quid agis? ille L. Crassa-  
 si, ille M. Antonij uoluntatem asperioribus facieijs sæ-  
 pe perstrinxit impune. nunc usque eo oppressa uestra  
 arrogantia ciuitas est, ut, quæ fuit olim præconi in ria-  
 dendo, nunc equiti R. in plorando non sit concessa li-  
 bertas. quæ enim unquam fuit Plancio uox contume-  
 liæ potius, quàm doloris? quid est autem unquam que-  
 stus, nisi cum à socijs, & à se iniuriam propulsaret?  
 cum senatus impediretur, quo minus, id quod hostia-  
 bus semper erat tributum, responsum equitibus R.  
 redderetur: omnibus illa iniuria dolori publicanis fuit:  
 sed eum ipsum dolorem hic tulit paulo apertius. com-  
 munis ille sensus in alijs fortasse latuit: hic, quod  
 cum cæteris animo sentiebat, id magis, quàm cæteri,  
 & uultu promptum habuit, & lingua. quanquam  
 iudices (agnosco enim ex me) permulta in Plancium,  
 quæ ab eo nunquam dicta sunt; conferuntur. ego  
 quia dico aliquid aliquando non studio adductus, sed  
 contentione dicendi, aut laceffitus; & quia, ut fit in  
 multis, exit aliquando aliquid, si non perfacetum, at-  
 tamen fortasse non rusticum: quod quisque dixit, me  
 id dixisse dicunt. ego autem, si quid est, quod mihi scia-  
 tum esse uideatur, & homine ingenuo dignum atque  
 docto, non aspernor; stomachor uero cum aliorum non:

me digna in me conferuntur. Nam quod primus sciuit legem de publicanis, tum cum uir amplissimus consul id illi ordini per populum dedit, quod per senatum, si licuisset, dedisset: si in eo crimen est, quia suffragium tulit, quis non tulit publicanus? si quia primum sciuit, utrum id sortis esse uis, an eius qui illam legem ferebat? si sortis, nullum crimen est in casu: si consulis, splendor etiam Plancij, hunc à summo uiro principem ordinis iudicatum. sed aliquando ueniamus ad causam: in qua tu nomine legis Liciniae, quae est de sodalitijs, omnes ambitus leges complexus es: neque enim quidquam aliud in hac lege nisi editicios iudices es secutus. quod genus iudiciorum si est æquum ulla in re, nisi si hac tribuaria: non intelligo, quamobrem senatus hoc uno in genere tribus edi uoluerit ab accusatore, neque eandem editionem transtulerit in cæteras causas: de ipso denique ambitu, de reiectione fieri uoluerit iudicium alternorum: cumq; nullum genus acerbitalis prætermitteret, hoc tamen unum prætereundū putarit. quid? huius rei obscura causa est, an et agitata, cum ista in senatu res agebatur, et disputata hesterno die copiosius à Q. Hortensio? cui tum est senatus assensus. hoc igitur sensimus: cuiuscunque tribus largitor esset, et per consensionem magistratuum, quæ honeste sodalitas nominaretur, quam quisque tribum turpi largitione corrumpere, eum maxime ijs hominibus, qui eius tribus essent, esse notum. ita putauit senatus, cum reo tribus ederentur eæ, quas is largitione deuinctas haberet, eosdem fore testes et iudices. acerbū omnino genus iudicij: sed tamē, si uel sua, uel ea, quæ maxime esset cuique



coniuncta, tribus ederetur, utx recusandum. tu autem Laterensis quas tribus edidisti? Terentinam, credo: fuit certe id æquum, & certe expectatum est, & fuit dignum constantia tua. cuius tu tribus uenditorem, et corruptorem, & sequestrem Plancium fuisse clamitas, eam tribum profecto, seuerissimorum præsertim hominum & grauissimorum, edere debuisti. aut Volitiniam. libet enim tibi, nescio quid etiam de illa tribu criminari. hæc igitur ipsam cur non edidisti? quid Plancio cum Lemonia? quid cum Veientina? quid cum Cruastumina? nam tertiam etiam, non quæ iudicaret, sed quæ reijceretur, esse uoluisti. dubitatis igitur iudices, quin uos M. Laterensis suo iudicio non ad sententiam legis, sed ad suam spem aliquam de ciuitate delegerit? dubitatis, quin eas tribus, in quibus magnas necessitudines habet Plancius, cum ille non ediderit, iudicarit officijs ab hoc obseruatas, non largitione? quid enim potest dicere, cur ista editio non summam habeat acerbitatem, remota ratione illa, quam in decernendo secuti sumus? tu deligas ex omni populo aut amicos tuos, aut inimicos meos, aut denique eos, quos inexorabiles, quos inhumanos, quos crudeles existimes? tu, me ignaro, nec opinante, inscio, notes & tuos, et tuorum necessarios, uel iniquos meos, uel etiam defensorum meorum? eodemque adiungas, quos natura putes asperos, atque omnibus iniquos? deinde effundas repente, ut ante confessum eorum iudiciu uideam, quam potuerim, qui essent futuri, suspicari? apud eosque me, ne quinque quidem reiectis, quod in proximo reode consilij sententia constitutum est, cogas causam de fortunis omnibus dicere? nõ enim, si aut

Plancius ita uixit, ut offenderet sciens neminem, aut tu ita errasti, ut eos ederes imprudens, ut nos inuito te tamen ad iudices, non ad carnifices ueniremus; iccirco ista editio per se non acerba est. an uero nuper clarissimi ciues nomen editi iudicis non tulerunt, cum ex CXXV iudicibus, principibus equestris ordinis, quinque & LXX reus reiiceret, L referret; omniaque potius permiscuerunt, quam ei legi conditioni; parerent: nos neque ex delectis iudicibus, sed ex omni populo, neque editos ad reiiciendum, sed ab accusatore constitutos iudices ita feremus, ut neminem reiiciamus? neque ego nunc legis iniquitatem queror, sed factum tuum a sententia legis doceo discrepare: et illud acerbum iudicium, si, quemadmodum senatus censuit, populusque iussit, ita fecisses, ut in hunc & suam & ab hoc obseruatas ederent, non modo non quereretur, sed hunc, iudicibus editis, qui testes iidem esse possent, absolutum putarem. neque nunc multo secus existimo: cum enim has tribus edidisti, ignotis te iudicibus uti malle, quam notis iudicauisti; fugisti sententiam legis, aequitatem omnem reieicisti; in tenebris, quam in luce, causam uersari maluisti. Volitinia tribus ab hoc corrupta. Terentinam habuerat uenalem. quid diceret apud Volitinenses, aut tribules suos iudices? immo uero tu quid diceres? quem iudicem ex illis, aut tacitum testem haberes, aut uero etiam excitares? etenim si reus tribus ederet, Volitiniam fortasse Plancius propter uicinitatem, ac necessitudinem suam non edidisset? et, si quaesitor edendus fuisset, quem tandem potius, quam hunc C. Alsum, quem habet, cui notissimus esse debet, utcinum, tribulem,

nuntiassse, diuissse : tum mirabor te ijs armis uti , quæ tibi lex dabat , noluisse : tribulibus enim iudicibus , non modo seueritatem illorum , si ista uera sunt , sed ne uultus quidem ferre possemus . hanc tu rationem cum fugeris ; cumq; hos iudices habere nolueris , quorum in huius delicto cum scientia certissima , tum dolor grauissimus esse debuerit : quid apud hos dices , qui abs te taciti requirunt , cur hoc sibi oneris imposueris , cur se potissimum delegeris , cur denique se diuinare malueris , quam eos , qui scirent , iudicare ? ego Plancium Laterensis & ipsum gratiosum esse dico , & habuisse in petitione multos cupidos sui gratiosos . quos tu si sodales uocas , officiosam amicitiam nomine inquinans criminoso . sin , quia gratiosi sunt , accusandos putas : non li mirari te id , quod tua dignitas postularit , repudiandis gratiosorum amicitijs non esse assecutum . iam ut ego doceo gratiosum esse tribulibus Plancium , quod multis benigne fecerit , pro multis sponderit , in operas plurimos patris auctoritate & gratia miserit , quod denique omnibus officijs per se , per patrem , per maiores suos totam Atinatem præfecturam comprehenderit : si tu doce sequestrem fuisse , largitum esse , conscripsisse , tribules decuriauissse . quod si non potes , noli tollere ex ordine nostro liberalitatem , noli maleficiū putare esse se gratiam , noli obseruantiam sancire pœna . itaque hæsitatem te in hoc sodalitiū tribuario crimine ad communem ambitus causam contulisti . in qua desinamus , aliquando , si uidetur , uulgari , & peruagata declamatione contendere : sic enim tecum ago . quam tibi commodum est ; unam tribum delige tu : doce id , quod

debes, per quem sequeſtrem, quo diuiſore corrupta ſit :  
ego, ſi id facere non potueris, quod, ut opinio mea fert,  
ne incipies quidem; per quem tulerit, docebo. eſt ne hæc  
uera contentio? placet ne ſic agi? non poſſum magis pe-  
dem conferre, ut aiunt, aut propius accedere. quid ta-  
ces? quid diſſimulas? quid tergiuerſaris? etiam atque  
etiam inſto, atque urgeo, inſector, poſco, atque adeo  
flagito crimen. quamcunque tribum, inquam, delegeris,  
quam tulerit Plancius; tu oſtendito, ſi poteris, uitium;  
ego, qua ratione tulerit, docebo. nec erit hæc alia ratio  
Plancio, ac Laterenſi. nam ut, quas tribus tu tulifti,  
ſi iam ex te requiram, poſſis, quorum ſtudio tuleris,  
explicare: ſic ego hoc contendo, me tibi ipſi aduerſario,  
cuiuſcunque tribus rationem popoſceris, redditurum.  
ſed cur ego ſic ago? quaſi non comitijs iam ſuperioribus  
ſit Plancius designatus ædilis. quæ comitia primum ha-  
bere cœpit conſul, tum omnibus in rebus ſumma aucto-  
ritate, tum harum ipſarum legum ambitus auctor: dein  
de habere cœpit ſubito, præter opinionem omnium: ut,  
ne ſi cogitaſſet quidem quiſpiam largiri; daretur ſpa-  
tium comparandi. uocata tribus, latum ſuffragium,  
deſcriptæ, renunciatae. longe plurimum ualuit Plancius.  
nulla largitionis nec fuit, nec eſſe potuit ſuſpicio. an  
tandem una centuria prærogatiua tantum habet au-  
ctoritatis, ut nemo unquam prior eam tulerit, quin re-  
nunciatus ſit: tu aut his ipſis comitijs conſularibus, aut  
certe in illum annum ædilem Plancium factum mi-  
raris, in quo non exigua pars populi, ſed uniuerſus po-  
pulus uoluntatem ſuam declararit, cuius in honore  
non unius tribus pars, ſed comitia tota comitijs fuerint



prærogata? quo quidem tempore, si id Laterensis facere uoluisses, aut si grauitatis esse putasses tuæ, quod multi nobiles sæpe fecerunt, ut, cum minus ualuisse suffragiis, quàm putassent, postea prolatis comitijs prosternerent se, & populo R. fracto animo, atque humiliter supplicarent: non dubito, quin omnis ad te conuersura se fuerit multitudo: nunquam enim nobilitas, integra præsertim atque innocens, à populo R. supplex repudiata fuit. sed si tibi grauitas tua, & magnitudo animi pluris fuit, sicut esse debuit, quàm ædilitas: noli, cum habeas id, quod malueris, desiderare id, quod minoris putaris. equidem primum, ut honore dignus essem, maxime semper laboraui: secundo, ut existimarer: tertium mihi fuit illud, quod plerisque primum est, ipse honos: qui ijs denique debet esse iucundus, quorum dignitati populus R. testimonium, non beneficium ambitioni dedit. Quæris etiam Laterensis, quid imaginibus tuis, quid ornatissimo atque optimo uiro patri tuo respondeas mortuo? noli ista meditari, atque illud caue potius, ne tua ista querela, dolorq; nimius ab illis sapientissimis uiris reprehendatur. uidit enim pater tuus, App. Claudium, nobilissimum hominem, uiuo patre suo, potentissimo & clarissimo ciue, C. Claudio, ædilem non esse factum, & eundem sine repulsa factum esse consulem: uidit, hominem sibi maxime cõiunctum, egregium uirum, L. Volcatium; uidit, M. Pisonem in ista ædilitate offensiuncula accepta, summos à populo R. esse honores adeptos. auus uero tuus et P. Nasica tibi ædiliam prædicaret repulsam, quo ciue neminem ego statuo in hac rep. fortiorem; & C. Marij,

qui, duabus ædilitatis acceptis repulsis, septies consul est factus; & L. Cæsaris, Cn. Octauij, M. Tullij, quos omnes scimus ædilitate præteritos, consules esse factos. sed quid ego ædilicias repulsas colligo? quæ sæpe eiusmodi habitæ sunt, ut ijs, qui præteriti essent, benigne à populo factum uideretur. Tribunus militum L. Philippus, summa nobilitate, & eloquentia, quæstor Q. Cælius, clarissimus, ac fortissimus adolescens, tribuni pl. P. Rutilius Rufus, C. Fimbria, C. Cassius, Cn. Orestes facti non sunt: quos tamen omnes consules factos scimus esse. quæ tibi ultro pater, & maiores tui non consolandi tui gratia dicerent, neque uero quo te liberent aliqua culpa, quam tu uereris, ne à te suscepta uideatur; sed ut te ad cursum istum tenendum, quem à prima ætate suscepisti, cohortentur: nihil est enim, mihi crede Laterensis, de te detractum: detractum dico? si mehercules uere, quod accidit, interpretari uelis, est aliquid etiam de uirtute significatū tua. noli enim existimare non magnum quendam motum fuisse illius petitionis tuæ, de qua, ne aliquid iurares, destitisti. denunciassti homo adolescens, quid de summa reip. sentire; fortius tu quidem, quàm nonnulli defuncti honoribus; sed apertius, quàm uel ambitionis, uel ætatis tuæ ratio postulabat. quamobrem in dissentiente populo noli putare nullos fuisse, quorum animos tuus ille fortis animus offenderet: qui te incautum fortasse nunc tuo loco dimouere potuerunt, prouidentem ante & præcauentem nunquam certe mouebunt. an te illa argumenta duxerunt? dubitabitis, inquit, quin coitio facta sit, cum tribus plerasque cum Plotio tulerit Plancius? an

una fieri potuerunt, si una tribus non tulissent? cum non nullas punctis pene totidem: quippe cum iam facti prope superioribus comitijs declaratiq; uenissent. quanquam ne id quidem suspicionem coitionis habuerit: neque enim unquam maiores nostri sortitionem constituisent ædiliam, nisi uiderent accidere posse, ut competitores pares suffragijs essent. Et ais, prioribus comitijs Aniensem à Plotio, Terentinam à Plancio tibi esse concessam; nunc ab utroque eas auulsas, ne in angustum uenirent. quàm conuenit, non dum cognita populi uoluntate, hos, quos iam tum coniunctos fuisse dicis, iacturam suarum tribuum, quo uos adiuuaremini, fecisse; eosdem, cum iam essent experti quid ualerent, restrictos, et tenaces fuisse? etenim uerebantur, credo, angustias; quasi res in contentionem, aut in discrimen aliquod posset uenire. sed tamen tu an Plotium, uirum ornatissimū, in idem crimen uocandum iudicas? an dicis eum te arripuisse, à quo non sis rogatus? Nam quod questus es, plures te testes habere de Volitinia, quàm quot in ea tribu puncta tuleris: indica, aut eos testes te adducere, qui, quia nummos acceperint, te præterierint; aut te ne gratuita quidem eorum suffragia tulisse. illud uero crimen de nummis, quos in circo Flaminio deprehensos esse dixisti, caluit re recenti, nunc in causa refrixit: neque enim, qui illi nummi fuerint, nec quæ tribus, nec qui diuisor, ostenderis. atque is quidem adductus ad consules, qui tum in crimen uocabatur, se inique à tuis iactatum, grauiter querebatur. qui si erat diuisor, præsertim eius, quem tu habebas reum: cur abs te reus non est factus? cur non



eius damnatione aliquid ad hoc iudiciū præiudicij comparasti? sed neque tu habes hæc, neque eis confidis. alia te ratio, alia cogitatio ad spem huius opprimendi excitauit. magnæ sunt in te opes: late patet gratia: multi amici, multi cupidi tui, multi fautores laudistuæ: multi huic inuident: multis etiam pater, optimus uir, nimirum retinens equestris iuris, & libertatis uidetur: multi etiam communes inimici reorum omnium: qui ita semper testimonium de ambitu dicunt, quasi aut moueant animos suis testimonijs, aut gratum populo Resit, aut ab eo facilius ob eam causam dignitatem, quam uolunt, consequantur. quibuscum me iudices pugnantem meo more pristino non uidebitis: non quod fas sit quidquam effugere, quod salus Plancij postulet: sed quia neque necesse est me id persequi uoce, quod uos mente uideatis; & quod ita de me meriti sunt illi ipsi, quos ego testes uideo paratos, ut eorum reprehensionem uos uestre prudetiæ assumere, meæ modestiæ remittere debeatis. illud unum uos magnopere oro, atque obsecro iudices, cum huius, quem defendo, tum communis periculi causa, ne fietis auditionibus, ne disseminato dispersoq; sermoni fortunas innocentium subiiciendas putetis. multi amici accusatoris, nonnulli etiam nostri iniqui, multi cōmunes obtrectatores, atque omnium inuidi multa finxerunt. nihil est autem tam uolucrum, quam maledictum: nihil facilius emittitur, nihil citius excipitur, nihil latius dissipatur. neque ego, si fontem maledicti reperietis, ut negligatis, aut dissimuletis, unquam postulabo. sed si quid sine capite manabit, aut si quid erit eiusmodi, ut non extet auctor, qui audierit;

aut



aut ita negligens uobis esse uidebitur, ut, unde audierit, oblitus sit; aut ita leuem habebit auctorem, ut memoria dignum non putarit: huius illa uox uulgaris auditu ne quid reo innocenti noceat, oramus. Sed uenio iam ad L. Cassium familiarem meum, cuius ex oratione ne illum quidem Iuuentium tecum exposulauit, quem ille omni & uirtute, et humanitate ornatus adolescens primum de plebe adilem curulem factum esse dixit. in quo Cassi si ita tibi respondeam, nescisse id populū R. neque fuisse, qui id nobis narraret, praesertim mortuo Longino; non, ut opinor, admirere, cum ego ipse non abhorrens à studio antiquitatis, me hic id ex te primū audisse, confitear. & quoniam tua fuit perelegans ac persubtilis oratio, digna equitis R. uel studio, uel pudore; quoniamq; sic ab his es auditus, ut magnus honos et ingenio, & humanitati tuæ tribueretur. respondebo ad ea, quæ dixisti, quæ pleraque de ipso fine fuerunt: in quibus ipsi aculei, si quos habuisti in me reprehendendo, tamen mihi non ingrati acciderunt. Quæsisisti, utrum mihi putarem equitis R. filio faciliorem fuisse ad adipiscendos honores uiam, an futuram esse filio meo, qui esset familia consulari? ego uero quanquam illi omnia malo, quàm mihi, tamen illi honorum aditus nunquam faciliores optaui, quàm mihi fuerunt: quin etiam, ne forte ille sibi me potius peperisse iam honores, quàm iter demonstrasse adipiscendorum putet, hæc illi soleo præcipere, quanquā ad præcepta ætas non est gnati, quæ ille à Ioue ortus suis præcepit filiis: vigilandum est semper: multæ insidiæ sunt bonis. nostis cætera. quæ \* non ne id, quod multi inuideant. quæ scripsit grauis il-

le & ingeniosus poeta, scripsit, non ut illos regios pueros, qui iam nusquam erant, sed ut nos & nostros liberos ad laborem, & laudem excitaret. Quæris, quid potuerit amplius assequi Plancius, si Cn. Scipionis fuisset filius? magis ædilis fieri non potuisset; sed hoc præstare, quòd ei minus inuideretur. etenim honorum gradus summis hominibus et infimis sunt pares, gloriæ dispares. quis nostrum se dicit M. Curio, quis C. Fabritio, quis P. Duellio parem? quis Attilio Calatino? quis Cn. & P. Scipionibus, quis Africano, Marcello, Maximo? eosdem sumus honorum gradus, quos illi, assecuti: est enim in uirtute multis ascensus, uti is gloria maxime excellat, qui uirtute plurimum præstet. honorum populi finis est consulatus: quem magistratum iam octingenti fere consecuti sunt. horum, si diligenter quæras, uix decimam partem reperiās gloria dignam. sed nemo unquam sic egit, ut tu: cur iste fit consul? quid potuit amplius, si L. Brutus esset, qui ciuitatem dominatu regioliberauit? honore nihil amplius, laude multum. sic igitur Plancius nihilo minus quæstor est factus, et tribunus pl. & ædilis, quàm si esset summo loco natus. sed hæc pari loco orti sunt innumerabiles alij consecuti.

Profers triumphos Ti. Gracchi, & C. Marij, et quæris, quid simile in Plancio. quasi uero isti, quos commemoras, propterea magis laude fuerint digni, quòd triumpharunt, & non quia commissi sunt ijs magistratus, in quibus re bene gesta triumpharent. Rogas, quæ castra uiderit, qui & miles in Creta Metello hoc imperatore, et tribunus in Macedonia militū fuerit, et quæstor tantum ex re militari detraxerit tēporis, quantum

in me custodiendum transferre maluerit. Quæris, num disertus, immo, id quod secundum est, ne sibi quidem uidetur. num iuris consultus. quasi quisquam sit, qui sibi hunc falsum de iure respondisse dicat: omnes enim istiusmodi artes in ijs reprehenduntur, qui, cum professi fuerint, satisfacere non possunt; non in ijs, qui abuisse ab istis studijs confitentur. uirtus, probitas, integritas in candidato, non linguæ uolubilitas, non ars, non scientia, requiri solet. ut nos in mancipijs parandis, quamuis frugi hominem si pro fabro, aut pro textore emimus, ferre moleste solemus, si eas artes, quas in emendo secuti sumus, forte nesciuerit; sin autem emimus, quem uillicum imponderemus, quem pecori præficeremus, nihil in eo nisi frugalitatem, laborem, uigilantiam esse curamus: sic populus R. deligit magistratus, quasi reip. uillicos: in quibus si qua præterea est ars, facile patitur; sin minus, uirtute eorum, & innocentia contentus est: quotus enim quisque disertus? quotus quisque iuris peritus est, ut eos numeres, qui uolunt esse? quòd si præterea honore dignus nemo, quidnam tot optimis, & ornatissimis ciuib. est futurum? Iubes Plancium de uitijs Laterensis dicere. nihil potest; nisi eum nimis in se iracundum putabis fuisse. Idem effers Laterensem laudibus. facile patior id te agere multis uerbis, quod ad iudicium non pertineat; et id te accusantem tandiu dicere, quod ego defensor sine periculo possim confiteri. atqui non modo confiteor summa in Laterense ornamenta esse, sed te etiam reprehendo, quòd ea non enumeres, alia quædam inania, & leuia conquiras. Præneſte fecisse ludos. quid? alij quæstores non ne



fecerunt? Cyrenis liberalem in Publicanos, iustum in socios fuisse. quis negat? sed ita multa Romæ geruntur, ut uix ea, quæ fiunt in prouincijs, audiantur. non uereor, ne mihi aliquid iudices uidear arrogasse, si de quæstura mea dixerò: quamuis enim illa sterneret, tamen cum me postea fuisse in maximis rebus arbitror, ut non ita mihi multum sit ex quæsturæ laude repetendū. sed tamen non uereor, ne quis audeat dicere, ullius in Sicilia quæsturam aut gratiorem, aut clariorem fuisse. uere mehercules hoc dicam. sic tum existimabam; nihil homines unquam aliud Romæ, nisi de quæstura mea, loqui. frumenti in summa caritate maximum numerum miseram: negotiatoribus comis, mercatoribus iustus, municipibus liberalis, socijs abstinens, omnibus eram uisus in omni officio diligētissimus: excogitati quidam erant à Siculis honores inauditi: itaque hac spe decedebam, ut mihi populum R. ultro omnia delaturum putarem. at ego, cum casu diebus ijs itineris faciendi causa decedens è prouincia, Puteolos forte uenissem, cum plurimi & lautissimi solent esse in ijs locis, concidi pene iudices, cum ex me quidam quæsisset, quo die Roma exissem, & nunquid in ea esset noui. cui cum respondissem, me è prouincia decedere: etiam, mehercules, inquit, ut opinor, ex Africa. huic ego iam stomachans fastidiose, immo ex Sicilia, inquam. tum quidam, quasi qui omnia sciret, quid? tu nescis, inquit, hunc Syracasis quæstorem fuisse? quid multa? destiti stomachari, & me unum ex ijs feci, qui ad aquas uenissent. sed ea res iudices, haud scio, an plus mihi profuerit, quàm si mihi tum essent omnes congratulati, nam posteaquam



sensi populum R. aures hebetiores, oculos acres atque acutos habere: destiti, quid de me audituri essent homines, cogitare: feci, ut postea quotidie me presentem uiderent: habitavi in oculis: pressi forum: neminem à congressu meo neque ianitor meus, neque somnus absterruit. ecquid ego dicam de occupatis meis temporibus, cui fuerit ne otium quidem unquã otiosum? nam quas tu cõmemoras Cassi legere te solere orationes, cum otiosus sis: has ego scripsi ludis et feriis, ne omnino unquã essem otiosus. etenim M. Catoni illud, quod in principio scripsit Originum suarum, semper magnificum & præclarum putavi, clarorũ uirorum, atque magnorum non minus otij, quàm negotij rationem extare oportere. ita si quam habeo laudem, quæ quanta sit nescio, parata Romæ est, quæ sita in foro: meaq; priuata consilia publici quoque casus cõprobauerunt, ut etiam summa res. mihi domi fuerit gerenda, et urbs in urbe seruanda. eadem igitur Cassi uia munita Laterensi est, idem uirtutis cursus ad gloriam, hoc facilius fortasse, quod ego huc à me ortus et per me nixus ascendi, istius egregia uirtus adiuuabatur commendatione maiorum. sed ut redeam ad Plancium, nunquã ex urbe abfuit, nisi forte, lege, necessitate. non ualuit rebus iisdem, quibus fortasse non nulli: at ualuit assiduitate, at ualuit obseruãdis amicis, ualuit liberalitate: fuit in oculis: petiuit: est usus ratione, qua minima inuidia noui homines plurimi eosdem honores cõsecuti sunt. Nam quod ais Cassi, non plus me Plancio debere, quàm bonis omnibus, quod ijs æque mea salus cara fuerit: ego me debere bonis omnibus fateor: sed etiam ij, quibus ego debeo, bo-

ni uiri & ciues, adilitijs comitijs, aliquid se meo nomina  
 ne debere, Plancio dicebant. uerum fac me multis debe-  
 re, & in is Plancio: utrum igitur, me conturbare oportet,  
 an ceteris, cum cuiusque dies uenerit, hoc nomen, quod  
 urget, nunc, cum petitur, dissoluere? quanquam  
 dissimilis est pecuniæ debitio & gratiæ: nam qui pecu-  
 niam dissoluit, statim non habet id, quod reddidit; qui  
 autem debet, is retinet alienum: gratiam autem &, qui  
 refert, habet; &, qui habet, in eo ipso, quod ha-  
 bet, refert. neque ego nunc Plancio desinam debere, si  
 hoc soluero: nec minus ei redderem uoluntate ipsa, si  
 hoc molestiæ non accidisset. Quæris à me Cassi, quid  
 pro fratre meo, qui mihi est carissimus, quid pro meis  
 liberis, quibus nihil potest mihi esse iucundius, amplius,  
 quàm pro Plancio facio, facere possim: nec uides isto-  
 rum ipsorum caritate ad huius salutem defendendam  
 maxime stimulari me atque excitari: nam neque illis  
 huius salute, à quo meam sciunt esse defensam, quid-  
 quam est optatius; et ego ipse nunquam illos aspicio, quin  
 per hunc me his conseruatum esse meminerim, huiusq;  
 meriti in me recorder. Opimium damnatum esse cōme-  
 moras, seruatorem ipsum reip. Calidium adiungis, cuius  
 lege Q. Metellus in ciuitatem sit restitutus: repre-  
 hendis meas pro Plancio preces, quòd nec Opimius suo  
 nomine liberatus sit, nec Q. Metelli Calidius. de Calidio  
 tibi tantum respondeo, quod ipse uidi: Q. Metellum  
 rium consulem prætorijs comitijs petente Q. Calidio  
 populo R. supplicasse, cum quidem non dubitaret, &  
 consul, & homo nobilissimus, patronum illum esse  
 suum, & familiæ suæ nobilissimæ, dicere. quo loco

quæro ex te, num id in iudicio Calidij putes, quod ego in Plancij facio, aut Metellum Pium, si Romæ esse potuisset, aut patrem eius, si uixisset, non fuisse facturum. nam Opimij quidem calamitas utinam ex hominum memoria posset euelli. uulnus illud reip. dedecus huius imperij, turpitudine populi R. non iudicium putandum est. quam enim illi iudices, si iudices, et non paricide patriæ nominandi sunt, grauiorem potuerunt reip. infligere securim, quàm cum illum è ciuitate eicerunt, qui prætor finitimo, consul domestico bello reip. liberarat? At enim nimis ego magnum beneficium Plancio, & ut ais, id uerbis exaggero. quasi uero me tuo arbitratu, et non meo gratum esse oporteat. quod istius tantum meritum, inquit? an quia te non iugulauit? immo uero, quia iugulari passus non est. quo quidem tu loco Cassi etiam purgasti inimicos meos, meæq; uitæ nullas ab illis insidias fuisse dixisti. posuit hoc idem Laterensis. quam ob rem de isto paulo post plura dicam. de te tantum requiro, utrum putes odium in me mediocre inimicorum fuisse. quod fuit ullorum tantum? requiro, utrum putes odium unquam barbarorum tam immane, ac tam crudele in hostem? an fuisse in ijs aliquem, aut fame metum, aut pœnæ, quorum uidisti toto illo anno ferrum in foro, flammam in delubris, uim in tota urbe uersari? nisi existimas, eos tunc uita meæ pepercisse, quod de reditu meo non timerent; & quenquam putas fuisse tam excordem, qui uiuis his, stante urbe & curia, redituum me, si uiuerem, non putaret. quam ob rem non debes, is homo, et is ciuis, prædicare, uitam meam, quæ

fidelitate amicorum conseruata sit, inimicorum molestia non esse appetitam. Respondebo tibi nunc Laterensis, minus fortasse uehementer, quàm abs te sum prouocatus; sed profecto nec considerate minus, nec minus amice. nam primum illud fuit asperius, me, quæ de Plancio dicerem, mentiri, & temporis causa fingere. scilicet homo sapiens excogitauit, quam ob rem uiderer maximis beneficii uinculis obstrictus, cū liber essem, & solutus. quid enim? mihi ad defendendum Plancium parum multæ, parum iustæ necessitudines erant familiaritatis, uicinitatis, patris amicitiae? quæ si non essent, uereor, credo, ne turpiter facerem, si hoc splendore, & hac dignitate hominem defenderem. fingenda fuit mihi iudices causa peracuta, ut ei, quæ mihi debere oporteret, ego me omnia debere dicerem. at id etiam gregarii milites faciunt inuiti, ut coronam dent ciuicam, & se ab aliquo seruatos esse fateantur: non quo turpe sit, protectum in acie, hostiū manibus eripi: nam id accidere, nisi forti uiro, & pugnanti cominus, non potest: sed onus beneficii reformidant, quod permagnus est alieno debere idem, quod parenti. ego, cum ceteri uera beneficia etiam minora dissimulent, ne obligati esse uideantur; eo me beneficio obstrictum esse eam mentiar, cui ne referri quidē gratia posse uideatur? an hoc tu Laterensis ignoras? qui, cum mihi esses amicissimus; cum uel periculum uitæ tuæ mecum sociare uoluisses; cum me in illo tristi, & acerboluctu, atque discessu non lacrymis solum tuis, sed animo, corpore, copiis prosecutus esses; cum meos liberos, & uxorem, me absente, tuis opibus auxilioq; defendisses: sic me-



cum semper egisti, te mihi remittere, atque concedere, ut omne studium meum in Cn. Plancij honorem consummerem, quod eius in me meritum tibi etiam gratum esse dicebas. nihil autem me noui, nihil temporis causa dicere, non ne etiam illa testis est oratio, quæ est à me prima habita in senatu? in qua, cum per paucis nominatim egissem gratias, quod omnes enumerari nullo modo possent, scelus autem esset quenquam præteriri; stauissemque eos solum nominare, qui causæ nostræ duces et quasi signiferi fuissent; in his Plancio gratias egi. recitetur oratio, quæ, propter eius magnitudinem, dicta de scripto est, in qua ego, homo astutus, ei me dedam, cui nihil magnopere debeam, et huius tanti officij seruitutem astringam testimonio sempiterno. nolo cætera, quæ à me mandata sunt literis, recitare: prætermitto illa, ne aut proferre uidear ad tempus, aut eo genere uti literarum, quod meis studiis aptius, quàm consuetudini iudiciorum esse uideatur. Atque etiam clamitas Latensis: Quousque ista dicis? nihil in Cispio profecisti: obsoletæ iam sunt preces tuæ. de Cispio mihi ne tu obijcies, quem ego de me bene meritum quia te teste cognoueram, te eodem auctore defendi? et ei dices, Quousque, quem negas, quod pro Cispio contenderit, impetrare potuisse? nam istius uerbi, quousque, hæc poterat esse inuidia. datus est tibi ille, condonatus ille: non facis finem: ferre non possumus. ei quidem, qui pro uno laborarit, et ipsum id non obtinuerit, dici, quousque, irridentis magis est, quàm reprehendentis. nisi forte ego unus ita me gessi in iudicijs, ita et cum his, et inter hos uixi, is in causis patronus, is in rep.

## O R A T I O

civis & sum & semper fui, solus ut à te constituer, qui nihil à iudicibus debeam unquam impetrare. & mihi lacrymulam Cispiani iudicii obiectas: sic enim dixisti, vidi ego tuam lacrymulam. uide, quàm me uerbi tui poeniteat. non modo lacrymulam, sed multas lacrymas & fletum cum singultu uidere potuisti. an ego, qui meorum lacrymis me absente commotus, simultates, quas mecum habebat, deposuisset, meaq; salutis non modo non oppugnator, ut inimici mei putarent, sed etiam defensor fuisset, huius in periculo non dolorem meum significarem? tu autem Laterensis, qui tum lacrymas meas gratas esse dicebas, nunc easdem uis inuidiosas uideri. negas tribunatum Plancij quidquam attulisse adiumenti dignitati meae: atque hoc loco (quod uerissime facere potes) L. Raciliij, fortissimi & constantissimi uiri, diuina in me merita commemoras: cui quidem ego, sicut Plancio, nunquam dissimulaui me plurimum debere, semperq; prae me feram. nullas enim sibi ille neque contentiones, neque inimicitias, neque uitae dimicationes nec pro rep. nec pro me defugiendas putauit. atque utinam, quàm ego sum in illum gratus, tam licuisset per hominum uim, et iniuriam populi R. ei gratiam referri. sed si non eadem contendit in tribunatu Plancius, existimare debes, non huic uoluntatem defuisse, sed me, cum iam Plancio deberem, Raciliij beneficijs fuisse contentum. an uero putas iudices iccirco minus mea causa facturos, quòd me esse gratum criminis? an, cum populus R. illo S. C. quod in monumento Marij factum est, quo mea salus omnibus est gentibus commēdata, uni Cn. Plancio gratias egerit, (unus

enim fuit de magistratibus defensor salutis meæ, cui senatus pro me gratias agendas putauit ) ei ego à mereferendam gratiam non putem ? atqui , eum cum uides, quo me tandem animo in te putas esse Laterensis ? ululum esse tantum periculum , tantum laborem , tantam contentionem , quam ego non modo pro salute tua , sed etiam pro dignitate defugerem ? quo quidem etiam magis sum , non dicam miser , ( natura quidem abhorret à uirtute uerbi ) sed certe exercitus : non quia multis debeo , ( leue enim onus , beneficij gratia ) sed quia sæpe concurrat , propter aliquorum de me meritorum inter ipsos contentiones , ut eodem tempore in omnes , uerear , ne uix possim gratus uideri . sed ego hoc meis ponderibus examinabo , non solum quid cuique debeam , sed etiam quid cuiusque intersit , & quid à me cuiusque tempus poscat . agitur studium tuum , uel etiam , si uis , existimatio , laus , ædilitas : at Cn. Planciꝝ salus , patria , fortunæ . saluum tu me esse cupisti : hic fecit , etiam ut esse posses . distineor tamen , & diuellor dolore , et in causa dispari offendi te à me , doleo : sed medijsfidijs multo citius meam salutem pro te obiecero , quàm Cn. Planciꝝ salutem tradidero contentioni tuæ . etenim iudices cum omnibus uirtutibus me affectum esse cupiam , tamen nihil est quod malim , quàm me et gratum esse , & uideri . hæc est enim una uirtus non solum maxima , sed etiam mater uirtutum omnium reliquarum . quid est pietas , nisi uoluntas grata in parentes ? qui sunt boni ciues , qui belli , qui domi de patria bene merentes , nisi qui patriæ beneficia meminerunt ? qui sancti , qui religionum colentes , nisi qui



meritam dijs immortalibus gratiam iustis honoribus,  
& memori mente persoluunt? quæ potest esse iucundi-  
tas uitæ, sublati amicitijs? quæ porro amicitia potest  
esse inter ingratos? quis est nostrum liberaliter educa-  
tus, cui non educatores, cui non magistri sui, atque do-  
ctores, cui non locus ille mutus, ubi ipse altus aut do-  
ctus est, cum grata recordatione in mente uersetur?  
cuius opes tantæ esse possunt, aut unquam fuerunt,  
quæ sine multorum amicorum officijs stare possint?  
quæ certe, sublata memoria, & gratia, nulla extare  
possunt. equidem nil tam proprium hominis existimo,  
quàm non modo beneficio, sed etiam beneuolentiæ si-  
gnificatione alligari: nihil porro tam inhumanum,  
tam immane, tam ferum, quàm committere, ut benefi-  
cio, non dicam indignus, sed uictus esse uideare. quæ  
cum ita sint, iam succumbam Laterensis isti tuæ ora-  
tioni: in eo ipso, in quo nihil potest esse nimium, quo-  
niam ita tu uis, nimium me gratum esse concedam:  
petamq; à uobis iudices, ut eum beneficio complectamini,  
quem qui reprehenderit, in eo reprehendit, quod  
gratum præter modum dicat esse. neque enim ad ne-  
gligendam meam gratiam debet ualere, quod dixit  
idem, uos nec nocentes, nec litigiosos esse, quo minus  
me apud uos ualere oporteret. quasi uero in amicitia  
mea non hæc præsidia, si qua forte sunt in me, parata  
semper amicis esse maluerim, quàm necessaria. etenim  
ego de me tantum audeo dicere, amicitiam meam uo-  
luptati pluribus, quàm præsidio fuisse: meq; uehemen-  
ter uitæ meæ poeniteret, si in mea familiaritate locus  
esset nemini, nisi litigioso, aut nocenti. sed hoc, nescio



quo modo, frequenter in me congeffisti, faneq; in eo creber fuisti, te iccirco in locos causam conijcere noluisse, ne ego mea consuetudine aliquid de tensis misericordiae causa dicerem, quod in alijs ædilibus ante fecissem. non nihil egisti hoc loco: nam mihi eripuisti ornamentum orationis meae. deridebor, si mentionem tesarum fecero, cum tu id prædixeris: sine tensis autem quid potero dicere? hic etiam addidisti, me iccirco mea lege ex isto ambitu traxisse, ut miserabiliores epilogos possem elicere. non uobis uideor cum aliquo declamatore, non causa laboris, & fori disputare? Rhodi enim, inquit, non fui: me uult fuisse. sed fui, inquit, (putabam in Nicæis dicturum,) bis in Bithynia. si locus haberet reprehensionis ansam aliquam, nescio, cur seueriorem Nicæam putes, quam Rhodum. si spectanda causa est, & tu in Bithynia summa cum dignitate fuisti, & ego Rhodi non minore. Nam quod in eo me reprehendisti, quod nimium multos defenderim: utinam & tu, qui potes, & ceteri, qui defugiunt, uellent me labore hoc leuare: sed fit uestra diligentia, qui in causis ponderandis omnes fere repudiatis, ut ad nos pleraque confluant, qui miseris, & laborantibus nihil negare possumus. Admonuisti etiam, quod in Creta fuisses, dictum aliquod in petitione tua dici potuisse, me id perdidisse. uter igitur nostrum est cupidior dicti, ego ne, qui, quod dici potuit, non dixerim, an tu, qui etiam ipse in te dixeris? te aiebas de tuis rebus gestis nullas litteras misisse, quod mihi meae, quas ad aliquem misissem, obfuisent. quas ego mihi obfuisse non intelligo, reip. uideo prodesse potuisse. sed sunt hæc leuiora: illa

uero grauiora, atque magna, quòd meum discessum, quem sæpe defleras, nunc quasi reprehendere, et subaccusare uoluisti: dixisti enim, non auxilium mihi, sed me auxilio defuisse. ego uero fateor mehercule, quòd uiderim mihi auxilium non deesse, iccirco me illi auxilio perpercisse. quis enim status, quòd discrimen, quæ fuerit in rep. tempestas illa, quis nescit? tribunicius me terror, an consularis furor mouit? decertare mihi ferro magnū fuit cum reliquijs eorum, quos ego. florentes atque integros sine ferro uiceram. consules post hominum memoriam teterimi, atque turpissimi, sicut & illa principia, & hi recentes rerum exitus declarant, quorum alter exercitum perdidit, alter uendidit; emptis prouincijs, à senatu, à rep. à bonis omnibus defecerant, qui exercitibus, qui armis, qui opibus plurimum poterant, cum, quid sentirent, nesciretur, furialis illa uox nefarijs stupris, religiosis altaribus effœminata, secum & illos & consules facere acerbissime perfonabat. egentes in locupletes, perditī in bonos, serui in dominos armabantur. aderat mecum senatus, & quidē ueste mutata, quòd pro me uno post hominum memoriam publico consilio susceptum est. sed recordare, qui tunc fuerint consulū nomine hostes, qui soli in hac urbe senatum senatui parere non suerint, edictoq; suo non luctum patribus conscriptis, sed luctus indicia adpnerint. aderat mecum cunctus equester ordo: quem quidē in concionibus saltator ille Catilinæ consul proscriptionis denunciatione terrebat. at tota Italia conuenerat: cui quidē belli intestini, & uastitatis metus inferebatur. hisce ego auxilijs studentibus atque inci-

tatis uti me Laterensis potuisse confiteor : sed erat non iure, non legibus, non disceptando decertandum : nam profecto, præsertim tam bona in causa, nunquam, quo cæteri abundarunt, id mihi ipsi auxilium meum defuisset : armis fuit, armis, inquam, fuit dimicandum : quibus à seruis, atque à seruorum ducibus cædem fieri senatus & bonorum, reip. exitiosum fuisset. uinci autem improbos à bonis, fateor fuisse præclarum, si finem eum uincendi uiderem : quem profecto non uidebam. ubi enim præsto fuisset mihi aut tam fortis cōsul, quàm L. Opimius, quàm C. Marius, quàm L. Flaccus, quibus ducibus improbos ciues resp. uicit armatis; aut, si minus fortes, attamen tam iusti. quàm P. Mucius, qui arma, quæ priuatus P. Scipio sumpserat, ea Ti. Graccho interempto iure optimo sumpta esse defendit? esset igitur pugnandum cum consulibus. nihil amplius dico, nisi illud: uictoriæ nostræ graues aduersarios paratos, interitus nullos ultores esse uidebam. hisce ego auxilijs salutis meæ si iccirco defui, quia nolui dimicare, fatebor, id quod uis, nō mihi auxilium, sed me auxilio defuisse: sin autē quo maiora studia in me bonorum fuerūt, hoc ijs magis consulendum, et parcendum putaui; tu id in me reprehendis, quod Q. Metello laudi datū est, hodieq; est, et semper erit maximæ gloriæ: quem, ut potes ex multis audire, qui tum affuerunt, inuictissimis uiris, constat bonis cessisse; nec fuisse dubium, quin contentione, et armis superior posset esse. ergo ille cum suū, non cum senatus fatum defenderet, cum perseverantiā sententiæ suæ, non salutem reip. retinuisset; tamen ob illam constantiā, quæ illud uoluntarium uulnus accepit, iustissimos omnium

Metellorum, & clarissimos triumphos gloriæ laude superavit, quod & illos ipsos improbissimos ciues interfici noluit, &, ne quis bonus interiret in eadem cæde, providit: ego tantis periculis propositis, cum, si uictus essem, interitus reip. si uicissem, infinita dimicatio pareretur; committerem, ut idem perditor reip. nominarer; qui seruator fuisset? mortem me timuisse dicis. ego uero ne immortalitatem quidem contra remp. accipiendam putarem, nedum emori cum pernicie reip. uellem. nam qui pro rep. uitam reddiderunt, (licet me desipere dicas) nunquam mehercule eos mortem potius, quam immortalitatem asssecutos putavi. ego uero si tum illorum impiorum ferro ac manu concidissem, in perpetuum resp. ciuile præsidium salutis suæ perdidisset. quin etiam si me uis aliqua morbi, aut natura ipsa consumpsisset, tamen auxilia posteritatis essent immixta, quod peremptum esset mea morte id exemplum, qualis futurus in me retinendo fuisset senatus popularisq; R. An, si unquam in me uitæ cupiditas fuisset, ego mense Decembri mei consulatus omnium parricidarum tela commossem? quæ, si uiginti quiessem dies, in aliorum iugulum consulum recidissent. quamobrem si uitæ cupiditas contra remp. est turpis, certe multo mortis cupiditas mea turpior fuisset cum pernicie ciuitatis. Nam quod te in rep. liberum esse gloriatus es, id ego & fateor, & lætor, & tibi etiam in hoc gratulor: quod me autem negasti, in eo neque te, ueque quenquam diutius patiar errare. nam si quis iccirco aliquid de libertate mea diminutum putat, quod non ab omnibus eisdem, à quibus antea solitus sum dissentire, dissentiam: primum,



primum, si bene de me meritis gratum me præbeo, non desino incurrere in crimen hominis nimium memoris, nimiumq; grati: sin autem sine ullo reip. detrimento respicio etiam aliquando salutem tum meam, tum meorum, certe non modo non sum reprehendendus, sed etiam, si ruere uellem, boni uiri me, ut id ne facerem, rogarent: res uero ipsa publica si loqui posset, ageret mecum, ut, quoniam sibi seruissem semper, nunquam mihi, fructus autem ex sese non, ut oportuisset, latos, & uberes, sed magna acerbitate permixtos tulissem; ut iam mihi seruirem, consulere meis; se non modo satis habere à me, sed etiam uereri, ne parum mihi pro eo, quod tum à me haberet, reddidisset. quid, si horum ego nihil cogito, & idem sum in rep. qui fui semper: tamen ne tu libertatem requires meam? quam tu ponis in eo, si semper cum ijs, quibuscum aliquando contendimus, depugnemus. quod est longe secus: stare enim omnes debemus tanquam in orbe aliquo reip. qui quoniam uersetur, eam deligere partem debemus, ad quam nos illius utilitas, salusq; conuerterit. ego autem Cn. Pompeium, non dico auctorem, ducem, defensorem salutis meæ, (nam hæc priuatim fortasse officiorum memoriam, & gratiam quærent) sed dico hoc, quod ad salutem reip. pertinet: ego eum non tuear, quem omnes in rep. principem esse concedunt? ego C. Cæsaris laudibus desim, quas primum populi R. nunc etiam senatus, cui me semper addixi, plurimis atque amplissimis iudicijs uideam esse celebratas? tum hercule me confitear non iudicium aliquod habuisse de reip. utilitate, sed hominibus amicum aut inimicum fuisse. an cum

uideam nauem secundis uentis cursum tenentem suum, si non ea eum petat portum, quem ego aliquando probavi, sed alium non minus tutum atque tranquillum: cum tempestate pugnem periculose potius, quàm illi, salute præsertim proposita, obtemperem & paream? neque enim inconstantis puto, sententiam, tanquam aliud quod nauigium, atque cursum ex reip. tempestate moderari. ego uero hæc didici, hæc uidi, quæ scripta legi; hæc de sapientissimis & clarissimis uiris & in hac rep. & in alijs ciuitatibus monimenta nobis literæ prodiderunt; non semper easdem sententias ab iisdem, sed quas cunque reip. status, inclinatio temporum, ratio concordie postularet, esse defendendas. quod ego & facio Laterensis, & semper faciam, libertatemq; , quam in me requiris, quam ego neque dimisi unquam, neque dimittam, non in pertinacia, sed in quadam moderatione positam putabo. Nunc uenio ad illud extremum, quod dixisti, dum Plancij in me meritum uerbis extollerem, me arcem facere ex cloaca, lapidemq; è sepulcro uenerari pro deo: neque enim mihi insidiarum periculum ullum, neque mortis fuisse. cuius ego temporis rationem explicabo breui, neque inuitus: nihil enim ex meis est temporibus, quod minus peruagatum, quodq; minus aut mea commemoratione celebratum sit, aut hominibus auditum atque notum. ego enim, Laterensis, ex illo incendio legum, iuris, senatus, bonorum omnium cedens, cum mea domus ardore suo deflagrationem urbi, atque Italie toti minaretur, nisi quicuissem; Siciliam \* petiui animo, quæ & ipsa erat mihi, sicut domus una, coniuncta, & obtinebatur à C. Virgilio, quo cum me

uno uel maxime cum uetusta amicitia, tum mei fratris collegia, tum ressp. sociarat. uide nunc caliginem temporum illorum. cum ipsa pene insula mihi sese obuiam ferre uellet, prætor ille eiusdem tribuni pl. concionibus propter eandem reip. causam sæpe uexatus, nihil amplius dico, nisi, me in Siciliam uenire noluit. quid dicam? C. Virgilio, tali ciui & uiro, beneuolentiam in me, memoriam communium temporum, pietatem, humanitatem, fidem defuisse? nihil uidelicet est eorum: sed quam tempestatem nos uobiscum non tulissemus, metuit, ut eam ipse non posset opibus suis sustinere. tum consilio repente mutato, iter à Vibone Brundisium terra petere contendi: nam maritimos cursus præcludebat hiemis magnitudo. cum omnia illa municipia, quæ sunt à Vibone Brundisium, in fide mea iudices essent, iter mihi tutum multis minitantibus magno cum suo metu præstiterunt. Brundisium ueni, uel potius ad mœnia accessi: urbem unam mihi amicissimam declinaui: quæ se uel potius excindi, quàm è suo complexu ut eriperer, facile pateretur. in hortos me M. Lenij Flacci contuli: cui cum omnis metus, publicatio bonorum, exilium, mors proponeretur, hæc perpeti, si acciderent, maluit, quàm custodiam mei capitis dimittere. huius ego, & parentis eius prudentissimi atque optimi senis, & utriusque filiorum manibus in nauis tuta ac fidei collocatus, eorumq; preces & uota de meo reditu exaudiens, Dyrrhachium, quod erat in fide mea, petere contendi. quò cum uenissem, cognoui, id quod audieram, refertam esse Graciam sceleratissimorum hominum ac nefariorum, quorum impium ferrum, ignesq; pestife-

ros meus ille confutatus è manibus extorserat : qui an-  
 tequam de meo aduentu audire potuissent , cum tum  
 abessent , aliquorum dierum uiam in Macedoniam , ad  
 Planciumq; perrexi . hic uero simul atque me mare  
 transisse cognouit : audi atque attende Laterensis , ut  
 scias quid ego Plancio debeam , confiteareq; aliquando ,  
 quod faciam , me & grate , & pie facere , huic , quæ  
 pro salute mea fecerit , si minus profutura sint , obesse  
 certe non oportere : nam simul ac me Dyrrhachium at-  
 tigisse audiuit , statim ad me , liçtoribus dimissis , insi-  
 gnibus abiectis , ueste mutata profectus est . ò acerbam  
 mihi iudices memoriam temporis illius & loci , cum hic  
 in me incidit . complexus est , conspersitq; lacrymis , nec  
 loqui præ mœrore potuit . ò rem cum auditu crudelem ,  
 tum uisu nefariam : ò reliquas omnes dies noctesq; eas ,  
 quibus iste à me non recedens Thessalonicam me in quæ-  
 storiumq; perduxit . hic ego nunc de prætore Macedoniae  
 nihil dicam amplius , nisi eum & ciuem optimum sem-  
 per , & mihi amicum fuisse , sed eadem timuisse quæ cæ-  
 teros ; Cn. Plancium fuisse unum , non qui minus time-  
 ret , sed , si acciderent ea , quæ timerentur , mecum ea su-  
 bire , & perpeti uellet . quî , cum ad me L. Tubero , meus  
 necessarius , qui fratri meo legatus fuisset , decedens ex  
 Asia uenisset , easq; insidias , quas mihi paratas ab exu-  
 libus coniuratis audierat , animo amicissimo detulisset ;  
 in Asiam me ire propter eius prouinciæ metum , & cum  
 \* meo fratre necis insidias comparatas non est passus . ul-  
 me inquam Plancius & complexu suo retinuit , mul-  
 tosq; menses à capite meo non discessit , abiecta quæsto-  
 ria persona , comitisq; sumpta . ò excubias tuas Cn.



Planci miseras, ò flebiles uigilias, ò noctes acerbæ, ò custodiam etiam mei capitis infelicem, si quidem ego tibi uiuus non prosum, qui fortasse mortuus, profuissem. memini enim, memini, neque unquam obliuiscar notis illius, cum tibi uigilanti, assidenti, moerenti uana quædam miser, atque inania, falsa spe inductus, pollicebar; me, si essem in patriam restitutus, præsentem tibi gratiam relaturum; sin autem uitam mihi fors ademisset, aut uis aliqua maior reditum peremisset, hos, hos (quos enim ego tum alios animo intuebar?) omnia tibi illorum laborum præmia pro me persoluturos. quid me aspectas? quid mea promissa repetis? quid meam fidem imploras? nihil tibi ego tum de meis opibus pollicebar, sed horum erga me beneuolentiam promittebam: hos pro me lugere, hos gemere, hos decertare pro meo capite uel uitæ periculo uelle uidebam: de horum desiderio, luctu, querelis quotidie aliquid tecum simul audiebam: nunc timeo, ne nihil tibi præter lacrymas queam reddere, quas tu in meis acerbitatibus plurimas effudisti: quid enim possum aliud, nisi moerere? nisi flere? nisi te cum mea salute complecti? salutem tibi idem dare possunt, qui mihi reddiderunt. huc exurge tamen quæso: retinebo, & complectar, nec me solum deprecatorem fortunarum tuarum, sed comitem sociumque profitebor: atque, ut spero, nemo erit tam crudeli animo, tamque inhumano, nec tam immemor meorum, non dicam in bonos meritorum, sed bonorum in me, qui à me mei seruatorem capitis diuellat, ac distrahat. non ego meis ornatum beneficijs à uobis deprecor iudices, sed custodem salutis meæ: non opibus contendo, non auctoritatem

tate, non gratia, sed precibus, sed lacrymis, sed misericordia: mecumq; uos simul miserimus, & optimus obtestatur parens, & pro uno filio duo patres deprecamur. nolite iudices per uos, per fortunas uestras, per liberos, inimicis meis, ijs praesertim, quos ego pro uestra salute suscepi, dare letitiam, gloriantibus uos iam oblitos mei, salutisq; eius, à quo mea salus conseruata est, hostes extitisse: nolite animum meum debilitare tum metu, tum etiam metu commutatae uestrae uoluntatis erga me: sinite me, quod uobis fretus huic saepe promisi, id à uobis ei persolvere. teq; C. Flauio oro, & obtestor, qui meorum consiliorum in consulatu socius, periculorum particeps, rerum, quas gessi, adiutor fuisti, meq; non modo saluum semper, sed etiam ornatum, florentemq; esse uoluisti; ut mihi per hos conserues eum, per quem me tibi, & his conseruatum uides. plura ne dicam, tuae me etiam lacrymae impediunt, uestraeq; iudices, non solum meae: quibus ego magno in metu meo subito inducor in spem, uos eosdem in hoc conseruando futuros, qui fueritis in me; quoniam istis uestris lacrymis, de illis recordor, quas pro me saepe, & multum profudistis.

1 m  
 2 m  
 3 m  
 4 m  
 5 m  
 6 m  
 7 m  
 8 m  
 9 m  
 10 m  
 11 m  
 12 m  
 13 m  
 14 m  
 15 m  
 16 m  
 17 m  
 18 m  
 19 m  
 20 m  
 21 m  
 22 m  
 23 m  
 24 m  
 25 m  
 26 m  
 27 m  
 28 m  
 29 m  
 30 m  
 31 m  
 32 m  
 33 m  
 34 m  
 35 m  
 36 m  
 37 m  
 38 m  
 39 m  
 40 m  
 41 m  
 42 m  
 43 m  
 44 m  
 45 m  
 46 m  
 47 m  
 48 m  
 49 m  
 50 m  
 51 m  
 52 m  
 53 m  
 54 m  
 55 m  
 56 m  
 57 m  
 58 m  
 59 m  
 60 m  
 61 m  
 62 m  
 63 m  
 64 m  
 65 m  
 66 m  
 67 m  
 68 m  
 69 m  
 70 m  
 71 m  
 72 m  
 73 m  
 74 m  
 75 m  
 76 m  
 77 m  
 78 m  
 79 m  
 80 m  
 81 m  
 82 m  
 83 m  
 84 m  
 85 m  
 86 m  
 87 m  
 88 m  
 89 m  
 90 m  
 91 m  
 92 m  
 93 m  
 94 m  
 95 m  
 96 m  
 97 m  
 98 m  
 99 m  
 100 m







